

স্বদেশে বিদেশে চুরাশি বৎসর জীবন যাপন

ডঃ বিজয়রাজ চট্টোপাধ্যায়

প্রাপ্তিস্থান

অমর সাহিত্য প্রকাশন

৭ টেমার লেন; কলিকাতা ৯

প্রকাশক

পি. ব্যানার্জী

৯১টি অক্ষকিষণে দ্বীট

পো: উত্তরপাড়া, হুগলী

প্রথম প্রকাশ, আবার ১৩৬৫

মুদ্রাকর

পি. কে. পাল

ত্রীসারদা প্রেস

৬৫ কেশব চন্দ্র সেন দ্বীট

কলিকাতা ৯

উৎসর্গ

মা ও বাবাকে

যাদের অনেকদিন হারিয়েছি

কিন্তু যাদের আশীর্বাদ কখনও হারাইনি ।

দেখেছি, শুনেছি, বুঝেছি কি ?

সুদীর্ঘ (১৮৯১—১৯৭১) ঘরে-বাইরের জীবন ।

অনেক দেখেছি, অনেক শুনেছি, ৮০র কোটায় পা দিয়ে এখন এই লেখা আরম্ভ করেছি । যা ভাল তা অনেক দেখেছি, যা ভাল বলে মনে হয়নি তাও অনেক দেখেছি, অনেক শুনেছি, যা বোঝা শক্ত তা বুঝতে চেষ্টা তো করেছি । বুঝেছি কিনা জানি না ।

এখন জীবনের শেষ অধ্যায়ে অতীতের স্মৃতি-কথা আর একবার ঝালিয়ে নিলে, নিজের বোধহয় অনেকটাই ভাল লাগতে পারে, অত্মদের কেমন লাগবে জানি নে । তবে নেই কাজ তো খই ভাঙ্গ—এই প্রাচীন প্রবচনটি মেনে নিয়ে এই কাজে হাত দিলাম ।

রবি ঠাকুরের কবিতার এই লাইনগুলিও আমাকে এই সংকল্পে প্রেরণা দিয়েছে । কবিতার সেই অংশটি হল :—

বুঝেছি কি বুঝি নাই সে তর্কে কাজ নাই

ভাল মোর লেগেছে যে রইল সেই কথাই ।

আজ শ্রাবণ মাস (১৩৭৭ সাল) বর্ষার দিনে, জীবনের গোড়ার দিকে ফিরে যাচ্ছি । আমার জন্মও হয়েছিল শ্রাবণ মাসে ৮০ বছর আগে । খুব ছেলেবেলার কথা দু-একটির বেশী মনে পড়ে না । যখন আমার দু'বছর মাত্র বয়েস, তখন আমার বোনকে তার জন্মের পরের দিন দেখেছিলাম । আমার চার বছর বয়েসে আমার ভাই স্বজনের জন্মবার আগে অঝালা থেকে বহরমপুর (মুর্শিদাবাদ) ট্রেনযাত্রা খানিকটা মনে আছে । আর ওকে ওর জন্মদিনে যেমন দেখেছিলাম বেশ মনে আছে ।

অঝালায় বাবা ওকালতি করতেন । ওঁর অফিসে, যেখানে ওঁর মুন্সী কাগজ-পত্র নিয়ে থাকত (সেটা ছিল আমাদের বাড়ির সামনে, রাস্তার ওধারে), কয়েকটি ঘর ছিল । সেখানে প্রায়ই দেশ থেকে কোন না কোন অতিথি এসে থাকতেন । এর মধ্যে দুজনকে ভাল করে মনে আছে । একজন ছিলেন রামকৃষ্ণ মিশনের স্বামী নিরঞ্জনানন্দ, আর অত্রটি ছিলেন স্বামী সদানন্দ । সেই সময় স্বামী বিবেকানন্দের অঝালা আসবার কথা ছিল, তাই তাঁর আসবার কিছুদিন আগেই

এঁরা দুজন এখানে এসেছিলেন ও আমাদের বাড়িতেই উঠেছিলেন। সদানন্দ সত্যই সদানন্দ ছিলেন। আমাকে অনেক গল্প বলতেন—বিশেষতঃ হিমালয়ের কথা। বরফঢাকা পর্বতচূড়া দেখবার যে বৌক আজও আছে, বোধহয় সেই থেকেই তার স্মরণপাত। নিরঞ্জনানন্দ গম্ভীর প্রকৃতির মানুষ ছিলেন—তাঁর কাছে আমাদের (আমি ও আমার ভাইবোনের) তেমন জমত না।

স্বামী বিবেকানন্দ অস্থায়ী এসেছিলেন, ছাউনিতে (Amballa Cantonment) তাঁর জন্ত বাংলো নেওয়া হয়েছিল। আমাদের অতিথি দুজন স্বামীজীও সেখানে চলে গেলেন। বাবা রোজ সন্ধ্যাবেলা নিজের কাজকর্ম সেরে ছাউনিতে (শহর থেকে ৩৪ মাইল দূরে) যেতেন, আর রাত ৯।১০টা আন্ডাজ ওঁদের সঙ্গে দেখাশুনা করে বাড়ি ফিরতেন। আমাদের সেইজন্তে আর স্বামী বিবেকানন্দকে দেখা হয়নি।

মহাপুরুষের দর্শন তো হল না ; তবে অস্থায়ী থাকতেই হিমালয় দর্শন হয়ে গেল। বাবা অস্থায়ী শহরেই বাড়ি ভাড়া নিয়েছিলেন, তেতলা বাড়ি ; তার ছাত থেকে ভোরবেলা পূর্ব দিকে সাদা ঝকঝকে বরফঢাকা পাহাড় দেখা যেত। এ দেখিয়েছিলেন মা। বড়ই ভাল লাগত ছেলেবেলায় এই হিমালয় দর্শন। তারপর ৭৩।৭৪ বছর কেটে গেছে—এখনও বরফের পাহাড় দেখলে তো দূরের কথা তার কথা শুনলে প্রাণটা নেচে ওঠে।

অস্থায়ী ছাড়বার আগে বাংলা ও ইংরাজি পড়া খানিকদূর এগিয়েছিল। সন্ধ্যাবেলা মার কাছে প্রায়ই বাংলা কবিতার বই ও অল্প ছোটদের বই (রবীন্দ্র ঠাকুরের নদী, কুন্তিবাসী রামায়ণ, অবনীন্দ্র ঠাকুরের ক্ষীরের পুতুল, শকুন্তলা) পড়তাম, মা'ই পড়তেন, আমরা শুনতাম। ইংরাজি আমি ও মা একসঙ্গেই পড়তাম বাবার কাছে। অস্থায়ী থাকতেই Goldsmithএর Vicar of Wakefield আমরা দুজনে শেষ করেছিলাম। যতদূর মনে পড়ে Jane Austinsএর Pride & Prejudice এইখানেই আরম্ভ করা হয়েছিল। সবই কি বুঝতাম ? তবে ভাল লাগত।

আর এখানে আমাদের ছোট ঘোড়াটির (বোধহয় kulu pony) কথা ভুললে চলবে না। আকারে খুবই ছোট ছিল, সোনালী রঙ আর মোটাসোটা স্কন্দর দেখতে। সিঁড়ি দিয়ে দোতলায় নিয়ে আসা যেত। আবার তার গায়ে এত জোর ছিল যে আমাদের তিন ভাইবোনকে পিঠে নিয়ে খুব ছোটালুটি করত। ঐ ঘোড়ার পিঠে চড়ে কাছাকাছি গাঁয়ের অনেক ক্ষেত, সবুজ মাঠ ঘুরেছি। যেমন

দেখতে সুন্দর ছিল, দুটুও ছিল তেমনি। অস্থান ছাড়বার সময় ঘোড়াটিকেও ছাড়তে হল।

আমরা লাহোরে এলাম বোধ হচ্ছে ১৮৯৯ সালে। আনারকলিতে বাদশাহী আমলের মস্ত সরাসরের সামনে একটি তেতলা বাড়ি, দোতলায় ও তেতলায় আমরা উঠে এলাম। নীচের তলায় বড় বড় দোকান ছিল, আর সামনের বড় রাস্তায় রাত এগারোটা-বারোটা পর্যন্ত লোকজনের ভিড় চলত।

বাবা! লাহোর চীফ কোর্টএ (পরে ঐটি হাইকোর্ট হয়েছিল) ওকালতি করতেন। আমরা আগেকার মতন বাড়িতেই পড়তাম। এই সময় মার সঙ্গে Charles Dickens এর David Copperfield ভাল করে পড়ি। ও বইটির যে কোন জায়গা থেকে যে কোন লাইন কেউ শোনাতে আমি তার context ঠিক বলতে পারতাম। এই সময়েই হেমবাবুর (৬হেমচন্দ্র বন্দ্যোপাধ্যায়), নবীন সেনের ও মাইকেল মধুসূদনের অনেকগুলি কাব্য সবাই একত্রে পড়েছিলাম।

অস্থান ছাড়বার ও লাহোরে আসার সময় বাইরের জগতে বড় বড় ঘটনা ঘটেছিল। বাংলা খবরের কাগজ পড়তাম খুব মনোযোগ দিয়ে। দক্ষিণ আফ্রিকায় বুয়র যুদ্ধ আর চীনের মুষ্টিযোদ্ধা বিদ্রোহ (Boxer rising) বাংলা ‘বঙ্গবাসী’ সাপ্তাহিক পত্রে নিয়মিতভাবে পড়া চলত। পিকিংএ ইংরাজ দূতাবাস অবরোধ, জাপানী ও ইউরোপীয় সৈন্যদলের পিকিং আক্রমণ, পিকিং লুট, চীনের বুড়ী রাণীর রাজধানী থেকে পলায়ন এসব খবর শুনতে ও পড়তে কখনও কোন ক্লান্তি আসত না। সেই সময় থেকেই চীনের বিষয় যতদূর সম্ভব জানবার ইচ্ছা সেই ছেলেবেলা থেকেই এখন পর্যন্ত অটুট রয়েছে।

১৮৯৭ সালে অস্থানায় থাকতে রাণী ভিক্টোরিয়ার হীরক জুবিলি উৎসব দেখেছিলাম। লাহোরে আনারকলির বাড়ি থেকে তাঁর মৃত্যুর খবর পেয়ে অফিস-ফেরতা কেরানীবাবুদের কালো ব্যাজ পরে লাইনবন্দী হয়ে বাড়ি ফেরার দৃশ্যও দেখেছিলাম। ষাঁদের ব্যাজ জোটেনি তাঁরা বুদ্ধি করে কালো ছাতাটা খুলে গম্ভীরভাবে বেশ যাচ্ছিলেন অগ্রদের সঙ্গে।

১৯০৩ সালে এনট্রান্স পরীক্ষা পাস করি বারো বছর বয়েস পুরো হবার আগেই। সেই বছরই আমরা সবাই কলিকাতা যাই। আমার ঠাকুরদাদার খুব অসুখ করেছিল। চিকিৎসার জন্য তাঁকে বারাসত থেকে কলকাতায় নিয়ে আসা হয়েছিল, মাস দুয়েক পরে তিনি মারা গেলেন।

সিপাহী বিদ্রোহের সময় ঠাকুরদাদা (৬কৈলাসচন্দ্র চট্টোপাধ্যায়) কানপুর সরকারী হাসপাতালে অ্যাসিস্ট্যান্ট সার্জন ছিলেন। সিপাহীরা তাঁকে ধরে তাদের নিজেদের দলের যুদ্ধে আহতদের দেখাশুনা করবার জন্তে আটকে রাখে।

ঠাকুরদাদা এক দেওয়ার সাহায্যে কানপুর থেকে নৌকাযোগে বাংলাদেশে পালিয়ে আসেন। ঠাকুরদাদার নামে ওয়ারেন্ট বেরোয় 'To be hanged wherever found' (যেখানে ধরা পড়বেন সেইখানেই যেন ফাঁসী দেওয়া হবে)। দু-তিন বছর অজ্ঞাতবাসের পর অনেক কষ্টে ঐ হুকুম বদলাতে পারা গিয়েছিল। উনি ফিরে এসে বারাসতের হাসপাতালের অ্যাসিস্ট্যান্ট সার্জন হলেন, কিন্তু আর প্রমোশন হয়নি। উনি কলকাতা মেডিকেল কলেজের প্রথম কি দ্বিতীয় গুপের পাস-করা ছাত্র ছিলেন।

১২০৪ সালে রুশ-জাপান যুদ্ধ আরম্ভ হল। এই যুদ্ধের সময় দেশের ছেলে-বড়োর মধ্যে কি উত্তেজনা! জাপান, এশিয়ার ছোট একটি রাজ্য, রুশকে—ইউরোপের একটি বিশেষ শক্তিশালী সাম্রাজ্যকে বড় বড় যুদ্ধে জলেস্থলে হারিয়ে দিচ্ছে। এ তো এক অভাবনীয় ব্যাপার! বেশ মনে আছে এক-একটি যুদ্ধজয়ের খবরে আমরা কি রকম আনন্দ পেতাম। Admiral Togo-র Tsushima-র নৌযুদ্ধে Russian Baltic fleet ধ্বংস, Marshal Oyama-র Mukden-এর মহাযুদ্ধে (Napoleon-এর যুগের পরে তখন পর্যন্ত অত বড় যুদ্ধ হয়নি) Russian General Kuropatkin-কে পরাজিত করা, Nogir-দুর্ভেদ Port Arthur-দখল করা—এসব প্রাণমাতানো খবর চীন থেকে নিয়ে পারস্য দেশ পর্যন্ত সাড়া পড়ে গিয়েছিল। আমাদের দেশেও কিছুদিনের মধ্যেই বিপ্লববাদ শুরু হল।

১২০৫ সালে ফার্স্ট আর্টস (F. A. এখনকার Intermediate Examination) পাস করে গুরুজনদের আজ্ঞায় এক বছর ছুটি ভোগ করা গেল। এতদিন বাড়িতেই পড়েছি, সবায়ের মতে আরও এক বছর পরে কলেজে ভর্তি হলেই হবে। কোন তাড়াতাড়ি নেই। বাড়িতে বেশীর ভাগ বাবার কাছেই পড়েছি। তবে Intermediate (তখন F. A.) stages-এ অষ্টটি কাকাবাবু (৬অসিতচন্দ্র, তিনি ইঞ্জিনিয়ার ছিলেন) আরম্ভ করিয়ে দিয়েছিলেন। জ্যাঠামশায়ের (৬স্বরেশচন্দ্র, তিনি ডেপুটি ম্যাজিস্ট্রেট ছিলেন) তখন অস্থখ করেছিল—তঁার ইচ্ছা ছিল তঁার কাছে ভাল করে অঙ্ক শিখি। তিনি M. A. Mathematics-এ First class first ও gold medalist ছিলেন, State

Scholarship পেয়েছিলেন, তবে ঠাকুরমার আপত্তি থাকায় বিলেত বাননি।

এই এক বছর ছুটিতে নিজের পছন্দমত বই Scott, Dickens প্রভৃতির বই পড়ে ও লাহোরে খুব বেড়িয়ে কাটানো গেল। ১৯০৬ সালে III yearএ (B. A. Previous classএ) Forman Christian Collegeএ ভর্তি হলাম। ওটি ছিল লাহোরের খুব নামকরা কলেজ, আর আমাদের জানাশোনা স্বরেনবাবু (স্বরেন্দ্রনাথ দাশগুপ্ত) ওখানে অঙ্কের প্রফেসর ছিলেন। এই প্রথম বাড়ির বাইরে পড়াশোনা করা। স্কুলেও তো কখনও যাইনি। দিনকতক অস্বস্তি বোধ হয়েছিল। কিন্তু খুব শীঘ্রই সে ভাবটা কেটে গেল।

সেবার আমরা সবাই কসৌলি গিয়েছিলাম। এই প্রথম hill station দেখা। বড়ই ভাল লেগেছিল। ডালিয়া, জিরেনিয়ম প্রভৃতি ফুল এই প্রথম দেখলাম। কসৌলী থাকতেই শ্রীঅরবিন্দের ‘বন্দে মাতরম্’ সংবাদপত্র প্রথম পড়ি। দিনকতক পরেই তাঁর কারাবাসের খবর বেরুল—আর ‘বন্দে মাতরম্’এ প্রকাশিত হল রবি ঠাকুরের “অরবিন্দ, রবীন্দ্রের লহ নমস্কার” কবিতাটি। কবিতাটি লোকের মুখে মুখে আবৃত্তি হত।

আমাদের বাড়িতে অস্তুতঃ খানিকটা জাতীয়তাভাব ছিল। লাহোর কংগ্রেসের কয়েক মাস আগে আমাদের বাড়িতে শ্রীস্বরেন্দ্রনাথ বন্দ্যোপাধ্যায় (পরে Sir Surendra Nath Banerjee) দুদিন ছিলেন। সেই সময় তিনি Bradlaugh Hallএর ভিত্তিস্থাপন করেন। সেই বছরেই (১৯০৯এর ডিসেম্বর মাসে) লাহোরে নিখিল ভারতীয় কংগ্রেস অধিবেশন হল। তখন কংগ্রেস মধ্যপন্থী, বোম্বাই হাইকোর্টের বিচারপতি চন্দ্রবরকার সভাপতি হয়েছিলেন। স্বরেন বাঁড়ুঘ্য এসেছিলেন, তিলক এসেছিলেন, বোম্বাই করাচী থেকে পার্শী নেতারা এসেছিলেন। মাদ্রাজ, মালাবার থেকেও কপালে তিলক পরা, লম্বা চুলে ঝুঁটি বাঁধা অনেকে উপস্থিত ছিলেন। আমাকে বাবা Visitor’s ticketএ Bradlaugh Hallএ এই কংগ্রেসের অধিবেশনে নিয়ে গিয়েছিলেন। কিছুই বুঝিনি, কিন্তু দেশবিদেশের বিচিত্র পোশাক-পরিচ্ছদ, বিশেষতঃ নানা রকমের পাগড়ি, টুপি, ইত্যাদি খুবই ভাল লেগেছিল।

এখন আবার আমার কলেজের IVth yearএর (বি. এ. ফাইনাল) কথায় ফিরে যাওয়া যাক। আমাকে Double Course Mathematics (Pure & Applied) নিতে হয়েছিল। English অবশ্যই ছিল—অল্প দুটি বিষয়, ইংরাজি একটি। ইংরেজী সাহিত্য খুবই ভাল লাগত (Hale’s Longer

English Poems, Autocrat of the Breakfast Table, Essays of Addison and Steel etc. এখনও হুবিধে পেলেই পড়ি)। অঙ্ক মোটেই ভাল লাগত না, তবে বিলেতের পরীক্ষায় ঐ বিষয়েরই বেশী কদর—তাই আমাকে অঙ্ক নিতেই হয়েছিল। খুব খেটেখুটে অঙ্কতে ভাল নম্বরই পেয়েছিলাম আর বি. এ. পরীক্ষায় ফল মন্দও হয়নি। তবে মন ও শরীরের ওপর ধকল বেশীই হয়েছিল। আর বি. এ. পাস করবার সময় (১৯০৮ মে বা জুন) আমার বয়েস সতেরো বছর পুরো হয়নি। পরিশ্রম বেশী হওয়ায় অনিত্রায় ভুগলাম, আর যখন তার বাড়াবাড়ি হত জোরে জর আসত। শরীরটা ভেঙে পড়ল। এ সময়ে আবাব বাবার খুব অসুখ করল। দেশ থেকে বড়দাদা (পিসতুতো ভাই) ও ছোটমামা এসে আমাদের কলকাতায় নিয়ে গেলেন। হাওয়া বদলাতে আমাদের দুজনের শরীর বেশ তড়াতাড়ি সেরে গেল। কিছুদিনের মধ্যেই কলকাতা ছেড়ে আমরা গোরাবাজার (বহরমপুর) আমার মামারবাড়ি গেলাম।

আমার দাদামশাই (৩মহেন্দ্রনাথ মুখোপাধ্যায়) বহরমপুরের বড় উকিল ছিলেন—ওঁর মকেলদের মধ্যে ওখানকার রাজা, বড় বড় জমিদার প্রভৃতি অনেকে ছিলেন। খুব লম্বা, খুব ফর্সা একটি প্রতিভাশালী personality ছিলেন আমার মাতামহ। মুখে মুখে মুর্শিদাবাদের ইতিহাস এমন করে বলতেন যে ছেলেবেলা থেকেই সিরাজদ্দৌলা, মীরজাফর, ক্লাইভ, ওয়ারেন হেস্টিংসএর কাহিনী আমাদের খুব ভাল করে জানা হয়ে গিয়েছিল—অবশ্য non-official version, ইংরাজদের লেখা বিবরণটা নয়। ১৯২৪ সালে London School of Oriental Studiesএ আমার tutor Prof. Dodwellকে এই আমাদের নিজেদের দিকটা কিছু শুনিয়েছিলাম। তাঁর এসব কথা ভাল লাগেনি।

বহরমপুরে দাদামশায়ের সঙ্গে আমরা দুই ভাই খুব ঘুরেছিলাম। কাশিম-বাজার, নসীপুর, কুঞ্জঘাটা রাজবাড়িগুলি উনি আমাদের দেখিয়ে এনেছিলেন। এ তিন জায়গাই ওয়ারেন হেস্টিংসএর স্মৃতির সঙ্গে বিশেষরকম জড়িত। মহারাজ নন্দকুমারের কুঞ্জঘাটার অবস্থা বিশেষরূপে শোচনীয় দেখলাম। দাদামশায়ের খাতিরে আমাদের এইসব জায়গায় খুব ভাল অভ্যর্থনা হয়েছিল।

অসুখ সেরে গেছে তাই নিশ্চিন্ত হয়ে লাহোরে ফিরে এসে আবাব এম. এ. ক্লাসে ঢোকা গেল। এবার আর অঙ্ক নয়—ইংরাজ সাহিত্য। পাঠ্য-পুস্তকগুলি খুবই ভাল লাগত—বিশেষতঃ কবিতার বইগুলি—Ward's English Poets, etc.। আর অঙ্ক ছেড়ে হাঁপ ছেড়ে বাঁচলাম। তবে দুঃখের

বিষয় অধ্যাপক সুরেন্দ্রনাথ দাশগুপ্তের কাছে আর পড়া হল না। লাহোরে অনেক উচ্চপদস্থ বাঙালী ছিলেন—বড় বড় government Officials ইত্যাদি—কিন্তু সুরেনবাবুর মত লোকপ্রিয় কেউ হতে পারেননি।

আমার কিন্তু এম. এ. পড়া আবার বন্ধ হল। আবার সেই অনিদ্রা, আবার জ্বর, জ্বর deliriumএ দাঁড়াতে, মনে হত যেন visions দেখছি। আর সেই স্বপ্নে দেখা দৃশ্যগুলি একেবারে অজানা অচেনা। আমার তখনও অল্প বয়সে, শয্যাগত আছি, সেই সময়ে আমার ছোট বোন মায়ার বিয়ে হয়ে গেল একটি সম্ভ্রান্ত ডাক্তারী পাস-করা ছেলের সঙ্গে। ভগ্নীপতির নাম অনাদিনাথ মুখোপাধ্যায়। মায়ী শশুরবাড়ি চলে গেল, লাহোরে আমরা রয়ে গেলাম—মা, বাবা, আমি, ছোট ভাই সজ্জন ও মেজদাদা (ময়নথনাথ মুখোপাধ্যায়—আমার পিসতুতো ভাই)। মেজদা আমাদের সঙ্গেই মানুষ হয়েছিলেন—আমরা অনেকদিন ওঁকে নিজের ভাই বলেই জানতাম।

আন্তে আন্তে সেরে উঠলাম, কলেজে প্রায় তিন বছর গেলাম না—বাড়িতেই English literature (বিশেষতঃ Standard novels—Scott, Dickens, V, Hugo's Les Miserables প্রভৃতি (in English Translation)) পড়বার যথেষ্ট অবকাশ ছিল। আর সংস্কৃত ব্যাকরণ ও সাহিত্য এই সময়ে আরম্ভ করেছিলাম। Entrance (Matric) ও F. A. (Intermediate) দুই পরীক্ষাতেই Latin নিয়েছিলাম—বিলেতের পরীক্ষায় কাজে লাগবে বলে। তবে Latin পড়বার লোক পাওয়া গেল না (বাবার কাছেই যতদূর হল পড়া গিয়েছিল)—তাই আর এ বিষয়টা বেশীদূর এগুলো না। সংস্কৃত খুবই ভাল লেগেছিল। প্রথমে বাবার কাছে, তারপর ছোটকাকার (গোবিন্দবাবুর) কাছে খুব আগ্রহের সঙ্গে ও বেশ তাড়াতাড়ি রঘুবংশ, গীতা, রত্নাবলী ইত্যাদি পড়তে পেরেছিলাম। ১৯০৯ সালে বাবার Law Collegeএ ছুটির সময় (বাবা তখন Lahore Law Collegeএ অধ্যাপক হয়েছেন—Lahore Law Collegeটি পাঞ্জাব, Frontier (পেশাওয়ার) সমস্ত অঞ্চলটির একমাত্র Law College) আমরা সকলে কাঙ্গড়া Valleyর ধরমশালা গেলাম। এ জায়গার স্থানীয় নাম ভাগমু—পিছনেতে ধওলাধার (১৫০০০ ফুট গিরিশ্রেণী), সামনে সুল্লর কাঙ্গড়া উপত্যকা। উপত্যকার মধ্য দিয়ে বেয়াস—বিপাশা—অনেকগুলি শাখা-উপশাখা নিয়ে প্রবাহিত।

ম্যাকলিয়ডগঞ্জের (Upper ধরমশালা) খানিকটা নীচে বাসা

পেয়েছিলাম, তবে রোজই ওপরের দিকেই বেড়াতে যেতাম। ম্যাকলিও-গঞ্জে পার্শী শেঠের দোকানটি বড় সুন্দর ছিল আর সেখান থেকে ধওলাধারের রাস্তা আরও ওপরের দিকে গেছে। ঐ রাস্তায় দেবদারু (Himalayan Fir বা Cedar) জঙ্গলটি আমাদের খুব ভাল লাগত। তারই কাছে রাস্তার ধারেই একটি ভূমিকম্পে ভাঙা বাংলোর ধ্বংসাবশেষ দেখা যেত। ১৯০৫ সালের ভূমিকম্পে কালুড়া ধরমশালা প্রায় ধ্বংস হয়ে যায়। এই ভাঙা বাংলোটর কয়েক একর জমি ছিল। Oak, rhododendron, pine প্রভৃতি গাছ চারিদিকে ছিল। মায়ের জায়গাটি পছন্দ হল। পার্শী শেঠ নওরোজীর সাহায্যে বাবা কোনিয়ম (পুরানো বাংলোটর নাম) কিনে নিলেন। ৬০ বছর কোনিয়ম আমাদেরই ছিল। ১৯৭১ সালে দালাইলামার একটি সেক্রেটারী লামা-শিক্ষাকেন্দ্র স্থাপন করবার জন্য কোনিয়ম আমাদের কাছ থেকে কিনে নিলেন। আমাদের শেষ কোনিয়ম দেখা হয়েছিল ১৯৫৪ সালে। এখান থেকে নেবেই সেই বছরে চীনযাত্রার আয়োজন করি।

যাক, আবার ১৯১০ সালে ফিরে আসি। প্রথমে আউটহাউস তৈরী করে, তারপর “কোনিয়ম”এর main building তৈরী হল। এবার আর ভেতরকার দেওয়াল পাথর দিয়ে গাঁথা হল না। ভূমিকম্পের পর এখন এই অঞ্চলে ধজির দেওয়ালের প্রচলন হয়েছিল। ছোট ছোট কাঠের ফ্রেমের মধ্যে ছোট ছোট পাথর ঠুকে ঠুকে তারপর প্লাস্টার করে দেওয়াল তোলা—এই হল ধজি। আমাদেরই হাতার ওক (দিশী নাম বান) গাছের কাঠের ফ্রেমে পুরনো বাংলার পাথর ভেঙে হুড়ির মত করে ধজির কাজ বেশ ভাল করে হয়ে গেল।

প্রথম বছর বড়দিনের সময় বরফ পড়লে বাড়ির কাজ বন্ধ করে নীচে চলে যাই। তার পরের বছর মার্চ মাসে ফিরে এসে নভেম্বরের মধ্যেই কাজ শেষ করা হল। কোনিয়ম ঝকঝকে তকতকে নতুন বাড়ি হয়ে দাঁড়াল। বাবাকে Law College এর জন্তে, সুজনকে তার F. Sc. class এর জন্তে কয়েকমাসই লাহোরে থাকতে হত। আমি আর মা আমরা দুজনেই কোনিয়ামে বরাবরই থাকতাম, বাড়ি তৈরীর কাজ দেখতাম।

কোনিয়মের দুই বারান্দা থেকে ছ’রকমের দৃশ্য—সামনেটি থেকে ধওলা-ধারের একটি চূড়া, পেছনের বারান্দা থেকে কালুড়া উপত্যকার সুন্দর দৃশ্য। ১৯১১য় আমরা যখন লাহোর থেকে এসে নতুন বাড়িতে উঠলাম তখন গুচ্ছ গুচ্ছ লাল রঙোডেনড্রন ফুলে বাড়ির চারিদিক আলো করে রয়েছে।

ঋণাধার বরফঢাকা হয়ে নাম সার্থক করেছে। পাহাড়ের গায়ে জলী লতানে গোলাপ গোছা গোছা সাদা ফুলে এবড়োথেবড়ো পাথর ঢেকে রেখেছে। বাড়ি থেকে কয়েক গজ পথ বেরোলেই ত্রিযুগের গায়ে একটি বড় জলপ্রপাত কালিবনের গায়ে সাদা ধপধপে পৈতের মত দেখা যায় সম্বচ্ছরই। ঐ জলপ্রপাতের জলেই Upper Dharamsala-র সব পানীয় জল যোগানো হয়। বাড়ির নীচের রাস্তা দিয়ে খানিকটা গিয়েই প্রসিদ্ধ তীর্থস্থান ভাগহুনাথের মন্দির—দূর দূর থেকে যাত্রীরা আসে, মন্দিরের হৃদয় কুণ্ডে স্নান করে ভাগহুনাথের দর্শন ও পূজা করে।

সত্যই মনোরম স্থান। লামাদের হাতে কোনিয়ম দিয়ে দিতে সত্যিই মনে কষ্ট হয়েছিল—তবে ওদের হাত থেকে ওটিকে উদ্ধার করাও সম্ভব ছিল না। বয়স বেশী হওয়ার জন্য অত উঁচু জায়গায় যাওয়াও আমার বারণ ছিল—এই সব নানা কারণে কোনিয়ম হাতছাড়া হয়ে গেল।

মায়ের শরীর অনেকদিন থেকে ভাল যাচ্ছিল না। ১৯১১র মাঝামাঝি অপারেশন হল। Dharamsala Cantonment-এর মিলিটারী হাসপাতালের ইংরেজ ডাক্তার অপারেশন করলেন। অপারেশন করে এসে আমাকে যখন তিনি বললেন Cancer advanced stage এ পৌঁছেছে, শীঘ্রই সব শেষ হয়ে যাবে, তখন একটা যন্ত্রণা সমস্ত শরীরে অল্পভব করেছিলাম—মা মারা যাবার সময়েও গুরুমটা অল্পভব করিনি।

এর কিছুদিন পরেই তো লাহোরে নেমে আসতে হল। মায়ের তখন অস্থির-সার শরীর—তবে শেষ পর্যন্ত প্রফুল্ল থাকতে চেষ্টা করতেন। ছোট্ট খুকি এলা (মেজদার মেয়ে) গুঁর খুবই আদরের পাত্রী ছিল। শরীরের কষ্ট খুবই ছিল, সাধ্যমত কষ্টের ভাব প্রকাশ করতেন না। কোজাগর পূর্ণিমার রাত্রি, প্রায় ভোর হয়ে এসেছে, ১১ই নভেম্বর (১৯১১) মায়ের রোগভোগ শেষ হল। প্রায় শেষ মুহূর্তে বলেছিলেন তিনি—যেন আবার আমাদের সকলের কাছে ফিরে আসেন, আর পরজন্মে বাবার সঙ্গে তাঁর ছাড়াছাড়ি না হয়।

আমার জীবনের এক অধ্যায় এখানে শেষ হল। মার স্মৃতিজড়িত ছিল বলেই ধরমশালা ও কোনিয়মের কথা বিশেষরূপে বলেছি।

আবার পড়াশুনা আরম্ভ হল নতুন করে। বিষয়ও নতুন নিলাম—ইতিহাস, B. A.তে 'History' পড়িনি যদিও। গুরুজীব, শিবাজীর বিষয় সবিস্তারে পড়া (স্যার যত্ননাথের বই তখন নতুন বেরিয়েছে), Europe-এর

Renaissance Period (Cambridge Modern History Vol 1 বোধহয় তার বেশীদিন আগে প্রকাশিত নয়) এসব Standard Works পড়া খুবই ভাল লেগেছিল। জীবনে যেন একটা নতুন উৎসাহ, উত্তম এসেছিল। এক বছর পরেই পরীক্ষা দিলাম—পাসও করে গেলাম। আরও পড়বার আগ্রহ ছিল—এবার Economics নিলাম। কখনও Economics পড়িনি—প্রায় Economicsএর definition থেকে আরম্ভ করতে হল। Marshall (বড় ও ছোট) ও Taussigsএর রূপায় পাসও করলাম M. A. Economics। দু'বছরে দুটি আলাদা আলাদা বিষয়ে M. A. পরীক্ষা আমি আর একটি ছাত্র দিয়েছিলাম। এই দুজনেই পাস করেছি Punjab University থেকে। এখন তো কোন Universityই এক বছরে M. A. পরীক্ষা দিতে দেয় না।

তখন যেন নেশা জেগেছিল—আর একটি বিষয়, English নিয়ে তৃতীয়বার M. A. পাস করার ইচ্ছা খুবই ছিল। কিন্তু এবার অনেকে আপত্তি তুললেন। মনে আছে শ্রীমতী সরলা দেবী চৌধুরাণী (উনি মার বন্ধু ছিলেন) এ সময়ে মাঝাকে দেখতে আসতেন (মাঝার তখন অসুখ বেড়েছে)। আমাকে একদিন জিজ্ঞেস করলেন, বিজ্ঞান, এবার কি করবে? আমি যখন বললাম এবার ইংরাজিতে M. A. দেব—উত্তরটা তাঁর পছন্দ হয়নি।

সত্যি কথা—উচ্চশিক্ষা যদি ভাল করে করা যায়—ভাল ভাল Standard literature পড়ে (বিশেষতঃ সেই সময়ের সমসাময়িক লেখা পড়ে) তাহলে যথার্থ আনন্দ পাওয়া যায়। Cram books পড়া, কেবল পরীক্ষা পাস করবার জন্তে, লেখাপড়ায় ঘেন্না ধরিয়ে দেয়।

১৯১৩ সালের গোড়াতেই আমার বোন মায়া মারা গেল। বেচারী অনেকদিন থেকে ভুগছিল। মা মারা যাবার সময় ও লাহোরে ছিল না—খন্ডুরবাড়িতে ছিল। সে-রাত্রে স্বপ্নে সে দেখে যে একটি স্টেশনে মা রেলগাড়িতে বসে আছেন—ও তাঁকে দেখতে গেছে। যখন মায়া গুর সঙ্গে যেতে চাইল, গুর গাড়িতে উঠতে চাইল, মা বারণ করলেন, বললেন, এখন নয়, কিছুদিন পরে তুমিও আসবে।

আমাদের পাঁচজনের Home Circleএ এখন তিনজন রয়ে গেলাম—মেজদাকে নিয়ে চারজন। আমার ভাই স্বজন এর কয়েক মাস পরে বিলাত চলে গেল ডাক্তারী পড়তে। বাবার ইচ্ছা ছিল যে আমি আইন পড়ি, উকিল হই। গুর Law Collegeএর ছাত্রেরা পেশাওয়ার (Peshawar) থেকে দিল্লী পর্যন্ত

ওকালতি করছে—তাদের সাহায্যে আমি লাহোর হাইকোর্টে (এখন আর চীফ কোর্ট নেই) যদি প্র্যাকটিস করি নিশ্চয়ই পারব।

আমি উকিলও হলাম না, ট্রিপ্ল এম.-এও হলাম না। Government Collegeএর Professor Wathen (Economics পড়বার জন্তে আমি Govt. Collegeএ ভর্তি হয়েছিলাম) একটি employment bureau খুলেছিলেন। Wathenই আমাকে অমৃতসর খালসা কলেজে Economics-এর Lecturer করে পাঠালেন।

খালসা কলেজে যোগ দেবার আগেই (তখন গ্রীষ্মের ছুটি ছিল) আমাদের কাশ্মীর যাত্রার সুযোগ হল। লাহোরের প্রবীণ উকিল যোগেন্দ্রনাথ বসু মহাশয় কাশ্মীরের মহারাজার Legal Adviser ছিলেন। যোগেনবাবু অবসর নিয়ে তখন কলকাতায় নিজেদের বাড়িতে থাকতেন। মহারাজ যখন ডাকতেন তখন এদিকে আসতেন, দিনকতক আমাদের কাছে লাহোরে থেকে কাশ্মীর যেতেন। ১৯১৪ সালে বাবার গরমের ছুটির সময় উনি আবার কাশ্মীর যাবেন বলে লাহোরে আমাদের বাড়িতে এলেন। আমার তখন অমৃতসর কলেজের কাজের জন্তে ওখানকার Hony. Secretaryর সঙ্গে কথাবার্তা হয়ে গেছে—তবে appointment letter কলেজ কমিটির মিটিং হবার পর পাব এই স্থির হয়েছে। আর এই meeting গরমের ছুটির শেষে হবে জানানো হয়েছে।

সুতরাং আমরা সবাই (বাবা, আমি ও মেজদাদা—ওরও হাইকোর্টে ছুটি ছিল) free ছিলাম। ঠিক হল আমরা তিনজনে যোগেনবাবুর সঙ্গে কাশ্মীর যাব। চাকরকে সঙ্গে নিয়ে, বাড়ি বন্ধ করে, আমরা ট্রেনে রাওলপিণ্ডি পৌঁছুলাম। সেখান থেকে একটি ভিক্টোরিয়া ফিটনে মরি, কোহালা, বারমুলা হয়ে পাঁচদিনে আমরা শ্রীনগর পৌঁছুলাম।

শ্রীনগর খুব ভাল করেই দেখা হল। মহারাজার দরবারও দু-তিনদিন আমরা দেখে এলাম। পূজার দরবারে মহারাজ পূজায় বসতেন ঝুড়ি ঝুড়ি পদ্মফুল নিয়ে। মন্ত্রীমশাই পূজাঘরের চৌকাঠের কাছে বসতেন, আর মহারাজা এক-একটি ফুল কোষাতে ফেলছেন আর মন্ত্রীর সঙ্গে রাজ্যের কাজকর্ম বিষয়ে কথা কইছেন। পূজা শেষ হলে, বাইরের বড় হলঘরের সভা ভঙ্গ হত।

শ্রীনগরের কাছাকাছি ব্রহ্ম, শঙ্করাচার্য, ক্ষীরভবানী মন্দির প্রভৃতি দেখে আমরা অমরনাথ যাত্রীদলে যোগ দিলাম। ললিতাদিত্য মুক্তাপীড়ের প্রসিদ্ধ মার্তণ্ড মন্দির (Greek Styleএর বিরাট ব্যাপার) রাত্রে চাঁদের আলোয় দেখে

পহলগাম পৌছলাম। ভোরবেলা উঠে অমরনাথ যাত্রা শুরু হল। সামনে কোলাহাই তুষারশৃঙ্গ, পাশেই খরস্রোত পরিষ্কার নীল জলের প্রবাহ লিডার নদী। বড়ই মনের ফুর্তিতে চড়াই চড়তে লাগলাম। ‘চন্দনবাড়ি’ পৌঁছে দেখলাম যে অনেক যাত্রী লিডারে বাঁপিয়ে পড়ে নাইছে। অনেকটা চড়াই চড়ে এসেছি, গায়ে ঘাম ছিল, সে-সব ভুলে গিয়ে আমিও সেই পরিষ্কার নীল জলে বাঁপিয়ে পড়লাম। ঠিক একটু ওপরে নদী একটি প্রকাণ্ড বরফের স্তূপের মধ্যে দিয়ে হুড়ঙ্গ কেটে বেরিয়ে আসছে। জলে নামবার মিনিটখানেক পরেই আমাকে প্রায় অজ্ঞান অবস্থায় নদী থেকে তোলা হল। জোরে জর এল—আমাদের তিন-জনের আর অমরনাথ দর্শন হল না। কষ্টে-কষ্টে পহলগাম (তখন সামান্য একটি গ্রাম মাত্র) ফেরা গেল—আর সেখান থেকে আরও খানিকটা গিয়ে ঝিলামের তীরে একটি নৌকা পাওয়া গেল—তারপর দক্ষিণবাহিনী নদী খুব শীঘ্রই শ্রীনগরে পৌঁছে দিল।

পৌঁছেই খবরের কাগজে দেখা গেল First World War আরম্ভ হয়ে গেছে। ঐ কাগজেরই আর এক পাতায় এক কোণে দেখলাম যে অমৃতসরে খালসা কলেজে একজন Double M. A. Economics Deptt-এ নিযুক্ত হয়েছেন। লাহোরে ফিরে গিয়ে যখন বাড়ি খোলা হল তখন আমার appointment letter পাওয়া গেল—দরজার ফাঁক দিয়ে পিওন গলিয়ে দিয়ে গেছে।

কাশ্মীর থেকে ফেরা হল Fruit Season প্রায় শেষ করেই—mid September-এ। ফল খুব খেয়েছি সবাই—French Pear (অত ভাল এর পরে France-এও পাইনি), ববুগোশা (খুব ছোট, খুব নরম, খুব মিষ্টি ফল, ২১০ দিনের মধ্যেই খারাপ হয়ে যায়), নানা রকমের apple (অম্লি প্রভৃতি), plum, cherry, apricot, কাঁচা আখরোট—এ সব পেট ভরে সকলে খেয়েছি। কাশ্মীর দেশ-বিদেশের ধনী বিলাসীদের টেনে আনে—কিন্তু ওদেশের লোক (শতকরা নব্বইজন মুসলমান) বড় গরীব। সে-সময়ে (১৯১৪ সালে) ভোগ্‌রা রাজপুত্রা ওখানে রাজত্ব করত—কাশ্মিরী বামুনরা ভাল ভাল কাজে বহাল ছিল—মুসলমানদের অবস্থা ভাল ছিল না। করণসিংজীর ঠাকুরদাদার দাশ তখন ওখানকার মহারাজ ছিলেন।

এবার অমৃতসর খালসা কলেজে শিক্ষকজীবন আরম্ভ। Economics class III year-এ (তখন Inter Stage-এ Economics ছিল না) প্রথম খুললাম।

আর কিছুদিন পরেই Ancient History of India পড়াতে লাগলাম। কারণ History Professor ছিলেন ইংরাজ, প্রাচীন ভারতের ঐতিহাসিক ব্যক্তিদের ও জায়গাগুলির নাম উচ্চারণও তিনি করতে পারতেন না। পরের বছরই আমার Economics Class তিনগুণ বেড়ে উঠল। শেষের দিকে কলেজে M. A. Economics Classও খোলা হয়েছিল।

Finance Deptt-এর All India Competition পরীক্ষায় কিন্তু আমি Economics Paper-এ যে নম্বর পেয়েছিলাম তার চেয়ে History Paper-এ অনেক বেশী পেয়েছিলাম। Economics-এ সেরকম নম্বর পেলে তো Finance Deptt-এ ঢুকতাম। এখন মনে হয় আমার শিক্ষকের জীবন সব দিক দিয়েই ভাল হয়েছে—অফিসে কাজ করা পোষাত না। তবে এটা ঠিক যে All India Competition-এ বেশ উচ্চস্থান (তখন দুটি Candidate প্রথম ও দ্বিতীয়টিকেই কেবল নেওয়া হত) পেয়ে একটা Self-Confidence হয়েছিল—তার নিশ্চয়ই একটা মূল্য আছে।

খালসা কলেজের দুটি সহকর্মী ও বন্ধুর নাম এখানে করে রাখি—গুরুকম দুটি বন্ধু বোধহয় আর পাইনি। একটি হলেন কাশ্মীরী সিং (ওঁর মেজ ছেলে এখন লেফটেন্যান্ট জেনারেল হয়ে অবসর নিয়েছেন), আর একটি ছিলেন বাবা হরকিষণ সিং (পরে উনি গুজরানওয়ালা গুরু নানক কলেজে অনেকদিন প্রিন্সিপাল ছিলেন)। এ দুজনের মতন উন্নতচরিত্র লোক আমি কমই দেখেছি। অনেক দোষ থাকা সত্ত্বেও আমার একটি গুণ আছে—সব জায়গায় সব রকম লোকের সঙ্গে খুব ভাব করে নিতে পারি। এর একটি উদাহরণ আমাদের খালসা কলেজের ‘Sages of the Bamboo Grove’—প্রাচীন চীনের একটি কবিগোষ্ঠীর নামানুসারে আমাদের একটি কাব্য, ধর্ম প্রভৃতি চর্চার জন্য চারটি ‘জ্ঞানী’র একটি বিশেষ অন্তরঙ্গ গোষ্ঠী। এই ‘জ্ঞানী’রা হলেন Hervey সাহেব (নবাগত ইংরাজ প্রফেসর), আমার দুই পূর্বোল্লিখিত শিখ বন্ধু এবং আমি নিজে। অনেক দিন আমাদের এই “বংশবাগানের জ্ঞানী গোষ্ঠী” বেশ ভাল ভাবেই কাজ চালিয়েছিল।

এবার আমার বিবাহের কথা একটু বুঝিয়ে বলতে হবে। বুঝিয়ে বলা দরকার কারণ এ বিষয়টি অনেকের মতে একটু যেন mysterious।

আগেই বলেছি যে B. A. পরীক্ষার সময় আমার শরীর বড় খারাপ হয়েছিল—অনিত্রা জ্বর প্রায়ই হচ্ছিল। দু-তিন রাত না ঘুমিয়ে জোরে জ্বর আসত,

deliriumএ দাঁড়াত। মনে হত যে ঘরের দেওয়ালে চলচ্চিত্রের মতন কিছু দেখছি। অনেক সময় মনে হত ঐ দৃশ্যগুলি চীন দেশের। পরে De Quinceyর Visions of an Opium Eaterএ পড়েছি যে ঐ আফিং-সেবীটিও ঐরকম চীনের দৃশ্য দেখতেন আর তাঁর ওসব দেখে মনে বড় অস্বস্তি হত। আমার কিন্তু ঐ চীনের ছবি বেশ ভাল লাগত। ১৯০৮ সালের এক শীতের রাতে ঐরকম আধো-জাগা আধো-ঘুমানো অবস্থায় আমি টেচিয়ে বলেছিলাম : ‘যাঃ, চীনের রাণী তো মরে গেল।’ পরে বাবার কাছে শুনেছিলাম যে তার দু-একদিনের মধ্যে খবরের কাগজে বেরিয়েছিল যে বৃদ্ধা Dowager Empress of China Tzu Hsi মারা গেছেন আর তাঁর বোনপো সম্রাট Kuang Hsi আত্মহত্যা করেছেন (সম্ভবতঃ বাধ্য হয়ে)।

এরপরও কিছুদিন খুব ভুগেছিলাম। আস্তে আস্তে সেরে তো গেলুম, কিন্তু একটা ভয় রয়ে গেল। আবার যদি ওরকম অস্বস্তি করে, তাহলে শরীর ও মনের কি অবস্থা হবে? আবার আর একরকম মনোভাবও দেখা দিল। Visions যা দেখেছি—ওগুলি কি পূর্বজন্মের স্মৃতি? আবার কি ওসব দেখা যাবে? আর ওই সব জায়গায় যাবার ইচ্ছাও খুব ছিল। রবি ঠাকুরের ‘মানস ভ্রমণে’ আছে : “ইচ্ছা করে...থাকি সর্ব লোকসনে দেশদেশান্তরে...তিব্বতের গিরিতটে বৌদ্ধমঠে...যেথা প্রাচীন চীন নিশিদিন কর্মাহুরত।” আমার এ কবিতাটি বড়ই প্রিয় ছিল। একটা আকাজক্ষাও এই ধরনের মনে জেগে উঠছিল।

সুতরাং একদিকে ছিল ভয়—অস্বস্তি শরীর ও মন ভেঙে যাবার। আর একদিকে এই আশা-আকাজক্ষা—দেশবিদেশ পর্যটন আর অনুরূপ জীবনযাপন। এ দু’রকম জীবনে বিয়ে করলে কেবল নিজেকে নয় আরেকজনকেও বিপদে ফেলা। সুতরাং আমার বিয়ে করা উচিত হবে না—সমস্তার এই হল সমাধান। এই ভীষ্মের প্রতিজ্ঞা কিন্তু টিকল না। দাদামশাই দিদিমার অহুরোধ, নিজেরই মনে দ্বিধা এই পণ রাখতে পারব কিনা, আরেকটা সংশয়ের মত মনোভাব অতবেশী উচ্চাশা রাখা সম্বন্ধে—এই রকম নানা চিন্তা ভিড় করে মনে এসে মতটা বদলে দিল। আজ পঞ্চান্ন-ছাপান্ন বছর পরে (১৯১৬ সালে আমাদের বিয়ে হয়েছিল) বুঝেছি সব দিক দিয়ে মত বদলানোটা ভাল হয়েছিল। আর এখনও ওর consequences ভালই হচ্ছে।

আমার কলেজের জীবনে ফিরে যাওয়া যাক। অমৃতসরে আমি বেশীর ভাগ একাই থাকতুম—কারণ ওখানে প্রতিবেশীরা সবাই শিখ পরিবার, আমার স্ত্রী

ওদিককার ভাষা একেবারেই জানতেন না, আর নেহাৎ ছেলেমানুষও ছিলেন। তাই বাবা ওঁকে লাহোরে মেজদার স্ত্রী পুত্র কন্যার সঙ্গেই রেখেছিলেন। আমি প্রতি রবিবারে ও অল্প ছুটির দিন লাহোরে যেতাম। এই লাহোর অমৃতসর জীবনযাপন A Tale of Two Cities হয়েছিল—পরে আরও কয়েকবার এইরকম tale of two cities হয়েছে (London-Paris, মীরট-দিল্লী, মীরট-কলকাতা)।

এই সময় একটি Punjab University tripএ আমরা খাইবার (Khyber Pass), পেশাওয়ার (Peshawar) প্রভৃতি পশ্চিম সীমান্তের কয়েকটি জায়গা বেড়িয়ে আসবার সুযোগ পেয়েছিলাম। যখন আমাদের ট্রেন সিন্ধুতীরে “আটক” পৌঁছল তখন লাহোরের পাঠান ছাত্ররা আমাদের খুব ঠাট্টা করতে লাগল। প্ল্যাটফর্মে আমাদের নামতে বারণ করে চোঁচাতে লাগল। “গাড়িতে জানলা দরজা বন্ধ করে বসে থাক—পাঠানরা চারিদিক থেকে গুলি ছুঁড়বে, তোমাদের ছাড়বে না।” আমরা তো নির্বিশ্বে “আটক” পার হলাম—এখানে সিন্ধু ও কাবুল নদের সঙ্গমে প্রাচীন “আটক” দুর্গ এখনও সীমান্ত রক্ষা করছে। মহারাজা মানসিং আটক পার হতে চাননি আজ থেকে ৪০০ বছর আগে—তখন আকবর তাঁর কাছে বলে পাঠিয়েছিলেন জগদীশ্বরের এই পৃথিবীতে তাঁর সৃষ্ট এক জায়গা থেকে আরেক জায়গায় যেতে কিসের “আটক” ?

পেশাওরে শাহী সরায় (কাবুলের আমীরের—তখনও কাবুল নৃপতি আমীরই ছিলেন—অনুচরেরা পেশাওরে এসে এই সরায় উঠতেন) আমরা ছুদিন বইলাম। এখান থেকে দূরে কাবুল শহরের ওপর বরফঢাকা পাহাড়টি বড় স্নন্দর দেখিয়েছিল। সরাই থেকে বেরিয়েই ‘কিস্‌সাখানি বাজার’। লম্বা দাড়িওয়ালা উট বোখারা সমরকন্দ থেকে কার্পেট আলুবোখারা বাদাম ইত্যাদি নিয়ে আসছে, ক্যারাবানগুলি বাজারের সরায় ঢুকছে, উট-চালকদের চেহারা অদ্ভুত (তাতার জাতীয়), তাদের পোশাকও বিচিত্র। এই বাজারে ঢুকলে মনে হয় যে মধ্য এশিয়ার কোন শহরে হঠাৎ এসে পড়েছি।

তার পরের দিন বাসে করে খাইবার পাস্‌এ ঢোকা গেল। বড়ই রুক্ষ পরিবেশ, সরু গিরিপথ দিয়ে দাড়িওয়ালা উটের সারি যাচ্ছে আসছে, রাস্তায় যারা কুলিমজুরের কাজ করছে তাদেরও পিঠে বন্দুক, কোমরে পিস্তল। আমাদের বাস পাহাড়ে চড়তে চড়তে লাগি কোটাল দুর্গে গিয়ে থামল। বড় কেলা, সামনে হাইল্যাণ্ডার গ্রহরী। আমরা এইখান থেকেই ফিরলাম, পরের

বাসটি (ওতে Punjab Universityর Vice-Chancellor Sir John Meynard ছিলেন) আরও ওপরে গিয়ে Landi Khana Fortএ পৌঁছেছিল। এখানে পাসএর রাস্তায় একটা সাদা লাইন টানা আছে আর লেখা আছে “It is absolutely forbidden to cross this line” (এ লাইনের ওদিকে যাওয়া একেবারে বারণ)। এ লাইনের ওদিক থেকে কাবুল রাজ্য আরম্ভ।

ফেব্রুয়ার পথে আলি মসজিদে পেশাওয়ার কলেজে চা খাওয়া গেল। এই জায়গায় শিখ-পাঠানে অনেক যুদ্ধ হয়েছিল। একবার সমস্ত দিন যুদ্ধের পর শিখেরাই জেতে। পাঠানদের যুদ্ধক্ষেত্র ছেড়ে পালাতে হয়। সেদিন তাদের বোধহয় জয়লাভের বেশ আশা ছিল—বড় বড় ডেগে প্রচুর পরিমাণে পোলাও রান্না হয়েছিল। শিখ সৈন্যদের সেদিন আহার জোটেনি—আর এদিকে পাঠানদের রান্না পোলাও প্রস্তুত। মহারাজ রণজিৎ সিং বুদ্ধিমান লোক—চট করে সমস্তাঃ সমাধান করলেন : “প্রত্যেক ডেগে দশ ঘা জুতো লাগাও—মুসলমানী বেরিয়ে যাবে—তারপর নির্ভয়ে খেতে শুরু কর।”

এর পরের বছর University trip তক্ষশীলা গিয়েছিল। মহাভারতের তক্ষশীলার তখনও খোদাই কাজ আরম্ভ হয়নি। কতকগুলি ছাত্রাবাসের ভিত্তি আমরা দেখেছিলাম, তবে তা বোধহয় বৌদ্ধযুগের। Greek period-এর অনেক ধ্বংসাবশেষ দেখা গেল—সুন্দর সুন্দর অনেক গান্ধার স্টাইলের মূর্তি তক্ষশীলার মিউজিয়ামে জড় করা হয়েছে। Apollo ও বুদ্ধ প্রায় এক হয়ে গেছেন এই গান্ধার শিল্পে। পেশাওয়ার মিউজিয়ামেও খুব ভাল গান্ধার ভাস্কর্যের নমুনা আছে। আর পেশাওয়ারের পাশেই একটি গভীর গর্ত দেখা যায়। এখান থেকে অনেক খুঁড়ে সম্রাট কণিকের seal দেওয়া একটি ছোট সোনার কোঁটায় বুদ্ধের চিত্রাভাস Archaeological Deptt কিছুদিন আগে পেয়েছিলেন। এখানেই কণিকের বিখ্যাত স্তম্ভ ছিল, চীনা পরিব্রাজকেরা যার উচ্চ প্রশংসা করেছেন।

পেশাওয়ার হল প্রাচীন পুরুষপুর—এর কাছে আরেকটি প্রাচীন নগর ছিল—পুঞ্চলাবতী। এটি ছিল Parthian সম্রাট, নৃপতিরা Gondopharesএর রাজধানী। Prof. Sylvain Livier মতে যে সব Magi নৃপতিরা শিশু বীণকে দর্শন করতে যান Gondophares তাঁদেরই মধ্যে একজন।

আরও শোনা যায় যে এঁরই রাজ্যে বীণুর নিজের দীক্ষিত শিষ্য St. Thomas ভারতে এসেছিলেন। St. Thomas এদেশে Syrian Christian

সম্প্রদায় প্রবর্তন করেন। আর এই রাজ্যেই টিলাল বাবার পথে চারসফার কাছে একটি টিলাল ওপর বিরাট বুদ্ধমূর্তির ক্ষণাবশেষ দেখা গেল, কেবল পা ছুটি আছে (ছুট চারেক লম্বা) আর টিলাল নীচে একটি বৌদ্ধমঠের কয়েকটি ভাঙা দেওয়াল। চীনা পর্যটকেরা এই ভীর্ণের বর্ণনা করেছেন। এখন এ আয়গাটির নাম তখ্-ত-এ-বাহি।

ভকশীলায় আমাদের মাধোশ্বরূপ বৎসের সঙ্গে প্রথম দেখা হয়। পরে ইনি Director General of Archaeology হয়েছিলেন আর হরাপ্পার বিষয়ে তাঁর বিখ্যাত বই লেখেন।

আবার খালসা কলেজে ফেরা বাক। এই সময়েই বিশেষতঃ অমৃতসরে আর আমাদের খালসা কলেজে ‘আকালি’ আন্দোলনের ঢেউ উঠল। এই বিক্ষোভে পঞ্জাবের দৈনন্দিন জীবনটাই যেন বদলে গেল—আর আমাদের খালসা কলেজে তো রীতিমত বিপ্লব ঘটল। এতে আমার জীবনেও একটা বিশেষ পরিবর্তন হয়ে গেল।

এও একটি নতুন অধ্যায় আরম্ভ করবার মতই ব্যাপারে দাঁড়াল। এখানে বলে রাখি যে এই কাহিনীতে এখন থেকে আমার নিজের বা নিজেদের লোকের কথা যথাসম্ভব কম করেই বলব—নিজেদের কথা কেবল যোগসূত্রের মত ব্যবহার করব।

আকালি বিক্ষোভ শিখসমাজে বিশেষভাবে তোলপাড় এনেছিল। এর একটু আগেকার কথা বলা দরকার। মহারাজ রণজিৎ সিং তো শেবাশেখি প্রায় গোঁড়া হিন্দু হয়ে দাঁড়িয়েছিলেন। বড় বড় হিন্দু মন্দিরগুলিতে (জালামুখী, পুরীর জগন্নাথ মন্দির প্রভৃতিতে) হীরে, সোনা মুক্তহস্তে দান করেছিলেন। তাঁর মন্ত্রী, সেনাপতি অনেকে হিন্দু ছিলেন। তারপর অনেক পাঞ্জাবী গৃহস্থস্বরে কেউ শিখ কেউ হিন্দু প্রায়ই দেখা যেত। গোঁড়া শিখেরা ভয় পেল যে শিখদের আলাদা অস্তিত্ব থাকবে না—বৌদ্ধদের মত হিন্দুসমাজে বিলীন হয়ে যাবে। হয়তো এতে ব্রিটিশ গভর্নমেন্টেরও কিছু হাত ছিল। তাঁদের রাজনীতির মূলমন্ত্র হল Divide and Rule—শিখদের (বিশেষতঃ শিখ সৈন্যদলকে) হিন্দুদের থেকে আলাদা করে রাজভক্ত হয়ে যাতে থাকে তার জন্য বিশেষ চেষ্টা নিশ্চয়ই হয়েছিল। সেই মামুলি কাহিনী এখানেও শোনা গেল। সরকারী চাকরি, ভোটের (Votes for Councils, Assemblies etc.) সংখ্যা নির্ধারণ, স্কুল কলেজ প্রভৃতিতে সরকারী সাহায্য এসব নিয়ে তো হিন্দু-

মুসলমানে বিবাদ লেগেই ছিল—এখন শিখ হিন্দুতেও লেগে গেল।

তারপর আর একটি গুরুতর ব্যাপার হল—গুরুদোয়ারা (শিখরক্ষিত) নিয়ে। বড় বড় গুরুদোয়ারাগুলিতে, যেমন নানকানা সাহেব (গুরুনানকের জন্মস্থানের বড় মন্দিরে) মহাস্ত্রা প্রায়ই খাঁটি হিন্দু হয়ে পড়েছিলেন আর অনেক জায়গায় (এমন কি অমৃতসরের বিখ্যাত স্বর্ণমন্দিরে) হিন্দু দেবদেবীর মূর্তিও রাখা হয়েছিল। গৌড়া শিখদের পক্ষে তো এসব ব্যাপার অসহ্য বোধ হল। এব বিরুদ্ধে তাঁদের চ্যালেঞ্জ হল আকালি আন্দোলন।

খালসা কলেজেও এই বিকোভের প্রভাব এড়াতে পারিনি। আমাকেই কলেজের অর্ধবৃত্তিক সেক্রেটারী (এক সম্ভ্রান্ত শিখ সর্দার) জিজ্ঞেস করেছিলেন আমি আর্থসমাজী কিনা। আর্থসমাজীদের বরাবরই একটু militant mood ছিল (আগে ছিল মুসলমানদের বিরুদ্ধে, এ সময় শিখদের প্রতিও বিদ্বেষ ভাব দেখা দিয়েছিল)। আর একটি বিশেষ লক্ষণীয় মনোভাব ক্রমশঃ স্পষ্ট হল—শিখদের মধ্যে আবার নতুন করে শিখ ইতিহাসের গৌরবের দিন-গুলির উপর একটি গভীর টান। ইংরেজরা যে কতকগুলো ছরাচার মন্ত্রী ও সেনাপতির বিশ্বাসঘাতকতার স্বযোগ পেয়ে লাহোরের শিখরাজ্য আত্মসাৎ করতে পেরেছিল, সেইসব স্মৃতি এখন তরুণ শিখদের মধ্যে ভালভাবেই জেগে উঠল।

১৯১৪ সালে যখন আমি খালসা কলেজে ঢুকেছিলাম তখন এক ইংরেজ প্রিন্সিপাল ছিলেন একটু কট প্রকৃতির। এক রাত্রে মিঃ রাইটকে খুন করতে এসে এক শিখ যুবক ভুল করে কেমিস্ট্রীর প্রফেসর Mr. Dunicliffeকেই ছোঁয়ার আঘাত করলে। তার কিছুদিন পরেই রাইট সাহেব এ কলেজ থেকে স্বানান্তরিত হলেন—নতুন প্রিন্সিপাল হয়ে এলেন আমাদের Govt. college-এর History, Politics-এর Professor G. A. Wathen I. E. S.। আমরা দু-তিনজন তো তাঁরই ছাত্র ছিলাম—বলতে গেলে Wathen সাহেবই আমাকে খালসা কলেজে পাঠিয়েছিলেন। আর উনিও ছিলেন চতুর ও মিত্তক লোক, দিনকতকের মধ্যেই সকলের প্রিয়পাত্র হয়ে উঠলেন—আমরাও হাঁক ছেড়ে বাঁচলাম। সত্যি, তিন-চার বছর আনন্দেই কেটেছিল Wathen সাহেবের সময় আর কান্মীরা সিং, বাগ্গা হরকিষণ সিং, Hervey সাহেবের মত বন্ধুদের সঙ্গে থেকে। শনিবারের সন্ধ্যায় লাহোর বাগ্গা আর সোমবার সকালে অমৃতসর স্কিরে আসা, weekdayগুলি ছাত্রদের সঙ্গে পড়াশুনা ও বাঁশবাগানের জানীদের (Sages of the Bamboo Grove) ছোট

সমিতিটিতে যোগদান করা—এইসব নিয়ে দিনগুলি বেশ ভালভাবেই কাটত ।

স্বস্তির হাঁপ ছেড়ে এ পৃথিবীতে কি বেলীদিন থাকা যায়! প্রথম বিশ্বযুদ্ধ শেষ হবার পর থেকেই চারিদিকে গোলযোগ শুরু হল। কানাডা-ফ্রান্সে শিখদের মধ্যে “গদর” বিকোভ, গান্ধীজির অহিংসা অসহযোগের জন্য দেশব্যাপী আহ্বান, আর এসবের উত্তরস্বরূপ সরকার তরফের রাওলাট অ্যাক্ট। এবার অমৃতসরেই আগুন জ্বলে উঠল। কিচলু (কান্দীরি মুসলমান ও অমৃতসরের একজন হিন্দু ডাক্তার, নামটি এখন মনে পড়ছে না—সম্ভবতঃ সত্যপাল) রাওলাট অ্যাক্ট-এর ধারা অনুসারে কোন সূদ্র অনির্দিষ্ট কারাগারে বন্দী হলেন। শহরে ভীষণ উত্তেজনার সৃষ্টি হল। একটি ইংরেজদের ব্যাঙ্ক খুঁড়ে গেল, দু-একজন ইংরেজকে ক্রোধোন্মত্ত জনতা আক্রমণ করল।

তিনদিন অমৃতসর ‘আজাদী’ অর্জন করেছিল। ব্রিটিশ পুলিশ বা গোরা লৈলু শহরে ঢুকতে পায়নি। আমরা তিন-চারজন সে সময় শহরে ঢুকেছিলাম (কলেজ থেকে শহর আড়াই মাইল দূর)। তখন সত্যি সত্যি হিন্দু-মুসলমানে কি অভূত সম্ভাব—আমাদের সেদিন কত লোকের সঙ্গে (হিন্দু, শিখ, মুসলমান) কোলাকুলি করতে হয়েছিল—দু-তিন জায়গায় রাস্তায় চলতে চলতে সববৎ খেতে হল। সুবর্ণমন্দিরের কাছে যখন পৌঁছুলাম তখন শোনা গেল কাছেই জালিয়া-ওয়ালা বাগে (তখন বাগ বা বাগানের চিহ্নমাত্র ছিল না—চারিদিকে দোতলা-তেতলা বাড়ির মধ্যে খানিকটা পোডো জায়গামাত্র ছিল) একটা মেলা বসেছে। আমরা মেলা দেখবার জন্য ওদিকে এগুলাম—কিন্তু চার-পাঁচজন আমাদের বিশেষ করে বারণ করলে যে ওখানে যেও না, একেবারেই ঢোকবার জায়গা নেই। আমাদের আর জালিয়াওয়ালা বাগে সেদিন যাওয়া হল না, ঘণ্টাখানেকের মধ্যেই জানতে পারা গেল যে সেখানে ঢুকলে আর জ্যান্ত ফিরতে হত না। আমরা যখন শহর থেকে বেরিয়ে স্টেশনেব কাছে রেলওয়ে ব্রিজের ধারে এসে পড়েছি তখন গোরা পাহারা পুলটা ঘিরে ফেলেছে। আমাদের চ্যালেঞ্জ করল, আমরা তো “ফ্রেণ্ডস্” বলে পাশ কাটিয়ে চলে এলাম। যখন কলেজের দিকে এগুচ্ছি, হেঁটেই থাকি, তখন দেখা গেল আমাদের কয়েকটি কলেজের ছাত্র রক্তাক্ত শরীরে কলেজে ফিরছে। তাদের মুখে খানিকটা খবর শোনা গেল। কলেজে পৌঁছে Wathen সাহেবের কাছে পূর্ণ বৃত্তান্ত পাওয়া গেল। তখন তাঁকে ও অন্ত দুটি সাহেব অধ্যাপক ও তাঁদের পরিবারবর্গকে শহরের কেন্দ্র

গোবিন্দগড় নিয়ে যাবার জন্ত গেরা অঝারোহী সৈন্ত এসেছে। Wathen সাহেব তো কলেজ ছেড়ে যেতে চাননি। তবে সরকারী হুকুম জারী হয়েছিল যে কোনও ইয়োরোপীয়ান সেদিন কেজার বাইরে থাকবে না—কারণ তাদের মারা পড়বার ভয় আছে। Wathen সাহেবের কাছে আমরা জানলাম যে আমরা যে সময় শহরে ঢুকেছি সেই সময়েই General Dyer গুর্খা সেপাহী নিয়ে জালিয়াঁওয়ালা বাগে যান, আর ঢোকবার বা বেরুবার (কারণ অন্ত কোনও রাস্তা ছিল না) রাস্তা বন্ধ করে ফায়ার করবার আদেশ দেন। সেদিনকার রিপোর্ট ছিল ৫০০-৬০০ হতাহতের সংখ্যা—পরে দাঁড়িয়েছিল ১০০০-১২০০।

সাত-আটদিন অমৃতসর থেকে সরকারী কর্মচারী ছাড়া কাউকে বাইরে যেতে দেওয়া হয়নি। বাইরের কোনও খবরের কাগজে এই হত্যাকাণ্ডের ব্যাপারটা একেবারে বেরুতে দেওয়া হয়নি। প্রায় কুড়িদিন পরে যখন স্পেশাল পারমিট নিয়ে লাহোর যেতে পেরেছিলাম তখন আমি অনেককে এ খবরটা দিই। আমার মনে হচ্ছে তার মধ্যে দু-একজন খবরের কাগজের লোক ছিলেন (অমল হোম ছিলেন তাঁদের সঙ্গে)। সবপ্রথম বোধ হয় এলাহাবাদের ‘ইণ্ডিপেন্ডেন্ট’ কাগজে জালিয়াঁওয়ালা বাগের ভীষণ কাণ্ডের বর্ণনা প্রথম প্রকাশিত হয়।

এরই মধ্যে—বোধ হয় এই হত্যাকাণ্ডের সাত-আটদিনের ভিতরেই—General Dyer খালসা কলেজে খবর পাঠান যে তিনি কলেজে আসবেন ছাত্রদের ও অধ্যাপকদের ধন্যবাদ দিতে যে তারা এই ব্যাপারে লিপ্ত ছিল না এই বলে। যাক, তখন আমরা একটি ভাল কাজ করেছিলাম। আমরা Principal Wathenকে গিয়ে বললাম যে General যদি সদর দরজা দিয়ে কলেজে ঢোকেন আমরা খিড়কির দরজা দিয়ে সবাই—ছাত্র ও শিক্ষক বেরিয়ে যাবকলেজখালি করে। বলা-বাহুল্য, General Dyer কলেজে আসেননি। আমাদের ওপর কিন্তু তখন থেকে সরকারের ‘স্বনজর’ পড়ল। আর খালসা কলেজও ক্রমশঃ আকালি আন্দোলনের একটি বিশেষ কেন্দ্র হয়ে উঠল।

১৯১৯ সালে আমার পক্ষে একটি স্মরণীয় বৎসর। আমার বড় ছেলের জন্ম এই বছরের ১লা জানুয়ারীতে। জালিয়াঁওয়ালা বাগে যে আমরা বন্দুকের গুলিতে মরতে মরতে বেঁচে গেলাম সেও এই বছরের রামনবমীর দিনে। General Dyerকে যে আমরা নিরাশ করতে পেরেছিলাম (তিনি সত্যিই আশা করেছিলেন যে আমরা ভয়ে ভয়ে কলেজে তাঁর রীতিমত অভ্যর্থনা করব আর

ভাতে লোকে বুঝবে যে তিনি দেশের উপকারই করেছিলেন গুলি চালিয়ে) — সেও ১৯১৯-এর এপ্রিল মাসে। এই বছরই গরমের ছুটিতে একলা একলাই বেরিয়ে রাজপুতানা, বোম্বাই, পূর্ববঙ্গের খুলনা প্রভৃতি জায়গা ঘুরে এসেছিলাম। আর এই বছরেই খুব ধুমধামে অমৃতসরে কংগ্রেসের অধিবেশন হল।

এ কংগ্রেসের নাম দেওয়া হয়েছিল Victory Congress। রাণ্ডলাট অ্যাক্ট-এর দফন খাঁরা রাজবন্দী হয়েছিলেন, তাঁরা ছাড়া পেয়ে অমৃতসর কংগ্রেসে এলেন। যখন তার দু-একদিন আগে কারামুক্ত মহম্মদ আলী, শৌকত আলী, দুটি ভীমকায় ভাই (লোকের আন্দাজ ছিল, শৌকত আলীর শরীরটি মাপে সাত ফুট বাই ছ ফুট) গান্ধীজিকে প্রায় কোলে করে কংগ্রেস প্যাণ্ডেলে ঢুকলেন তখন মহাসভায় সেই দৃশ্য ভোলবার নয়। সে কী উত্তেজনা, কী হর্ষধ্বনি! প্যাণ্ডেল যেন ভেঙে পড়বে মনে হচ্ছিল!

সেবার দেখলাম দেশের সব নেতাদের। গান্ধীজি তো ছিলেনই, তাঁর পাশে জিন্না সাহেবও ছিলেন—নিখুঁত বিলাতী পোশাকে। তিলক এসেছিলেন, সি. আর. দাশ, বিপিন পাল, মোতিলাল নেহরু সপরিবারে, আর পাঞ্জাবের লালা লাজপত রায়, অজিত সিং, কানাডা-প্রত্যাগত ‘গদর’ পার্টির কয়েকটি শালগ্রামও মহাভূজ শিখসর্দার, মাদ্রাজ ও আরও দক্ষিণের খ্যাতিনামা ব্যক্তি, এঁরাও ছিলেন—এরকম ভারতের প্রত্যেকটি প্রদেশের প্রতিনিধিদের মহাসম্মেলন এর আগে কখনও হয়নি। ভারতবর্ষের ইতিহাসে স্বাধীনতা সংগ্রামের এটি ছিল প্রথম অধ্যায়।

এইখানেই অহিংস অসহযোগ আন্দোলন শুরু হয়। আমরা তো জালিয়াঁ-ওয়ালা বাগের ঘটনার পর থেকেই খন্দর পরতে আরম্ভ করেছি। Wathen সাহেব তো আমাদের নতুন পোশাক দেখে হেসেই অস্থির। ষাক, আমরা তো তুচ্ছ মানুষ—এদিকে সি. আর. দাশ, মোতিলাল নেহরু প্রমুখ বড় বড় লোক সব ছেড়ে দিয়ে জাতীয় আন্দোলনে যোগ দিলেন—নিজেদের দৈনিক হাজার হাজার টাকা আয়, বিলাসের জীবন সব ত্যাগ করে। সত্যি, ও সময়টা মনে রাখবার মত। বিশালকায় শিখেরা যখন সেই অহিংস সংগ্রামে পুলিশের লাঠির আঘাতে ভূপতিত হল—এরা একবারও প্রত্যুত্তরে হাত তুলল না, চূপচাপ সব সহ্য করে গেল—সেও একটা অপূর্ব ব্যাপার। অহিংস যুদ্ধ বাস্তবিক ইতিহাসে একটি নতুন ধরনের যুদ্ধপ্রণালী।

১৯১৯ ও ১৯২০ সাল এইভাবেই চলল। নতুন ডাক এল এবার ছাত্রদের প্রতি। স্কুল-কলেজ ছেড়ে এই নতুন রকম সংগ্রামে যোগ দাও। আলিগড়

বিশ্ববিদ্যালয় বন্ধ হল। বেনারস হিন্দু বিশ্ববিদ্যালয় টলটলায়মান।

যখন শিক্ষাকেন্দ্রগুলির এরকম ন যথো ন তত্বো অবস্থা সেই সময় হঠাৎ গান্ধীজি আর মদনমোহন মালবীয়া মহাশয় খালসা কলেজে এলেন। Wathen সাহেব তো নিশ্চয়ই ঘাবড়ে গিয়েছিলেন—তবে বুদ্ধিমান লোক, তাঁদের কলেজের সুন্দর মাঠ দেখালেন, খুব আপ্যায়িত করবার চেষ্টা করলেন। আমার বাড়িতে তখন মেয়েছেলে তো কেউই ছিলেন না—ঐখানেই অনেক সময় ছোটখাটো আড্ডা হত। এবারও সবাই এ দুজন মাননীয় অতিথিকে আমার গৃহে নিয়ে এলেন। গান্ধীজি ও মালবীয়াজি, Principal Wathen ও দুজন সাহেব (I. E. S. Professor), সর্দার যোগেন্দ্র সিং (উনি পরে পাঞ্জাবের মন্ত্রী হয়েছিলেন) ও আমরা দশ-বারোজন খুব ধৈর্যধৈর্য করে আমার ছোট পড়বার ঘরেতে বসে বা দাঁড়িয়ে ছিলাম। ছাত্র ও শিক্ষকেরা non-cooperation movement-এ যোগ দেবে কিনা এ বিষয়ে তো মালবীয়াজি ও গান্ধীজিরই মত-বিরোধ, সাহেবরা অবশ্যই মালবীয়াজির সঙ্গে একমত। আমরা শুনেই পেলাম। অতিথিদের জল খাওয়ালাম। ঘণ্টাখানেক পরে সভাভঙ্গ হল। দুজন নেতা শহরে ফিরে গেলেন। কাকুর কাকুর সন্দেহ রয়ে গেল যে তাদের কলেজে আগমন—আমাদেরই (বাওয়াজি, কান্দীরা সিং ও চাটুজ্যো এই তিনজনের) কাজ। এ সন্দেহটা কিন্তু ভুলই ছিল।

অতটা উত্তেজনার পর ১৯২০ সাল খানিকটা টিমে চালেই চলল। আমার ছোট ভাই দুজনরাজ Durham University (New Castle) থেকে M. B. পাস করে ফেরবার জাহাজ পেতে অনেক দেরি হওয়ায় বিলেতেই আটকে রইল। প্রথম বিশ্বযুদ্ধের পর কিছুদিন যাতায়াতে ঐ রকম গোলমাল চলেছিল। যুদ্ধ শেষ হওয়ায় ইউরোপ থেকে অনেক স্কলার, বিশেষতঃ আবার এদেশে আসতে লাগলেন। একজনের কথা খুব ভাল করেই মনে হচ্ছে, Mr. Foucher, ফরাসী প্রস্তুতস্বিৎ। ইনি কাবুলে অনেক পুরাতন স্থাপ প্রভৃতি দেখে শুনে বৌদ্ধযুগের নতুন মালমশলা যোগাড় করছিলেন। তারপর তিনি লাহোরে আসেন। ওখানকার সিনেট হলে তিনি কম্বুজের (Cambodia) Angkor Vat (নগর-বাটি) আলোকচিত্র দিয়ে অতিসুন্দরভাবে দেখিয়েছিলেন। কম্বুজ ও অন্ধোরের সঙ্গে সেই আমার প্রথম পরিচয়। তার জের এখনও থামেনি। কালই (২৮শে সেপ্টেম্বর, ১৯৭০ সাল) মীরাট কলেজে কম্বুজ ও অন্ধোরের বিষয়ে ঘণ্টাখানেক বলে এলাম। আর ১৯২৪ সাল থেকে তো কম্বুজ, যবদ্বীপ প্রভৃতি সুন্দর দেশে

ভারতীয় কৃষ্টির প্রভাব বিস্তার বর্ণনার কাজে হাত দিয়ে নিজের পড়া ও পড়ানোর আয়ুর্ন পরিবর্তন করে ফেললাম। ছিলাম Economics-এর লেকচারার, এর পর ইতিহাসের অধ্যাপক হলাম। আর এই বদলাবার পালার টাল সামলাতে দেশে-বিদেশে ঘুরতে হল। সত্যি কথা, এ ঘোরাটাঁকে পরম সৌভাগ্য ভেবেছিলাম তখনও, এখনও তাই ভাবি। Mr. Foucher-এর অঙ্কের বর্ণনা বাস্তবিকই আমার পক্ষে একটি স্মরণীয় ব্যাপার।

১৯২০ সালের প্রথম দিকে স্কজন বিলেত থেকে ফিরল। প্রথম দিকটা নাহোরেই ডাক্তারী প্র্যাকটিস শুরু করলে। কয়েক মাস পরে কলকাতায় চলে গেল আর শেষ পর্যন্ত সেখানেই রইল। বিলাত থেকে ফেরার দু-চার মাসের মধ্যে গুর বিয়ে হল। ঐ বছরেই শেষের দিকে আমার জ্যেষ্ঠা কন্যা অমিতা মৈনপুরীতে (স্বশ্রমশাই সেখানে ডিস্ট্রিক্ট জজ ছিলেন) জন্মগ্রহণ করল। গুর 'ভাত' (অন্নপ্রাশন) হয়েছিল নতুন ঘরনে। সে সময় আমরা ধরমশালায় ছিলাম। বাবা এক গদী (ঐ পাহাড় অঞ্চলের বামুন ক্ষত্রীদের গদী উপাধি) পুরুতের বন্দোবস্ত করলেন, যে ঘরের দেওয়ালে মান্নের চিতাভস্মের একটি ছোট কোঁটো পোঁতা ছিল, সেই ঘরটিতে খুব ভাল করে হোম ইত্যাদি করা হল। তারপর কনিয়মের (বাংলার পুরাতন নাম) সামনের মাঠে গদীদের নাচ হল। আমাদের ভাণ্ডারি চৌকিদার নাচ গান বাজনার সব বন্দোবস্ত ভালই করেছিল।

একটি স্মরণীয় ভ্রমণ

যদিও অমৃতসরে আকালি আন্দোলন আন্তে আন্তে বেড়েই চলেছিল—সে সত্ত্বেও খালসা কলেজ কোনও গুরুতর গোলমালে পড়েনি। স্মৃতরাং আমরা নিশ্চিন্ত মনে একটি বহুদিনের ষা প্রায় স্বপ্নের মত দুরাশা বলেই বোধ হত যেটি এবার সত্যি সত্যি বাস্তব জীবনে করে ফেলবার জন্তে প্রস্তুত হলাম। আর এর স্বযোগও এল অপ্রত্যাশিতভাবে। পাঞ্জাব বিশ্ববিদ্যালয়ের বোটানির প্রফেসর রায়বাহাদুর শিবরাম কশুপ আই. ই. এস. কয়েক বছর থেকে হিমালয়ের বরফে ঢাকা কতকগুলি স্ফুটন স্থানে বোটানি ডিপার্টমেন্টের জন্য লতাপাতা ফুল-ফলের খোঁজে যেতেন। এই বছর (১৯২২ সালে) তিনি হিমালয়ের ওপিন্টে খাস তিব্বতে মানস সরোবর কৈলাসের দিকটিতে ঘুরে আসবেন। দু-তিনটি সঙ্গী তাঁর দরকার ছিল। তাঁর ছাত্ররা খানিকটা পথ (হিমালয়ের এদিকেই) তাঁর সঙ্গে যেতে ইচ্ছুক ছিল, হিমালয় টপকাতে মোটেই রাজী ছিল না। বোটানি ডিপার্টমেন্ট কর্মচারীর মধ্যেও কারুর এগুবার লক্ষণ দেখা গেল না। এই খবরটি আনলেন আমাদের কান্দীরা সিং। শোনামাজ্রাই আমি ও বাওয়া জয়কিষণ সিং, কশুপ মশায়ের তিব্বত যাত্রাসঙ্কল্পে যোগদান করবার আমাদের আন্তরিক ইচ্ছার কথা তাঁকে জানানোর জন্তে লাহোরে খবর পাঠানো হল। দু-একদিনের মধ্যেই আমাদের বোটানি বিভাগের চরণ সিংও বললেন যে তিনিও যাবেন। ঠিক হল যে লাহোর থেকে অধ্যাপক কশুপ ও তাঁর একটি পুরাতন ভৃত্য (সে তিন-চারবার হিমালয় অঞ্চলে গুর সঙ্কে ঘুরে এসেছে) আর খালসা কলেজের আমরা চারজন (তিনজন শিখ প্রফেসর ও আমি) আমাদের কলেজের একটি চাকর নিয়ে এই সাতজন হিমালয় পারের মানস সরোবর ও কৈলাস দর্শন করবার উদ্দেশ্যে লাহোর স্টেশন থেকে বেরিলী যাত্রা করলাম (১৮ই জুন, ১৯২২)। কাঠগোদাম থেকে বাসে করে নৈনিতাল, সেখান থেকে বাসে করে আলমোড়া পৌঁছলাম ২০শে জুন, ১৯২২।

এর পর আর বাস নয়, পদব্রজে চলা আরম্ভ হল, মালপত্র খুচরের গিঠে চড়িয়ে তার তদারক করতে করতে। এই বাঘাবর জীবন শহুরে জীবন থেকে

একেবারে আলাদা, মোটেই খারাপ লাগল না। রাত্রে কোনও ফরেস্ট বাংলো বা ডাকবাংলোয় আশ্রয় নেওয়া। দু-এক জায়গায় নিজেদের তাঁবু খাটিয়েও থাকা হয়েছিল। সরষুর ধার ধার দিয়ে হরিতকীর বনের মধ্যে দিয়ে বেশ ছাওয়ায় ছাওয়ায় একদিন যাওয়া গেল। এরই মধ্যে একদিন সকালবেলা পাহাড়ী রাস্তায় একটি বাক ঘুরে সামনে দেখা গেল অন্ততঃ একশো মাইল জুড়ে বরফ-ঢাকা হিমালয় (main Himalayan range)। এই আমাদের প্রথম দর্শন—সাক্ষাৎ দেবতাত্মা হিমালয়ের, দিগন্ত জুড়ে বিরাজমান, পৃথিবীর সবচেয়ে মহান দৃশ্য। চিরতুষারাবৃত পর্বতশ্রেণী, অসীম সমুদ্রের অগাধ জলরাশি, তারান্তরা নিশীথ আকাশ—এই তিনটি প্রকাশ, আমি ভাবি বিশ্বস্রষ্টার শ্রেষ্ঠ রচনা—এই তিনটি রূপের দর্শন, ধ্যানধারণা, আমার বিশ্বাস তাঁর সর্বোত্তম আরাধনা।

“যন্ত্রেমে হিমবন্তো মহিষা যন্ত সমুদ্রং রসয়া সহাঃ।

যন্তেসা প্রদিশো যন্ত বাহু কন্ঠৈ দেবায় হবিষা বিধেম ॥”

—ঋগ্বেদ ১০, ১২১, ৪

“এই হিমবন্ত পর্বতসমূহ, নদীর সহিত সমুদ্র যাহার মহত্ত্ব বলিয়া কথিত হয়, এই দ্বিকসমূহ যার বাহু, (সেই) কোন দেবতাকে আমরা হবিষ্যারা পূজা করিব।”

ঋগ্বেদের এই সূত্রটি আমার বড় ভাল লাগে। যখনই বরফে ঢাকা পর্বতের চূড়া বা সমুদ্রের দিগন্তবিস্তার দেখি তখনই বেদের এই সূত্রটি মনে পড়ে যায়।

১লা জুলাই আবার কুয়াশা কেটে গেলে ভোরবেলা আমরা দেখলাম যেন একেবারে সামনে নন্দাদেবীর জোড়া শিখর—ত্রিশূল, পঞ্চচুলী আর অজানা অসংখ্য ‘হিমবন্ত’ শৈলরাজ।

সেইদিনই আমরা পিথোরাগড় ছেড়ে আসকোটের দিকে এগুচ্ছি। পিথোরাগড় ছিল মধ্যযুগের কুমায়ূনের রাজপুত্র রাজাদের রাজধানী। কালী বা সারদা নদীর তীরে বড় সুন্দর ছোট শহরটি—শোর এর আর একটি নাম। নদীর ওপারে নেপাল রাজ্য। পূর্ব কুমায়ুন ও পশ্চিম নেপালকে বিভক্ত করেছে কালী নদী। এখন থেকে আমরা কালী নদীর ধার ধার দিয়ে সোজা উত্তর দিকে যাব—লিপুলেখ বা লিপু পাস-এর দিকে। আলমোড়া ছেড়ে আমরা পূর্ব দিকে এগিয়েছিলাম এ কদিন। এবার আমাদের যাত্রা হবে উত্তরমুখী—তার প্রথম ‘পড়াও’ আসকোট। এটিও একটি ছোট পাহাড়ী রাজ্যের রাজধানী ছিল—এখনও এখানকার যিনি বড় ভূস্বামী তাঁকে ‘রাজবার’ বলা হয়। ‘রাজবারে’রা বরাবর কৈলাস যাত্রীদের সাহায্য ও উৎসাহ দিয়ে থাকেন। আমাদেরও

এখনকার যিনি ‘রাজবার’ তিনি চাল, ঘি, মধু ও আচার পাঠিয়েছিলেন। আল-মোড়া থেকে যে খচ্চরওয়ালারা আমাদের জিনিসপত্তর এনেছিল—তারা এখানে আমাদের ছেড়ে দিয়ে ফিরে গেল। ‘রাজবারে’র সাহায্যে আমরা আসকোট থেকে নতুন লোক পেলাম।

আসকোটের ‘বনমাহুবে’র কথা অনেক শোনা গিয়েছিল। আমরা তাদের দেখা পাইনি। এই ‘বনমাহুবে’রা নাকি এখনও প্রস্তরযুগ থেকে এগেয়নি। তারা কোনও ধাতুর তৈরী জিনিস ব্যবহার করে না। বস্ত্রাদির এদের কোনও হরকার নেই। আর এরা পানীয় জল কেবল যেখানে পাহাড়ের গায়ে কোন ডংস থেকে বেরুচ্ছে সেই জলই খায়, নদীর জল খেতে চায় না। এরকম আদিম স্তরের আদিবাসী শুনেছিলাম আমাদের দেশে খুব কমই দেখা যায়। আরও দিনকয়েক আসকোটে থাকলে, ‘রাজবারে’র সাহায্যে ‘বনমাহুবে’ দেখা যেত।

এরপর দু-একদিন আমাদের গরম জায়গায় নামতে হল। আমার তো বেশ পেট খারাপ ও তার সঙ্গে শরীরটা বেশ খারাপ হল—আর এর জের আসল চড়ায়ের সময় রয়েই গেল।

এবার আমরা ধারচুলা পৌঁছুলাম—এটি হল লিপুলেখের পথে তিব্বত থেকে যে সব পশম, কসল, borax, ইত্যাদি আমদানি হয় তার উপর ‘চুঙ্গী’ নেবার প্রধান চৌকি। এইখানেই আমাদের ঠাকুর শ্রীরামকৃষ্ণদেবের সহধর্মিণী পূজনীয়া সারদাদেবীর দ্বারা দীক্ষিতা কুমাদেবীর দর্শনলাভ হল। ইনি ছিলেন একটি বেশ ধনী ভোটিয়া সদাগর ঘরের মেয়ে। অল্প বয়সেই সংসার ত্যাগ করে সন্ন্যাসিনী হয়েছেন। কলকাতায় গিয়ে ৬সারদা মাতাঠাকুরাণীর কাছে মন্ত্র নিয়ে এসেছেন। তারপর নিজেকে কৈলাস ও মানস সরোবর যাত্রীদের সাহায্যকার্বে নিযুক্ত করেছেন। দশ-বারো বার হিমালয় পার হয়ে পশ্চিম তিব্বতের তীর্থস্থানগুলি ঘুরেছেন—বেগীর ভাগ ভারতের নানা প্রদেশের তীর্থযাত্রীদের নিয়ে। প্রমোদ চাট্‌জ্যো ও সত্যচরণ শাস্ত্রী মশায়ের ইনিই ছিলেন গাইড। আমাদের পরম সৌভাগ্য যে ধারচুলায় কুমাদেবীকে আমাদের গাইড হিসেবে পেয়ে গেলাম। উনি ভোটভাষা তো জানতেনই—ওটি তো ওঁর মাতৃভাষা—তিব্বতী ভাষাতেও বেশ কথাবার্তা চালাতে পারতেন। এ দুটি ভাষা জানার জন্তে ওঁকে কৈলাস, মানস সরোবরের পথে পাওয়ার মানে হল যে আমাদের অনেক সমস্‌তাই দূর হল।

এর কয়েকদিন পরে আমাদের নির্পানি ‘পড়াও’ পার হতে হল। এ সজ্জি নির্পানি—আট-ন ঘণ্টা কোথাও জল নেই। পাহাড়ের গায়ে সরু রাস্তা—কোন কোন জায়গায় এত সরু যে দুটি পা পাশাপাশি রাখবার জো নেই। কোথাও পাহাড় কেটে পথ করবার জো নেই। পাহাড়ের গায়ে বড় বড় গজাল পুঁতে তার ওপর পাথরের স্লাব বসিয়ে রাস্তা করা হয়েছে। এই ‘পড়াও’য়ে প্রত্যেক বার কেউ না কেউ পা ফেঁড়ে তিন-চার হাজার ফিট নীচে কালী নদীর খরস্রোতে পড়ে—এই অপঘাত মৃত্যুগুলি হল শ্রমশানেশ্বর কৈলাসনাথের উদ্দেশ্যে বলিদান। যা হোক আমাদের কারুরই শহীদ হবার সৌভাগ্য হয়নি। ক্ষুধার্ত, তৃষ্ণার্ত ও পরিশ্রান্ত অবস্থায় পাহাড়ের ওপর খানিকটা সমতল জমিতে ওঠা গেল। একটা রুড় ফাঁড়া সেদিন কেটে গেল। শরীরটা খারাপ থাকায় আমার কষ্টটা বেশীই হয়েছিল।

তার পরদিন ক্ষতিপূরণ-স্বরূপ আমরা একটি চমৎকার জায়গায় পৌঁছলাম। তিনদিকে কুমায়ুন ও পশ্চিম নেপালের অন্তর্গত হিমালয়ের শৃঙ্গগুলি অর্ধবৃত্তাকারে ঘিরে রয়েছে একটি সবুজ মাঠ—আর সেখানকার ঘাস প্রায় ঢেকে ফেলেছে অজস্র বনফুল। এই হল আলপাইন ফুলের সময়, ফুল না মাড়িয়ে পা ফেলবার জায়গা নেই। বর্ষাকাল শেষ হলে এরকম ফুলের মেলা দশ-বারো হাজার ফুট উঁচু জমিতেই দেখা যায়। এখানে আমাদের দুটি বোটানিস্ট দেখতে পেলেন প্রকৃতিদেবীর নিজের হাতে লাগানো, মাহুষের হাতে নয়, anemone, geranium, iris—আরও কত ফুল যার নাম বিলিতি ফুলের ক্যাটালগেই দেখা যায়। এখানে সেই সব শীতপ্রধান দেশের ফুল চারিদিক আলো করে রেখেছে। হিমাবৃত পর্বতশিখর, যাকে বলে grand, sublime, বিরাট মহান—আর এই ধরাতলে পুষ্পবৃষ্টি স্নন্দর মনোরম। গার্বিয়াং-এর ঠিক নীচের এই বরফে ঢাকা পাহাড়-ঘেরা প্রকৃতিদেবীর ফুলবাগানটি বিরাট ও স্নন্দর, এ দুইয়েরই—বিরাট ও রমণীয়—আশ্চর্য মিলনস্থান। সেইদিনই আমরা গার্বিয়াং-এ পৌঁছলাম। এটি কুমাদেবীর বাপের বাড়ি—এখনও এখানে ওঁর বড় বোন আছেন—তঁার স্বামী (একজন এদিককার নামী ভোট সদাগর) আমাদের ওঁদের বাড়িতে নিয়ে গেলেন। সে রাজ্যে রীতিমত ভোজ হল। তাঁরা একটু হুঁশিত হলেন যে আমরা ওঁদের প্রস্তুত পাহাড়ী মদ পান করলাম না। এসব পাহাড়ী অঞ্চলে মদ্যপান মোটেই দোষের কথা নয়।

সেই রাজ্যে আমি ও বাগুয়া হরকিষণ সিং তো অনেকদিন পরে ঘরের চার দেওয়ালের মধ্যে বেশ আশ্রয় করে শুলাম। অল্প তিনজন স্থানীয় রায়বাড়

দেখতে গেলেন। এ অস্থানটি ভোটিয়াদের একসকল নৈশ ক্লাবের মত। এখানে সন্ধ্যাবেলা পাড়ার যুবক-যুবতী এসে জড় হয়, নাচগান হয়, এইখানেই পাজপাজীর কোর্টশিপ আরম্ভ হয়। তারপর পাকাপাকি সম্বন্ধে পৌঁছলে, বাপ-মার সম্মতি নিয়ে, তাদের বিয়ে হয়ে যায়। জানি না ভোটিয়া ছাড়াও অন্ত্র পাহাড়ীদের মধ্যেও এ প্রথা আছে কিনা।

ভোটিয়ারা একটু আলাদা ধরনের পাহাড়ী জাত। এরা নামে, মোটামুটি ধর্মও, হিন্দু (বেটাছেলেদের সব সিং উপাধি, মেয়েদের নামেও হিন্দুপ্রভাব দেখা যায়), তবে এদের নাক মুখ চোখ পরিচয় দেয় মঙ্গোলীয় রক্তের। এদের প্রধান ব্যবসা হল তিব্বতের সঙ্গে বাণিজ্য—কম্বল, চামর, পশম, সোহাগা, প্রভৃতি আমদানি করা, কেরোলিন, হারিকেন লঠন, কিছু স্বতী কাপড়, ছুঁচ, স্বতো ইত্যাদি রপ্তানি করা। শীতের শেষে পশ্চিম তিব্বতের তকলাকোট, জাণিমা, দাবা, থোলিং ও অন্যান্য মণ্ডিতে এরা যায়। বরফে গিরিধারগুলি বন্ধ হবার আগেই হিমালয়ের এদিকে চলে আসে। প্রত্যেক বড় গিরিধারের কাছে এদের এক-একটি বসতি—সেখানকারই নামে এক-একটি ভোটিয়া শাখার নাম ও পরিচয় (চৌদাম, দার্মা, জোহর, মানা, নিতি ইত্যাদি)। পশ্চিম তিব্বত ও উত্তরপ্রদেশের মধ্যে লিপু, নিতি ও মানা এই তিনটিই বেশী ব্যবহার হয় বাণিজ্যের জন্য। পঞ্চাশ বছর আগে গার্বিয়াং ছিল কুমায়ূনের উত্তর-পশ্চিম সীমানার শেষ ভাকঘর। আমরা এখানে বাড়ির লোকের শেষ চিঠিপত্র পেলাম (দেড় মাস আর পাব না) ও আমরাও তাঁদের দেড় মাসের জন্যে চুপচাপ থাকব এ খবর পাঠালাম।

গার্বিয়াং-এ আমরা নতুন করে মালবাহী টাট্টু ও বুঝুর বন্দোবস্ত করলাম—আমাদের ভোটিয়া বন্ধুদের সাহায্যে। বুঝু বেশ বড় মোষের মত দেখতে, তিব্বতের চমরী ও আমাদের দেশের গরুর crossbreed। বরফের ওপর এদের পা পেছলয় না। বারো-তেরো হাজার ফিট এসব জায়গার উচ্চতা—এখানকার হাওয়া বেশী পাতলা। আমরা নীচে থেকে এসেছি—আমাদের কিছুদিন এ পাতলা হাওয়ায় নিশ্বাস নিতে কষ্ট হবে বলে এখান থেকে ঘোড়ায় চড়ে যাওয়াই ঠিক হল। মালপত্র বুঝুদের পিঠে চলল।

জুলাইয়ের মাঝামাঝি আমরা হিমালয় পার হবার জন্য বেরিয়ে পড়লাম। লাভ-আটজন ঘোড়সওয়ার, দু-তিনটি বুঝু—বেশ একটি শোভাযাত্রা বেকল লিপুলেখের দিকে। আবার কালী নদীর তীরে পৌঁছনো গেল। এখানে একটা

বড় গুহার অনেকগুলি স্তম্ভদেহ যেন সাজানো, রাখা আছে। এগুলি শুকিয়ে গেছে, পচেনি (এখানকার শীতে পচে না, মামির মত হয়ে যায়)—এরা বোধহয় শ'দেড়েক বছর আগেকার কোন যুদ্ধে হত সৈন্য। আমাদের মধ্যে দু-তিনজনই এই দৃশ্য দেখতে গিয়েছিলেন—আমি যাইনি।

সেইদিনই সূর্যাস্তের খানিকক্ষণ আগে একটি মনোরম দৃশ্য আমরা দু-তিনজন দেখেছিলাম। আমরা তখন আরও উঁচুতে উঠেছি, বড় গাছ আর নেই, তিন-চার ফুট উঁচু গোলাপের ঝাড় পাহাড়ের গা আলো করে রেখেছে। আমরা এই গোলাপবনের মধ্যে দিয়ে আস্তে আস্তে এগুচ্ছি। গোলাপফুল খুব ফুটেছে—ছোট ছোট ফুল, চার-পাঁচটির বেশী পাপড়ি নেই—তবে পাপড়িগুলি ফুলের বোটার ওপর এমন করে সাজানো যে হাওয়ায় প্রত্যেক পাপড়িটি ঠিক যেন এক-একটি প্রজাপতির মত নাচছে। এ জাতের গোলাপ আগে কখনও দেখিনি। হঠাৎ কোথা থেকে জানি না, দুটি ছোট ছোট বালক-বালিকা এই গোলাপকাননে দেখা দিল—মনে হল ফুলগাছের মধ্যে তারা যেন লুকোচুরি খেলছে। আমরা বেশ আশ্চর্য হয়েই ফুলের নাচ আর এই শিশুদের নাচ দেখছি, আর যেমন হঠাৎ এরা দেখা দিয়েছিল তেমনি হঠাৎ এ দুটি কোথায় চলে গেল আর দেখা গেল না। যতদূর মনে পড়ে এ দুটি ছেলেমেয়ে সাধারণ ভোটিয়া ছেলেমেয়েদের চেয়ে ঢের বেশী সুন্দর, ঢের বেশী পরিষ্কার-পরিচ্ছন্ন মনে হয়েছিল। জানি না তারা কাছেরই কোন ভোটিয়া বসতির কোন অবস্থাপন্ন পরিবারের পুত্রকন্যা, কিংবা মাঝে মাঝে যেমন ভাবি, এরা দেবতাত্মা হিমালয়ের (আমরা তখন তাঁর দিকে অনেকটা এগিয়েছি) আমাদের ওপর কৃপা করে পাঠানো একটি অলৌকিক স্বপ্ন।

যাই হোক, সে রাত্রি, ঠিক হিমালয়ের পদপ্রান্তে, আমরা তাঁবু খাটিয়ে শুলাম। গরম জামা কাপড়, জুতো মোজা কিছুই না খুলে দু-তিনখানা কম্বল মুড়ি দিয়ে শোওয়া তো গেল, কিন্তু শীতের চোটে ভাল ঘুম হল না। ১৯শে জুলাই ভোর হবার আগেই উঠে পড়া গেল, আর একটু অঙ্ককার থাকতে থাকতে লিপু-লেখের দিকে রীতিমত শোভাযাত্রা করে বেরিয়ে পড়া গেল। রোদ্দের বেশী তেজ হবার আগেই লিপু পাস পার হয়ে তিব্বতে প্রবেশ করতে হবে। নয়ত দুপূর্ববেলা বড় বড় বরফের চাঙড় ওপর থেকে লিপু-রাজীর মাথায় পড়বে আর তাদের চিঁড়েচাপ্টা করে দেবে। যাক আমরা নির্বিঘ্নে লিপুলেখ পার হয়ে আমাদের নিজের দেশ ভারতবর্ষ ছেড়ে বিদেশ-বিভূঁই তিব্বতে পৌঁছলাম।

সুনেছিলাম হিমালয়ের এই গিরিধারগুলিতে ঢোকবার পথে এমন সব ফুল দেখা যায় যার স্বগন্ধে মানুষ আন্তে আন্তে অজ্ঞান হয়ে পড়ে—ক্রোরোফর্ম শুকিয়ে দিলে অপারেশন টেবিলে রোগীর ঘেরকম অবস্থা হয় সেইরকম। আমরা সে ফুল তো পাইনি—পেয়েছিলাম পাউডার পাকের মত ফুল। দেখতে বেশ, তবে বৈলীকণ হাতে রাখলে গলে কাদার মত হয়ে যায়।

কিছু মুশকিলে পড়া গিয়েছিল। গিরিপথের বরফটা মানুষ, ঘোড়া ও খুবসুর ইঁটাইটিটির জন্তে নরম হয়ে যাওয়াতে আমাদের ঘোড়ার পা বরফে বেশ খানিকটা করে ঢুকে যাচ্ছিল, আরেকটু জোর দিয়েই বরফ থেকে পা বের করতে হচ্ছিল। এর জন্ত খানিকটা দেবী হল, আরেকটু অস্বস্তি বোধ হল। হিমালয়ের পার্শ্ব দেশটি প্রথম দর্শনে মনে হল যেন এক ভিন্ন জগৎ। (১) হিমালয় বা আমাদের ভারতবর্ষের দিকে এত বিরাট, এমন গগনচুম্বী মনে হয়—তিব্বতের মালভূমি থেকে অনেক ছোট, বিরাট নয় সুন্দর, আর তিব্বতের মধ্যে আরও খানিকটা ঢুকে গেলে রূপোর খেলনার মত চমৎকার দেখায়। (২) হিমালয়ের আমাদের দিকটা উঁচু-নীচু, খুব চড়াই-উৎরাই, অনেকটা বড় বড় গাছে (দেবদারু, চাঁর, ওক ইত্যাদি) ঢাকা; হিমালয়ের ওপাশে (তিব্বতের দিকটায়) যতদূর দেখা যায় প্রায় সমতলভূমি, মধ্যে মধ্যে দু-একটি পাহাড়—আর দূরে হিমালয়ের সমান্তরাল পর্বতমালা যার দু-একটি চূড়া বরফে ঢাকা। এইটি হল কৈলাস পর্বত-শ্রেণীর প্রধান শিখর—কৈলাস পর্বত—যেখানে আমরা তীর্থযাত্রীরা এত তোড়-ছোড় করে যাচ্ছি। (৩) আরেকটি বৈশিষ্ট্য বা প্রথম প্রথম চোখে পড়েছিল তা হল যে দু-একটি ছোট পাহাড় বা কাছাকাছি ছিল, প্রত্যেকটি মনে হল যেন আলাদা আলাদা রঙের। সামনেরটি (যেটির দিকে আমরা এগুচ্ছিলাম) সবুজ আর হলদে দুটি বেশ সুন্দর রঙের মিশেল দেখাচ্ছিল।

একটি খরস্রোত নদী পার হয়ে আমরা ঐ জায়গাতে পৌঁছলাম। একটু নীচেই একটি সমতল উপত্যকার মধ্যে দিয়ে কর্ণালী চলেছে। হিমালয় ভেদ করে ভারতের দিকে যাবার জন্তে শক্তি সঞ্চয় করে। আর তারই তীরে তকলাকোট মণ্ডী, যেখানে আমাদের দেশের ভোটিয়ারা এসে তাঁবু খাটিয়েছে তাদের সদাগরী জিনিসপত্র সাজিয়ে। আর এই মণ্ডীর পাশেই খাড়া চড়াইয়ের পাশ দিয়ে উঠতে হয় তকলাকোট “লামাসেরী” বা বৌদ্ধমঠে। এটি বাইরে থেকে দেখতে ঠিক কেল্লার মত। মনে হয় দুর্গোগের সময় কেল্লার কাজেই লাগানো যায়।

তিব্বতে পৌঁছবার প্রথম দিনেই আমার পেটের অস্বস্তি একেবারে সেরে গেল।

বাস্তবিক কিছুদিন আমি বড় কষ্ট পেয়েছিলাম। লিপুলেখে পর্বত লঙ্ঘনের সময় রুগীর পথ্যই আমার আহার ছিল। তিব্বতে এসে রুমাদেবী তকলাকোট মণ্ডী থেকে বড় বড় মটর আনলেন, দানাগুলির গায়ে রোঁয়া ছিল—এরকম মটর আমি আগে দেখিনি। কুটি দিয়ে সেই মটরের ঝোল তো সেদিন খেলাম, ভীষণ খিদে পেয়েছিল, অদৃষ্টে যা থাকে তাই হবে আমি আর পারি না এই ভেবে। মটর খেয়েই হোক আর তিব্বতের জল-হাওয়ার গুণেই হোক আমি সুস্থ হয়ে উঠলাম। বেশ খাওয়াদাওয়া করতে লাগলাম, দুর্বল ভাবটা কাটতে লাগল। তার পরদিন (২০শে জুলাই) তকলাকোট মণ্ডীর মধ্যে ঘুরতে ঘুরতে জংপঙের (আমাদের ম্যাজিস্ট্রেটের মত রাজকর্মচারী) দপ্তরে সবাই উপস্থিত হলাম। জংপঙ মশাই পুরু তিব্বতী কার্পেটের উপর পত্নী ও সহকারী কর্মচারী পরিবৃত হয়ে বসে ছিলেন। রুমাদেবী আমাদের কৈলাসযাত্রী বলে পরিচয় করিয়ে দিলেন। জংপঙ চুংখ করে বললেন যে তাঁদের দেশে রেলগাড়ি তো নেই, ঘোড়া বা গরুর গাড়িও নেই আর রাস্তাঘাট বলতেও বিশেষ কিছুই নেই। আমাদের অনেক কষ্ট সহ্য করতে হবে তবে তীর্থযাত্রীদের তো কষ্ট সহ্য করা উচিতই। আমাদের জিজ্ঞেস করলেন যে তিনি কোন সাহায্য করতে পারেন কিনা! জংপঙপত্নী আমাদের ছোয়ারা ও মিশ্রী হাতে দিলেন, তারপর আমরা বিদায় নিলাম।

সেইদিনই আমরা ওখানকার সেই প্রকাণ্ড কেল্লার মত বৌদ্ধমঠটি দেখে এলাম। খানিকটা বেশ চড়াই চড়তে হল, সেখানে তিন-চারটে ভিথিরী ছেলে দু'হাতের বুড়ো আঙুল উঁচু করে জিব যতটা পারে বের করে (এইটিই হল সম্মান দেখানোর প্রথা) ভিক্ষা চাইল। একদল বাচ্চা শিক্ষানবীশি লামা (পুরোপুরি লামা হতে তাদের তখন অনেক দেরী) আমাদের সেই বৃহৎ মঠের চারধার দেখাতে নিয়ে গেল। তারা খুব হাসিখুশী, গাভীর্ষ এখনও রপ্ত করতে পারেনি। একটি বড় হল ভর্তি করে লামারা পূজো করছেন, অসংখ্য পিতল-কাঁসার প্রদীপ চারদিকে জ্বালা রয়েছে, ছোট বড় ব্রোঞ্জের বুদ্ধমূর্তি হলে দেওয়াল ঘিরে সাজানো রয়েছে, ওম্ মণিপদমে হুং লেখা শিলা, ছোট বড় প্রার্থনা চক্র ভেতরে বাইরে সব জায়গায় নজরে পড়ছে—এই দৃশ্য আমাদের খুব ভাল লেগেছিল। মঠের বড় লাইব্রেরিতে ঢুকলাম। পুঁথিগুলি সমস্তে প্যাকেটে বাঁধা, দেওয়ালে নানা রঙের নানা আকৃতির scrolls (তঙ্কা বা টঙ্কা) ঝোলানো রয়েছে, বুদ্ধ বোধিসত্ত্ব ও প্রাচীনকালের লামাদের ছবি আঁকা। Scrollsগুলির রং খুব উজ্জ্বল

আর আঁকবার ধরনও নিঃসন্দেহে ভারতেরই। তবে ভারতের কোনদিক থেকে এই প্রভাব এল সে বিষয়ে মতভেদ আছে। কারও কারও মতে আবার এ ধরনটা হল মধ্য-এশিয়ার, খোটান প্রভৃতি জায়গার, লাদাক হয়ে পশ্চিম তিব্বতে এসেছে। আর এক মত হল যে এটি মগধ ও বাংলার পালরাজ্যের কৃষ্টির প্রভাব। খ্রিস্টীয় একাদশ শতাব্দীর গোড়ার দিকে ভারতের শ্রেষ্ঠ বৌদ্ধাচার্য অতীশ দীপঙ্করের পশ্চিম তিব্বতে আসবার ফলে এই প্রভাব পালরাজ্যস্থিত বিখ্যাত বিক্রমশীলা মঠ ও বিদ্যালয় থেকে আসা সম্ভব হয়েছিল।

একটু পরে এ বিষয়ে আরও বলতে ইচ্ছা আছে। তবে এই scroll-গুলিতে যে তাত্ত্বিক Imagery স্পষ্ট দেখা যায় তা বোধ হয় খ্রিঃ ৮ম শতাব্দীর মাঝামাঝি নালন্দার পদ্মসম্ভবের অম্লচরদের সঙ্গে এসেছিল। পদ্মসম্ভবের চেলারা ছিলেন তিব্বতের Red Lamaদের অগ্রগী আর অতীশ দীপঙ্কর হলেন Yellow Lama সম্প্রদায়ের প্রতিষ্ঠাতা। Red Lamaরা (রক্তবস্ত্রধারী লামারা) তাত্ত্বিক, আর Yellow Lamaরা (পীতবসনধারীরা মহাযানী)। তবে তিব্বতের মহাযানও তাত্ত্বিক প্রভাবান্বিত। তিব্বতী শিল্পে তাই তন্ত্রের ছাপ অক্ষুণ্ণ রয়েছে যেমন এ রয়েছে তিব্বতী জীবনের আরও অনেক বিষয়ে। যাই হোক এই হল আমাদের বৌদ্ধমঠের (ধ্বংসভূতপের নয়, সজাগ সক্রিয় লামামঠের) প্রথম পরিচয়। এরপর আরও দূরদেশে বৌদ্ধমঠ দেখবার সৌভাগ্য হয়েছিল। তিব্বতী ইট চাও (Brick tea) সেদিন প্রথমবার চোখে দেখলাম। এর প্রথম পরিচয় স্মৃতির নয়। ইটের গড়ন আর ইটেরই মত শক্ত চায়ের ডেলা হামানদিস্তায় গুঁড়ো করে তারপর অনেকক্ষণ জলে সেদ্ধ করে মাখন (চমরীর দুধের) ও oat-এর ছাতু খুব ভাল করে গুলে খেতে হয়। বাসি মাখনের গন্ধ তো গোড়ায় গোড়ায় অসহ্য বোধ হত। তিব্বতীদের এ চা আহার ওষুধ দুই-ই। ঠাণ্ডা দেশে এরকম পানীয় ও খাত্তের একত্র মিশ্রণ ভালই। তকলাকোট থেকেই আমরা ‘খেচরনাথ’ দেখে এলাম। হিন্দুসন্ন্যাসীরাই এই নাম দিয়েছেন। গুঁরা এখানকার ত্রিমূর্তিকে রাম, লক্ষ্মণ, সীতা বলে পূজা করেন। বস্তুতঃ এ হল বুদ্ধ, ধর্ম সন্ধ্য। ত্রিমূর্তিটি দেখবার মত—সেখানকার লোকদের মতে গুটি মানুষের হাতে তৈরী নয়।

ঐখানেই এক গুস্তায় (গুহা?) একজন লামার দর্শন পাওয়া গেল। শুনলাম যে গুঁর বয়স আশীর ওপর, দেখলে বোধ হয় চল্লিশ বছরের শক্তসমর্থ রীতিমত পালোয়ান। মুখের ভাবটিও শিশুর মত। কুমাদেবী তাঁকে বললেন যে আমরা বহুদূর থেকে তীর্থযাত্রী এসেছি—আমাদের কিছু বলবেন কি? একটু

হেসে উনি বললেন যে এ সংসারে ভক্তির মত আর কিছুই নেই। সুনলাম যে সমস্ত নীত উনি ঐ ‘গুমফা’র ভিতর আরও একটি ছোট গুমফায় ধ্যানস্থ হয়ে কাটিয়ে দেন। পশ্চিম তিব্বতে অনেক লামার দেখা পেয়েছি—এমন সৌম্য-মূর্তি লামা কিন্তু আর দেখিনি।

২৪শে জুলাই (১৯২২) আমাদের তিব্বত ভ্রমণের একটি স্মরণীয় দিন। বোড়া ও বুকুর পিঠে তাকলাকোট মণ্ডীতে কেনা তিব্বতী ‘দান’ (কার্পেট) বেশ বাহার করে পেতে আমাদের দুটি বন্দুক, একটি পিস্তল ও পাঁচটি কুকুর সকলকে দেখিয়ে আমরা মানস সরোবর ও কৈলাস অভিমুখে যাত্রা আরম্ভ করলাম। অস্ত্র-শস্ত্র দেখাবার উদ্দেশ্য ছিল ডাকাতদের হাত থেকে পরিজ্ঞাপন পাবার। এ অঞ্চলে এই সময় ডাকাতদের উপদ্রবের বিশেষ ভয়। তীর্থযাত্রী ও লাসার দিক থেকে সদাগরেরা আসে জিনিসপত্র নিয়ে পশ্চিম তিব্বতের মণ্ডীতে বিক্রী করবার জন্তে—সুতরাং ডাকাতদের এইটিই হল মরসুম—এমন সুযোগ বছরে আর কোনও সময় হয় না। তবে এদের বন্দুক হল সপ্তদশ শতাব্দীর, পাঁচ-ছয় মিনিট লাগে বারুদ গাদ্‌বার জন্তে, তারপর ক্যামেরা স্ট্যান্ডের মত একটা ত্রিপয়ে চড়িয়ে সলতে সংযোগে আঙুন ধরিয়ে গুলি ছুঁড়তে হয়। যাদের কাছে আজকালকার বন্দুক আছে তারা এতক্ষণে ওদের দলকে দল সাফ করে দিতে পারে। ওরা সেইজন্তে যাদের কাছে আধুনিক অস্ত্রশস্ত্র আছে তাদের ত্রিসৌমানা মাড়ায় না। আমাদের এই বন্দুক ও পিস্তল প্রদর্শনী সত্যি খুব কাজ দিয়েছিল।

এই অশ্বারোহী ও বুকুর আরোহীদের দল কর্ণালী পার হয়ে একটি ছোট উপত্যকার মধ্যে ঢুকলো। এ জায়গায় কিছু ওটের (oat) চাষ হয়—পশ্চিম তিব্বতে এরকম চাষের ক্ষেত খুব কমই আছে। কর্ণালী নদীটি ছোট কিন্তু খরশ্রোতা—শ্রোতের এতটা শক্তি আছে যে হিমালয় ভেদ করে উত্তরপ্রদেশে সরযু (‘সরজ’—মানস সরোবরের যার জন্ম) নাম নিয়ে অযোধ্যাপুরীর পা ধুয়ে গঙ্গায় গিয়ে মিশেছে।

তাকলাকোট থেকে মাইল তিনেক এগিয়ে আমরা টোয়া গ্রামে পৌঁছলাম। এইখানে প্রসিদ্ধ ভোগরা সেনাপতি জোরাওর সিংএর সমাধি দেখা গেল। এটি একটি লাল রঙের স্তূপের মত—তিব্বতীরাও এটিকে সযত্নে রেখেছে। আর জোরাওর সিংকেও এরা ভোলেনি—তিনি পরম শত্রু হলেও অসামান্য বীর ছিলেন, সেইজন্তু তাঁর মৃতদেহ টুকরো টুকরো করে অনেক মঠে ও অগ্নি জায়গায় ভক্তিবরে তুলে রাখা হয়েছে। ১৮৪২ (খ্রিঃ) সালে এই ভোগরা রাজপুত

সেনাপতি (পঞ্জাব কেশরী মহারাজ রণজিৎ সিংএর মন্ত্রী রাজা গোলাব সিংএর বিশ্বস্ত সেনাধ্যক্ষ) লদাখ পুরোপুরি জয় করে পশ্চিম তিব্বত আক্রমণ করেন । মানস সরোবর পর্যন্ত পৌঁছে যান । এখানে একরাত্রি অনবরত তুষারপাতে শিখ ও ডোগরা সৈন্য শীত সহ করতে না পেয়ে বন্দকের কুঁদো জ্বালিয়ে (ওখানে তো বড় গাছ নেই যে জালানী কাঠ পাবে) প্রাণ বাঁচালো । সকাল হতে না হতে তিব্বতীরা শিখ শিবির আক্রমণ করলো । সন্মুখে জোরাওর সিং এই মানস সরোবরের যুদ্ধে নিহত হলেন । কিন্তু তাঁর বীরত্বের কদর ,তিব্বতীরা নিজেদের প্রথা অনুসারে করেছে ।

সেদিন আমরা যখন তাঁবু খাটাচ্ছিলাম সন্ধ্যাবেলা, একটি জংলী চেহারার তিব্বতী এসে আমাদের ঝুঝুঙালাকে খুব চটেচিয়ে কি সব জিজ্ঞেস করলে । তার উত্তর শুনে বোধ হয় টের পেলে যে এদের কাছে যা আছে তাদের ২০০ বছর আগের গাদা বন্দুক এখানে কিছুই করতে পারবে না । ও লোকটা নিশ্চয়ই ডাকাতের দলের লোক ছিল । দু-একটা গুরুতর দল এরপর আমাদের পাশ কাটিয়ে চলে গেল, কিছু না বলে ভাল করে দেখে গেল ।

২৫শে জুলাই আমরা মাক্কাতা পাস-এ (Pass) পৌঁছলাম । সামনে পেছনে, পাশে আমরা যা দেখলাম সে অতুলনীয় দৃশ্য ! পাশেই ডানদিকে মাক্কাতা পর্বত—বরফ ঢাকা যেন দৈত্যরাজের বিরাট তাঁবু—সেইজন্তে এর নাম হল ‘গুন্ডুলা’ (তাঁবু) মাক্কাতা । সামনে কৈলাস পর্বতমালা, তার মাঝামাঝি কৈলাসশিখর সাদা মার্বেল পাথরের গম্বুজের মত দেখাচ্ছে । পেছনে হিমালয় তরঙ্গের পর তরঙ্গ তুলে, মাথায় সাদা ধপধপে ফেনা, যতদূর দেখা যায় পূর্ব থেকে পশ্চিম ঘুরে গেছে । আর প্রায় পায়ের নীচে রাবণ হ্রদ বা রাক্ষসতাল, তার গভীর নীল জলের বুকে অসংখ্য ছোট ছোট দ্বীপ । আর ওদিকে হ্রদটি কৈলাসের চরণতল ছুঁয়েছে । উত্তরে কৈলাস, দক্ষিণে হিমালয়, চোখের সামনে একটি, মুখ ফেরালেই অল্পটি, আমার মনে হলো দুর্গা এইখান দিয়েই পূজার সময় বাপের বাড়ি যান, আর এইখান দিয়েই আবার নিজের বাড়ি কৈলাসে ফিরে আসেন ।

খানিকক্ষণ এই অপূর্ব পর্বত, হ্রদ, উপত্যকার সমাবেশ দেখে আমরা মাক্কাতা গিরিদ্বার থেকে নেমে রাক্ষসতালের তীরে এসে গেলাম । এ হ্রদের জল খাওয়া বারণ,—কারণ রাবণ কৈলাস উপড়ে লঙ্কা নিয়ে যাবার বৃথা চেষ্টা করে ঘর্মান্ত কলেবরে এই হ্রদে ঝাঁপিয়ে পড়েছিলেন তাই এর নাম রাক্ষসতাল বা রাবণ হ্রদ আর এর জল অশুদ্ধ । অনেক বারণ সত্ত্বেও আমরা চুপিচুপি রাক্ষস-

তালের জল খেয়েছিলাম, আর খেয়ে খুব তৃপ্ত হয়েছিলাম। তেঁটা পেয়েছিল আর যদিও অনেকবার আমাদের বলা হয়েছিল যে ঘণ্টা দুয়েক পরেই তোমরা মানস সরোবরের জল খেতে পাবে, আমরা অত বিধিবিধান মানতে রাজী ছিলাম না।

সমুদ্রতল থেকে প্রায় পনের হাজার ফুট উচ্চে এ ছুটি বড় হ্রদের মধ্যে একটি ছোট পাহাড় ব্যবধানস্বরূপ রয়েছে। এই পাহাড়ে উঠতে তারপর আবার ওর উনটোপিঠে নামতে ঘণ্টা দুই লেগেছিল আর আমরা হাঁপিয়েও পড়েছিলাম। তবে কষ্ট সার্থক হল। সত্যিই আমরা সেই ব্রহ্মার মানসস্রষ্টি, কবিকল্পনার বিষয়বস্তু, হিন্দু ও বৌদ্ধ দুয়েরই পূজ্য, কৈলাস ও মাঙ্কাতা দুটি বিরাট ভুবারমণ্ডিত পর্বতের মধ্যে অবস্থিত, হ্রদর বিস্তৃত এই গাঢ় নীল হ্রদের দর্শনলাভ করলাম। এ যেন একটি স্বপ্নাতীত ব্যাপার। একবার চারিদিক দেখে নিয়ে, ভক্তিভরে মাথায় জল দিয়ে, পেট ভরে সরোবরের জল খেয়ে নিলাম।

তারপর বলা বাহুল্য, পূর্বজন্মের (এ জন্মের তো নিশ্চয়ই নয়) পুণ্যফলে মানস সরোবরে স্নান করা গেল। এতটা উঁচুতে জল যত ঠাণ্ডা হবে ভয় ছিল তত ঠাণ্ডা বোধ হল না। এখানে জলের নীচে ও পাশেও উষ্ণ প্রশ্রবণ আছে। একটি তো আমরাই দেখেছি, খুব গরম জল ফোয়ারার মত সাত-আট ফুট ওপরে উঠে গড়িয়ে পড়ছে। তাই আমাদের স্নান খুবই আরামদায়ক হয়েছিল। এই সব উষ্ণ প্রশ্রবণগুলি না থাকলে মানস সরোবর বছরের বেশীর ভাগ সময় জমাট বরফ হয়ে থাকত। আজকালও মাস পাঁচেক সরোবরের জল জমে যায়।

স্নানের পর সঙ্গীরা পাশেরই একটি গুম্ফায় (ছোট তিব্বতী মঠ) গেলেন। আমি সঙ্গে করে রবিঠাকুরের চয়নিকা (বোধ হয় প্রথম সংস্করণ ১৩১৫ সালের) এনেছিলাম, এখন ‘মানসভ্রমণ’ কবিতাটির এই অংশ মন দিয়ে পড়লাম :

চারিদিকে শৈলমালা,

মধ্যে নীল সরোবর নিস্তব্ধ নিরালা

ক্ষুটিক নির্মল স্বচ্ছ ; খণ্ড মেঘগণ

মাতৃস্তনপানরত শিশুর মতন

পড়ে আছে শিখর আঁকড়ি ; হিমরেখা

নীল গিরিশ্রেণী 'পরে দূরে যায় দেখা

দৃষ্টি রোধ করি ; যেন নিশ্চল নিবেদ

উঠিয়াছে সারি সারি স্বর্গ করি ভেদ

—যোগমগ্ন ধূজটির তপোবনছায়ে ।

কবির বর্ণনা ও সামনে যা দেখছি এ দুয়ের খুব মিল বোধ হল, তবে ‘হিমরেখা’ এখানে ‘দূরে যায় দেখা’ নয়—খুব কাছেই যায় দেখা । বাস্তবিক, পাশে পাশে বরফের পাহাড়—বিশেষতঃ দক্ষিণ ও উত্তরে মাক্কাতা ও কৈলাসের বিরাট স্তূপ-শিখরের ঠিক মাঝখানে—মানস সরোবর যেন প্র্যাটিনামের আংটির মধ্যমণির মত একটি সুবৃহৎ নীল হীরক । সকাল থেকে সন্ধ্যা পর্যন্ত আকাশের রঙের সঙ্গে সরোবরের রঙ এমন সুন্দর বদলায়, কখনো সাদা, পর পর হালকা নীল, ঘোর নীল, নীলচে সবুজ । তিনদিকে হিমগিরি গায়ে যে মেঘগুলি শুয়ে থাকে তাদেরও রঙ চমৎকার বদলাতে থাকে । দূরে দূরে অসংখ্য জলচর পাখী দেখা গেল । কাছাকাছি রাজহংস দেখতে পাইনি—তবে রাজহংসের ডিম দেখেছি ও খেয়েওছি । ঠিক বাদিকেই (ছয়-সাত মাইলের তফাতে) রাক্ষসতালের অতগুলি ছোট ছোট দ্বীপ তো রাজহংসের ডিমের খোলায় ভরে গিয়ে (বহু বছরের জড়ো করা) দূর থেকে যেন মার্বেল মোড়া রয়েছে দেখায় । শেরিং সাহেবের বইয়ে পড়েছি যে চীন সম্রাটকে লাসা থেকে প্রতি বৎসর মানস সরোবর ও রাক্ষসতাল যাত্রী রাজহংসের ডিমের ডালি পাঠানো হত । (যাত্রী এইজন্তে বলা হয়েছে কারণ রাজহংসরা দস্তুরমত খুব দূরে দূরে যাত্রা করে ।) এই হংসরা শীতের আগেই ক্যাম্পিয়ান সমুদ্রের দিকে চলে যায় আর বরফ পড়া বন্ধ হলে মানস সরোবরে ফিরে আসে । তিব্বতীরাও রাজহংসদের পবিত্র ও স্তূতরাং অবধা বলে মনে করে । রাজহংস শিকার করলে মৃত্যুদণ্ড দেওয়া হয় ।

সেদিন আমাদের মধ্যাহ্ন ভোজনটি খুব ঘটা করে হলো । রুমাদেবী তো পরিশ্রমের পর বিশ্রামে বিশ্বাস করেন না, এইটুকু সময়ের মধ্যেই জ্বালানি কারাগানা (কাঠ তো নেই সবুজ কারাগানা (Caragana) বাড় দিয়েই আগুন জ্বালতে হয়), চমরীগরুর দুধ, রাজহংসীর ডিম, ইত্যাদি ঘুরেফিরে যোগাড় করে এনেছেন । আমি ছানার পায়ের রান্নায় সিদ্ধহস্ত এরূপ একটু অহঙ্কার ছিল—তাই আমি সঙ্গীদের ঐ উপাদেয় ‘খীর’ (পঞ্জাবে পায়ের স্কীর সবই খীর বলেই চলে) খাওয়াব স্থিবি করলাম । তবে চমরীর দুধ দিয়ে তো পায়ের কখনও করিনি । দুধে ছানার টুকরো ছাড়তেই সব দুধটাই কেটে গেল । এই দেখে আমার বন্ধুরা বেশ রাগ করলেন । আমি আর কি করি, অনেকক্ষণ জ্বাল দিতে দিতে ঐ তরল পদার্থটিকে থানিকটা হালুয়ার মত করলাম । নেহাৎ মন্দ হয়নি খেতে—আমি গুর নাম দিয়েছিলাম ‘গুরলা’ সন্দেহ । গুরলা মাক্কাতা তো পাশেই বিরাজমান ।

কিন্তু আর কখনও আমার হাতে ছুঁধের হাঁড়ির জিন্মা দেওয়া হয়নি আর আমি এ যাত্রায় আর ছানার পায়ের বন্ধুদের খাওয়াতে পারিনি।

সে রাত্রে খুব ঝড় ও বৃষ্টি হয়ে গেল। এখানে এইরকমই হয়ে থাকে, সোয়েন হেডিন (Sven Hedin) তাঁর 'ট্রান্স হিমালয়াজ্'-এ (Trans Himalayas) এর বেশ বর্ণনা দিয়েছেন। ঝড়ের সঙ্গে হাঁসেরা (দিনের বেলায় তো এরা অনেক দূরে ছিল, ভাল করে দেখাই যায়নি) ঝড়েরই মত উড়তে লাগলো। মনে হচ্ছিল যেন ঘন ঘন বাঁশি বাজছে। আমাদের তাঁবুর মধ্যে বৃষ্টির ঝাপটা আসতে লাগলো। যাহোক ঘণ্টা দুই-তিন পরে সব থেমে গেল। সকালবেলা দেখা গেল আকাশ পরিষ্কার, গুরলা মাস্কাতা রোদদূরে বক্‌বক্‌ করছে। ঝড়ের একমাত্র চিহ্ন হ্রদের তীরে কিছু ছোট মাছ মরে পড়ে রয়েছে। তিব্বতীরা সম্বন্ধে এই মাছ কুড়িয়ে নিয়ে যায়। এগুলি শুকিয়ে রাখা হয়, কারুর অসুখবিসুখ হলে তার ঘরে এ মাছ পোড়ালে এদের বিশ্বাস সব রোগ সেরে যায়।

মানস সরোবর (তিব্বতী ভাষায় 'মাবাং') সমুদ্রপৃষ্ঠ থেকে ১৫ হাজার ফুট উঁচু, দৈর্ঘ্য ১৭ মাইল, প্রস্থে ১১ মাইল কি আর একটু বেশী। এখানকার উচ্চতার জন্য হাওয়া পাতলা তাই প্রায় বারো মাইল চওড়া সরোবরের ঐ দিকটা বেশ স্পষ্ট দেখা যায়, মনে হয় যে সাত-আট মাইলের বেশী তফাৎ নয়।

২৮শে জুলাই। আমরা এবার কৈলাসের দিকে এগুলাম। মানস সরোবরের উত্তর-পশ্চিম কোণে বেশ বড় উষ্ণ প্রস্রবণ দেখলাম, আর সেইখানে একটা নানা (তখন শুকনো) পার হলাম। বছরের কোনো সময়ে এই নানা দিয়ে মানস সরোবরের জল রাক্ষসতালে গিয়ে পড়ে। এই জায়গায় খুব মশা—তিব্বতে আর কোনো জায়গায় মশা দেখা যায়নি। কৈলাস ও এই দুটি হ্রদের মাঝখানে অনেকটা সমতল ভূমি আর এখান থেকে কৈলাস শিখর (২১৮০০ ফুট উঁচু থেকে) বড় চমৎকার দেখায়। নীচের ভাগ কালো পাথরের, তার ওপর যেন সাদা মার্বেলের একটি বড় বাটি উপুড় করে রাখা আছে। কালো পাথরের গায়ে তিনটি সমান্তরাল রেখা বেশ স্পষ্ট দেখা যায়। হিন্দু সন্ন্যাসীদের মতে ওগুলি রাবণ যে দড়ি দিয়ে পর্বত বেঁধেন করে কৈলাস ওপড়বার চেষ্টা করেছিল এ সেই দড়ির দাগ। নিশ্চয়ই ভূতত্ত্ববিদরা ওকে পাথরের ভিন্ন ভিন্ন স্তর বলবেন। আর একটি অদ্ভুত দৃশ্য আছে। কৈলাস পর্বতের শিখর থেকে ঠিক সিঁড়ির মত নেমে এসেছে যেন বরফ কেটে ধাপে ধাপে।* আর শিখরের নীর্ধদেশে একটু ছোট বরফের স্তুপের বা টিবির মত দেখা যায়—এইখান থেকেই এই বরফের সিঁড়ি নেমে

এসেছে কালো পাথরের স্তর পর্যন্ত। তীর্থযাত্রী সন্ন্যাসীরা তো এর বেশ ব্যাখ্যা করেছেন—শিখরের ওপর ঐ উঁচু জায়গাটি হল হর-পার্বতীর কুটির—আর ঐ সিঁড়ি দিয়ে গুরা নীচে নামেন আর আবার ওপরে উঠে যান। ভূতত্ত্ববিদরা এই সিঁড়িকে বোধ হয় গ্লেসিয়ার বলে আমাদের বুঝিয়ে দেবেন। যাই হোক, এই তিনটি কালো পাথরের ওপর তিনটি সাদা দাগ শিখরের ঠিক ওপরের ঐ স্তূপ, আর সেখান থেকে নীচে নামবার সিঁড়ি—এসব মিলিয়ে কৈলাসের বৈশিষ্ট্য ভোলবার নয়। আবার কৈলাসের দু' পাশের পর্বতশৃঙ্গগুলি সত্যিই অদ্ভুত ধরনের—কালো রঙ (উপরে বরফের সাদা ছিট), মাঝের মাথার গড়নের—ওরকম শিখর হিমালয়ে কোথাও দেখিনি। চাঁদনী আলোতে কৈলাসের ডাইনে বাঁয়ে ঠিক ভূতের মত দেখায়। হয়তো প্রকৃতির এইসব লীলাখেলারই জন্তু শিবের ভূত-প্রেত অহুচর, রাবণের লঙ্কায় কৈলাস নিয়ে যাবার চেষ্টা, ইত্যাদি প্রাচীন ধারণা-গুলি গড়ে উঠেছে।

'বর্খা'র (এটি হল এই ছোট তিব্বতী বস্ত্রীর নাম) সমতল ভূমি থেকে আমরা কৈলাসের এই অপরূপ দৃশ্য খুব ভাল করে দেখেছিলাম। আর একটু এগিয়ে গিয়ে আরও ভাল করে দেখতে পাব এই আশায় বর্খাতে কৈলাসের ফটো তোলা হল না। কিন্তু দুর্ভাগ্যের বিষয় কিছুক্ষণ পরেই মেঘে ঐ দিক ঢেকে গেল, দু'দিন পরে বরফও পড়লো। আগস্ট মাসে রীতিমত তুষারপাত। কৈলাস দর্শন আরেকবার আমাদের আর হল না। আর ফটো তোলা হলো না। কৈলাসের যে সুন্দর ছবিটি অধ্যাপক কশ্যপ এর পর আমাদের দিয়েছিলেন এটি তাঁর ১৯২৬ সালের পশ্চিম তিব্বতে ভ্রমণের সময় তোলা ছবি।

৩০শে জুলাই আমরা দার্চিন থেকে কৈলাস পরিক্রমা আরম্ভ করলাম। আমাদের সব মালপত্র (বিছানা ও দু-তিনদিনের খাওয়াদাওয়ার ব্যবস্থা ছাড়া) একটি তিব্বতী বৃদ্ধা স্ত্রীলোকের জিন্মায় রেখে, তাঁরি দেওয়া এক-এক বাটি গরম দুধ খেয়ে আমরা বেরিয়ে পড়লাম। সন্ধ্যার আগেই আর একটি গুম্ফার কাছে পৌঁছে তাঁবু খাটানো হলো। এইসময় মিনিট খানেকের জন্তু আমরা কৈলাস শিখরের উত্তর দিক (পেছনের দিক) স্পষ্ট দেখতে পেলাম—সামনের (দক্ষিণের) দিকের মত একেবারেই নয়। এ দিকটি প্রায় অনেকটাই খাড়া কালো পাথর—বরফ তত বেশী নেই, দড়ির দাগ ও সিঁড়ির ধাপও তত স্পষ্ট নয়। খিদে বেশ পেয়েছিল, ভাল করেই খাওয়া হল, যদিও আগুন জ্বালতে খুব দেরী হল। রাত্রে বৃষ্টি আরম্ভ হল, মাঝরাতে ঝুপঝুপ করে বরফ (snow) পড়তে শুরু হল—আর

সমস্ত রাত (৩০শে জুলাইয়ের রাত) তুষারপাত চললো ।

৩১শে জুলাই (১৯২২) । বরফের চাপে তাঁবু খাটিয়ে রাখা গেল না । অন্ধকার থাকতে থাকতেই তাঁবু নামিয়ে কৈলাস পরিক্রমা শেষ করতে হলো । অন্ধকারেই টাটকা নরম বরফের উপর ২।৩ মাইল হাঁটবার পর স্বর্ঘ উঠলো । সন্ত-পড়া তুষারের উপর রোদ্দুর চোখ বলসে দিল । যতদূর দেখা গেল সব সাদা হয়ে গেছে । তবে বাক্মকে রোদ্দুর আর আকাশ পরিষ্কার ছিল বলে আমাদের খুব হুতি হলো—আমরা বরফের বল তৈরী করে এ ওর গায়ে ছুঁড়তে লাগলাম । তিব্বতী বুঝুগুয়ালারা বরফের বলসানি থেকে চোখ বাঁচাবার জন্তে চমরীর লোম দিয়ে ঝালরের মত করে নিয়ে ওদের নিজের ও আমাদের চাকরদের কপালে বেঁধে দিলে ।

এবার আমরা গৌরীকুণ্ডে বরফের আর একটি অভাবনীয় দৃশ্য দেখলাম । ছোট্ট গোলাকার হ্রদটি বরফে ঢাকা, এখানে বরফ আর গলে না, চার-পাঁচ মিনিট অন্তর ওপরের কৈলাস শৃঙ্গ থেকে বরফের বড় বড় টুকরো পড়ছে । কি তার গুরুগম্ভীর শব্দ, আর হ্রদের বরফও সেখানটায় যেখানে ওপর থেকে বরফের চাকড় পড়ছে, সশব্দে ফেটে যাচ্ছে । এ শব্দ ছাড়া আর সব নিস্তব্ধ, পশুপক্ষীর কোনও সাড়াশব্দ নেই । এমন থমথমে একটা ভাব আগে কখনও অনুভব করিনি ।

এই গৌরীকুণ্ডে পার্বতী আবক্ষ নিমজ্জিত হয়ে তপস্বী করেছিলেন কৈলাস-পতি মহাদেবকে স্বামীরূপে পাবার জন্তে । এটি মহাপবিত্র তীর্থস্থান, এর তিব্বতী নাম ‘সোকাওলা’ । এই বরফ-জমা হ্রদে পৌঁছবার জন্তে আমাদের যে দলমালা গিরিপথ থেকে নেমে আসতে হয়েছিল, সেই দলমা গিরিপথের বিষয় আমাদের দলের নেতা অধ্যাপক কশুপ কলকাতার এসিয়াটিক সোসাইটির জার্নালে ১৯২৬ সালে কিছু লিখেছিলেন । তাই থেকে এখন কিছু বলতে চাই । কৈলাস পর্বতমালা থেকে একটি সুউচ্চ শাখা দক্ষিণ দিকে থানিকটা বেরিয়ে এসেছে—কৈলাস-শিখর এই ridge বা শাখার উপর অবস্থিত । কৈলাস পরিক্রমার সময় এই পর্বতশাখা দলমা লা (La = Pass) টপকে যেতে হয় । দলমা লা-র উচ্চতা ১৮,৬০০ ফুট—এইটিই হলো আমাদের এই যাত্রার সবচেয়ে উঁচু জায়গা । গৌরীকুণ্ড থেকে যখন আবার আমরা এই পর্বতশাখায় ফিরে এলাম তারপর আর আমাদের চড়াই চড়তে হয়নি । পরিক্রমার পথ খুব আন্তে আন্তে নামতে লাগলো । পথ চলার কষ্ট যদিও কম হলো কিন্তু রাত্রিরে আবার ঝড় ও অল্প

তুষারপাত শুরু হলো। একটি গুফার নীচে তাঁবু লাগিয়ে আশ্রয় নেওয়া হলো। সবাই খুব হাঁফিয়ে পড়েছিলাম—আর সে রাতে আমরা শিবের উদ্দেশ্যে ‘অকাল শিবরাত্রি’র উপোস করলাম। আমাদের রসদ ফুরিয়ে গিয়েছিলো। গরম জলে দুধ চা ছেড়ে দিয়ে দু-তিন বাটি এই চা খেয়ে রাত কাটানো গেল। পরের দিন ভোরবেলা আবার নামতে লাগলাম। তখন আমরা কৈলাসের দক্ষিণ দিকে এসে গেছি। মাঝে মাঝে কুয়াশার মধ্যে দিয়ে নীচে মানস সরোবর দেখা যাচ্ছে আর দু-এক বার গুরলা মাঙ্কাতার great pyramidও দেখতে পেলাম। সত্যিই সে অলৌকিক দৃশ্য! শীঘ্রই আমরা কৈলাসের চরণমূলে এসে পড়লাম—কৈলাস পরিক্রমা শেষ হলো। ঠিক এইসময় আমি একটা কাণ্ড করে বসেছিলাম। উৎরাই শেষ করে খুব খেতে নেমে একটি বরনায় মুখ ধোওয়ার জন্তে হেঁট হয়েছি অমনি অনাহার ও পথের কষ্টের দরুন অজ্ঞান হয়ে পড়লাম। যখন জ্ঞান ফিরে পেলাম দেখলাম আমার বন্ধুরা আমার সামনে গরম খাবারের থালা রেখে দিয়েছেন। বিনা বাক্য-ব্যয়ে উঠে বসে পেট ভরে খেলাম আর খাওয়া শেষ করে সুস্থ শরীরে আবার খুব পিঠে চড়ে সঙ্গীদের সঙ্গে দার্চিনের দিকে ফিরে চললাম।

১লা আগস্ট। দার্চিন থেকে আমাদের জিনিসপত্র নিয়ে আমরা এবার পশ্চিম-মুখে হয়ে চললাম। ঠিক হয়ে গেছে যে পথ দিয়ে এসেছিলাম সে পথ দিয়ে আমরা ফিরবো না। আমরা এখন পশ্চিম তিব্বতের আরও ভিতর দিকে যাব। তারপর নিতি বা মানা বা আরও পশ্চিমে কোনও গিরিপথ দিয়ে দেশে ফিরে যাব। সন্ধ্যাবেলা আমরা ললিংতা পৌঁছলাম।

একটি ছোট পুকুরের মত জলাশয়ে, ছোট ছোট পাহাড় ঘেরা—আর এই থেকে একটি ছোট নালা—বেশ জলভরা—বেরিয়ে পশ্চিমের দিকে এগিয়েছে। একটি লং জাম্প করলে এই নালার মত জলপ্রবাহ বেশ টপকানো যায়। এই ছোট্ট নালাটিই, এর পাশ দিয়ে দিন পনেরো যেতে যেতে, বেশ একটি নদী হয়ে উঠলো—আর পশ্চিম তিব্বত ছাড়ার আগেই একে বিশালকায়মত লজ্জ রূপে দেখা গেল। ভূতত্ত্ববিদেরা বলেন যে মানস সরোবরের জল কিছুটা সেই নালা, যা আমরা শুকনো অবস্থায় হ্রদের উত্তর-পশ্চিম কোণে দেখেছিলাম, সেই নালা দিয়ে আর বেশীর ভাগ মাটির নীচে দিয়ে রাক্ষসতালে এসে পড়ে, তারপর রাক্ষসতাল থেকে আবার মাটির নীচে দিয়ে এই ললিংতায় এসে পৌঁছয়। তাই ললিংতা আকারে এত ছোট হলেও ওর জল অফুরন্ত। আর উত্তর দিক থেকে কৈলাস পর্বতমালায়

বরফ গলে অনেক ছোট ছোট স্রোত এই নালায় মত স্রোতে এসে পড়ায় খুব তাড়াতাড়িই এটি অত বড় নদী হতে পেরেছে। একজন ইংরাজ লেখক, ধরমশালায় তাঁর বাড়ি ছিল (আর ধরমশালায় বিষয় খুব ভাল লিখেছেন), বলেন যে সত্‌লজ্‌ই হলো কুবলাই থানের *Stately Pleasure Dome*, যেটি *Sacred River Alph*-এর তীরে তৈরী হয়েছিল—যে *sacred river ran through caverns measureless to man down to a sunless Sea*. কুবলাই খাঁ তিব্বত জয় করেছিলেন, পশ্চিম তিব্বতে সত্‌লজ্‌ তীরে প্রাসাদ নির্মাণ করতে তিনি নিশ্চয় পারতেন—তবে সত্‌লজ্‌ তো কোনও অস্বর্ষস্পৃশ্য সমুদ্রে গিয়ে পড়েনি।

যাই হোক, আমরা এখন যতটা পারি এই সত্‌লজ্‌জের ধার দিয়ে পশ্চিম তিব্বতের ভেতর ন্যূনাধিক ২৫০ মাইল এগিয়ে চললাম। এ অঞ্চলকে নীতল মরুভূমি বলা হয়, চড়াই ও উৎরাই কম, কিন্তু যেখানে কৈলাস পর্বতমালা থেকে স্রোত নেমে দক্ষিণ দিকে যাচ্ছে সেই স্রোতগুলি পার হওয়া বড়ই কষ্টসাধ্য ব্যাপার হয়েছিল। এই মালভূমির জমি তো তেমন শক্ত নয় সেইজন্য এই স্রোতগুলি গভীর খাদ কেটে উত্তর থেকে দক্ষিণে চলেছে। এখানে নামাও শক্ত, চড়াও শক্ত। ঘোড়া বা কুকু চড়ে ওঠা নামা সত্যি বিপজ্জনক—তাই এসব খাদে (রোজ দু-একটা পথে পড়তো) নিজেদের হাত-পাই ছিল ভরসা। সন্ধ্যাবেলা যখন তাঁবু খাটানো হত তখন বিশ্রামের খুবই দরকার হত। ঘুম ভালই হত—রাত্রে ঘুম ভাঙলে চাঁদের আলোতে হিমালয় বড় সুন্দর দেখাতো, ঠিক যেন রূপোর খেলনার লক্ষা লাইন কেউ খেলবার জন্তে বিছিয়ে রেখেছে। পাঠক মনে রাখবেন যে আমরা এখন চোদ্দ-পনেরো হাজার ফুট উঁচুতে আছি, হিমালয়ের একুশ-বাইশ হাজার ফুট উঁচু শিখর এখন আমাদের চোখে মোটে ছয়-সাত হাজার ফুট উঁচু। তবে রাস্তিরে আমাদের একটু সজাগ থাকতে হত, ডাকাতির ভয় তো ছিলই—আবার এখানে নেকড়ে বাঘের উপদ্রব ছিল। একদিন সকালে দেখলাম একটি ঘোড়া মেরেছে, সেই রাত্রেই মারা। আর একদিন মাঝরাাত্রে আমি দেখলাম একটা মস্ত কুকুরের মত কি ঘুরে বেড়াচ্ছে তাঁবুর চারিদিকে। ওটা নিশ্চয়ই নেকড়ে ছিল, ঘোড়ার সন্ধানে এসেছিল। ওরা ঘোড়া পেলে মানুষকে আক্রমণ করে না। এ সব কারণে রাস্তিরে প্রত্যেককে পালা করে দু-তিন ঘণ্টা করে জেগে বিছানায় বসে থাকতে হত।

বলতে ভুলে গেছি, কৈলাস থেকে ফেরবার সময় আমাদের নাগা সন্ন্যাসী

নিজানন্দর সঙ্গে দেখা হয়। তার পর থেকে উনি আমাদের সঙ্গেই থেকে যান। সন্ধ্যাবেলা নিজানন্দ যখন তুলসীদাসের রামায়ণ পড়তেন আমাদের বড়ই ভাল লাগতো। বেশ হাসিখুশী লোকটি ছিলেন, নাগাদের অনেক গল্প আমাদের শুনিয়েছিলেন। পরিধানে তাঁর একটি বাঘছাল ছাড়া প্রায় কিছুই ছিল না, বেশীর ভাগ খালি পায়েই চলাফেরা করতেন। আমরা ঠুঁকে কিছু কাপড় ও এক জোড়া চটিজুতো দিয়েছিলাম, ও সবের ব্যবহার খুব কমই করতেন। এখন উনিই বিশেষ করে আমাদের গাইড হলেন—কারণ রুমাদেবী এদিকটায় বেশী যাওয়া-আসা করেননি।

এইবার আমরা কিয়াংদের দেখা পেলাম। কিয়াং হলো তিব্বতের জঙ্গলী ঘোড়া, দেখতে ঘোড়া জেব্রা ও গাধার মাঝামাঝি জীব। গায়ে জেব্রার মত দাগ দু-একটি আছে—তবে অত স্পষ্ট নয় আর অত বেশীও নয়। লেজ গাধার মত কিন্তু শরীরটা ছোট টাট্টু ঘোড়ারই মত বেশ সূত্রী। বেশী কাছে তো আসে না—দূর থেকে ভারী স্তম্ভর দেখায়, খুব চকর দিয়ে দৌড়ায় ছোট ছোট দলে।

এইরকম এগুতে এগুতে আমরা আগস্ট মাসের গোড়ার দিকে গ্যানিমা মণ্ডী পৌঁছলাম। এটি বেশ বড় মণ্ডী। জোঁহরের ভোটিয়ারা বাগেশ্বর প্রভৃতি পাহাড়ী এপাশ থেকে উল্টাধূয়া পাস্ দিয়ে এখানে আসে জুনের শেষে, আর সেপ্টেম্বরে হিমালয় পার হয়ে দেশে ফিরে যায়। তিব্বতীরা নিয়ে আসে ভেড়ার পাল এখানে, তাদের লোম কাটা হয়, আর ভোটিয়াদের বেচে দেওয়া হয়। সোহাগা আর কালো ছুনও তিব্বতীরা আনে আর এ সবের বদলে ওরা সূতী কাপড় ও গম কেনে। লদাখীরা শুকনো খোমানি আনে এখানে, আর আসকাডু থেকে আসে ছাগলের পশম। এখানে আমাদের দিন পাঁচেক থাকতে হলো নতুন করে বুঝু, টাট্টুর বন্দোবস্ত করতে। আমার জন্মদিন—৭ই আগস্ট—এই গ্যানিমা মণ্ডীতেই পালন করা গেল। মনে নেই কিরকম আয়োজন করা হয়েছিল, বোধ হচ্ছে সেদিন আমরা সবাই হালুয়া খেয়েছিলাম। অমৃতসর থেকে টিনের মুগের ডাল ভাজা ও বিনোলায় লাড্ডু (বিনোলা হলো তুলোর বিচি) আমরা এনেছিলাম। এগুলি খুব সন্তুর্পণে অল্প অল্প করে আমরা খেতাম, অতিথি (কোনও লামা) কেউ এসে পড়লে তাদের মিষ্টিমুখ করানো হত। শীতের সময় এই বিনোলায় লাড্ডু উপকারী ও খেতেও মন্দ নয় (বেশ করে ভাল ঘি ও কিসমিস দিয়ে তৈরী)।

৮ই আগস্ট আমরা গ্যানিমা থেকে বেরিয়ে ছিনকু নদী পার হয়ে শিবচিলম পৌঁছলাম। এটা হল নিতি পাসে ভোটিয়াদের মণ্ডী—তবে এসময় মণ্ডী খালি

হয়ে গেছে—একটিও তাঁবু আর এখানে নেই। পরের দিন কুমাদেবী কাছাকাছি তিব্বতীদের তাঁবু ঘুরেফিরে দুধ ও টাটকা মাখন নিয়ে এলেন। সেখানকার ছোট ছেলেমেয়েদের পুঁতির মালা, ছোট ছোট খেলনা (এগুলি আমরা এই জগ্গেই লাহোর, অমৃতসর থেকে এনেছিলাম) দেওয়া গেল, তারা ও তাদের বাপ-মায়েরা খুব খুশী হল।

এরপর আমরা দাবা হয়ে (এখানকার গুম্ফার দেওয়ালে বেশ সুন্দর স্টাইলে অঙ্গুরা ইত্যাদি আঁকা ছিল) মাংলাও ময়দানে পৌঁছে একটি কিয়াং-এর বড় দল দেখলাম। আমাদের দেখে তারা আরও দূরে গিয়ে চক্কর কাটতে লাগল। কিয়াংদের খেলাই হল এরকম চক্কর কাটা—ছোট চক্কর তারপর বড় চক্কর তারপর হঠাৎ চক্করে tangent-এর মত লাইন টেনে দৌড় দিয়ে অদৃশ্য হওয়া। ১২ই আগস্ট আমরা সতলজের গভীর খাদে আস্তে আস্তে নামতে লাগলাম। এ একটা দুঃস্বপ্ন দেখার মত ব্যাপার—শতলজ্জ এই গভীর খাদের এত নীচে দিয়ে যাচ্ছে যে দেখাই যায় না। নদীর দুধারের পাড় শত শত বছরের নদীর জলের তোড়ে এমনভাবে কাটাছাঁটা হয়েছে যে মনে হয় সারি সারি বিশাল আকার (chorten তিব্বতী ব্লুপ) পাশাপাশি সাজানো রয়েছে। আর কোথাও ঘাস বা গাছপালার চিহ্নমাত্র নেই। মাইলের পর মাইল এই অদ্ভুত দৃষ্টাবলীর মধ্য দিয়ে একলা যেতে যেতে গা ছম্ছম্ করে, বোধ হয় পৃথিবী ছেড়ে যেন কোনও দৈত্যপুরীর মধ্যে ঢুকছি। সম্ভবতঃ চার-পাঁচ মাইল এরকম পাতাল প্রবেশের মত নেমে গিয়ে আমরা অবশেষে থোলিং-এর ময়দানে এসে পড়লাম। পশ্চিম আমেরিকার Grand Canyon-এর যা বর্ণনা পড়েছি মনে হয় সেও এই ধরনেরই ব্যাপার।

থোলিং মঠ (সোয়েন হেডিন-এর Totling Gumpha) পশ্চিম তিব্বতের সবচেয়ে বড় আর সবচেয়ে প্রসিদ্ধ মহাযানী বৌদ্ধমঠ। এখানে তিনটি মন্দির আর একটি ভিক্ষুদের বাসস্থান—একটি খুব বড় মঠ আছে। আমাদের সঙ্গী নাগা সন্ন্যাসী নিজানন্দ বড় মন্দিরে আমাদের নিয়ে গেলেন, সদর দরজায় দু'ধারের চারটি মূর্তি দেখিয়ে বললেন যে এই চারটি চার যুগ—সত্য, ত্রেতা, দ্বাপর ও কলি।

ভিতরে ঢুকেই আরও দুটি বিরাট মূর্তি—জয় ও বিজয়। দেওয়ালে অনেক ছবি, নানারকম নকশা আঁকা আছে। গর্ভগৃহে বিশালকায় বুদ্ধমূর্তি প্রস্থটিত সহস্রদলের উপর আসীন। সৌম্য মূর্তিটির চোখমুখ দিয়ে জ্ঞান ও করুণার ছটা যেন বেরুচ্ছে। খুব উঁচুদরের শিল্পীই এরকম উঁচুদরের কল্পনা করতে পারেন।

নাগা সন্ন্যাসী নিজানন্দের মতে ইনিই আদি বজ্রী। খোলিংই আদি বজ্রীনাথ। শঙ্করাচার্য এখানে এসে দেখলেন যে হিমালয় পারের এই তীর্থস্থান ভারতের তীর্থ যাত্রীদের পক্ষে দুর্গম। তিনিই বজ্রীনাথ হিমালয়ের অন্তর্দিকে ভারতবর্ষে নিয়ে গেলেন। তবে আজও দু-একজন সন্ন্যাসী বহু কষ্ট সহ্য করে হিমালয়ের মানা, নিতি গিরিদ্বার দিয়ে তিব্বতে ঢুকে আদি বজ্রী দর্শন করে যান।

মন্দিরের অগ্নি ঘরগুলিতে আরও অনেক মূর্তি আর দেওয়ালে সুন্দর ছবি ছিল। একটি চতুর্মুখ দেবতা, একটি বৌদ্ধধর্মের দেবী, একটি খুব বড় সূর্যমুখী ফুল হাতে বোধ হয় সূর্যদেব অসংখ্য মূর্তির মাঝে বিশেষ করে আমাদের দৃষ্টি আকর্ষণ করেছিল। দেওয়ালে আঁকা ছবিগুলি আমার তো অজস্র ধাঁচের আঁকা বলে বোধ হল। আর আমার মনে হয়েছিল যে এই সব পুরাকালের সুন্দর জিনিস দেখবার ও বোঝবার জন্য কোনও প্রাচ্যবিজ্ঞাপারদর্শী পণ্ডিতের খোলিংএ আসা বড় দরকার। কে ও কবে এসব চিত্রকলার ও ভাস্কর্যের নিদর্শন রেখে গেছেন তা কি আর আমরা জানতে পারব না!

খানিকটা বছর তিন-চার পরে জানতে পেরেছিলাম। ১৯২৫-২৬ সালে যখন আমি ইউরোপে ভারতের ধর্ম ও সংস্কৃতির এশিয়ার অগ্নি দেশে বিস্তারের বিষয় কাজ করছিলাম, তখন ব্রিটিশ মিউজিয়াম লাইব্রেরীতে বিখ্যাত পর্যটক শরৎচন্দ্র দাসের লেখা 'Indian Pandits in the land of snow' বইটি পেলাম। এইবার জানতে পারলাম যে ভারতের শেষ বৌদ্ধ মহাপণ্ডিত পুণ্যকীর্তি অতীশ দীপঙ্কর পালরাজ্যের বিখ্যাত বৌদ্ধবিহার বিক্রমশীলা থেকে এই খোলিংএ এসেছিলেন ১১ শত খ্রীষ্টাব্দের মাঝামাঝি। পশ্চিম তিব্বতে তখন গুগে নামের এক রাজ্য ছিল, গুগের রাজা Ye-Ses-Od (দ্যে সে ওর) তাঁর রাজ্যে তান্ত্রিক প্রভাব বেশী হয়ে যাচ্ছে দেখে উদ্ভিগ্ন হয়েছিলেন। তাঁর ইচ্ছা ছিল যে পশ্চিম তিব্বতে মহাযান ধর্মের প্রচার হয়। তিনি শুনেছিলেন যে ভারতবর্ষে তখন অতীশ দীপঙ্কর শ্রেষ্ঠ বৌদ্ধাচার্য—তাঁর বিজ্ঞাবুদ্ধি আর পুণ্যচরিত্র কেবল ভারতে নয় সুদূর স্ত্রমাত্রা, যবদ্বীপ পর্যন্ত প্রখ্যাত ছিল। স্ত্রতরাং রাজা বিক্রমশীলা বিহারে অতীশকে তিব্বতে আসবার জন্য নিমন্ত্রণ করে পাঠালেন। অতীশও তাঁর সম্মতি প্রকাশ করলেন এই তিব্বত যাত্রার প্রস্তাবে। কিন্তু বঙ্গ, মগধের পাল নৃপতি মহীপাল একেবারে এই প্রস্তাব অগ্রাহ্য করলেন। তিনি অতীশকে বিশেষ করে বোঝালেন যে তাঁর ভারতে থাকা অত্যন্ত প্রয়োজনীয়। অতীশ ভারতবর্ষ ছাড়লে ভারত থেকে বৌদ্ধধর্মও লোপ পাবে। অতীশের সেবার যাওয়া হল না।

তারপর যখন তিব্বতরাজ আরও দু'বার বিশেষ অহুন্নোদ করে রাজদূত পাঠালেন, তখন অতীশ পালরাজকে বিদেশ যাবার অহুমতি দিতে রাজি করালেন। মহীপালকে তিনি জানালেন যে ধর্মের উন্নতির জন্য তিনবার ডাক এসেছে—এবার না গেলে বৌদ্ধভিক্ষুর যা কর্তব্য তা তাঁর পালন করা হবে না। তারপর তিনি তিব্বতী গাইডের সঙ্গে নেপাল হয়ে মানস সরোবর পৌঁছলেন। সরোবরের পবিত্র জলে উনি তর্পণ করলেন। সেখানে পশ্চিম তিব্বত রাজ্যের প্রধান সেনাপতি সৈন্তসামন্ত নিয়ে এসে তাঁকে খোলিং নিয়ে গেলেন। খোলিং ছিল রাজ্যের রাজধানী, এখানে শুভদিনে রাজা Ye-Ses-Odকে অতীশ মহা-যান ধর্মে দীক্ষিত করলেন। তান্ত্রিক প্রভাবটা অনেক কমে গেল। অতীশের আর দেশে ফেরা হল না। খোলিংকে তিনি ও তাঁর অহুচরেরা একটি শীর্ষস্থানীয় বিজ্ঞা ও ধর্মের কেন্দ্র করে তুলেছিলেন। এর নাম হয়েছিল অহুপম নিরাভোগ বিহার। এই বিহারে অনেক বৌদ্ধগ্রন্থ ও অনেক প্রাচীন গ্রন্থের টীকা ব্যাখ্যা লেখা হয়েছিল। সেই সময়েই বোধ হয় শিল্পী, চিত্রকররা মগধ ও বাংলা দেশ থেকে এখানে এসেছিলেন, আর আমরা খোলিং মঠে যে মূর্তি আর চিত্রসম্পদ দেখেছিলাম সেগুলি এই মগধ ও বাংলার শিল্পীদের শিল্পপরম্পরারই হাতের কাজ। তবে ডাঃ ফেব্রি (লাহোর মিউজিয়ামের কনসার্ভেটর—১৯৪০) মনে করেন যে পশ্চিম তিব্বতের ভাস্কর্য ও চিত্রকলা মধ্য-এশিয়ার খোটান প্রভৃতি বৌদ্ধশিল্পকেন্দ্র দ্বারা প্রভাবান্বিত—আর ঐ সংস্কৃতির প্রভাব লাদাখের রাস্তায় এসেছিল। লাহোরে যে ভারতীয় ইতিহাস কংগ্রেসের অধিবেশন হয়েছিল (বোধ হয় ১৯৩৯ সালে) তাতে আমি খোলিংকে কেন্দ্র করে বাংলা ও মগধের ধর্ম ও সংস্কৃতির তিব্বতের উপর প্রভাব সম্বন্ধে কিছু বলেছিলাম। তার উত্তরে লাহোর মিউজিয়ামের কনসার্ভেটর ডাঃ ফেব্রি মধ্য-এশিয়ার খোটান প্রভৃতি কেন্দ্র থেকে Sino-Indian cultureএর বিকাশ ও সেখানকার চিত্রকলা ও ভাস্কর্যের প্রভাব যে লাদাখের পথে পশ্চিম তিব্বতে এসেছিল তার বৃত্তান্ত সবিস্তারে বলেন। আমি কিন্তু পালরাজ্যের তদন্তপুরি ও বিক্রমশীলা কেন্দ্রগুলির প্রভাবের কথাই জোর দিয়ে বলি। এর কিছুদিন পরে ইটালীর খ্যাতনামা অধ্যাপক তুচ্চির 'খোলিং' পুস্তকে আমার মতেরই সমর্থন পেলাম। তুচ্চি বলেন যে ভারতে যখন বৌদ্ধধর্ম ও কৃষ্টির অবসান হল, তখন এই বরফের দেশেই কতকগুলি অসমসাহসী বৌদ্ধপণ্ডিত খোলিংএ আশ্রয় নিয়ে অনেক বৌদ্ধগ্রন্থ এখানে তিব্বতী ভাষায় অহুবাদ করেন। তিনি লিখেছেন যে খোলিং মঠকে তিনি অতি শ্রদ্ধার সহিত

দেখেন, কেননা এইখানে যে ধর্মাঙ্গা জ্ঞানপিপাসী সাধকেরা থোলিংএ এসেছিলেন, তাঁরা সারা তিব্বতে যে ধর্ম ও জ্ঞানের আলো জ্বলেছিলেন সে আলো এখনও নেভেনি।

অতীশের বিষয়ে আরও দু-একটি কথা বলে এই প্রসঙ্গ শেষ করব। তিব্বতে আসবার আগে এই পুণ্যাঙ্গা হৃদয় স্ববর্ণদ্বীপে (সুমাত্রা) ও স্ববর্ণদ্বীপে (জাভা) তাঁর ধর্ম ও জ্ঞানপিপাসার পরিচয় দিয়েছিলেন। অনেক বছর এই দ্বীপগুলিতে তিনি ধর্মচর্চা করেন সেখানকার বৌদ্ধ আচার্যদের সঙ্গে। অতীশের মৃত্যুর পর তাঁরই শিষ্য ব্রনটন তিব্বতের বর্তমান লামা hierarchy অনুষ্ঠান করেছিলেন। তিব্বতের ইতিহাসে অতীশের স্থান খুবই উচ্চে—আর এই থোলিংই হল তাঁর কীর্তির প্রধান কেন্দ্র।

এখানে থাকতে থাকতেই (নতুন করে বুঝুর আয়োজন করতে ছ-সাতদিন থাকতে হয়েছিল) এখানকার লামা ম্যাজিস্ট্রেট খুবসুর সঙ্গে দেখা করলাম। আমরা কৈলাসযাত্রা শেষ করে আসছি শুনে আনন্দ প্রকাশ করলেন। আমাদের তাঁর বাগানের মূলো খেতে দিলেন। তিব্বতে এই প্রথম ও শেষবার টাটকা সজ্জী আমরা পেয়েছিলাম।

২০শে আগস্ট। আমরা দেশে ফেরবার জন্য থোলিং থেকে বেরোলাম। এই সময় লাসা থেকে একজন লামার সঙ্গে দেখা হল। কি চেহারা কি ব্যবহারে লাসা অধিবাসীরা পশ্চিম তিব্বতীদের চেয়ে কত ভাল এর আগেও দু-একবার আমরা দেখেছিলাম। কদিন আগে লাসার এক সদাগর দেখেছিলাম, খুব ভাল কাপড়চোপড় পরা, মাথায় বেশ ফ্যাশনের ফেন্ট টুপি আর তাঁর পিঠে অন্ততঃ ছটি দেবদেবীর প্রতিমা ফ্রেমে আঁটা বাঁধা আছে। আমাদের এই নতুন ধরনের ঠাকুরঘরটি বেশ ভাল করে দেখবার সুযোগ দিয়েছিলেন এই লাসাবাসীটি।

২২শে আগস্ট। আমরা আর সত্‌লজের গভীর খাদের মধ্যে নেই। সামনে এখন মস্ত ময়দান হিমালয় পর্যন্ত বিস্তৃত। হিমালয়ের সাদা চূড়াগুলি ময়দানটি ঘিরে রয়েছে, আর ছোট ছোট পাহাড়ী নদী জায়গাটিকে অনেকটা সবুজ করে রেখেছে। এবার খুব বড় কিয়াংএর পাল (নিশ্চয়ই ১০০র কাছাকাছি হবে) আমাদের কেন্দ্র করে খুব বড় একটা বৃত্ত করে নাচ দেখাল—তারপর এক দৌড়ে অদৃশ্য হয়ে গেল। আর একটু এগিয়ে আমরা আর একটি বিচিত্র দৃশ্য দেখলাম। সামনেই কামেত ২৬,০০০ ফুট উঁচু, গির্জের চূড়ার মত ওপরে উঠে গেছে আর তার গা থেকে একটি খুব বড় হিমপ্রবাহ নেমে এসে এই ময়দানের মধ্যে এসে

পড়েছে। এত বড় গ্লেন্সিয়ার যে আমরা দেখতে পাব ভাবিনি। এর পাশ দিয়ে আমরা কিছুদূর গেলাম, গ্লেন্সিয়ারের ওপরও খানিকটা হাঁটলাম। হাঁটা স্থবিধের নয়—বরফজমা ঢেউগুলির ওপর দিয়ে হাঁটা ছুঁচলো পাথর বিছানো রাস্তার উপর হাঁটার মত কষ্টকর।

এমন সুন্দর জায়গা আর কবে দেখব তাই আমরা শিপুতে সেই সন্ধ্যায় তাঁবু খাটিয়ে রইলাম।^১ রাত্রে কামেত আর অগ্নসব হিমশৃঙ্গগুলি শেষবারের মত দেখা গেল। এরপর তো হিমালয়ের এ পিঠ (উত্তরদিকের) আর দেখা যাবে না।

তার পরদিন আমরা মানা গিরিবন্ধের ঠিক প্রবেশদ্বারে থেকে গেলাম। সামনেই মানা পাস বরফে ঢাকা ময়দানের মত দক্ষিণদিকে একটু একটু করে চড়ে গেছে। সে রাত্রি খুব শীত করেছিল।

২৩শে আগস্ট। ১৯২২ বেশ সকালে সকালে বেরিয়ে দুপুরবেলা মানা পাস-এ ঢোকা গেল। লিপুর্ চেয়ে মানা পাস অনেক বেশী উঁচু আর এখানকার দৃশ্যও চমৎকার। চারিদিকে বরফ, বরফের ওপর দিয়ে হাঁটছি, মাঝে মাঝে মনে হয় যে দু'ধারে বরফের দেওয়াল আমরা দু'হাত দিয়ে ছুঁতে পারব। একটু এগিয়ে দেবতালে পৌঁছলাম, চারিদিকে বরফের পাহাড়, তার মাঝখানে গাঢ় নীল ছোট সরোবর, জলে বড় বড় বরফের টুকরো ভাসছে, যেন খুব বড় সাইজের রাজহংসরা সাঁতার কাটছে। বাদাশাঁ জাহাঙ্গীরের সময় এক জেন্সইট মিশনারী Father Andrade এই রাস্তায় গাশ্চিম তিব্বতে গিয়েছিলেন। তিনি এই দেবতালকেই মানস সরোবর বলেছেন। বাস্তবিক এই দেবতাল দেবতাদেরই স্নানের জায়গা হবার উপযুক্ত। আমাদের সঙ্গের চাকরদের বরফের জলজলে আলোতে চোখ বলসে যাবার ভয় হয়েছিল। আমরা পুরু ক্রমাল দিয়ে তাদের চোখ বেঁধে হাত ধরে খানিকটা পথ নিয়ে এসেছিলাম। আমাদের নাগা সন্ন্যাসীকে কিছু করতে হয়নি, তিনি তাঁর বাঘছালের ওপর আমাদের দেওয়া একটা কঞ্চল জড়িয়ে, আমাদেরই দেওয়া পুরানো জুতো (তেমন ভারী পুরু জুতোও নয়) পরে বেশ হাসিমুখে মানা পার হলেন।

২৩শে আগস্ট বিকেলবেলা। আমরা দেশে ফিরে এসেছি। 'জাগ্রো'তে একটা গ্লেন্সিয়ারের পাশে তাঁবু খাটিয়ে বিশ্রাম করছি। সন্ধ্যার আগেই বজ্রীনাথের কুলীরা এসে পৌঁছল। খোলিং-এর ভোটিয়া সদাগর ধামসিং এসব বন্দোবস্ত আমাদের জন্তু করে দিয়েছিল। বুঝু ও বুঝুওয়ালারা তিব্বতে ফিরে গেল।

২৪শে আগস্ট—অনেকটা নামতে হল, কোন রাস্তা নেই, একটা পাথর থেকে আগের আর একটা পাথরে পা দিতে হয়। মধ্যে বরফ গলা জল—মাঝে মাঝে লাফ দিয়েই এগুতে হয়। আমরা এখন সরস্বতীর তীর দিয়ে ভারতবর্ষের ভেতর এগুচ্ছি—একটু এগুতে অনেক সময় লাগছে। আর খাবারদাবার বিশেষ কিছু নেই।

২৫শে আগস্ট—সকালবেলা খুব হালকা জলখাবারের পর বেরিয়ে পড়া গেল। সন্ধ্যার আগে বজ্রীনাথ পৌঁছতে হবে নয়ত রাত্রিরটা অনাহারে কাটাতে হবে। এবার দৌড় আরম্ভ হল—যার যেমন শক্তি এগিয়ে চল বজ্রীর দিকে। একটি বড় তুষার সেতুর পাশ দিয়ে এলাম। ভোরবেলা এর বরফ নীল রঙের দেখাচ্ছিল।

ভাল করে দিনের আলো হলে দেখা গেল দূরে আমাদের বাঁদিকে সুন্দর নীল রঙের পাড়ের মত দিকচক্রবালের গায়ে আঁকা রয়েছে। হাওয়া জোরে চললে ঐ নীল রেখাও দুলতে লাগল। অধ্যাপক কশ্যপ দূরবীন লাগিয়ে দেখে বললেন যে ও হল সুদূর বিস্তৃত হিমালয়ান নীল পপি (blue poppy) ফুলের ঝোপ—মাইলের পর মাইল সাজানো বাগানের মত হিমালয়ের এই অঞ্চলের রূপই বদলে দিয়েছে। বরফ গলার পর ও আবার নতুন করে বরফ পড়বার আগে পর্যন্ত হল আলপাইন ফুলের মরুম। আমার এখন মনে হয় যে ঐটিই হল সেই জায়গা যা আজকাল ‘নন্দনকানন’ নামে খ্যাতি লাভ করেছে।

ঘাসতৌলি পৌঁছবার পর হাঁটতে আর কষ্ট পেতে হল না। তবে ভেড়া চরার পথ ও পাকদণ্ডী চার-পাঁচটি এক জায়গায় দেখা গেল আর সেইজন্ম বেশ গোল বাধল। আমাদের তিন শিখ বন্ধু তো দৌড়ুতে দৌড়ুতে অদৃশ্য হয়ে গেলেন; অধ্যাপক কশ্যপ, কুমাদেবী ও মালপত্র নিয়ে কুলীরা পেছিয়ে পড়েছিল, আমি একলা পড়ে গেলাম। সামনে সরস্বতী নদী অনেক উঁচু থেকে পড়ে একটা গহ্বরের মধ্যে অদৃশ্য হয়ে গিয়ে আবার একটি সুন্দর জলপ্রপাত হয়ে বেরিয়ে এসেছে এখানে। সত্যিই অপরূপ দৃশ্য। খানিকক্ষণ তো অবাক হয়ে দেখলাম, তারপর ভাবতে হল কোন পথে কোন দিকে যাব। এদিক ওদিক ঘুরতে ঘুরতে এক মেঘপালকের দেখা পাওয়া গেল। অনেক কষ্টে ওকে বোঝালাম যে বজ্রীনাথ যাব। সে এক পাকদণ্ডী দেখিয়ে দিল। বেশ খানিকটা হেঁটে নানাগ্রামে এসে পড়লাম। বড়ই অপরিষ্কার গাঁ, তবু এটি হল বিদেশ থেকে ফিরে প্রথম দেশের বসতি। একঃরকম ভালই লাগলো। তারপর আরও ঘণ্টাখানেক বেশ জোরে পা চালিয়ে এক মোড়ের মাথায় একটি সন্ন্যাসীকে জিজ্ঞেস করলাম যে বজ্রীনাথ আর কতদূর।

সে বেচারী বড়ই আশ্চর্য হয়ে গেল, কথা না বলে হাত ঘুরিয়ে মোড়টা দেখিয়ে দিলে। মোড় ঘুরেই দেখলাম সামনে ভাল রাস্তা, একটু দূরেই বাজার দেখা যাচ্ছে। বাজারে ঢুকতেই দেখলাম আমার তিন বন্ধু পুরি, মিঠাই ও গরম দুধের সদ্যব্যবহার করছেন। তাঁদের সাদর নিমন্ত্রণে আমিও ভোজে যোগ দিলাম। কি ভালই না লাগল সেদিনের ভূরিভোজ। তারপর মনে পড়ল যে আমাদের পকেটে তো পয়সা নেই। আমাদের টাকাকড়ি বাস্তববদ্ধ হয়ে, অনেক পিছনে কুলীদের পিঠে আসছে। হালওয়াইকে একথা বলতে সে আমাদের আশ্বাস দিলে যে কোনও ভাবনা নেই, কাল দাম দিও, তোমরা কৈলাসঘাত্তী, আমার দোকানে তোমরা যে যাত্রা শেষ করে এসে খেলে এই আমার পরম সৌভাগ্য। যাহোক আমাদের ভোজনপর্ব শেষ হতে না হতে অধ্যাপক কশ্যপ, কুমারদেবী, কুলীদের নিয়ে পৌঁছে গেলেন। তাঁরাও এইখানেই খেলেন ও হালওয়াইকে তার সব পাওনা আমরা দিতে পারলাম। দু'মাস পরে আমরা সে রাত্রি ঘরের চার দেওয়ালের মধ্যে শুলাম।

২৬শে আগস্ট সকালে ‘তপ্ত কুণ্ডে’ নেয়ে বজ্রীদর্শন করলাম। মন্দিরের বড় পূজারী রাণওয়ালজী আশ্চর্য হলেন যে আমরা সংসারীর দল তিব্বত থেকে নেমে বজ্রীনাথ আসছি। মাঝে মাঝে দু-একজন সন্ন্যাসী আদি বজ্রীতে পূজা দিয়ে মানা পাস হয়ে বজ্রীদর্শন করেন। আমরা ভাল করে ছুদিন ঠাকুরদর্শন করলাম, বজ্রীর গলার বনফুলের মালাও পেলাম। অনেকদিন সে মালার ফুল ছিল—সে ফুলের মধ্যে দু-একটি ‘ব্রহ্মকমল’ও ছিল। এই বিখ্যাত ফুল আমার তো অনেকটা ম্যাগনোলিয়া গ্র্যাণ্ডিফ্লোরার মত দেখতে লাগল।

তীর্থযাত্রা এবার শেষ হল। আমরা ছুড়ছুড়িয়ে নামতে লাগলাম। তাঁবু দুটি বেচে দেওয়া হয়েছে, বুকু তো নেই-ই, লাঙ্গু ঘোড়াও আর রাখা হয়নি, ঝাড়ঝাপ্টা হয়ে ঘরমুখো চললাম। চমোলিতে বাবার পাঠানো টাকা পেলাম। ত্রীনগরে (গাড়োয়াল) তিনটি শিখবন্ধু অমৃতসর স্ববর্ণমন্দিরের গুরুদোয়ারা প্রবন্ধক কমিটিতে গোলমালের খবর পেয়ে রোজ দুটি করে ‘পড়াও’ (আন্দাজ ১৭।১৮ মাইল) চলবেন এই মতলব করে হরিদ্বারের রাস্তা ধরে চলে গেলেন। আমরা তিনজন—অধ্যাপক কশ্যপ, কুমারদেবী, আমি ও প্রফেসর মশায়ের চাকর বরকত রাম অত তাড়াতাড়ি যাবার দরকার নেই বলে ল্যান্ডাউন, পৌড়ি, কোট-দ্বারের রাস্তা ধরলুম। আমরা ২।১০ মাইল করে রোজ হাঁটতুম, রাস্তিরটা ডাক-বাংলায় আশ্রয় নিতুম, বেশ আরামেই শেষের দিকটা কাটানো হল। পৌড়িতে

চুকেছি এমন সময় আমার সঙ্গে একজন ইংরেজ officialএর সঙ্গে দেখা হল। তিনি আমার পোশাকপরিচ্ছদ ও sunburnt চেহারা দেখে জিজ্ঞেস করলেন আমি কোথা থেকে আসছি। যখন আমি বললাম আমরা (কম্প ও রুমাদেবী কুলীদের সঙ্গে পেছিয়ে পড়েছিলেন) পশ্চিম তিব্বত থেকে আসছি, তখন তিনি রাস্তায় দাঁড়িয়ে অনেকক্ষণ আমাদের ভ্রমণ বিবরণ শুনলেন। শুনলাম তিনি হলেন কুয়ায়ুন ও গাডোয়াল ডিভিশনের কমিশনার মিঃ উইনহাম। তিন বছর পরে লণ্ডন স্কুল অফ ওরিয়েন্টাল স্টাডিজ-এ এঁর সঙ্গে আবার দেখা হয়েছিল। মাসুখটি খুবই ভদ্র, গুঁর কথাবার্তা খুবই ভাল লেগেছিল। ১২ই সেপ্টেম্বর কোটদ্বার রেল স্টেশনে রেলগাড়িতে ওঠা গেল। ১৯শে জুন রেলগাড়ি থেকে নেমেছিলাম। ১৩ই সেপ্টেম্বর ঘরের ছেলে ঘরে (লাহোরে) ফিরে এলাম।

এই মানস সরোবর ও কৈলাস যাত্রায় সাংসারিক জীবনে কোনও উপকার হয়েছিল কিনা জানি না, কিন্তু যে একটা মনের নিজের জগৎ আছে সেখানে এই পর্বতলজ্জয়নস্বত্তি এমন একটি অনুপ্রেরণা দিয়েছিল যা বাস্তবিকই অমূল্য। এরপর মনে এক বিশ্বাস রয়ে গেল যে স্থিরসংকল্প করে কোনও কাজ হাতে নিলে সে কাজ ভাল করে শেষ করতে পারব। এ যাত্রায় অনেক কষ্ট সহ্য করতে হয়েছিল, এসব সম্বন্ধেও মনে এক আত্মপ্রসাদ এসেছিল যে একটি করবার মত কাজ করতে পেরেছি। আর এরপরও ভাল কাজ ভালভাবে করতে পারব। অনেক বাধা-বিলম্ব দেখে পেছিয়ে যাব না।

প্রত্যাবর্তন ও পুনরায় বিদেশ ভ্রমণ

কিছুদিন তো খুব খাওয়াদাওয়া আর ঘুমানো চলল। রুমাদেবী দিনকতক লাহোরে থেকে হরিদ্বার হয়ে তাঁর দেশের দিকে চলে গেলেন। অধ্যাপক কঙ্কণ লাহোরে এই কৈলাস যাত্রার বিষয় Lantern Slides দিয়ে বক্তৃতা দিলেন। এর কিছুদিন পরে আমিও ঐ slides নিয়ে গিয়ে কলিকাতা বঙ্গীয় সাহিত্য পরিষদে একটি বক্তৃতা দিয়েছিলাম। ৬হরপ্রসাদ শাস্ত্রী প্রভৃতি অনেক গণ্যমান্য ব্যক্তি শুনতে এসেছিলেন।

১৯২৩ সালে আমার ছোট মেয়ে মানসীর জন্ম হয়। আর এখানেই বলে রাখি যে দ্বিতীয় বিশ্বযুদ্ধ শেষ হবার সময় মানসীর কৈলাসনাথের সঙ্গে বিবাহ হয়। মানস সরোবর ও কৈলাস যাত্রার কিছু প্রভাব এতে নিশ্চয়ই ছিল। এই বছর শিখের মধ্যে শিখ গুরুদোয়ারা বিশেষতঃ দরবার সাহেব (গোল্ডেন টেম্পল) নিয়ে গোলমাল খুবই বেড়ে যায়। আকালিরা এবার স্থির করল যে খালসা কলেজকে ওরা সরকারের হাত থেকে ছিনিয়ে নেবে। এই খালসা কলেজ ও স্কুল থেকে শিখ রেজিমেন্টের জন্ম অফিসার বাছাই হত। দু-তিনজন অন্ততঃ স্ট্রাণ্ড-হাউসে গিয়েছিল এখান থেকে। তাই কলেজের প্রিন্সিপাল, ভাইসপ্রিন্সিপাল ইংরেজ হতেন ও আই. সি. এস. কমিশনার, ডেপুটি কমিশনার কলেজের President ও Vice-President হতেন। কলেজের প্রিন্সিপাল, ভাইস প্রিন্সিপাল, আর একজন সিনিয়র অধ্যাপক ইংরাজ ছিলেন I. E. S. পদের। বাকী শিক্ষকেরা দেশীয় ও বৈশীরা ভাগই শিখ। বাস্তবিক এই কলেজের উপর ব্রিটিশ সরকারের কড়া নজর ছিল আর এ সময় একদিকে আকালি আন্দোলন ও অত্যাচারে দেশজোড়া অসহযোগ বিক্ষোভ খালসা সমাজের আগেকার গতানুগতিক মনোভাব বদলে দিয়েছিল। উচ্চপদস্থ কর্মচারী ও ধনী পরিবার ছাড়া প্রায় অধিকাংশ মধ্যবিত্ত ও যুব শিখসমাজ একটি সত্যিকার জাতীয়তা ভাবে প্রভাবান্বিত হয়েছিল। আমাদের কলেজেও এর ঢেউ ভালরকমই ঢুকেছিল।

তবে এর জন্তে যে পড়াশুনা শিকেন উঠেছিল তা নয়। বাবার খুব ইচ্ছে

ছিল আর আমারও মনে হয়েছিল যে এবার কিছু রিসার্চ কাজ করে একটি ডক্টরেটের থিসিস লিখি। ভেবেচিন্তে ঠিক করলাম যে গোল্ড এক্সচেঞ্জ স্ট্যাণ্ডার্ড বিষয়টি সময়োচিত হবে আর আমাকেও এ বিষয়ে ওর কাজ করার জন্য গায়ে গায়ে বস্তিতে বস্তিতে ঘুরতে হবে না। প্রথম বিশ্বযুদ্ধের পর আমাদের টাকাকে ইংলণ্ডের শিলিংএর সঙ্গে আগেকার হারে ($1\text{Re} = 1\text{s } 4\text{d}$) টিকিয়ে রাখা অসম্ভব হয়ে পড়ছিল। নতুন হার কি হবে, $1\text{Re} = 1\text{s } 6\text{d}$ বা 2s , ব্রিটিশ সরকার ঠিক করতে পারছিল না। একটি উপায় ছিল যে দেশের মধ্যে রূপো বা কাগজের মূদ্রা চলুক, বাইরের দেশের সঙ্গে আদানপ্রদানের বেলায় $1\text{Re} = 1\text{s } 4\text{d}$ এই হার ঠিক করা থাক। অর্থাৎ দেশের মধ্যে যে মূদ্রা (রূপার টাকা বা নোট) চলবে তার সঙ্গে বিলেতের শিলিংয়ের (তার মানে সোনার সঙ্গে) কোনও সম্বন্ধ থাকবে না। কেবল বিদেশের সঙ্গে যে মূদ্রা বিনিময়ের দরকার হবে সেই বিনিময়ের হার ঠিক $1\text{s } 4\text{d}$ করে রাখা হবে। সে সময় এই গোল্ড এক্সচেঞ্জ স্ট্যাণ্ডার্ড এশিয়া ও আফ্রিকার ইউরোপীয় অধিকারভুক্ত অনেক-গুলি দেশে চলতি ছিল, কিন্তু এই ইউরোপীয়ান দেশগুলির নিজেদের ব্যবহারের জন্তে (দেশের ভেতর ও বাইরের দুইরকম ব্যবহারের জন্তেই) যে মূদ্রার চলন ছিল তার সোনার সঙ্গে একটা নিশ্চিত হার ছিল (fixed rate)। আর ওখানকার রূপোর মূদ্রা ও নোটও ইচ্ছামত স্বর্ণমূদ্রার সঙ্গে বিনিময় করা যেত। একে গোল্ড স্ট্যাণ্ডার্ড বা স্বর্ণমান বলা হত। আমাদের দেশের অনেকেরই মতে তখন গোল্ড এক্সচেঞ্জ স্ট্যাণ্ডার্ড দাসত্বের প্রতীক নিয়ন্ত্রণের মূদ্রা প্রচলন বলে গণ্য হত আর স্বর্ণমানই (Gold Standard) বাঞ্ছনীয় মনে করা হত। এখানে এইটুকু বলে রাখি যে এখন (দ্বিতীয় বিশ্বযুদ্ধের সময় থেকে) কোন দেশেই স্বর্ণমূদ্রার প্রচলন নেই, আর দেশবিদেশের মধ্যে লেনদেনের জন্য প্রত্যেক দেশের মূদ্রার দাম সোনার সঙ্গে একটা বিশেষ হারে বাঁধবার চেষ্টা চলছে। বলা যেতে পারে যে গোল্ড স্ট্যাণ্ডার্ডের জায়গায় আজকাল গোল্ড এক্সচেঞ্জ স্ট্যাণ্ডার্ডই সর্বত্র চলছে। কিন্তু ৪৫ বছর আগে এ কথা বললে আমাদের অর্থনীতিবিদরা মারতে আসতেন।

আমি কাজটা তো আরম্ভ করলাম, কিন্তু এই বিষয়টা ভাল করে বোঝবার জন্তে যা মালমসলা দরকার দেখা গেল তা এ দেশে পাওয়া মুশকিল। কাছাকাছির মধ্যে শ্রামদেশ, ফরাসী ইন্দোচীন, ফেডারেল মালয় রাজ্য (এখনকার মালয়) ডাচ পূর্বভারতীয় দ্বীপপুঞ্জ (ইন্দোনেশিয়া) ফিলিপীনস—এরা সে সময়েও গোল্ড

একচেয়ে স্ট্যাণ্ডার্ডের দলভুক্ত। এদের মধ্যে দু-একটি দেশ ঘুরে আসা দরকার মনে হয়েছিল, আর তাছাড়া তিব্বত দেখবার পর আরও দু-একটি বৌদ্ধ দেশ দেখবার খুবই ইচ্ছা হয়েছিল।

১৯২৩ সালে গরমের ছুটিতে আবার বেরিয়ে পড়লাম। এবার একলা, কলকাতা থেকে সিঙ্গাপুরগামী জাহাজে সেই পুরাতন যুগের দক্ষিণসমুদ্রযাত্রীদের পদাঙ্কসরণ করে বঙ্গোপসাগরে পাড়ি দিলাম। এঁরাই দক্ষিণ-পূর্ব-এসিয়ায় (কম্বুজ, চম্পা, সুবর্ণদ্বীপ, যবদ্বীপ, বঙ্গদ্বীপে) ভারতের ধর্ম (ব্রাহ্মণ্য ও বৌদ্ধ) ও সংস্কৃতি নিয়ে গিয়ে সেখানে সযত্নে রক্ষা করেছিলেন। আমরা তাঁদের কীর্তি-কলাপ প্রায় ভুলেই গিয়েছিলাম, তবে ফ্রান্স ও হল্যান্ডের পুরাতত্ত্ববিদরা তা কিছু কিছু পুনরুদ্ধার করেছিলেন। যেহেতু তাঁদের ভাষা আমরা শিখিনি, তাই এ বিষয়ে লেখা বইগুলি আমাদের কাছে অজানাই রয়ে গিয়েছিলো। যখন মাঝ-রাতে সাগরসঙ্গমে পৌঁছে সমুদ্রপাড়া হয়ে খুব বমি করছি, তখন কি জানি যে আমি অন্ততঃ খানিকটা এ কাজ করতে পারব—তারপর প্রাচীন ইতিহাসের একটি গৌরবময় অধ্যায় (যা আমরা ভুলে গিয়েছিলাম) ফরাসী পণ্ডিতদের সাহায্যে দেশের লোককে আবার জানাতে পারব! আমি তো তখন অর্থনীতির মুদ্রা বিষয়ে তত্ত্বাত্ত্বিকভাবে যাচ্ছি বিদেশে, গুরুত্ব করে যে সমস্ত লক্ষ্যটাই বদলে যাবে তা ভাবিনি।

তার পরদিন সমুদ্রপাড়া আর বেশী কষ্ট দেয়নি, কেবিন থেকে বেরিয়ে এলাম, ‘কালাপানীর’ কালরূপ (অত কালো জল আর কোথাও দেখিনি) দর্শন হল। ডেকে বেড়িয়ে বেড়িয়ে কেবিনে ঢুকে দেখলাম সহযাত্রীটি কেবিনের “পোর্ট হোল” (Port hole) খুলে বেশ হাওয়া খেতে খেতে বার্থে শুয়ে আছেন। হাওয়াটা সত্যিই খুব ভাল লাগছিল, আমিও বেশ আরামে শুয়ে পড়লাম। হঠাৎ পোর্ট হোল দিয়ে প্রকাণ্ড একটা ঢেউ ঢুকে আমাদের কেবিন যেন ভাসিয়ে দিলে। আমার সঙ্গীটির তখনকার মুখের ভাব, কি করে ভদ্রলোক চমকে উঠেছিল, এখনও আমার মনে আছে। এক ঝুড়ি পটল কলকাতা থেকে রেঙ্গুন নিয়ে যাচ্ছিল, দেখতে দেখতে সব হেজে গেল। তার কেবিন বয় এসে আমাদের খুব বকল, আমাদের ডেকে পাঠিয়ে দিয়ে বিছানাপত্র সব বদলালো আর “পোর্ট হোল” কষে বন্ধ করে দিয়ে গেল আমরা যেন আর খুলতে না পারি।

অভ্যেস নেই বলে, আর নিরামিষাশী ছিলাম বলে জাহাজের থাওয়াদাওয়া ভাল লাগত না। নৌচের ডেকে তৃতীয় শ্রেণীর ডেক যাত্রীরা যখন রুটি, শাকভাজা

রেখে খেত আমার তখন খুব লোভ হত। তার পাশাপাশি মাঝেমাঝে ঘুরতাম, জানেই অর্ধেক ভোজন হত।

কেবিনে আর হাওয়া খাওয়া যেত না, এখন ডেকেই থাকতে হত। অনেক নতুন জিনিস চোখে পড়ল—উড়ন্ত মাছ, শুশুক, রাতে জাহাজের কাছে চেউয়ের ওপর চিকচিক করছে আলো। এক প্রবীণ সারেঞ্জের কাছে সাইক্লোন, টাইফুনের লোমহর্ষণ গল্প শোনা গেল। সাইক্লোন হল আমাদের দেশের টাইফুন চীন সমুদ্রের। একই ব্যাপার। দু-তিনদিন পরে ডাঙা দেখা গেল, ঝাঁকে ঝাঁকে সী গাল পাখি জাহাজের চারধারে ঘুরতে লাগল। আমরা বর্মায় পৌঁছলাম।

(ব্রহ্মদেশের চেয়ে মর্মার দেশ বলাই উচিত। হাজার দেড়েক বছর আগে এখানে মর্মা নামে জাতি বাস করত। তাদেরই নামে দেশের নাম।)

বর্মায় তো পৌঁছলাম। সব প্রথম তো রেঙ্গুন—যাত্রীরা নেবে গেল। আমরা প্রাতর্ভোজন খেয়ে ধীরেস্থে ডাঙায় নামলাম। আমি আর জাহাজের ডাক্তার (তিনিও বাঙালী) আমার কেবিনের সঙ্গীর বাসার খোঁজে গেলাম। তদ্রলোক বেরিয়ে গিয়েছিলেন, আমরা তাঁর ঘর দেখলাম। শরৎ চাটুজ্যের ‘শ্রীকান্ত’ ও ‘পথের দাবী’তে যেমন পড়া গিয়েছিল সেইরকম জরাজীর্ণ কাঠের মেঝে, দোতলায় তক্তার ফাঁকে ফাঁকে নীচের ঘর দেখা যায়, মোটের ওপর ভাল লাগবার মত কিছুই নেই। জাহাজে ফেরবার আগে রেঙ্গুনের প্রসিদ্ধ বৌদ্ধমন্দির শোণ্ডয়ে দাগন দেখে এলাম। হ্যাঁ, এ মন্দির মনে রাখবার মত, মস্ত ব্যাপার আর খুবই সুন্দর, ঝকঝক করছে যেন সোনা দিয়ে মোড়া। কতকগুলি মেয়ে থালায় করে পদ্মফুল নিয়ে পূজা করতে যাচ্ছে, জায়গায় জায়গায় রাশি রাশি ফুল বিক্রি হচ্ছে, অনেক ভক্ত সাষ্টাঙ্গে প্রণিপাত করছে—সব মিলিয়ে দেখে মনে খুব তৃপ্তি হল। বন্দরের কাছাকাছি এসে এক জায়গায়, আমাদের দেশের যাত্রার মত নাচগান হচ্ছিল—তাও দেখা গেল। তার পরদিন জাহাজ পিনাংএর দিকে চলল।

সমুদ্রে এখন শান্ত স্থির, ডেকে বেড়াতে খুব ভাল লাগছিল, প্রায়ই ছোট ছোট দ্বীপ কাছেই দেখা যাচ্ছিল, ডাঙাও দূর ছিল না। সমুদ্রের জল এদিকে কালো নয়, হালকা সবুজ। কালাপানীর সেই বিকট রূপ আর নেই। পিনাং পৌঁছনো গেল। সুন্দর জায়গা, রেঙ্গুন বন্দর বাস্তবিক বিক্রীই ছিল। ডাক্তার আর দু-চারজনের সঙ্গে একটু বেড়িয়ে এলাম। বাজারে একটি গুজরাটি জহরীর দোকানে (সেখানে ঘড়িও বিক্রি হত) আমার ঘড়ির স্ট্রাপটা ঠিক করিয়ে নিলাম। ফেরবার পথে এই গুজরাটি তদ্রলোকের বাড়ি দুদিন ছিলাম, খুব স্বস্তি আমাকে রেখে-

ছিলেন। ৩৪ বছর পরে আবার পিনাং-এ এসেছিলাম, সপ্তাহখানেক ছিলাম এক কনফারেন্স উপলক্ষ্যে। পিনাং-আমার খুবই ভাল লেগেছিল, ইচ্ছে করে আরেকবার সেখানে যাই। পিনাং মানে ‘সুপুরি’ মালে ভাষায়। বাংলায় পুলি-পুলম বলে যে জায়গার নাম পাওয়া যায় পুরনো বইয়ে (যেমন “আলালের ঘরের ছুলাল”) সে জায়গা এই পিনাং। তখন যারা যাবজ্জীবন কারাবাস দণ্ডে দণ্ডিত হত সেই সব অপরাধীদের ‘পুলিপুলমে’ পাঠানো হত। ‘পুলম’ মালে ভাষায় দ্বীপ। মালায়া যখন আর ভারত সরকারের নীচে রইল না, তখন আন্দামান দ্বীপ এই কাজে লাগানো হল।

এখন পিনাং-এ অনেক মধ্যবিত্ত ভারতবাসী থাকেন, ব্যবসায়ী, শিক্ষক, উকিল প্রভৃতি। তবে এখানকার ধনী সম্প্রদায় হয় চীনা বা ইংরাজ। মালেরা বেশীর ভাগ তখন ছোট কাজ (পুলিস কনস্টেবল, চাকর, মজুর) নিয়েই থাকত শহর অঞ্চলে, গাঁয়ে চাষবাস অবশ্য ওদের হাতেই ছিল। লেখাপড়ার দিক দিয়েও মালেরা খুব পেছিয়ে পড়েছিল। তবে অভিজাত সম্প্রদায় খাঁটি মালে (Malay) ছিল। ছোট ছোট স্টেটগুলি এক-একটি স্থলতানের নীচে তাঁর মালে পাত্রমিত্র নিয়ে এক-একটি ক্ষুদ্র রাজ্য, ব্রিটিশ প্রেসিডেন্টের প্রায় সম্পূর্ণ আত্মাধীন। আজ অবশ্য এসব বদলে গেছে।

সেবার পিনাং-এ কম সময়ই ছিলাম, ওখান থেকে বেরিয়ে Port Swettenham-এ জাহাজ থামল। ঐ পোর্টকে পোর্ট বলাই বড় বেশীরকম বাড়িয়ে বলা। জাহাজ যেখানে নোঙর ফেলল তার চারিদিকে জলাভূমি ও ছোট ছোট গাছের জঙ্গল, একটি ছোট নদী কুয়ালালামপুরের দিক দিয়ে এসে এখানে ঘেন পথ হারিয়ে ফেলেছে। কুয়ালালামপুর হল ব্রিটিশ মালয়্যার রাজধানী, আর Port Swettenham হল রাজধানীর বন্দর, এই নদীটি রাজধানীর বাণিজ্যের সামগ্রী Port Swettenham-এ পৌঁছে দেয়, আর এখান থেকে সমুদ্রগামী জাহাজ সে সব মাল দেশবিদেশে দিয়ে যায়।

এবার সিঙ্গাপুর যাত্রা, ওখান থেকে এ জাহাজ আবার কলকাতায় ফিরবে। Strait of Malacca—মালাক্কা প্রণালীর মধ্য দিয়ে আমরা যাচ্ছি। একদিকে মালায়্যার মালাক্কা প্রদেশ অগ্নিদিকে সুমাত্রা—দুদিকই মাঝে মাঝে দেখা যায়। এই সমুদ্রের খাড়ীর মধ্যে দিয়ে হল পশ্চিম জগৎ ও পূর্ব জগতের সব রকম আদান-প্রদানের পথ। এই পথের উপর যে রাজ্যের প্রভুত্ব গড়ে ওঠে সেই রাজ্যের ঐশ্বর্য ও ক্ষমতাও সঙ্গে সঙ্গে খুবই বেড়ে ওঠে। মধ্যযুগের শ্রীবিজয়রাজ্যের

উত্থান এর উদাহরণ ।

কলকাতা থেকে বেরিয়ে বারদিন পরে সিঙ্গাপুরে জাহাজ পৌঁছল । সিঙ্গাপুর প্রাচীন লিংহপুর; এখন পৃথিবীর একটি শ্রেষ্ঠ বন্দর, আমেরিকার জাহাজ এখানে ভীড় করে দাঁড়িয়ে আছে, ব্রিটিশ মানওয়ারি ক্রুজার প্রভৃতি বন্দরের রক্ষণাবেক্ষণ করছে । সিঙ্গাপুর ফ্রী পোর্ট—আমদানী জিনিসের ওপর শুল্ক লাগে না, আর এখান থেকে রবার ও টিন পৃথিবীর সব দেশে রপ্তানি হয় । রবার ও টিন এ দুয়ের উৎপাদনে মালায়া অদ্বিতীয়—যদিও এতে মালেদের অংশ কমই । চীনা ও ইংরাজ এরাই এ কাজ একচেটিয়া করে নিয়েছে । ৫০ বছর আগে মালায়ার মালেদের (অভিজাতবর্গ ছাড়া) অবস্থা মোটেই ভাল ছিল না, দেশের সম্পদ বিদেশীর হাতে ছিল । স্বাধীন মালায়া এখন এর প্রতিক্রিয়া চলছে । চীনা ব্যবসায়ীদের ওপর মালায়া এখন খড়গহস্ত । তবে সিঙ্গাপুরে চীনারা নিজেদের আগেকার প্রতিষ্ঠা বজায় রেখেছে, মালায়াতে অবশ্য ওদের কিছু হঠতে হয়েছে । ১৯৫৭ সালে মালায়া ও সিঙ্গাপুর স্বাধীন তো হল কিন্তু দুইয়ে মিলে একটি রাষ্ট্র হতে পারল না, আলাদা আলাদাই রয়ে গেল । খাস মালায়ার মধ্যেও মালে, চীনা ও ভারতীয় নিয়ে বহু সমস্যা উপস্থিত, এরকম পরিস্থিতিতে গণতন্ত্র চালানো দুরূহ ব্যাপার । ১৯২৬ সালে ব্যাপার অন্তরকম ছিল, মালেরা নিজের দেশে কেবল ইংরেজের নয় চীনা ও কিছুটা ভারতীয়দেরও প্রভুত্ব স্বীকার করতে বাধ্য ছিল । ১৯৬২-৭০-এ এই বহুজাতি সমস্যা মালায়াকে বিশেষরূপে বিক্ষুব্ধ করেছিল ।

সিঙ্গাপুরের একটি শিখ ভদ্রলোকের ঠিকানা আমি অমৃতসরেই পেয়েছিলাম । জাহাজ থেকে নেমে ডাক্তারের কাছে বিদায় নিয়ে সোজা সেইখানে চলে গেলাম । এঁর খেলবার জিনিসের কারবার ছিল । জাভা, ভারত প্রভৃতি দেশে খেলার জিনিস পাঠাতেন, একটি জাপানী মিস্ত্রী ওঁর কাছেই থাকত, ব্যবসা চলছিল ভালই । আমাকে কতী গিন্নী সাদর অভ্যর্থনা করে তাঁদেরই বাড়ির একটি ঘরে রাখলেন । ২৫ বছর পরে একদিন দেখলাম মৌরাট কলেজের খেলবার মাঠের কাছে একটি পাঞ্জাবি রেফ্রুজি কলোনি হয়েছে, সেখানে তাঁরাও এসেছেন । মালায়ায় ও সিঙ্গাপুরে জাপানী আক্রমণের সময় তাঁরা দেশে ফিরে এসেছেন । তবে তখনও তাঁদের আগেকার ব্যবসা চলছে ।

এক সপ্তাহ আন্দাজ সিঙ্গাপুরে ছিলাম । ওখানকার সরকারী দপ্তরে মুদ্রা-বিষয়ে কথাবার্তা হল, একটি উচ্চপদস্থ কর্মচারী বেশ ভাল করেই ওখানকার সমস্যা বুঝিয়ে দিলেন । তাঁর চেহারা অদ্ভুত, সম্ভবতঃ ইউরো-আফ্রিকান । তিনি

অফিস থেকে চলে যাবার পর একটি ইংরেজ অফিসার আমার সঙ্গে কিছুক্ষণ কথা কওয়ার মধ্যে বললেন যে আপনি যেন তুল না বোঝেন ওঁর চেহারা দেখে, উনি অতি বিচক্ষণ অফিসার, অফিসের বড়সাহেব। একদিন ওখানকার ভারতীয় ব্যবসায়ীদের একটি ক্লাবে আমাকে নিমন্ত্রণ করা হয়েছিল। তাঁদের অভ্যর্থনার উদ্ভরে আমি ইংরাজিতে কিছু বলতে যাচ্ছিলাম, তাতে তাঁরা দুঃখপ্রকাশ করলেন। তারপর আমাকে ভাঙা ভাঙা হিন্দীতে বলতে হল। হিন্দীতে বক্তৃতা দেবার অভ্যাস তো মোটেই ছিল না। সভার সভাপতি ছিলেন গুজরাটি, তিনি আমার চাইতেও হিন্দী বলতে অপারগ, সুতরাং আমার হিন্দীর আর সমালোচনা করলেন না। এখানে আমি ‘মুদ্রা বিনিময়’ বিষয়ে কিছু বলতে চেষ্টা করিনি কারণ ভাষায় কুলোত না। এসব দেশের সঙ্গে ভারতের কতদিন থেকে নিকট সম্বন্ধ (তখন আমি এ বিষয়ে কিছু জানতাম না), তাঁরা এই নিয়ে কিছু খোঁজ করেছেন কিনা, এইসব কথা দিয়ে দশ-বারো মিনিট কাটিয়ে দিয়েছিলাম।

একদিন সন্ধ্যাবেলা ওখানকার এক মেলায় গিয়েছিলাম। সেখানে চীনা মহিলাদের সেই সেকালকার মত খুব ঢিলে রেশমী পোশাক দেখা গেল। ৩১ বছর পরে চীনে পুরাতন নাটকের অভিনয় অহুষ্ঠানে থিয়েটারের স্টেজে এরকম পোশাক আবার দেখেছিলাম। একদিন বেতের কারখানা দেখতে (মালাক্কা বেত) গিয়েছিলাম আর সেখানে দুটি মালাক্কা বেত কিনলাম। আর যে ক’দিন ওখানে ছিলাম পেট ভরে আনারস খেয়েছিলাম। বরফের বড় বড় ব্লক ও আনারস ঠেলায় করে চীনে ফেরিওয়ালারা রাস্তায় রাস্তায় ঘুরে বেড়াত, র‍্যাঁদা করা গুঁড়ো বরফ দিয়ে আনারসের টুকরো বিক্রী করতো। সিঙ্গাপুরে খুব ধনী লোকও চীনে আর খুব গরীবরাও চীনে।

এখানকার কাজ শেষ করে এবার গ্রাম দেশ (সিয়ান বা থাইল্যান্ড) চললাম। বন্ধুরা F. M. S. R.-র গাড়িতে চড়িয়ে দিয়ে গেলেন। সিঙ্গাপুর তো ছোট দ্বীপ। খানিকক্ষণের মধ্যেই সেই সেতু (causeway) পার হয়ে গেলাম যেটি এই দ্বীপকে মালায়্যার সঙ্গে যোগ করে রেখেছে। জাপানী আক্রমণের সময় এই সেতু ভেঙে দেওয়া হয়েছিল। কিন্তু তাতেও জাপানীদের থামাতে পারা যায়নি।

তার পরদিন কুয়ালালামপুর পৌঁছলাম। এটি হল মালায়্যার রাজধানী ও এখনও এটিই স্বাধীন মালায়্যার রাজধানী। এখানে ট্রেন অনেকক্ষণ থামে বলে গাড়ি থেকে নেমে একটু বেড়িয়ে এলাম। স্টেশনের শিখ পুলিশের কি সুন্দর ইউনিফর্ম আর কি জমকালো চেহারা! আমি অমৃতসর থেকে আসছি শুনে

আমাকে একজন শিখ কনস্টেবল রাস্তা দেখিয়ে বলে দিল যে আপনি ঘণ্টা দুয়েক বেড়িয়ে আসতে পারেন, আপনার জিনিসপত্রের জন্তে কোন ভাবনা নেই। বাইরে বেরিয়ে দেখলুম সবপ্রথম পান্থপাদপ (travellers palm), বড়ই স্থল্লর গাছ, পেখমধরা কলাগাছের মত। এতগুলি আর এত চমৎকার পান্থপাদপ আর কখনও দেখিনি। এই শহরের বাড়িগুলি গম্বুজওয়ালা মুসলমানী ধরনের, সিঙ্গাপুরের মত হালফ্যাসানের বিলাতী ধরনের নয়। আবার স্টেশনে ফিরে গেলাম। ট্রেন চলল অফুরন্ত রবার গাছের বাগানের মধ্য দিয়ে, অনেক গাছেই চীনা মাটির ভাঁড় লাগানো, গাছের গুঁড়িতে ফুটো করে ঐ ভাঁড়ে তরল রবার জমা করা হচ্ছে।

সন্ধ্যার সময় পিনাঙে পৌঁছানো গেল। এখানে এবার Thomas Cook-এর টিকিটে একটি সাহেবী হোটেলে আমার রাত্রে থাকার কথা ছিল। এখান থেকে শ্রামদেশ যাবার গাড়ি পরের দিন সকালে ছাড়বে। সে গাড়ি F. M. S. এর (Federated Malay States) নয়, শ্রাম রাজ্যের। দু হাতে দুটি লম্বা মালাক্কা বেত (ওখানেও দুটি ছাঁটা হয়নি) হাতে করে চব্বিশ ঘণ্টা ট্রেন যাত্রার চটকানো কাপড়চোপড়ে এই শৌখীন ফ্যাশানের হোটেলে পৌঁছলাম। মনে হল এই মূর্তি দেখে চীনে দরওয়ান প্রায় হেসে ফেলেছিল, কিন্তু টমাস কুক-এর টিকিট দেখে সামলে নিলে আর খুব ভদ্রভাবে আমার জিনিসপত্র ভেতরে নিয়ে যাবার জন্তে লোক ডেকে দিলে। আমার জন্তে নির্দিষ্ট ঘরে উঠলাম, যাবার সময় দেখলাম খুব সুসজ্জিত ডাইনিং ঘর। অনেক সাহেব-মেম ডিনার খাচ্ছে ফিট্‌ফাট পোশাক পরে। আমি বড়ই হাঁফিয়ে পড়েছিলাম। আবার কাপড়চোপড় ছেড়ে ভদ্র হয়ে ডাইনিং রুমে যাবার ইচ্ছে হল না। বেয়ারাকে বললাম যে আমি নিজের ঘরেই খাব দুধ, ফল, আর কুটি মাখন। মিনিট দশেকের মধ্যেই বড় ট্রে করে স্থল্লর জগে দুধ, বরফ দেওয়া আনারস, রাম্পাষ্টান (লিচুর মত ফল), আইসক্রীম, পাউরুটি স্লাইস, মাখন ইত্যাদি আমার সামনে একটি ছোট টেবিলে রাখলে। আমি খুব তৃপ্তি করে খেয়ে শুয়ে পড়লাম। সমস্ত রাত মনে হল যেন জাহাজে আছি, খুব বড় বড় ঢেউ জাহাজ কাঁপিয়ে দিচ্ছে। ভোরবেলা জানলা দিয়ে মুখ বাড়িয়ে দেখলাম যে সামনেই খোলা সমুদ্র, বড় বড় ঢেউ এসে জানলার নীচে সমুদ্রতীরে এসে পড়ছে। এরকম স্থল্লর সমুদ্রতীর আগে দেখিনি। বন্দরগুলির কাছে তো কেবল জেটি, ডক আর ময়লা জলই দেখা যায়।

হোটেলের হিসেব চুকিয়ে বেয়ারাকে বকশিশ দিয়ে তাড়াতাড়ি স্টেশনে ফিরে

শ্রাম-মালয় গাড়িতে নিজের বার্থে বসলাম। শ্রামদেশীয় ড্রাইভার, গার্ড, টিকিট চেকার এ গাড়ির চার্জে। এখানে বলে রাখি সে সময় (১৯২৩ সালে) থাই (Thai) শব্দ ব্যবহার হত না, তখন Siam (শ্রাম নয় সাইয়াম), Siamese, এই কথাগুলি সরকারী, বেশরকারী সব কাজেই বলা চলত। থাই ও সাই এ দুয়েরই মানে স্বাধীন, এ দুটি শব্দের ব্যুৎপত্তি যতদূর জানি একই। বোধ হচ্ছে দ্বিতীয় বিশ্বযুদ্ধের দু-তিন বছর আগে থেকে সাইয়াম বা সাইয়ামই বলা বন্ধ হল, তার জায়গায় থাইল্যান্ড ও থাই সরকারী নাম ঘোষণা করা হল। এ পরিবর্তন হল রাষ্ট্রবিপ্লবের ফল, দেশের রাজার হাত থেকে ক্ষমতা দেশের সেনাপতির হাতে এল।

আমি যে সময়ের কথা বলছি তখন প্রায় সব উচ্চপদ সামরিক ও অসামরিক রাজপরিবারের রাজকুমারদের হাতে ছিল। বছর ত্রিশেক দেশে উচ্চশিক্ষা প্রচলিত হওয়ার পর রাজপুত্রদের এরকম একচেটে প্রভুত্ব আর চলল না। সাইয়াম-এর রাজা চূড়ালঙ্কারণ নিজের দেশকে সব বিষয়ে আধুনিক যুগের উপযুক্ত করবার জন্য বিশেষ করে স্কুল কলেজের ভাল ছাত্রদের ইয়োরোপে পাঠাবার বন্দোবস্ত করেছিলেন। এই ছাত্ররা যখন ফ্রান্স, ইংল্যান্ড, জার্মানী থেকে শিক্ষা শেষ করে দেশে ফিরে এল, তখন চূড়ালঙ্কারণ আর এ জগতে নেই, তাঁর বড় ছেলেও মারা গেছেন, সেজ ছেলে রাজত্ব করছেন। এই বিলাতক্ষেত্রীরা মোটেই রাজার ও রাজকুমারদের অক্ষুণ্ণ প্রভুত্ব মানতে রাজী হল না। প্রথমে তো উচ্চশিক্ষিত অসামরিক ব্যক্তিদের হাতে ক্ষমতা এল, কিন্তু এ ব্যবস্থা টিকলো না, সময়বিভাগ এবার এগোল, অসামরিক শাসক সম্প্রদায়কে সরিয়ে দিয়ে নিজেদের সেনাপতির হাতে সমস্ত শাসনভার ও শাসন করবার জন্য অব্যাহত ক্ষমতা সমর্পণ করল। সেই সময়েই (১৯৩৬) দেশের নাম সাইয়াম থেকে থাই দেশ হল। সাইয়ামী-রাও থাই বলে দেশবিদেশে পরিচিত হলেন।

আমাদের ট্রেন এবার গভীর জঙ্গলের মধ্যে দিয়ে যাচ্ছিল, এ জায়গায় নাকি কিছুদিন আগে বুনো হাতী ট্রেন দেখে খেপে গিয়ে ইঞ্জিনের ওপর ঝাঁপিয়ে পড়ত। যা হোক, এবার বুনো হাতী দেখা দেয়নি।

তবে আর এক সমস্যা উপস্থিত হল—এই ট্রেনে রাত্রে বিছানা ও মশারি দেওয়া হয়। আমার টমাস কুক-এর টিকিটে এই বিছানার ও মশারির ব্যবস্থা ছিল না। মহামুশ্ছিল হল—এর জন্য অতিরিক্ত মূল্য কেমন করে নেওয়া যায় ? সাইয়ামী টিকল (tical) ও ব্রিটিশ পাউণ্ড স্টারলিংয়ের কি বিনিময়

হার হবে—এইসব প্রশ্ন নিয়ে ট্রেনের গাড়ের মাথা ঘুলিয়ে গেল। সহযাত্রীরা ভয় পেলে, আমাকে মাঝরাস্তায় নামিয়ে না দেয়। যা হোক, কিছু ব্রিটিশ মুদ্রা দিয়ে (আর দরকার হলে ব্যাঙ্ক পৌঁছে আবার হিসেব করা যাবে এই বলে) আপাততঃ মিটমাট হয়ে গেল। নিশ্চিন্ত হয়ে বার্থের ওপর ভাল বিছানা পেতে মশারি খাটিয়ে বেশ ঘুমুনো গেল।

সকাল হলে দেখি যে বাইরের দৃশ্য বদলেছে। যেখানে একটু উঁচু জায়গা দেখা যায় সেখানেই এক একটি বৌদ্ধ মন্দির—কোনটি বড় কোনটি ছোট। সূর্যোদয়ের সময় আমাদের গাড়ি ভারি স্তম্ভর একটি ময়দানের মধ্যে এসে পড়ল। চারিদিকে সবুজ লন, ঢালু হয়ে সমুদ্রতীরে এসে নেমেছে। সুনলাম এটি রাজ্যর খুব শতের গল্ফ লিঙ্কস—ছয়াহিন এর নাম। পর্যটকেরা বা যারা পৃথিবী পর্যটন করতে করতে এদেশে আসেন তাঁরা এখানে দু-একদিন থেকে তারপর রাজধানী ব্যাঙ্কে যান। ট্রেনের জানলা থেকেও সমুদ্রতীর ও গল্ফ লিঙ্কস চমৎকার দেখাচ্ছিল। আর একটি দেখবার মত জায়গার নাম শোনা গেল—নকন পটন (নগর প্রথম)। এখানে এ দেশের সব চেয়ে পুরনো, বৌদ্ধমন্দির থাইদের বড় তীর্থস্থান। বলা বাহুল্য, এসব বৌদ্ধমন্দির ও মঠ থেরাবাদ বৌদ্ধধর্মের—প্রায়ই যাকে আমরা হীনযান বলে থাকি। দক্ষিণ এশিয়ার বৌদ্ধেরা থেরাবাদী বা হীনযানী। তবে সাত-আট শত বছর আগে, যখন কম্বুজ বা খমের সাম্রাজ্য শ্রাম, কম্বুজ (Cambodia), দক্ষিণ ভিয়েতনাম, লাওস ও উত্তর মালায়া এসব জুড়ে আধিপত্য করত তখন হীনযান এ অঞ্চলে আসেনি। কম্বুজ সাম্রাটরা শৈব কিংবা মহাযানী বৌদ্ধ ছিলেন।

বিকালবেলা ব্যাঙ্ক স্টেশনে গাড়ি এসে থামল। প্লাটফর্মে থাই-ইউরোপীয় ফ্যাশানে সুসজ্জিত অনেক ভদ্রলোক ও মহিলা দেখলাম। এ নতুন ধরনের পোশাক-পরিচ্ছদ বেশ ভালই লাগল। বেটাছেলেদের পরনে রেশমী ধুতি মালকোঁচা মেয়ে পরা, কালো ফুলমোজা, পাম্পাণ্ড, গায়ে বুকখোলা কোট, ভেতরে সাদা রেশমী কামিজ দেখা যাচ্ছে। মেয়েদের পায়ে মোজা, চটি, রেশমী সারং (লুঙ্গি), গায়ে রেশমী ব্লাউজ। অনেকেরই চুল ছোট করে ছাঁটা। প্রাচীনদের ওরকম সোঁখীন ব্লাউজ নেই, গায়ে উড্ডুনি, স্ত্রীর সারং, দাঁত মিশি দিয়ে কুচকুচে কালো করা, খালি পা। তাদের চুল একেবারে খুব ছোট করে কাটা। পরে শুনেছিলাম যে মেয়েদের ওরকম বিক্রী করে রাখবার কারণ ছিল যে বর্মীরা প্রায়ই এদেশে লুটতরাজ করত আর এখানকার মেয়েদের ধরে নিয়ে গিয়ে ক্রীতদাসী

করে রাখত। যা হোক, এখন তো সে ভয়ও নেই আর সে রেওয়াজও উঠে গেছে। গুরুত্ব বৃদ্ধি বোধ হয় ব্যাককে আজ আর দেখতে পাওয়া যাবে না।

রেল স্টেশন থেকে বেরিয়ে একটা ভাড়াটে কীটন করে একটি হিন্দুস্থানী ব্যবসায়ীর ঠিকানায় চললাম। এখন মনে নেই এই ঠিকানা সিঙ্গাপুরে আমার শিখ হোস্টের কাছে পেয়েছিলাম বা তাঁর কোন জানাশোনা লোকের কাছে থেকে। ঠিকানায় পৌঁছে দেখা গেল যে এঁরা গোরখপুর থেকে এসেছেন, এখানে ডাল, আটা ও আমাদের দেশের বেশন, গুড়, ছাতু, মশলা ইত্যাদি, নানান রকম খাদ্যদ্রব্য তাঁর দোকানে রাখেন ও এসব দিয়ে এখানকার ভারতবাসীদের (এঁদের সংখ্যা ব্যাককে 'কম নয়) একটি বিশেষ অভাব ভাল করে মেটাতে পারেন। আমাকে এঁর ক ভাই খুব ভাল করে রেখেছিলেন। আমি এঁদের নিজের হাতে রান্না পরটা, অড়হর ডাল, আলু-চচ্চড়ি খুব তৃপ্তির সঙ্গে খেতাম। রাজে দোকানের ওপরে একটি ছোট ঘরে পাশাপাশি দড়ির খাটিয়াতে তিন-চারজন গল্প করতে করতে ঘুমিয়ে পড়তাম। •

তার পরদিন তাঁদের একজনকে সঙ্গে নিয়ে ওখানকার অর্থদপ্তরের অফিসে গেলাম। সাইয়ামের রাজকুমার বিদ্যা বছরখানেক আগে অমৃতসরে এসেছিলেন। তখন লাহোর, অমৃতসরে ডার্লিং প্রমুখ নামকরা সমবায় আন্দোলনের কর্মীরা ঐ কাজ পাঞ্জাবে আরম্ভ করেছেন আর থানিকটা সফলও পেয়েছেন। আমাদের খালসা কলেজের প্রিন্সিপাল ওয়াদেন সাহেবের সঙ্গে মিঃ ডার্লিং-এর খুব ভাব ছিল—তাই ডার্লিং এখানে প্রায়ই আসতেন। তাঁরই উৎসাহে কলেজে সমবায় ডেয়ারী ও সমবায় স্টেশনারী দোকান খোলা হয়েছিল। আমি ইকনমিক্স পড়াই বলে আমাকে কলেজের সমবায় সমিতির সেক্রেটারি করা হয়েছিল। ডার্লিং আর আরেকজন ঐ বিষয়ে বিশেষজ্ঞ মিঃ কলভার্টের খ্যাতি তখন দেশময় ছড়িয়ে পড়েছিল। স্বতরাং রাজকুমার বিদ্যা যখন শ্রামদেশে সমবায় আন্দোলন চালু করার উদ্দেশ্যে ভারতে আসেন, ঐ বিষয়ের খোঁজখবর নিতে তখন তাঁকে অমৃতসরেও আসতে হয়েছিল। আমাদের কলেজেই ডার্লিং ও কলভার্ট সাহেবদের সঙ্গে তাঁর পাঞ্জাবে সমবায় সম্বন্ধে কথাবার্তা হয়েছিল। আমাকেও ডার্লিং সেই সময় রাজকুমারের সঙ্গে পরিচয় করিয়ে দিয়েছিলেন। আর আমিও তখন সাইয়াম-এর মুদ্রাবিনিময় সংক্রান্ত নিয়মকানুন জানবার জন্ত রাজকুমারের সাহায্য চাইলাম আর বিদ্যাও তৎক্ষণাৎ সন্মত হলেন।

এখন আমি তাঁকে সেই কথা মনে করিয়ে দেবার জন্তে তাঁর সঙ্গে দেখা

করলাম। আমি তাঁদের দেশে এসে পৌঁছেছি দেখে তিনি খুব খুশী হলেন আর আমাকে মৃত্তাবিভাগে পাঠিয়ে দিলেন।

সাইয়ামে রাজকীয় দপ্তরে এক নতুন ব্যাপার দেখলাম। প্রত্যেক অফিসারের টেবিলের কাছে বড় বড় পিকদান রাখা আছে। আরচাপরাশী ঘন ঘন পান-সুপারির ট্রে নিয়ে ঘোরাঘুরি করছে। সুপারিগুলি কাঁচা, ছুরি দিয়ে কেটে নিতে হয়। সব অফিসার, ক্লার্ক, নিজেরাই সুপারি কাটছেন আর পান সেজে খাচ্ছেন। সেই সঙ্গে চাও চলছে কাপের পর কাপ, সবুজ চা, চিনি-দুধের কোনও গ্লাস নেই, আমি ঘণ্টাখানেকের মধ্যে দু'কাপ খেয়ে নিলাম। মৃত্তাবিভাগ থেকে একখানি বই তখনই আমাকে দেওয়া হল আর তিন-চারদিন পরে আবার আমাকে আসতে বলা হল। আমার কাজ বেশ এগুচ্ছে দেখে আমিও খুশী হয়ে সেই ডাল আটার দোকানে ফিরলাম।

ব্যাঙ্কের ইলেকট্রিক ট্রামগুলি ভালই, আর ওগুলিতে একটি বেশ মজার নিয়ম আছে। মহিলাদের জন্তে আলাদা সীট নেই। কিন্তু কোনও মহিলা যদি ট্রামে চড়েন সব পুরুষযাত্রীদেরই দাঁড়িয়ে পড়া প্রথা, মহিলাটি যাতে যেখানে ইচ্ছা বসতে পারেন। পুরুষযাত্রীরা তাই বসতেই চান না, কোনও মহিলা থাকুন না-থাকুন পুরুষরা ট্রামে দাঁড়িয়েই থাকেন। দেশের রাজা মহাবজ্রায়ুধ ক্রান্ত হয়ে এসেছেন, ফরাসী কৃষ্টি ও সাহিত্য ভাল করেই জানেন, তাঁরই আদেশে এই ব্যবস্থা চলছে।

এ দেশের বৌদ্ধমন্দির (vat বা বাট) সংখ্যায় অগণ্য, দেখতেও সুন্দর। কতকগুলি প্যাগোডার মত, চূড়া বেশ উঁচু, ধাপে ধাপে উঠেছে। ছাত চীনা-মাটির টালি দিয়ে ঢাকা, রঙবেরঙের টালির ওপর যখন রোদুঁর পড়ে সব ঝকঝক করে ওঠে, বড় সুন্দর দেখায়। রাজধানীর মন্দিরের মধ্যে পাল্লার বুদ্ধমূর্তির মন্দির সবচেয়ে প্রসিদ্ধ। শোনা গেল একটি বড় পাল্লা খোদাই করা এই মূর্তি, এটি যেন রাজ্যের ইস্টদেব। মন্দিরের দরজাগুলিতে রূপোর কাজ করা রামায়ণের চিত্র। রাম ও রামায়ণের শ্রামদেবের ওপর খুব প্রভাব। রাজাদের সব রাম উপাধি, সে সময়ের রাজা মহাবজ্রায়ুধ হলেন পঞ্চম রাম। দেশের পুরনো রাজধানী ছিল আয়ুখিয়া (অযোধ্যা)। বর্মীরা আয়ুখিয়া ধ্বংস করলে ব্যাঙ্ক হল নতুন রাজধানী। মীনাম নদীর ওপর এই শহর, নদীতে স্তম্ভীব, বালী নামের ছোট ছোট যুদ্ধজাহাজ রাজধানীর রক্ষণাবেক্ষণ করছে। এই জাহাজগুলি দেখে ও তাদের নাম শুনে বড়ই ভাল লাগল। মনে হুঃখও হল যে আমাদের এত বড়

দেশ, তবুও আমরা পরাধীন, আমাদের তো নিজেদের নাম-করা যুদ্ধ-জাহাজ নেই। আমাদের দেশে রাজা তো অনেক আছেন, কিন্তু তাঁরা সবাই ব্রিটিশ সরকারের গোলাম, নিজেদের রাজ্যে ব্রিটিশ রেসিডেন্টের ইচ্ছিতে ওঠা-বসা করতে হয়। আর আমাদের সাধারণ লোকের রাজনৈতিক কোন কিছুতে যোগদান সরকারের দৃষ্টিতে বড়ই খারাপ কথা। “নিজ বাসভূমে পরবাসী হলে, পরদাস্থিতে সমুদয় দিলে”—কবির একথা ভাল করেই বোঝা যায় যখন দেশো-বাইরে গিয়ে খুব ছোট স্বাধীন দেশও দেখা যায়।

এত ছোট শ্রামরাজ্য কি করে ইয়োরোপীয় সাম্রাজ্যবাদের হাত থেকে নিষ্কৃতি পেলো? দু-চার কথায় এর উত্তর দিচ্ছি। শ্রামের একদিকে বর্মা ও মালায়া ইংরেজের কুক্ষিগত হল, অত্রদিকে কাষোডিয়া, লাওস ও ভিয়েতনাম ফ্রান্সের কবলে গেল, এ দুয়ের মাঝখানে শ্রাম ইংরেজ ও ফরাসীদের পরস্পরবিরোধী-ভাবের জগুই টিকে রইল। ভয় ছিল কাষোডিয়া ও লাওস-এর পরেই ফ্রান্স শ্রামদেশে ঢুকে পড়বে। ব্রিটেনের এতে এত জোর আপত্তি ছিল যে ফ্রান্স আর এগুল না। ইংলণ্ডের এ রাজ্যটি গ্রাস করে বর্মার ও মালায়ার সঙ্গে এক করে খাসা একটি দক্ষিণ এশিয়ার ব্রিটিশ সাম্রাজ্যের শাখা তৈরী হতে পারতো, কেবল ফ্রান্সের হিংসের জালায় হল না। শ্রামের থাই রাজারা বুদ্ধি খাটিয়ে ছুটি ইয়োরোপীয় মহাশক্তিকে পরস্পরের বিরুদ্ধে দাঁড় করিয়ে নিজের দেশটি বাঁচিয়ে নিতে পেরেছিলেন। এশিয়ার আধুনিক যুগের ইতিহাসে থাই রাজাদের এই কীর্তি ভুললে চলবে না।

এবার আমার এই বিদেশ-বিভূঁয়ে আসবার ফলে আমার পড়াশুনার কাজ যে এক নতুন দিকে চললো সেই কথা বলি। তার আগে এখন এদেশে আমাদের দেশের লোক কেমন যান, আসেন ও থাকেন সে বিষয়ে কিছু বলা উচিত। আমার হোস্টের দোকানে অনেক ভারতবাসী আসতেন সন্ধ্যাবেলা নিজেদের কাজকর্ম সেরে। আমার জন্মস্থান বহরমপুরের একটি মুসলমান ভদ্রলোক আমার মামার বাড়ির পরিচয় পেয়ে খুব আত্মলাদের সঙ্গে আমার দাদামশাই ও মামাদের কথা জিজ্ঞেস করলেন। তখনি তাঁর বাড়িতে নিয়ে গেলেন, দেখলুম তাঁর ছেলেরা একেবারে শ্রামদেশীয় চেহারার, বুঝলাম ভদ্রলোক এই দেশে এখানকারই মেয়ে বিয়ে করেছেন। এখানকার নোঁবিভাগে ইনি কাজ করেন। দেশের ওপর এখনও এঁর বিলক্ষণ টান আছে। আর একটি বাঙালী ভদ্রলোকের সঙ্গে দেখা হয়েছিল, তাঁর এখানে তেজারতী কাজ চলছে। আমাকে একদিন তাঁর

বাসায় নিয়ে গিয়ে খেজুরগুড়ের পায়েস খাইয়েছিলেন। তবে দেখলাম যে অস্তুতঃ ব্যাককে গোরখপুর জেলার লোকই বেশী এসেছে। এখানে শিখ গুরুদোয়ারা আছে। আমাকে এখানে থাকতেও তখনকার শিখ ভদ্রলোকেরা (তাঁরা অনেকেই রেশম ব্যবসায়ী) অহরোধ করেছিলেন। সনাতনীদের একটি বিষ্ণুমন্দিরও আছে।

আর একদিন একটি দক্ষিণ-দেশীয় ব্রাহ্মণ পণ্ডিত এলেন, সংস্কৃত খুব ভাল জানেন, বললেন যে এখানকার সরকারী বড় লাইব্রেরীতে তিনি কাজ করছেন, এখন একজন ফরাসী পুরাতত্ত্ববিদের সঙ্গে কিছু প্রাচীন সংস্কৃত পুঁথি প্রভৃতি নিয়ে দুজনে এই অঞ্চলের একটি পুরাকালের বৃত্তান্ত রচনা করবার প্রয়াস করছেন। তিনি আমার সঙ্গে সেই পুরাকালের অনেক কথা বললেন, সে সময়ে (১৫০০ বছর আগে) এই দক্ষিণ-পূর্ব এশিয়ার কত হিন্দুরাজ্য ছিল, কি রকম সিংহবিক্রমে তাঁরা চীন সম্রাটদের সঙ্গে যুদ্ধ করে নিজেদের স্বাধীনতা বজায় রেখেছিলেন। আর তাঁর বিশ্বাস তাঁরা নিশ্চয়ই তাত্ত্বিক সাধনায় সিদ্ধ হয়ে এরকম অলৌকিক শক্তি ধারণ করতে পেরেছিলেন, তবে দুঃখের বিষয় যে এইসব অত্যাশ্চর্য ব্যাপার ভারতবাসীরা কিছুই জানে না। তিনি আশ্বাস দিয়েছিলেন যে তিনি নিজে তাঁর দেশবাসীদের এই সাগরপারের মহাবীর হিন্দুরাজাদের গল্প শোনাবেন। আমার খুবই ভাল লেগেছিল তাঁর এসব কথা। আমি তাঁকে অহরোধ করলাম যে সেই ফরাসী পণ্ডিতের সঙ্গে আমার দেখা যেন তিনি করিয়ে দেন। তিনি তার পরের দিনই সেখানে আমাকে নিয়ে যাবেন বললেন। আমার তো অনেক আগে থেকেই ভারতের সঙ্গে এদিককার যোগাযোগ (বিশেষ করে পুরাকালের) জানবার খুব ইচ্ছা ছিল। ফরাসী পুরাতত্ত্ববিদের সঙ্গে দেখা করবার জন্তে উৎসুক হয়ে রইলাম।

সেদিন নির্দিষ্ট সময়ে রাজার বজ্ঞান লাইব্রেরীতে দুজনে উপস্থিত হলাম। আমার কার্ড পাঠিয়ে অধ্যাপক জর্জ কীভিস্-এর সঙ্গে দেখা করলাম। সৌম্য-দর্শন মধ্যযুগ ভদ্রলোক, আমার প্রশ্নের উত্তরে তিনি বললেন যে ভারতবর্ষের প্রভাব এই অঞ্চলের উপর খুব ফলপ্রসূদ হয়েছিল ও এখনও এর অনেকটা থেকে গেছে। এইসব দেশে—শাম, কাসোডিয়া, আনাম (ভিয়েতনাম) প্রভৃতি রাজ্যে—৬০০-৭০০ বছর আগেও প্রবলপ্রতাপ শৈব, বৈষ্ণব, মহাযান বৌদ্ধ সম্রাটেরা বিশাল সাম্রাজ্যের উপর আধিপত্য করতেন। মাঝে মাঝে শাম, লাও (লব ?), উত্তর মালায়া, দক্ষিণ ভিয়েতনাম (চম্পা)—এইসব দেশগুলি এক বৃহৎ

কম্বুজ সাম্রাজ্যে অন্তর্ভুক্ত ছিল। তখন সপ্তম জয়বর্মণের মত কম্বুজাধিপতির। বলতে পারতেন যে পশ্চিম সাগর (বঙ্গোপসাগর) থেকে পূর্ব সমুদ্র (প্রশান্ত মহাসাগর) পর্যন্ত বিস্তৃত ভূখণ্ড তাঁদের শাসনাধীন ছিল।

আর কেবল বড় বড় রাজ্যের কথা নয়, এই সম্রাটদের স্থাপিত মন্দির [আন্ধোর, বাইয়ন (বৈজয়ন্ত?) প্রভৃতি] আজও জগতে অতুলনীয়। আন্ধোর বাট আসলে বিষ্ণুমন্দির—অত বড়, অত সুন্দর মন্দির জগতে নেই। কম্বুজ নৃপতিদেরই নামধারী দেবমূর্তি (এখানকার রাজারাণীরা পরলোকে যাবার পর কোন না কোন দেবলোকে যেতেন বলে, সেই সেই দেবদেবীর নামে মৃত্যুর পরে পরিচিত হতেন) গুপ্ত, পাল, পল্লভ ভাস্কর্যের রীতি অনুযায়ী পরিকল্পিত, এই অঞ্চলের সর্বত্র পাওয়া যায়। কম্বুজ সম্রাটদের কীর্তিকলাপ শত শত শিলালিপিতে বিস্তৃত সংস্কৃত ভাষায় রচিত হয়েছে। ৬০০-৭০০ বৎসরের ইতিহাস এইসব লিপি থেকে পাওয়া যায়। তারতবর্ষেও এরকম শিলালিপির অবিচ্ছিন্ন অনুবর্তন দেখা যায় না। আর ফরাসী ও ডাচ পুরাতত্ত্ববিদের এইসব লিপির অনেকগুলিরই পাঠোদ্ধার করতে পেরেছেন।

অধ্যাপক কীডিস্ দুঃখপ্রকাশ করলেন যে ভারতের ইতিহাসের একটি স্মরণীয় যুগ ভারতীয় ঐতিহাসিকদের জানা নেই। এই যুগটি এই অঞ্চলের (দক্ষিণ-পূর্ব এশিয়ায়) ভারতের ধর্মের ও সংস্কৃতির অব্যাহত প্রভাবের যুগ ছিল। আর একটি বিশেষ করে লক্ষ্যের বিষয় হল যে এই প্রভাব ভারতের কোনও সাময়িক জয়যাত্রার ফল নয়, ভারতের ধর্মের (শিব, বৈষ্ণব, বৌদ্ধধর্মের) ও কৃষ্টির (সাহিত্য, স্থাপত্য শিল্পকলা) প্রচার করতে যারা পর্বত লঙ্ঘন করেছিলেন, হ্রদ্র সমুদ্রপারের দেশে অনেক কষ্ট ভোগ করে পৌঁছেছিলেন, এ গভীর প্রভাব তাঁদেরই অধ্যবসায়ের ফল। যুদ্ধে রক্তপাত করে এ সম্ভব হয়নি, শাস্তির আবহাওয়াতেই এই ধার্মিক ও জ্ঞানীদের শান্তিময় অভিযান সফল হয়েছিল। তারপর পাঁচ-ছশো বছর হয়ে গেল, বাইরের শত্রুর আক্রমণ, নানা দেশের নানারূপের ঘাতপ্রতিঘাত এখনও ঐ ভারতীয় প্রভাব উন্মূলিত করতে পারেনি।

অধ্যাপক কীডিস্-এর কথা আমি তো মনঃমুগ্ধের মত শুনছিলাম। তারপর তাঁকে জিজ্ঞেস করলাম, আমি এ বিষয়ে কাজ করতে চাই, কি করে এ কাজ আরম্ভ করব? তিনি বললেন যে প্রথমে আমাকে ফরাসী পড়তে শিখতে হবে আর একটু ডাচও শিখতে হবে, তারপর অনেক ফরাসী ও ডাচ মালমশলা এ বিষয়ের ওপর পাব। বিশেষতঃ সংস্কৃত শিলালিপির যে পাঠোদ্ধার হয়েছে বার্ধ ও বের্গে

প্রভৃতি ফরাসী পুরাতত্ত্ববিদদের পুস্তকে সেগুলি পড়তে হবে। আমি ভারতবাসী, দক্ষিণ-পূর্ব এশিয়ায় ভারতের প্রভাবের অনেক তথ্য বের করতে পারব যা বিদেশীরা বুঝতে পারেনি। ভারতের অহুসঙ্কিতদেরই এই কাজ করা উচিত।

তঁার একটি ফরাসী মহিলা সহকর্মী এসে পড়লেন, তঁার ও আমার পরিচিত দক্ষিণ ভারতের পণ্ডিতের সঙ্গে তখন কীডিস্ তঁার লেখাপড়া আরম্ভ করলেন। আমিও বিদায় নিলাম। তখন থেকেই মনস্থির করলাম যে মূদ্রা বিনিময় কাজটা তাড়াতাড়ি শেষ করে ভারতের বাইরে ভারতের কৃষ্টির জয়যাত্রার সম্বন্ধে উপকরণ সন্ধান করব।

এবারকার দেশভ্রমণ প্রায় শেষ হল। একদিন আমার দোকানদার বন্ধু আমাকে এক উচ্চশ্রেণীর বৌদ্ধভ্রমণের কাছে নিয়ে গিচ্ছিলেন। তাঁকে দেখে আমার খুব ভক্তি হয়েছিল, মুখ দেখলেই মনে হয় যেন যথার্থ শাস্তি পেয়েছেন। বেশ পরিষ্কার পরিচ্ছন্ন পরিবেশটি। আমি ভারতবর্ষ থেকে এসেছি, ব্যবসায়ী নয় বিদ্যার্থী একথা আমার বন্ধুর মুখে শুনে খুশী হলেন। তাঁকে বললাম এদেশের বৌদ্ধধর্ম বিষয়ে তঁার কাছ থেকে কিঞ্চিৎ শুনতে চাই। এর উত্তরে তিনি বললেন যে ভারতের সম্রাট অশোক সোনক ও উত্তর নামের দুটি বৌদ্ধ ভিক্ষু পাঠিয়ে-ছিলেন ‘স্ববর্ণভূমিতে’—শ্রাম দেশও ঐ স্ববর্ণভূমির অন্তর্গত। এখানে রাজা, প্রজা সকলেরই এক ধর্ম—ধেরাবাদ বৌদ্ধধর্ম। সকলকেই—সিংহাসনের উত্তরাধিকারী রাজকুমার থেকে গাঁয়ের চাষী পর্যন্ত সাংসারিক বা গার্হস্থ্য জীবনে ঢোকবার আগে কিছুদিন বৌদ্ধমঠে ভিক্ষুর জীবন পালন করতে হয়। আরও বললেন যে ধর্ম নিয়ে এদেশে কোনও বিক্ষোভ নেই—আর হবার কোনও ভয়ও নেই। তঁার কথাগুলি আমার বড় ভাল লেগেছিল।

রাজকুমার বিদ্যার কাছে বিদায় নিতে গিচ্ছলাম। তিনি শ্রামের মূদ্রা ‘টিকল’ সম্বন্ধে আরও কাগজপত্র দিলেন। তঁার নির্দেশানুসারে ব্যাককের ফরাসী কনসালের কাছেও গিচ্ছলাম ইন্দোচীনের মূদ্রাবিনিময় সংক্রান্ত খোঁজখবর নিতে। কনসালের দেখা পেয়েছিলাম আর তঁার কাছ থেকে ফরাসী ইন্দোচীনের টাকা-কড়ির বিষয়ে একটি সংক্ষিপ্ত রিপোর্টও পেয়েছিলাম।

চলে যাবার আগের দিন ব্যাককের বিষ্ণুন্দিরে ওখানকার প্রবাসী হিন্দু, শিখ ও দু-একজন মুসলমানও আমাকে বিদায় দিলেন। আমি তাঁদের স্বুলের জন্তে কিছু বই কলকাতা থেকে পাঠিয়েছিলাম।

কাজ কতদূর হয়েছিল বলতে পারি না—কিন্তু আমার মনোবাঞ্ছা পূর্ণ হল। একটি স্বাধীন বোর্ড রাজ্য দেখলাম, আর দেখে মন প্রফুল্ল হল। রাজদর্শন হয়নি, রাজা তখন অপেক্ষাকৃত ঠাণ্ডা উত্তরদিকের পাহাড়ী অঞ্চলে গেছেন, রাজার শ্বেত হস্তীও তখন সেখানে গেছেন, তাঁরও গরম সময় না। রাজা মহাবজ্রাযুধ অবিবাহিত, নাটক লেখেন, তার অভিনয়ও করান, বড় বেশী মেলামেশা করেন না। সুনলাম এই কারণে শিক্ষিত সম্প্রদায় তাঁর ওপর তত সন্তুষ্ট নন। তবে রাষ্ট্রবিপ্লবের তখন দেরী আছে আরও বায়ো বছর।

ফেরবার পথে পিনাং-এ দুদিন থাকতে হল জাহাজের অপেক্ষায়। সেই গুজরাটি অলকার-ব্যবসায়ী যাঁর দোকানে কলকাতা থেকে আসবার সময় ঘড়ি মিলিয়েছিলাম, এবার তিনিই আমার ‘হোস্ট’, আমাকে স্টেশন থেকে নিয়ে গেলেন তাঁর বাসায়। দোকানের ওপর তাঁর ফ্ল্যাট বড় সুন্দর, দুদিন আমাকে সম্বন্ধে রেখেছিলেন। পিনাং-এর প্রসিদ্ধ ‘সাপের মন্দির’ দেখালেন, সমুদ্রতীরের ‘রামপাস্টান’ (আমাদের লিচুর মত ফল—ফলের গায়ে লম্বা রেঁয়া) বাগান ঘুরিয়ে নিয়ে এলেন, আর দেশের খবর শোনালেন। সাপের মন্দিরটি অদ্ভুত জায়গা—কত রকমের কত রঙের সাপ খোলা উঠানে ঘুরছে, তাদের দেখে কেউ ভয় পাচ্ছে না, তারাও কাউকে কামড়াতে যাচ্ছে না। মন্দিরটির মেঝে মার্বেলের, খুব পরিষ্কার সবুজ, হলদে, লাল সাপ কিলপিল করছে। ছোট ছোট কচ্ছপও অগুনতি। নতুন ধরনের সবই, তবে এখান থেকে বেরিয়ে এলেই মনটা আশ্বস্ত হয়।

পিনাং-এর সমুদ্রতীর, বাগান বড়ই সুন্দর, ওরকম সুন্দর জায়গা (ওখানে আবার গিছলাম ৩৫ বছর পরে) কমই দেখেছি। যা হোক, কলিকাতাগামী জাহাজ এল, বড় জাহাজ, ডেকে হালওয়াইয়ের দোকান, সুতরাং জাহাজের খাবার এবার খেতে হল না। পুরি কার্চোরী, বর্ফি ইত্যাদি ভালই পাওয়া গেল। নির্বিশেষে কলকাতা পৌঁছলাম। ছুটি ফুরিয়ে এসেছিল। কয়েকদিন পরেই অমৃতসরে ফিরতে হল।

খালসা কলেজে আন্দোলন ও বিদেশ যাত্রা

সেখানে তখন আর নিশ্চিত হয়ে কাজ করবার জো নেই। আকালি আন্দোলন পুরোদমে চলছে। খালসা কলেজটিকে স্বদেশীকরণ করবার জন্য প্রাণপণ চেষ্টা চলছিল। আবার প্রিন্স অব ওয়েলস তখন ভারতবর্ষে আসছিলেন, তাঁর খালসা কলেজেও আসবার কথা ছিল। এতেও আকালিদের বিশেষ আপত্তি ছিল। বিশ্ববিদ্যালয়গুলিকে বেসরকারী করবার আন্দোলন তখনও দেশ জুড়ে চলছিল, আর প্রিন্স অব ওয়েলস (যিনি অষ্টম এডওয়ার্ড হয়েছিলেন) যেখানে যেখানে যাচ্ছিলেন সেখানে সেখানে 'হরতাল' হচ্ছিল। দেশের এই পরিস্থিতিতে খালসা কলেজের স্টাফ খালসা কলেজকে জাতীয় কলেজ করা ও প্রিন্স অব ওয়েলসএর কলেজে না আসার এই দুই মতেরই পক্ষে ছিল। কলেজ কর্তৃপক্ষ এজ্ঞা প্রফেসারদের ওপর খুব চটে ছিলেন। তাঁদের তরফ থেকে হুকুমজারী হল যে স্টাফ এসব বিষয়ে একেবারেই না হস্তক্ষেপ করে।

আমরা শিখ রাজাদের অস্ত্ররোধ করলাম যে তাঁদেরই দেওয়া টাকায় যখন এ কলেজ গড়ে উঠেছে, তাঁরাই যেন এ সঙ্কটে কলেজটি বাঁচান। খানিকটা পরিবর্তন হল। শিখ সম্প্রদায়ের নরমপন্থীরা কলেজের ভার নিলেন, আকালিদের (গুরুদোয়ারা প্রবন্ধক পার্টিকে) এদিকে ঘেঁষতে দেওয়া হ'ল না। এই নরম-পন্থীদের বলা হ'ত চীফ খালসা দেওয়ান পার্টি। আকালীরা এঁদের ওপর হাড়ে হাড়ে চটা ছিলেন, তাঁদের মতে চীফ খালসা দেওয়ান একেবারে ব্রিটিশ সরকারের ধামাধরা, আর এই পরিবর্তনের ফলে ব্রিটিশ সরকারেরই জয় হ'ল।

কলেজের প্রফেসারদের সমস্তা সেই রইল। কলেজের নতুন কর্তারা সেই পুরোনো আদেশই বহাল রাখলেন, আর শিক্ষকেরাও তাঁদের আগেকার মত বদলালেন না। এ ছুঁয়ের মাঝে সংঘর্ষটি এড়ানো গেল না। আমাদের প্রিন্সিপাল মিঃ ওয়াদেনএর সহায়ত্বে আমাদের সঙ্গে ছিল, তিনি অল্প জায়গায় বদলী হলেন, বা তাঁকে বদলী করানো হ'ল। চীফ খালসা দেওয়ান পার্টির কলেজ ম্যানেজিং কমিটি আমাদের স্টাফ থেকে বরখাস্ত করলেন আর শিখ প্রফেসারদের কোনও রকম আন্দোলন করতে কড়া নিষেধ করলেন। বারোজন শিখ প্রফেসার

তৎক্ষণাৎ তাঁদের পদত্যাগের কথা কমিটিকে জানিয়ে দিলেন। হুতরাং আমি আর বারোজন শিখ প্রফেসর একইদিনে খালসা কলেজ থেকে বেরিয়ে এলাম। আমাদের তো আমার প্রভিডেন্ট ফাণ্ড পুরো দেওয়া হ'ল, অত্ৰ বারোজন ঐ ফাণ্ডের কেবল নিজের দেওয়া টাকা পেলেন, কলেজ যে টাকা সাধারণতঃ তাঁদের ঐ অ্যাকাউন্টে দিত তা আর দিল না। এঁদের প্রত্যেকের দু হাজার বা আরও বেশী লোকসান হল। আমি তাঁদের অহরোধ করেছিলাম যে তখুনি তখুনি পদত্যাগ না করে এক মাসের নোটিশ দিয়ে কাজ ছাড়ুন। সে কথা কেউ শুনলেন না, তাঁরা বললেন যে ওরকম করলে আমার প্রতি অবিচার করা হয়।

আমি তাঁদের হয়ে লড়েছি, তাঁরা আমাকে এ লড়ায়ে ওরকম করে ছেড়ে যেতে পারেন না। আমার পুরাতন প্রফেসর হুরেজনাথ দাসগুপ্ত মশাই সেই সময় আমাকে বলেছিলেন যে তোমার জন্তে তোমার শিখ বন্ধুরা যা করেছে অত্ৰ জায়গায় এরকম কেউ করতো না। তিনি ঠিকই বলেছিলেন—গেরস্ত ঘরের লোকের প্রত্যেকের হাজার দুয়েক টাকার লোকসান বিনা দ্বিধায় মেনে নেওয়া কষ্টসাধ্য ব্যাপার—অনেকেই এরকম করাতে পারবে না। অনেকদিন পরে আমার বারোজন সহকর্মীদের এই স্বার্থত্যাগের উল্লেখ করে একজন গণ্যমান্ণ ব্যক্তি বলেছিলেন যে এটা ছিল খালসা কলেজের হিরোয়িক যুগ। শিখসম্প্রদায়ে তো এতগুলি লোকের একসঙ্গে কলেজ থেকে বেরিয়ে যাওয়া নিয়ে তুমুল আন্দোলন আরম্ভ হ'ল। অধ্যাপক গুরমুখ নেহাল সিং বেনারস বিশ্ববিদ্যালয় থেকে এসে অমৃতসরে একটি প্রতিবাদ সভায় সভাপতিত্ব করলেন। বছর ত্রিশেক পরে ইনি রাজস্থানের গভর্নর হয়েছিলেন। আমাকেও সেই সভায় কিছু বলতে হয়েছিল। মস্ত হলভরা শ্রোতাদের সামনে দাঁড়িয়ে সেই আয়েয় পরিস্থিতিতে অনিচ্ছাসত্ত্বেও কিছু গরম গরম বলে ফেলেছিলাম। দিন কতক আগেই বাবা আমার ইয়োরোপ যাবার জন্তে পাসপোর্ট যোগাড় করেছিলেন, খবরের কাগজে আমার ঐ কথাগুলির রিপোর্ট পড়ে বাবা বিরক্ত হয়েছিলেন, ভেবেছিলেন যে পাসপোর্ট হয়ত ভেঙ্গে যাবে। যাহোক ব্যাপারটা আর অতদূর গড়ায়নি।

সে সময়টাতে অন্ততঃ কিছুদিনের জন্ত খালসা কলেজের এই তেরোজন বিশেষ খ্যাতিলাভ করেছিলাম। প্রায় বোজ্জই খবরের কাগজে আমাদের বিষয়ে কিছু না কিছু থাকতো—পরে দেখা যাবে বিলেত পর্যন্ত আমাদের কথা উঠেছিল।

এই গোলমালের মধ্যে আমার খিসিস শেষ করে পাঞ্জাব বিশ্ববিদ্যালয়ে পাঠানো হয়েছিল আর গুটি ফিরেও এসেছিল। রিপোর্টে ছিল যে আরও

বিস্তৃতভাবে আলোচনা করে আবার যেন খিসিসটি পাঠাই। এদিক দিয়ে আমার বিলেত যাওয়াতে সুবিধা হয়েছিল। ওখানে আরও নতুন উপকরণ পাব—আরও ভাল করে লিখতে পারব। আর পরীক্ষকরা দুজনেই ইংল্যান্ডের। হয়তো তাঁরা আরও মালমশলা সংগ্রহ বিষয়ে কিছু নির্দেশ দেবেন।

আগেই বলেছি যে আমাদের দেশে স্বর্ণ বিনিময় মান বা গোল্ড এস্কেচঞ্জ স্ট্যাণ্ডার্ড বস্তুটি একেবারেই অপাংক্তেয়। ১৯২৪ সালের গোড়ায় বোম্বাইয়ে ইকনমিক্স কনফারেন্সে আমি এইরকম মুদ্রাবিনিময় পদ্ধতির ওপর একটি বক্তৃতা পড়েছিলাম। একটি ইংরেজ অধ্যাপক ছাড়া কেউই আমার মতামত মানেননি। এই ইংরেজ অধ্যাপকটি কলকাতা বিশ্বাবিদ্যালয়ের ইকনমিক্সের মিণ্টো অধ্যাপক। বোম্বাইয়ের নামী অর্থবিদেরা তো আমাকে স্বদেশবিরোধী বলে ঠাউরে ছিলেন।

বিদেশ যাবার আগে মাস দুয়েক ধরমশালায় সবাইয়ের সঙ্গে কাটিয়েছিলাম। বাবা সেখানে ছিলেন আর আমার স্ত্রী ; বড় ছেলেটি ও দুটি খুব ছোট মেয়ে। সে দুটি মাস বেশ কেটেছিল। একদিন ওপরকার ‘এলাকায়’ বরফও দেখে এসেছিলাম। তারপর একদিন ভোরবেলা লাহোর চলে গেলাম, সেখান থেকে করাচী মেলে করাচী গিয়ে ওখান থেকে জাহাজ ধরতে হবে। লাহোর রেলস্টেশনে বাবা, সেজদা, (স্ত্রী, পুত্র, কন্যাদের তো ধরমশালায় দেখে এসেছি) আর কয়েকটি বন্ধু আমাকে লাহোর-করাচী কম্পার্টমেন্টে চড়িয়ে বিদায় দিলেন। তারপর পশ্চিম পঞ্জাবের মধ্যে দিয়ে সিন্ধুপ্রদেশের দিকে দীর্ঘযাত্রা শুরু হল। দিনের বেলাটা মন্দ কাটলো না, রাত্রে গাড়ি যখন মরুভূমি পার হ’ল আমারও তখন জ্বর এল। বোধহয় খানিকটা হীট-স্ট্রোকের মত হয়েছিল। বাথরুমে জলের ঘড়া ছিল কিন্তু জল দেখতে দেখতে ফুরিয়ে গেল। সকালবেলা সিন্ধুনদ ও পঞ্চনদের সঙ্গম দেখে মনটা অনেকটা ভাল হ’ল। করাচী স্টেশনে লাহোরের ট্রিবিউনের অ্যাসিস্ট্যান্ট এডিটর সুধীর মুখুজ্যে মহাশয়ের একটি বন্ধু আমাকে তাঁর বাড়ি নিয়ে গেলেন। তাঁর স্ত্রী অনেকরকম রান্না করেছিলেন আমার জন্তে, আমার কিন্তু খেতে বসতে বসতেই আবার জ্বর এল। করাচীর কিছুই দেখা হল না। পরের দিন সকালে আমার ‘হোর্স্ট’ আমার সঙ্গে মাস্ত্রা হারবারে গেলেন। তাঁর ভয় ছিল ডাক্তার যদি পরীক্ষার সময় আমার জ্বর দেখে জাহাজে ওঠবার অনুমতি না দেন তাহলে আমাকে আবার তাঁদের বাড়ি ফিরিয়ে নিয়ে যাবেন। যাহোক একটি বুড়ো ইউরেশিয়ান ভদ্রলোককে নিয়ে (তাঁর শরীর খুব খারাপ ছিল)

ডাক্তার এত ব্যস্ত ছিলেন যে আমাকে আর ভাল করে পরীক্ষা করবার সুযোগ পেলেন না। তখন আমার ‘হোস্ট’ ফিরে গেলেন।

জাহাজ ছাড়বার খানিকক্ষণ আগে ডেক থেকে দেখলাম যে অমৃতসরের কয়েকজন শিখ ভদ্রলোক আমার দিকে তাকিয়ে আছেন আর আমাকে ঘেন ডাকছেন। তখনও কিছু সময় ছিল, জাহাজের একটি অফিসারকে বলে জেটিতে নেবে তাঁদের সঙ্গে কথা কইলাম। দু’একজনকে তাঁদের মধ্যে চিনতাম। তাঁরা বললেন যে আপনি তো অনেকদিনের জন্তে দেশ ছেড়ে যাচ্ছেন, খালসা কলেজ যাতে বগড়া-বাঁটিতে একেবারে নষ্ট না হয়ে যায় সেই উদ্দেশ্যে কিছু ঘরোয়া বিবাদ মেটাবার কথা বলে যান। আমারও তাঁদের কথা শুনে মনে হ’ল যে কেন এরকম অশান্তিতে একটি ভাল কলেজ উচ্ছন্ন যাবে। তাই আমি এই শিখ ভদ্রলোকদের বললাম যে বাদবিবাদ যথেষ্ট হয়েছে—কলেজটিকে বাঁচাতে হবে। লগুনে পৌঁছে আমার শিখ বন্ধুরা, যারা আমার সঙ্গে কলেজ ছেড়ে ছিলেন, খুব রাগ করে আমায় চিঠি লিখেছিলেন। তাঁদের মতে আমার ওরকম কথা বলা অগাধ হয়েছিল—আমি তো যুদ্ধক্ষেত্র থেকে সরে গেলাম—যারা সেখানে রয়ে গেল তাদের “parting kick” দিয়ে গেলাম। মনে নেই এর জবাব কি, দিয়েছিলাম।

সমুদ্রের হাওয়ায় আমি তো বেশ স্বস্থ হয়ে উঠলাম, কিন্তু সেই বুড়ো ইউরেশিয়ান ভদ্রলোকটি আরব সাগর পার হ’তে না হ’তেই মারা গেলেন। একদিন সকালে জাহাজের সবাইকে ডাকা হল সমুদ্র-সমাধি অনুষ্ঠানে উপস্থিত হতে। মৃতদেহটি ইউনিয়ন জ্যাকে ঢাকা, ডেকের খানিকটা রেলিং সরিয়ে, একটা তক্তার উপর রাখা হল। জাহাজের ক্যাপ্টেন বাইবেল থেকে কিছু পড়লেন, আমরা সবাই শালুট করলাম, তক্তাটা নীচের দিকে কাত করা হল—দেহটি সমুদ্রে পড়লো। দু-একটি ডলফিন (purpoise?) জলে পড়ার শব্দে জলের ওপর দেখা দিল। সমুদ্র-সমাধি হয়ে গেল।

বেশ গরম। তারপর স্বয়ংজ খালের ভিতর দিয়ে যাওয়ার সময় ও আর গরম লাগলো। জাহাজের ক্যাবিনে আমরা তিনজন ছিলাম—আমি, একটি সিন্ধী ছাত্র, আর একটি পঞ্জাবী মুসলমান যুবক। পাশের ক্যাবিনে দুজন ডাক্তার ছিলেন, তাঁরা উচ্চতর ডিগ্রী লাভ করবার আশায় বিলেত যাচ্ছিলেন—একজন ক্ষতী পঞ্জাবের আর একজন লাহোরের সরকারী হাসপাতালের মুসলমান অ্যাসিস্ট্যান্ট সার্জন। শেষোক্তটি বড়ই আমদে ভদ্রলোক, খুব গল্পগুজব করে

আসর জমিয়ে রাখতে পারতেন। আমরা পাঁচজনে বেশ হাসিখুশীতে দিনগুলি কাটিয়েছিলাম।

এভাবে জাহাজ থামেনি, Al kantaraতে থামলো। মরুভূমির মধ্যে ফুলবাগানের শোভার জন্তু এ জায়গাটি বড় ভাল লেগেছিল। খালটি তো বেশি চওড়া নয়। ওদিক থেকে জাহাজ আসবার সময় তাকে পাশ কাটিয়ে বেরিয়ে যাবার জন্যে মাঝেমাঝে কিছু অপেক্ষাকৃত খোলা জায়গা আছে, সেখানে এদিকের জাহাজদের দাঁড়িয়ে থাকতে হয়। আমাদের বাঁদিকে Egypt-এর মরুভূমির মধ্যে দিয়ে রেলগাড়ি রাক্তিবেলা যখন যায় সে একটা মনে রাখবার মত দৃশ্য হয়।

পোর্ট সৈয়দে আমরা করাচী ছাড়বার পর প্রথমবার ডাঙায় নাবলাম। বেশীর ভাগ দোকানেই ফরাসী ভাষায় লেখা সাইনবোর্ড, ফরাসীরা কবে ইজিপ্ট ছেড়েছে তবুও এখন ফরাসী সংস্কৃতির প্রভাব বেশ রয়েছে। বাজারে খুব আঙ্গুর পাওয়া গেল—বেশ বড় বড় গোছা কিনে জাহাজে ফেরা গেল। বন্দরের মিশরী পুলিশের ব্যবহার মোটেই ভাল বোধ হল না। যাত্রীদের উপর যা ব্যবহার করছিল তাতে মিশরের সুনাম হয় না।

লেসেপ্সের বিরাট স্ট্যাচু দেখা গেল ইউরোপ, আফ্রিকা ও এশিয়ার সন্ধিস্থলে। তারপরই আমরা ভূমধ্যসাগরে ঢুকলাম। লোহিতসাগর ও স্যুয়েজ-খালের গরম আর নেই। সমুদ্রের জল এখন নীল আর সমুদ্রের বাতাস বেশ ঠাণ্ডা। তার পরদিন গ্রীসের উপকূলের দ্বীপগুলি দূর থেকে বড় সুন্দর দেখাচ্ছিল।

গ্রীস ও সিসিলির মধ্যে মেসিনা প্রণালী উল্লেখযোগ্য জায়গা। এইখানেই গ্রীক পুরনো কাহিনীর Scylla and Charybdis ছিল, সেকালের নাবিকরা এর এক জায়গায় জাহাজ বাঁচিয়ে নিলে অন্য জায়গাটাতে আর জাহাজডুবি থেকে নিষ্কৃতি পেত না। এই প্রণালীর দু'দিকের দৃশ্যও সুন্দর। তবে মেসিনার বাড়িগুলি ভূমিকম্পে সম্প্রতি ভেঙে গিছিলো, তখনও সেই ভাঙা অবস্থাতেই ছিল। তবে এই ধ্বংসের চারিপাশের সবুজ ঘাস ঢাকা ছোট ছোট পাহাড়গুলি গ্রীক ও ল্যাটিন কবি বর্ণিত bucolic scenes (প্রাচীন গ্রীসের গোষ্ঠলীলা) এর পটভূমি মনে করিয়ে দেয়। এবার মার্সেই বন্দরের কাছে আমাদের জাহাজ পৌঁছল।

কিছুক্ষণ পরে ডুমার প্রসিদ্ধ উপগ্রাস কাউন্ট অফ মন্টেক্সীস্টোর প্রথম

পর্বের সেই কুখ্যাত জেলখানা *Chateau d'if* দেখা গেল। এখান থেকে অনেক বছরের বন্দী দাস্তে অভাবনীয় উপায়ে পালিয়ে মণ্টেক্রীস্টো দ্বীপে পৌঁছে কিছুদিনের মধ্যেই কাউন্ট অফ মণ্টেক্রীস্টো নামে সংসারে পুনঃপ্রবেশ করে।

ঘণ্টাভূয়েকের মধ্যেই আমরা ইউরোপের মাটিতে পদার্পণ করলুম। প্রথম যেটা চোখে লাগলো সেটি হ'ল আমাদের দেশের গরুর গাড়ির মত মালবোঝাই গাড়ি টানবার বিশালকায় ঘোড়া। এই জাতের ঘোড়া আকারে যত বৃহৎ তেমনি মোটাসোটা লোমওয়ালা পা—ওয়েলের ঘোড়ার মত দেখতে স্ত্রী একেবারে নয়।

আমাদের তখন ফ্রেঞ্চ পড়া কতদূর এগিয়েছিল তা বোঝা গেল যখন তিন-চার জায়গায় লেখা '*defence-de fumer*' এর মানে কি তার কতরকম ব্যাখ্যা করা হ'ল, তার পরে বোঝা গেল যে সবগুলিই ভুল হয়েছে। ঐ কথাটির মানে ওখানে ধূমপান নিষেধ। খানিকটা মার্সেই-এর রাস্তাঘাটে বেড়ানো হ'ল। ফরাসী মহিলাদের একটি ফ্যাশন চোখে পড়লো—কালো ওভারকোটের *bottom hole* এ বড় লাল (কৃত্রিম) ফুল। প্যারিসেও এই প্রথা দেখা গেল কিন্তু লগুনে দেখা যায়নি।

সন্ধ্যাবেলা প্যারিস থু ট্রেনে আমরা চারজন (আমি, দুটি ভক্তার ও সিন্ধী ছাত্রটি) প্যারিস (পারী) যাত্রা করলাম। *Wagonlit*-এর (শোবার গাড়ির) টিকিট তো ছিল না—এক-একটি বেঞ্চে দুজন করে অর্ধশায়িত অবস্থায় রাত কাটানো গেল।

ভোরবেলা *Paris—The Grand Monarch, Danton, Robespierre* নেপোলিয়নের প্যারিস পৌঁছলাম। গাড়ি থেকে নেমে প্রথমে তো স্টেশনের (*Garde da hyons* এ) *buffet* তে *Fernch breakfast*—শোকোলা (*chocolat*) ও *croissant* (শিং-এর আকারের ছোট পাউরুটি)—খাওয়া গেল। তারপর ট্যাক্সি করে (প্যারিসের ট্যাক্সি বড় জোরে যায়) লুভর (পুরনো রাজবাড়ি—এখন জগতের সবচেয়ে সুন্দর আর্ট মিউজিয়ম) ঘণ্টা-খানেকের মধ্যে ঘুরে (ভাল কবে দেখতে অনেকদিন লাগে) স্টেশনে ফিরে এসে জিরিয়ে *Gare de Nord* (প্যারিসের আর একটি বড় স্টেশন) গেলাম আর বিকেলবেলা ক্যালে যাবার থু ট্রেন ধরা গেল। সন্ধ্যাবেলা ক্যানেল ক্রস করে ডোভার পৌঁছে লগুনের গাড়িতে ওঠা গেল রাত সাড়ে-নটা আন্দাজ। লগুন পৌঁছে আমাদের যাত্রা শেষ হ'ল।

দু-এক জায়গা (আমাদের ভাক্সারদের নির্দেশমত) চুঁ মেয়ে রাত এগারটা আন্দাজ ১১২ গাউয়ার স্ট্রীটে সবাই পৌঁছলাম। সে রাতের মত পাশাপাশি দু-একটা বোর্ডিং হাউসে আশ্রয় নিয়ে তার পরের দিন গাউয়ার স্ট্রীটে সকালে চলে এলাম। এটি হ'ল ওয়াই. এম. সি. এ'র ভারতীয় ছাত্রদের লগুনে এসে অন্ততঃ দিন কতকের জগত আশ্রয়স্থল। থাকবার ও ভারতীয় স্টাইলে খাবারদারারেরও ব্যবস্থা আছে। কেউ কেউ এইখানেই থেকে যান, বিলেতের কাজকর্ম সেরে বছর দুয়েক পরে এইখান থেকেই দেশে ফিরে যান।

বোধহয় তার পরদিনই লগুন বিশ্ববিদ্যালয়ে গিয়ে রেজিস্টারের কাছে একটি পুরো বছরের কী জমা দিলাম। তাঁর কাছে শুনলাম যে আমার টিউটর হবেন Prof. Dodwell আর আমাকে School of Oriental & African Studies এ ভর্তি হতে হবে। কালবিলম্ব না করে Prof. Dodwell এর সঙ্গে দেখা করলাম। তাঁর কথা শুনে দমে যেতে হ'ল। তিনি সাক্ষ্য জবাব দিলেন যে আমার প্রস্তাবিত বিষয়টি—Indian Cultural Influence in Cambodia & Java—এখানে অচল।

লগুন বিশ্ববিদ্যালয়ে বা ইংলণ্ডে আর কোথাও এ বিষয়ে কেউ আমাকে গাইড করতে পারবেন না। আমি যদি ঐ বিষয় ছেড়ে দিয়ে দক্ষিণ ভারতের Early Dutch Records-এর উপর কাজ করি—তাহলে উনি নিজে আমাকে guide করবেন আর কাজটাও সহজ হবে। আমি তাঁকে বিশেষ করে অনুরোধ করলাম যে অন্ততঃ কিছুদিনের জগত আমাকে অনুমতি দিন দেখে নিতে আমার বিষয়টির উপর কাজ করতে পারি কিনা। প্যারিসে আমার একজন বন্ধু আছেন সেখানে Prof. Sylvain Leviর সঙ্গে কাজ করছেন—একবার তাঁর সঙ্গে দেখা করতে চাই। এ বন্ধুটি হলো শ্রীস্ববোধচন্দ্র মুখোপাধ্যায়, ফিনান্স ডিপার্টমেন্টের এক বড় সাহেব। বছর নয়েক আগে আমরা একসঙ্গে ফিনান্স ডিপার্টমেন্টের All India Competitive Examination এর পরীক্ষা দিয়েছিলাম, তাতে উনি প্রথম স্থান পেয়ে ঐ ডিপার্টমেন্টে ঢোকেন। তখন থেকেই পরিচয় ও পত্র বিনিময় চলেছিল। বিলেতে আসবার আগেই প্যারিস থেকে তাঁর চিঠি পেয়েছিলাম।

এ বিষয়ে আমার আগ্রহ দেখে Prof. Dodwell আমাকে প্যারিস যাবার অনুমতি দিলেন। আমিও আর বেশী দেরী না করে স্ববোধবাবুর 17 Rue de Sommerard, Paris 17, Arrond ঠিকানায় তাঁর কাছে পৌঁছলাম। স্ববোধ

মুখ্যে তো খুব খুশী হলেন, আর সেই ১৭নং বাড়িতেই ছিলেন ত্রীপ্রবোধচন্দ্র বাগচী। তাঁর সঙ্গে পরিচয় করিয়ে দিলেন। প্রবোধ বাগচী তখন Prof. Sylvain Levir কাছে চীনে বৌদ্ধ ধর্ম বিষয়ে রিসার্চ করছিলেন। কয়েক বছরের মধ্যেই ইনি ভারতের শ্রেষ্ঠ Sinologist (চীন ভাষাবিদ) বলে গণ্য হয়েছিলেন।

Prof. Levir এই প্রিয় ছাত্রটিই আমার সমস্ত পূরণ করলেন। প্রবোধ-বাবু খবর দিলেন যে Prof. Coedes এখন প্যারিসেই আছেন আর অন্ততঃ দু-তিন মাস এইখানেই থাকবেন। সুতরাং আমার নিজের বেছে নেওয়া বিষয় নিয়ে কাজ আরম্ভ করা ভাল করেই সম্ভব হতে পারে। স্ববোধ ও প্রবোধবাবুরা দুঃখ করলেন যে আমি পুরো বছরেরই fee লগুন বিশ্ববিদ্যালয়ে জমা দিয়ে এসেছি, তা নইলে আমি প্যারিসেই পড়তে পারতাম। আমার মনে হ'ল যে আমি ভুল করিনি, ফ্রান্সে ভর্তি হ'লে ফরাসী ভাষায় thesis লিখতে হ'ত, খুব ভাল রকম করেই ঐ ভাষা শিখতে হ'ত! লগুনের ছাত্র হয়ে ইংরাজিতেই লিখতে পারবো, ফরাসী ভাষা পড়তে পারলেই চলবে, ঐ ভাষাতে লিখতে তো হবে না। নতুন একটি ভাষা পড়তে পারা সেই ভাষাতে লেখার চেয়ে অনেক সহজ। তাহ'লে আমার প্রোগ্রাম হ'ল প্যারিসে তাড়াতাড়ি ফরাসী ভাষায় লেখা বই পড়তে শেখা, Prof. Coedes প্রমুখ বিশেষজ্ঞদের কাছে আমার বিষয়ের বইয়ের সম্মান নেওয়া, আর লগুনে Prof. Dodwell-এর তত্ত্বাবধানে থিসিস লেখা। আমাকে দুই জায়গাতেই—প্যারিস-লগুনে কাজ করতে হবে, আর তার জগে আমার কোন দুঃখ নেই।

বাগচী আমার ফরাসী ভাষা পড়ার ব্যবস্থা করে দিলেন। একটি প্রোচা গরীব রাশিয়ান মহিলা মেকালের থিয়োসফিস্ট, ভারতেও বছর পাঁচিশ আগে কিছুদিন ছিলেন, আমাকে তাঁরই লেখা ফরাসী ভাষায় বুদ্ধচরিত পড়াতে আরম্ভ করলেন। বইটিতে যথেষ্ট ভুল ছিল ইতিহাসের দিক থেকে—তাহলেও সহজ ছিল। আর কিছুদিনের মধ্যেই ফরাসী কবিতা (স্কুলপাঠ্য বই থেকে) পড়তে পারলাম। ক্রমশঃ বই পড়তে আমার খুবই ভাল লাগতো। একটু আধটু সংস্কৃত পড়াও (বহুদিন যা এক প্রকার বন্ধই ছিল) আরম্ভ করা গেল। আগের বছরেই (১৯২৩) শ্রামদেশে অধ্যাপক কীডিস্ বলেছিলেন যে কল্পে ছয় সাত শো বছর ধরে অনেক সংস্কৃত ভাষায় লেখা শিলালিপি কল্প নৃপতির রাজ্যের বিভিন্ন স্থানে রেখে গেছেন। আর এই শিলালিপিগুলিই হ'ল আমার কাজের জন্ত সবচেয়ে দরকারি মালমশলা (primary source)। আমিও প্যারিসে আসবার

আগেই Probsthein-এর দোকানে (ব্রিটিশ মিউজিয়ামের ঠিক সামনে) চল্লিশ বছর আগে ছাপানো Barth & Bergaigneএর Inscriptions Sansrites du Cambodge et Champa পেয়ে গিছিলাম। পড়তেও চেষ্টা করছিলাম যদিও তখন আমার পক্ষে ও বই প্রায় দুর্বোধ্য ছিল। প্যারিসে এসে কীডিস্ সাহেবের সঙ্গে দেখা হলে বুঝলাম যে Barth & Bergaigneএর বইয়ের পর আরও অনেক শিলালিপি খুঁজে পাওয়া গেছে—আর তার অনেকগুলিই স্মৃতিভাবে সম্পাদিত হয়েছে Bulletin de Ecole Francaise d' Extreme Orient নামক বিখ্যাত প্রত্নতত্ত্ব বিষয়ের পত্রিকাতে। এই বুলেটিন হ্যানয় থেকে ফরাসী প্রত্নতত্ত্ব বিভাগ ছাপাতেন—সংস্কৃত শ্লোকগুলি রোমান অক্ষরে ছাপা হ'ত আর তারপর ফরাসী অনুবাদও থাকতো। অধ্যাপক কীডিস্এর বিশেষ অনুরোধে এই পত্রিকার যে সংখ্যাগুলি আমার কাছে লাগতে পারে সে সবগুলিই আমি Ecole Francaise d' Extreme Orient-এর কাছ থেকে উপহারস্বরূপ পেয়েছিলাম। এ উপকার ভোলবার নয়। বার বার বলবার দরকার নেই—অধ্যাপক জর্জ কীডিস্এর সাহায্য না পেলে দক্ষিণ এশিয়ায় ভারতীয় সংস্কৃতির বিস্তার সম্বন্ধে কোনও কাজই করতে পারতাম না।

আমার বন্ধু সুবোধ মুখুজ্যে আমাকে তাঁর গাইড জগদ্বিখ্যাত অধ্যাপক সিলভ্যো লেভির সঙ্গে পরিচয় করিয়ে দিলেন। লেভি সাহেব তখন the greatest living Orientalist বলে গণ্য। প্রাচ্য, প্রতীচ্য, প্রাচীন, আধুনিক বোধহয় কোনো ভাষা ও তার সাহিত্য তাঁর অজানা ছিল না। তিনি তখন মধ্য এশিয়ার গোবি মহামরুভূমির বালুরাশির মধ্যে বিলুপ্ত একটি ইতিহাসের পাতা থেকেও অবলুপ্ত প্রাচীন এক ভাষার পুনরাবিষ্কার করেছিলেন। এই ভাষার নাম সেই প্রাচীন রাজ্যের নামে Kuchean দেওয়া হয়েছিল। আশ্চর্যের বিষয় হ'ল যে এই ভাষার ভারতের সংস্কৃত বা প্রাচীন ইরাণের পহলবীর চেয়ে স্ফূর্ত পশ্চিম ইউরোপের দু-একটি ভাষার সঙ্গে বেশী মিল দেখা গেল। এরকম ভাষার অস্তিত্বের কথা কেউ আগে ভাবেই নি। লেভি সাহেব ভারতের ছাত্রদের বড় ভালবাসতেন। মাঝে মাঝে তাঁর ক্লাসে প্যারিসের ভারতীয় বিদ্যার্থীদের ডাকতেন আর ফ্রান্সের বড় বড় অধ্যাপক ও সাহিত্যিকদের সঙ্গে পরিচয় করিয়ে দিতেন। তাঁর এই সাক্ষ্যপাঠিগুলিতে যোগদান করা আমরা বিশেষ সৌভাগ্য বলে মনে করতাম। এই রকম একটি পাঠিতে বিখ্যাত পর্যটক ও চীন ভাষাবিদ Prof. Paul Pelliotএর সঙ্গে দেখা হয়েছিল। Pelliot সাহেব চীন ও

দক্ষিণ-পূর্ব এশিয়া এ দুইয়ের মধ্যে প্রাচীন কালে যে রাজনৈতিক ও সাংস্কৃতিক সম্বন্ধ ছিল তার উপর বিশেষ মূল্যবান কাজ করেছিলেন। সৌভাগ্যবশতঃ তাঁর লেখা যেগুলি ছাপাহরেছিল—আমি *Bulletin de l' Ecole Francaise d'Extreme Orient, Tong Pad* প্রতি *Journal* এ পড়তে পেয়েছিলাম। এই সময় আর একজন বাঙালী তরুণ অধ্যাপকের দেখা পেলাম। শ্রীনিরঞ্জন-প্রসাদ চক্রবর্তী কলিকাতা বিশ্ববিদ্যালয়ের সংস্কৃত বিভাগে অধ্যাপনা করতেন। তিনি তখন প্যারিসে লেভি ও পেলিও সাহেবদের তত্ত্বাবধানে মধ্য এশিয়ার প্রাচীন খোঁটান রাজ্যে (এখন মকড়ুমির মধ্যে বিলুপ্ত) প্রাপ্ত ধর্মপদের কয়েকটি তাল-পত্রে হস্তলিখিত পুঁথির ভাষা (বিশেষ type-এর প্রাকৃত) ও পালী গ্রন্থের পাঠভেদ নিয়ে কাজ করছিলেন। পরে এই চক্রবর্তী মশাই দেশে ফিরে গিয়ে উটকামণ্ডে *Epigraphist (Govt. of India), Dy. Director, Archaeological Deptt of India*, এবং তারপর *Director general of the Archaeological Deptt* হয়েছিলেন। আমার সঙ্গেও পরে তাঁর বিশেষ সৌহার্দ্য হয়েছিল।

সত্যিই খুব ভাল লেগেছিল—কাজের সুবিধার জন্তে ও এমন সব বন্ধু পাওয়ার জন্তে। লগুনে ফিরে আমার অধ্যাপক *Prof. Dodwell* কে সব কথা বললাম। *Prof. Coedes* ও *Prof. Sylvain Levir* কাছে এরকম সাহায্য পাব শুনে তিনি আমার নিজের পছন্দের বিষয়টি (*Indian Cultural Influence in Combodia & Java*) গ্রহণযোগ্য বলে মেনে নিলেন। আমার জন্তে লেখা-পড়ার প্রোগ্রাম ঠিক করে দিলেন। তিন মাস করে আমি প্যারিসে থাকব—*Prof. Coedes* এর তত্ত্বাবধানে তথ্যগ্রন্থসঙ্কলনের কাজে, তারপর লগুনে ফিরে এসে তাঁর (*Prof. Dodwell* এর) কাছে যতদূর *material* যোগাড় করেছি সেটুকু লিখে ফেলতে হবে। তিন মাস পরে আবার প্যারিসে ফিরে ক্রেঞ্চ বিশেষজ্ঞদের সাহায্য নিতে হবে, তারপর আবার লগুনে গিয়ে *Prof. Dodwell* কে কি লিখেছি তা দেখাতেও হবে। এই রকম করে দুটি *Academic year* পুরো হলে (দু বছরের কিছু কম) থিসিস *submit* করতে পারব। এই প্রোগ্রাম অনুসারে আমি বারো বার ব্রিটিশ চ্যানেল পার হয়েছি—প্যারিসে তিন তিন মাস করে চার বার কাজ করেছি আর লগুনে তিন মাস করে চারবার *Dodwell* সাহেবের কাছে কাজ দেখিয়েছি। আমার জীবনে এরকম *Tale of two cities* কয়েকবার হয়েছে—লাহোর-অমৃতসর, প্যারিস-লগুন, আর পরে মীরট-

দিল্লী আর এখন ৮০ বছর বয়সে বোধ হচ্ছে মীরাট-কলকাতা।

একটা লেখাপড়ার বিষয় তো ঠিক হলো—আর একটারও ব্যবহার ভার ঘাড়ে চাপল। পাঞ্জাব বিশ্ববিদ্যালয়ে দেওয়া Gold Exchange Standard Thesis ভাল করে revise করে—বাড়িয়ে, সংশোধিত করে—আবার লাহোরে পাঠাতে হবে খবর পেলাম। আমার একজন পরীক্ষক জনল্যাম Mr. T. E. Gregory পরে Financial adviser to the Government of India হয়েছিলেন। তখন তিনি London School of Economics d'Political Scienceএ পড়াতেন। তাঁর কাছে পরামর্শ চাইতে গেলে তিনি কেবল বললেন যে ঐ স্কুলের লাইব্রেরীতে সেই সব দেশের যেখানে Gold Exchange Standard আছে সেখানকার খবরের কাগজ থেকে দেখে নাও তোমার বিষয় সম্বন্ধে কিছু পাও কিনা। এর বেশী তিনি আর কিছু বলতে চাইলেন না। সুতরাং লগুনে যে কয়েকমাস থাকতাম তখন Prof. Dodwellএর নির্দেশ মত প্রাচীন দক্ষিণ-পূর্ব এশিয়ার ইতিহাসের অধ্যায়গুলি লিখতাম আর London School of Economics ও ব্রিটিশ মিউজিয়মের লাইব্রেরীতে মুদ্রাবিনিময় সম্পর্কীয় তথ্য খুঁজে বের করতাম। পাঞ্জাব বিশ্ববিদ্যালয়ের কাজ আমাকে লগুনে করতে হয়েছিল। আর লগুন বিশ্ববিদ্যালয়ের কাজ প্যারিসে করেছিলাম। এই রকম প্রায় দু নৌকোয় পা দিয়ে আমাকে বছর দুয়েক চালাতে হয়েছিল। পরিশ্রম বেশী হয়েছিল, কিন্তু তখন বিশেষ Strain বুঝতে পারিনি, পরে কিছুদিন ভুগতে হয়েছিল।

এ সব তো হ'ল লেখাপড়ার কথা—এবার এই দুই শহরের প্রবাসী ভারতীয় ছাত্রদের বিদেশে জীবন যাপনের কথা কিছু বলি। লগুনে তখন বহু সংখ্যক ভারতবাসীদের আনাগোনা—বিদ্যার্থী, ব্যবসায়ী, সরকারী কর্মচারী, রাজনৈতিক নেতা, ইত্যাদি। সেদিনও এখানে নিজেদের বসতবাড়িতে বেশ কয়েক ঘর ডাক্তার, ব্যারিস্টার, ব্যবসায়ী, ধনী পরিবার বসবাস করতেন। ছাত্ররা, বিশেষতঃ যারা Scholarship holder, Cromwell Roadএ (বোধহয় ঐ রাস্তার ২১ নংএর বাড়ি) আশ্রয়সরকারি hostelএ থাকতো। অন্তরা ১১২, গাউয়ার স্ট্রীটে Y. M. C. A. Hostelএ উঠে পরে শহরের উপকণ্ঠে নিজেদের পছন্দ মত বাসা খুঁজে নিত। বড় শহরের ভিতরে থাকা কিছুদিনের মধ্যেই অস্বস্তিকর হয়ে ওঠে। আমি তো কিছুদিনের মধ্যেই Hampsteadএ খোলা জায়গায় একটি ছোট পরিবারের বাড়িতে একটি ভাল ঘর পেয়েছিলাম। পাচ

ছয় মিনিট হাটলেই পৌঁছনো যেত Hampstead Heath—খানিকটা কলকাতা ময়দানের মত মাঠ, পুকুর (অবশ্য ছোট পুকুর) খানিকটা বাগান ও দুয়েকটি ঝোপঝাড়। অভাব শহরের অত কাছে এতটা খোলা জায়গা সত্যিই অভাবনীয় ব্যাপার। সন্ধ্যাবেলা Heathএর দু-একটি জায়গায় বেশ ভিড় হত। এ রকম চারিদিকের শহরতলিতে ছড়িয়ে থাকা সবেও শনিবার সন্ধ্যায় ও রবিবারে ১১২, গাউয়ার স্ট্রীটে অনেক ভারতবাসী ডিনার খেতে আসতেন। পরটা, ভেজিটেব্ল (বাংলা ভাষায় চচ্চড়ি), ভাত, মাছের ঝোল, দই ইত্যাদি। দেশের খাবারের লোভ অনেককেই এখানে টেনে আনতো। আজ থেকে ৪৫ বছর আগে লণ্ডনে এ দেশের খাবারদাবার দু-একটি জায়গা ছাড়া পাওয়া যেত না। আবহুল্লাহ রেস্টোরাঁর তখন খুব নাম ছিল আমাদের দেশের রকমারি খাবারের জন্তে, তবে আমি সেখানে কখনও খাইনি। আমি নিরামিষাশী বলে Stern's Vegetarian Restaurant পছন্দ করতাম, সেখানে দুধের জিনিসও দিত না—সম্পূর্ণরূপে জাস্তব পদার্থহীন শাকসব্জী ও ফলমূল দিয়ে লাঞ্চ ও ডিনারের ব্যবস্থা ছিল। কেবল ফল দিয়েও খাওয়াবার আয়োজন ছিল।

প্রথম দিকে যখন লণ্ডনে আসি ১৯২৪ সেপ্টেম্বর মাসে তখন সিনেমায় প্রথম talkies experiment হচ্ছিল। ততদিন পর্যন্ত movieরই প্রচলন ছিল। আমরা একটা বড় Picture Houseএ এই talkie দেখতে যাই। সেখানেও experiment ভাল হয়নি। Sound movement তখনও Synchronise ভাল করে হয়নি। তখন থিয়েটারের জোর প্রভাব। ১৯২৫ সালে Sibyl Thorndikeএর St. Joan (Jeanne d' Arc) এর ভূমিকায় Bernard Shawএর ঐ নাটকে অভিনয় বাস্তবিকই খুব উচুদরের হয়েছিল। ঐ মাঝবয়সী মহিলা বোল সতেরো বছরের মেঘপালিকা Jeanne সেজে এলেন স্টেজে, তারপর কয়েকটা সিনে কয়েক বছরের মধ্যেই পরাজিত ফরাসী জাতিকে আবার ইংরেজদের সঙ্গে যুদ্ধে পদে পদে বিজয়ী করলেন, আর সবশেষে তাঁর কি রকম শোচনীয় পরিণাম হ'ল—এই দৃশ্যগুলি ৪৫ বছর পরেও ভুলিনি।

সেই সময় Chelsea Theatreএ Bernard Shawএর অনেকগুলি নাটক অভিনয় হচ্ছিল। তার মধ্যে দু-একটা দেখেছিলাম—আর আমার ওঁর বই পড়ার চেয়ে স্টেজে ওঁর নাটকের অভিনয় দেখতে বেশী ভাল লাগত। একদিন Canton Hallএ Bernard Shawএর বক্তৃতাও শুনেছিলাম। তখন তো উনি বেশ বৃড়ো, তবু কি রকম করে ঐ বিরাট হল-ভরা শ্রোতৃমণ্ডলীকে যেন মন্ত্রমুগ্ধ

করে রেখেছিলেন। বক্তৃতার বিষয় ছিল—সময়ের পরিবর্তনের সঙ্গে সামাজিক পরিবর্তনের আবশ্যকতা।

একটি সন্ধ্যায় Chelsea Theatre এ বাঙলায় ডি. এল. রায়ের “চন্দ্রশেখর”র দু-একটা দৃশ্য দেখানো হয়। Chemistryর তৈল সংস্কায় বিশেষজ্ঞ ডাঃ নৃত্যগোপাল চট্টোপাধ্যায় তাঁর খুব শখের পার্ট চাণক্য ধৃতি চাদর পরে ঐ বিখ্যাত স্টেজে তাঁর দেশীয় ও বিদেশীয় বন্ধুদের দেখিয়েছিলেন। আমার তো খুব ভাল লেগেছিল, কিন্তু দু-একজনের মতে এই রকম খালি গায়ে খালি পায়ে বিলেতী দর্শকের সামনে বেরোনো ঠিক হয়নি। এঁদের মধ্যে একজনের কথায় কিছু নতুনত্ব ছিল। তিনি বলেছিলেন যে এ দেশের লোক বোধহয় আমাদের মুখটাই কালো বলে জানত—এখন তারা দেখল যে আমাদের হাত পা সব কালো। ঠাট্টাই করেছিলেন কিন্তু এতে Inferiority ও Colour Complex দুয়েরই আভাস ছিল।

সেই সময় Bernard Shawএর নাটকের সঙ্গে সঙ্গে James Barrieএরও নাটকের খুব কদর ছিল। Peter Pan, ‘Rose Marie, Admirable Chrichton প্রভৃতি Barieএর নাটক বড় বড় থিয়েটারে অভিনীত হচ্ছিল। এই দুটি নাট্যকারের মধ্যে বিলম্ব প্রভেদ ছিল। শ’ ছিলেন বাস্তবপন্থী ও ব্যারী ভাববাদী, বরং তাঁকে স্বপ্নলোকে বিচরণকারী বলা যেতে পারে। Maeterlinkএর Blue Birdও তখন থিয়েটার ও সিনেমাতে অনেকদিন ধরে চলেছিল, Barrieএর Rose Marieএর মত স্বপ্নলোকের ব্যাপার। Old Vic নামের লণ্ডনের প্রসিদ্ধ থিয়েটারে Shakespeareএর নাটক প্রতি সপ্তাহে মঞ্চস্থ করা হ’ত। দু-তিনটি—Macbeth, Richard III, Midsummer Night’s Dream দেখতে গিয়েছিলাম। শেখোক্ত নাটকটি বড় ভাল লেগেছিল, অল্প দুটি অভিনেতাদের বড় তাড়াতাড়ি কথা বলার জগ্রে ঠিক ঠিক বুরতে পারিনি। আধুনিক নাটক অভিনয়ের বেলায় এ অস্থবিধা কখনও হয়নি।

লণ্ডনের কথা বলতে গেলে ব্রিটিশ মিউজিয়মের-উল্লেখ বিশেষ করে করতে হয়। এটি হ’ল পৃথিবীর অগ্রতম বিরাট লাইব্রেরি ও জগতের নানা দেশের প্রাচীন শিল্প ও সংস্কৃতির দুস্ত্রাণ্য জিনিসের সংগ্রহ স্থান। এই পুস্তকাগারের বিশাল domeএর নীচে ১ হাজারের বেশী পাঠক একসঙ্গে পড়াশুনা করতে পারে। এই-খানেই কাল’হিল তাঁর বিখ্যাত French Revolution আরম্ভ করেছিলেন, কিন্তু তাঁর পাশের একটি সীটে একজন সজোরে হাঁচলে উনি রেগেমেগে ব্রিটিশ

মিউজিয়াম থেকে চলে গিয়েছিলেন আর ফেরেননি। বই শেষ করতে হ'ল তাঁকে অনেকগুলি বিভিন্ন জায়গা থেকে মালমশলা জোগাড় করে। তাঁর বই এই কারণে পড়তে খুব চমৎকার বটে কিন্তু একে ইতিহাস বলা যায় না। এই ব্রিটিশ মিউজিয়াম লাইব্রেরীতেই কার্লমার্ক্স তাঁর প্রলয়ঙ্করী *Das Kapital* লিখেছিলেন। এইখানেই লেনিনও বলশেভিক বিপ্লব বিক্ষোভের আগে ভারী বিপ্লবের রীতিনীতির পর্যালোচনা করেছিলেন। বাস্তবিক domeএর নীচে এই গোলাকার হলটি একটি ঐতিহাসিক স্থান। প্রায় ছাদ পর্যন্ত বই ঠাসা—আবার এই বইয়ের দুর্ভেদ্য দেওয়ালের মধ্যে জায়গায় জায়গায় বোতাম টিপে ছোট ছোট ঘরে ঢোকা যায়, সেখানে আরো বই রাখা আছে। আমার ব্রিটিশ মিউজিয়ামে কাজ ছিল নানা দেশের Currency ও Exchange reports নিয়ে—সেগুলি পাওয়া যেত ঐ রকম বইয়ের দেওয়ালের পিছনে ছোট ঘরে। আমার Currency and Exchangeএর কাজ—পঞ্জাবের কাজ—বেশীর ভাগ ঐখানেই পাওয়া খবরের কাগজ ইত্যাদির সাহায্যে শেষ করতে পেরেছিলাম। বাস্তবিক এই লাইব্রেরিতে কাজ করা বড় সৌভাগ্যের বিষয়, পাশাপাশি বসে কত লোকে কত বিষয়ে গভীর মনোযোগ দিয়ে লেখাপড়া করছেন। এখানকার আর একটি বৈশিষ্ট্য হচ্ছে যে এই বিরাট পুস্তকাগারে ঢোকবার সময় বা এখান থেকে বেরবার সময় কি নিয়ে ঢুকছি বা কি নিয়ে বেরছি কেউ দেখে না। প্রথমে যখন শুনেছিলাম যে ব্রিটিশ মিউজিয়ামে তুমি বড় স্টকেশ নিয়ে ঢুকতে পারো আর ওখান থেকে ঐ স্টকেশ নিয়ে বেরবার সময়ও কেউ দেখতে চাইবে না যে ওর মধ্যে কি আছে একথা বিশ্বাস করিনি। আর কোনো জায়গায় reading publicএর ওপর এতটা বিশ্বাস দেখিনি। তবে ব্রিটিশ মিউজিয়াম লাইব্রেরীতে প্রবেশাধিকার নিতে গেলে এমন একজনের সুপারিশ নিতে হয় যার Englandএ ভূসম্পত্তি আছে।

ব্রিটিশ মিউজিয়ামে লাইব্রেরী ছাড়া আরও অনেক ব্যাপার আছে। প্রত্নতত্ত্ব বিভাগে একদিন দেখলাম একটি বৌদ্ধ দেবীমূর্তির পায়ের কাছে যেন পরিষ্কার বাঙলা অক্ষরে লেখা দেবতার নাম। শৈলেন্দ্র রাজাদের সময় ঐ রকম একটি উত্তর-ভারতীয় লিপির শ্রী বিজয় রাজ্যে প্রচলন ছিল। সেই সময় কাষোভিজাতেও কঙ্কজরূপিত যশোবর্মণের digraphic (দুই ভিন্ন লিপিতে লেখা) শিলা-লেখও এই উত্তর-ভারতের (বাঙলা অক্ষরের মত) script দেখা যায়। খুব সম্ভবতঃ সমকলীন নালান্দার বৌদ্ধসংস্কৃতির কেন্দ্রই এই লিপির উৎপত্তিস্থল।

British Museumএর আরেকটি ঘরে **Oriental Literature Deptt**এ কিছু ভাল বাঙলা বইও পেয়েছিলাম। দীনেশ সেনের একটি বইতে একটি পুরনো উপকথা (শীত বসন্তের গল্প) উল্লেখ পেলাম কবুজে, সেই গল্পটি ঐ দেশের বহু শতাব্দীর জনপ্রিয় fairy tale। এই ঘরেই দীপঙ্কর অতীশের থোলিও মঠে পশ্চিম তিব্বতের নরপতিকে মহাযান বৌদ্ধধর্মে দীক্ষিত করবার বিবরণ শরৎচন্দ্র দাসের *Indian Pandits in the land of snow*তে পেলাম। ১৯২২ সালে আমরা থোলিও মঠে পৌঁছে সেখানকার ভারতীয় শিল্পধারার নিদর্শন দেখে আশ্চর্য হয়েছিলাম—এখন ঐ শিল্পসম্ভার কি রকম করে ঐ দুর্গমস্থলে পৌঁছেছিল বুঝতে পারলাম।

বিলেতের আরও দু-একটি কথা বলে এবার ফ্রান্সে আমার প্রবেশের দিনগুলির কথা আরম্ভ করবো। ১৯২৪ সালে যখন প্রথম এখানে আসি তখন আমার খালসা কলেজের ইংরেজ Colleague Prof. Herveyও ছুটিতে *England*এ ফিরেছিলেন। তাঁর একটি ছোট গাড়িও ছিল। একদিন তিনি আমাকে তাঁর গাড়িতে অক্সফোর্ড নিয়ে গেলেন। বড়ই ভাল লাগলো অক্সফোর্ডে ‘front’গুলি (কলেজগুলির সামনের দিকের লন ও বাগান)। কেশ্বিজের কিন্তু backগুলি দেখবার জিনিস। তাই ঠাট্টা করে cantobদের back দেখাবার (to show their backs) কথা বলা হয়। অক্সফোর্ডের Addisons Walkটি কবিদের কল্পনালোকের মতো—ছোট্ট নদী Isis বাঁকে হরিণ ঘুরে বেড়াচ্ছে সবুজ মাঠে, দু-একটি কলেজের সুন্দর চুঁড়ো কিছু দূরে দেখা যাচ্ছে। আর এক জায়গায় দেখা গেল কতকগুলি আমাদের দেশীয় ছাত্র (Hervey সাহেব একটু উত্তেজিত স্বরে ঐ দেখ Indian students বলে আমাকে দেখিয়ে দিলেন) রাস্তায় খেলা করছে। এই প্রথম Oxford bags দেখলাম। খুবই ঢিলে প্যান্ট—আজকাল gutter pipe আঁটা trousersএর টিক উল্টো। দু-একটি কলেজের ভেতরেও ঢুকলাম—প্রায় গির্জের (cathedral-এর) মতই দেখতে ও সেইরকমই শান্তির জায়গা।

লণ্ডনে ফেরবার আগে Hervey আমাকে Stratford on Avonএ নিয়ে গেলেন। Avon নদীতে Swans (সত্যিকারের রাজহংস) অনেকগুলি দেখা গেল। নদী, রাজহংস, নদীর ধারে সেকালকার পুরনো বাড়ি সব মিলিয়ে ৩০০ বছর আগেকার একটি চমৎকার ছবি দেখলাম। শেক্সপীয়ারের নিজের বাড়িটিও একটি দেখবার জিনিস। লণ্ডনে ফেরবার সময় Stoke Poggis-

এর ছোট গির্জাটি, যেখানে Grey তাঁর জগৎবিখ্যাত *Elegy written in a country churchyard* লিখেছিলেন সেটি দেখা গেল—কবির কবর সেখানেই আছে। ওখানে যে পৌঁছব কখনও ভাবিনি—দেখে বড়ই আনন্দ হ'ল। ওরই কাছাকাছি Burnam Beeches—Englandএর মত জনাকীর্ণ জায়গায় যে এখনও মধ্যযুগের নামকরা দস্যু Robinhoodএর সেই Green Forestএর কিছু রয়ে গেছে—তার সাক্ষ্য দিচ্ছে। খুব বড় বড় গাছ—আর গাছতলায় যেন পরিষ্কার Lawn। লগুনে ফিরতে বেশ দেরী হ'ল—আর ঠাণ্ডায় কাঁপিয়ে দিয়েছিল। তখন বোধহয় অক্টোবর মাস শুরু হয়েছে। Mr. Hervey অতগুলি জায়গা দেখিয়ে সত্যিই Bamboo Groveএর Sageএর উপযুক্ত কাজ করেছিলেন। 'বাঁশ বাগানের গোষ্ঠীর' আর একটি আড্ডাধারী তাঁর কাছে এর জন্ম রুতজ্জ।

এবার Channel পারে প্যারিসে যাওয়া যাক। বার দুয়েক এখানে আসাতে এখানকার ভাষাটি কিছু আয়ত্ত হয়েছে। বন্ধুদের উপদেশ মত French খবরের কাগজ (অবশ্য Le Tempsএর মত দুর্দ্বন্দ্ব দৈনিক নয়) পড়ছি rapid reading (ডিকসনরি না দেখে তাড়াতাড়ি) প্রথাতে। আর একটি নতুন উপায়ও বার করা গেছে। মলিয়েরের নাটক প্রায়ই Odeon বা Theatre Francaiseএ অভিনীত হত। সে সপ্তাহে যে বইটি মঞ্চস্থ হবে, সেটি বাড়িতে ভাল করে পড়ে, বইটি সঙ্গে নিয়ে theatre দেখতে যাওয়া—এই হল ফরাসী উচ্চারণ স্বকর্মে শুনে ঐ কঠিন ব্যাপারটি সহজ করে নেবার চেষ্টা। আর এতে ভাল ফলও পেয়েছিলাম। তখন Franceএর Franc রোজই exchange বাজারে বেশ দ্রুতবেগে পড়ছিল—আমাদের কাছে francএর দাম আট আনা বা আরো কম দাঁড়িয়েছিল। তাই ভাল থিয়েটার বেশ ভাল Seat আমাদের পক্ষে হুমু'লা ছিল না। মাঝে মাঝে সঙ্গে করে ছোট Electric torch নিয়ে যেতাম, যখন থিয়েটারের আলো নিবে যেত তখন Torchএর আলোতে বই পড়া চলতো। মলিয়েরের অনেকগুলি ভাল বই এই রকম করে পড়াও দেখা দুই হয়েছিল। খুবই ভাল লেগেছিল। আমার French পড়াও আর সেই বুড়ী Russian theosophistএর কাছে হ'ত না। Quotidien দৈনিক কাগজের একটি নিয়মিত লেখিকা ছিলেন আমার নতুন tutor Mlle Simone Karpelez। এঁর দুই দিদিও ছিলেন বিদ্বানী মহিলা। এঁর বড় দিদিকে Mlle Andree Karpelez দেখেছিলাম Bangkokএর রাজপুতকাগারে,

Coedie সাহেবের research assistant হয়ে তাঁর কাজে সাহায্য করছিলেন। অনেকদিন পরে ইনি ভারতবর্ষে এসেছিলেন, দিল্লী ও কলকাতার Alliance Francaiseএ একজন বিশিষ্ট কর্মী ছিলেন। আমার ভ্রাতৃজায়া তুহিনিকা দেবীর সঙ্গে তাঁর বেশ ভাব হয়েছিল। দিল্লীতে একটি ফরাসী পুস্তকের প্রদর্শনীতে তিনি আমাকে Prof. Coedesএর একটি নতুন বই উপহার দিয়েছিলেন। এই বইটি আমার Indonesia (India & Javaর নতুন সংস্করণ) লেখবার সময় খুব কাজে লেগেছিল। এঁদের মেজ বোন Mlle Suzanne Thierry রীতিমত journalist, ছোটগল্প লেখিকা ও Social Worker ছিলেন। আর এঁদের বিশেষ বন্ধু ছিলেন Miss Madeline Slade, ভারতের British Admiral Sladeএর মেয়ে, পরে যিনি ভারতে এসে গান্ধিজীর শিষ্যা হয়ে মীরা বেন (Behn) নাম নেন। Miss Sladeএর সঙ্গে প্যারিসে Karpelez ভগ্নীদের মধ্যবর্তিতার পরিচয় হয়েছিল। উনি ভারতীয় ছাত্রদের সঙ্গে কথাবার্তা বলবার জুড়ে খুব ইচ্ছুক ছিলেন। ওঁর গান্ধিজীর প্রতি ভক্তি মা তো একেবারে পছন্দ করতেন না। আর উনি যে গান্ধিজীর আশ্রমে যাবেন ও সেইখানে থাকবেন এই সঙ্কল্প তো ওঁর মার অসহ্য ছিল। খানিকটা সেই কারণেই বোধহয় উনি প্যারিসে কিছুদিনের জুড়ে এসেছিলেন, বাড়ির ঐ বিরুদ্ধ মনোভাবের আবহাওয়া থেকে দূরে থাকতে। তবে ভারতে যাওয়ার আগে উনি আত্মীয়স্বজনদের সঙ্গে দেখা করে, তাঁদের কাছ থেকে বিদায় নিয়ে ও মার আশীর্বাদ পেয়ে নতুন জীবনে প্রবেশ করবেন এসব এরই মধ্যে ঠিক করে ফেলেছেন। ভারতবর্ষ ওঁর কাছে একেবারে নতুন দেশ নয়, ওঁর বাবা Admiral Slade যখন বোম্বাই ছিলেন তখন উনি যদিও ছেলেমানুষ ছিলেন তবুও নিজে চৌঘুড়ি চালিয়েছেন কয়েকবার এ গল্প তাঁর কাছে শুনেছি। বিদেশী এই মহিলার এরকম দৃঢ় সঙ্কল্প ও আত্মত্যাগ সব ছেড়ে দিয়ে সন্ন্যাসীর জীবন নেওয়া আমাদের চমৎকার লেগেছিল। তাঁর একটি কথা বেশ মনে আছে—উনি ওঁর মাকে বলেছিলেন যে Jesus Christ বা Peterএর সময় কোন Roman Matron যেমন করে তাঁর মেয়েকে খ্রীষ্টধর্ম গ্রহণ করতে অনুমতি দিতে পেরেছিলেন তেমনি করে তুমিও আমাকে গান্ধিজীর আশ্রমে যেতে দাও। এর উত্তর কি পেয়েছিলেন জানি না। তাঁর দৃষ্টান্তের একটি ফল ফলেছিল। আমিও স্থির করেছিলাম যে দেশে ফিরে গিয়ে সরকারী চাকরি নেব না।

প্যারিসে তখন কয়েকজন ভারতবাসী ছিলেন যাদের দেশে ফিরে যাওয়া সম্ভব

ছিল না। রাজনৈতিক কারণে তাঁদের এই নির্বাসন দণ্ড ভোগ করতে হয়েছিল। শহীদ সুরাবর্দি (Sahid Suhrawardi) এই উদ্বাস্তুদের একটি উচুদরের উদাহরণ। এঁর বাবা কলিকাতা হাইকোর্টের জজ, ওঁকে অল্পবয়সেই বিলেতে পাঠিয়েছিলেন। Oxford University থেকে খুব ভাল করে ইংরেজি সাহিত্যে পাস করে উনি St. Petersburgএর (এখনকার Leningradএর Universityতে lecturer in Englishএর পদে কিছুদিন কাজ করেছিলেন। তারপর ১৯১৭ সালের Bolshevik বিপ্লব St. Petersburgয়েই আরম্ভ হয়। সুরাবর্দিকে শহর ছেড়ে পালাতে হয়। ও ভদ্রলোক তো Bolshevikদের হাত থেকে পালিয়ে এলেন, কিন্তু British Govt. সন্দেহ করলেন যে ১৯১৭ সালের Revolutionএর সময় St. Petersburg ও Leningradএ ছিল, স্বতরাং নিশ্চয় ঐ বিপ্লোতে জড়িত ছিল। সুরাবর্দি অতএব ভারতে বা Great Britainএ ফেরবার অসম্মতি পেলেন না। কয়েক বছর থেকে ভদ্রলোক France, Germany, Switzerland প্রভৃতি দেশে যাবাবরের জীবন যাপন করেছিলেন। এই রকম দেশবিদেশে ঘোরবার ফলে কতকগুলি ইউরোপীয় ভাষা ওঁর খুব সড়গড় হয়েছিল। French, German, Russian এই তিনটিতে সুরাবর্দি লেখাপড়া কথোপকথন কোনটাতেই পশ্চাৎপদ ছিলেন না। ওঁর স্বভাবের একটা দিক বেশ মজার লাগত। উনি কোনরকম গোঁড়ামি সহ্য করতে পারতেন না। আর ওঁর সবচেয়ে রাগ ছিল গোঁড়া মুসলমানদের উপর। পাণ্ডিত্যাভিমান ওঁর ছিল না, আমাদের দলে (স্ববোধ মুখুজ্যে, প্রবোধ বাগচী, নিরঞ্জন চক্রবর্তী, প্রভৃতি) আগ্রহের সহিত যোগদান করেছিলেন। উনি নিজেও journalist ছিলেন তাই Karpelez ও Thierry ভগ্নীদের সঙ্গেও পরিচয় ছিল।

১৯২৫এর শেষের দিকে জার্মানী থেকে প্রফেসর সত্যেন বোস এলেন প্যারিসে। জার্মানীতে সত্যেন বোস আইনস্টাইনের সঙ্গে কাজ করেছিলেন। আর সেই সময়েই ওঁদের দুজনের নামেই বোস-আইনস্টাইন থিওরি বের হয় ও বিশেষজ্ঞদের কাছে এঁর খুব কদর হয়। প্যারিসে এসে তো বোসমশাই খুব ফরাসীসাহিত্য চর্চা করেছিলেন, গণিত শাস্ত্রের কাজ অবশ্যই করে থাকবেন, সেটা আমরা জানতে পারিনি। অদ্ভুত লোক বোসমশাই, যখন নিজের বিষয় গবেষণা করতেন, ঘরের দরজা বন্ধ থাকত, পেয়ালার পর পেয়লা কফি আনাতেন রিং করে, (Door Bell) সমস্ত ঘরময় পেয়লা, সিগারেটের ছাই ছড়ানো থাকত। কাজ শেষ হলে দরজা খোলা হত, ঘরটি পরিষ্কার করানো হত, আর

বন্ধুবান্ধবদের সঙ্গে গল্প, হাসি ঠাট্টা জোর চলত। বলা বাহুল্য ইনি ছিলেন দেশের National Professorদের মধ্যে একজন—ভারতের Leading Physicist of the day।

Physicist কথাটি যখন বললাম তখন অল্পদেশের ‘রামাইয়ার’ (পুরো নামটি মনে নেই—V. Ramaiya বোধ হয়) বাস্তবিক অসাধারণ ব্যাপারটির উল্লেখ এখানেই করা উচিত। উনি ছেলেবেলা থেকে বিশেষ আগ্রহের সঙ্গে science পড়তেন ও artsএর দিকে একেবারে টান ছিল না। সেই কারণে ম্যাট্রিক পরীক্ষাও পাস করেননি। কিন্তু ভিজিয়ানগ্রাম (Vizianagram) রাজ-পরিবারের সঙ্গে এঁদের ঘনিষ্ঠ সম্পর্ক থাকার দরুন রামাইয়া ভিজিয়ানগ্রাম কলেজের ল্যাবরেটরীতে ফিজিক্স বিষয়ের গবেষণা চালাতে পেরেছিলেন। এই রকম কাজ করতে করতে ওঁর বিশ্বাস হয় যে তিনি স্ববিধে পেলে একটি নতুন আবিষ্কার করতে পারেন। ভারতের কোন বিশ্ববিদ্যালয় তাঁকে ডক্টরেটের জন্তে রিসার্চ করবার অহুমতি দিলেন না। ইংলণ্ডেও চেষ্টা করে বিফলমনোরথ হলেন। তখন তিনি ফ্রান্সে তাঁর গবেষণা কাজটি যথাযথভাবে সমাপন করতে চাইলেন। প্যারিস ইউনিভার্সিটি তাঁর প্রস্তাব অল্পমোদন করলেন, তিনি যদি ঠিক ঠিক রেজাল্ট দেখাতে পারেন তাহলে (যদিও তিনি ম্যাট্রিকও পাস নন), তিনি ডি-এসসি ডিগ্রী পাবেন। রামাইয়া পূর্ণ উত্তমে কাজ আরম্ভ করেন, তাঁর নিজের উদ্ভাবিত কিছু যন্ত্রপাতির সাহায্যে যা তিনি করে দেখাতে চাইছিলেন তা তাঁর অধ্যাপকদের মনের মত করে দেখালেন। আমরা সবাই ওঁর ডক্টরেট পাওয়ার সময়ে ইউনিভার্সিটির একটি সম্মেলনে উপস্থিত ছিলাম। ফ্রান্সে ডক্টরেট পরীক্ষার viva voice stage একটি ছোটখাটো সভা করে হয়—যাঁরা সে বিষয়ে চর্চা করেন তাঁরা ঐ সভায় যোগদান করেন। ছাত্র আসেন, অধ্যাপকেরাও আসেন, পরীক্ষার বন্ধুরা আসতে পারেন। এই stageটিকে বলা হয় defence of the thesis। সেদিনকার সম্মিলনীতে রামাইয়ার কাজের খুব প্রশংসা করা হয়েছিল আর রামাইয়া তার উত্তরে বলেছিলেন যে তাঁর দুটি মাতৃভূমি—একটি হ’ল ভারতবর্ষ, দ্বিতীয়টি ফ্রান্স। এরপর উনি তো দেশে ফিরে গেলেন। শুনেছি যে হায়দ্রাবাদে দু-তিন বছর কাজ করার পর উনি মারা গিয়েছিলেন। একটি প্রতিভাশালী বৈজ্ঞানিক অর্কালে চলে গেলেন।

শান্তিনিকেতনের কয়েকটি ছাত্র—খুবই অল্পবয়সী—এখানে technical line-এ কাজ শিখতে এসেছিল। একটি মারাঠী ছেলে গণিত বিষয়ের ফরাসী বই

পড়ছিল আর একটি কলকাতার ছেলে ভাল football player—Iron & Steel Industryর technique বোঝবার জন্তে ফ্রান্সের নানা স্থানে ঘুরছিল। এর মধ্যে দু-একটি তো যে কাজের জন্ত এসেছে তা খুব মনোযোগ দিয়েই করছিল—তবে দুঃখের বিষয় সবার ক্ষেত্রে এরকম বলতে পারি না। আমার বিশ্বাস নেহাত অল্পবয়সে ছেলেদের বিদেশে শিক্ষালাভের জন্তে পাঠানো উচিত নয়। লগুনেও কয়েকটি শিক্ষার্থীর বিপথে যাওয়া দেখেছি, প্যারিসেও দেখলাম। একেবারে নতুন রকমের জীবনযাত্রা ও সামাজিক প্রথার মধ্যে পড়ে ছেলেমানুষের মন অনেক সময় টাল সামলাতে পারে না। এরকম দু-একটি ছেলেকে প্রায় জোর করে বাড়ি ফেরানো হয়েছিল। একটি বেশ Promising ছাত্র (অঙ্কের) নিজের পড়া ছেড়ে সাহিত্যচর্চায় লাগল, তাতেও বেশী উদ্বিগ্ন হবার কথা ছিল না। ভাবা গিয়েছিল নিজের কাজ ও কিছুদিনের মধ্যেই আবার করবে। এক সন্ধ্যায় একটু বোধহয় তাড়াতাড়ি শুয়ে পড়েছি, Door Bell বাজল। অব্যাহতি নাই দেখে “Entrez” বললাম, দেখলুম সেই ছাত্রটি ঘরে ঢুকলেন—আমার খাটের (পালঙের) পাশের চেয়ারে বসে কেন যে তাঁর কাজ এগুচ্ছে না তা আমাকে বোঝাবার চেষ্টা করলেন। আমি দশ বছর কলেজে অধ্যাপনা করে এসেছি এ খবরটা অনেকেরই জানা ছিল। তাই কমবয়সী ছাত্ররা আমাকে একটু সমীহ করে চলত—আর কখনও কখনও আমার কাছে পরামর্শ নিতে আসত। এই যুবকটি খানিকক্ষণ পরে Mistanguet-এর (এটি গায়িকার Stage name) নাম উল্লেখ করলেন। সে সময় প্যারিসের রঙ্গমঞ্চে Mistanguet-এর খুব নাম। তিনি খুব উচ্চদরের গায়িকা, প্রায়ই খবরের কাগজে তাঁর আগের সন্ধ্যায় গাওয়া গানের উচ্ছ্বসিত প্রশংসা বেরোত। এই মারাঠী ছেলেটি দু-তিনদিন তাঁর গান শুনে মোহিত হয়ে এখন তাঁর কোনো গীতানুষ্ঠানই বাদ দেন না।

পড়াশুনার দিকে আর মন যায় না। Mistanguet-এর সঙ্গে ভাল করে পরিচয় কি করে হয় এখন তাই হয়েছে তাঁর প্রায় একমাত্র চিন্তা। হাসিও পেল দুঃখও হ'ল এরকম আত্মকাহিনী শুনে। কি আর বলবো তাই বোঝাতে চেষ্টা করলাম যে Mistanguet-এর সঙ্গে তাঁর ঘনিষ্ঠ পরিচয়ের কোনো সম্ভাবনা নেই। খবরের কাগজে দেখা যায় অনেক ধনকুবের (বেণীর ভাগ বিদেশী) Mistanguet-এর admirer। ছাত্রটির উচিত গণিত শাস্ত্রে ভাল করে মন দেওয়া—অনেকের মতে গণিতের চর্চা এরকম যোগসাধন—মন একাগ্র করবার শ্রেষ্ঠ উপায়। পরামর্শটি নিশ্চয়ই ভাল লাগেনি—কারণ

গণিতের ঐ ছাত্রটি আর কখনো আমার ঘুম ভাঙাতে চেষ্টা করেননি।

একটি case এ কিন্তু romance আর কাজ দুই একসঙ্গে মোটের উপর ভাল ভাবেই চলতে পেরেছিল। এ কাহিনীর নায়ক হলেন 'ঈশ্বর বিকৃত মনোবস্থা'র বিষয় তত্ত্বাসন্ধানকারী একটি ছাত্র। এঁর পিতা একটি বড় শহরের বস্ত্রবিক্রেতা, পয়সার কোনো অভাব নেই। প্রায়ই আমাদের সকালবেলা নিকটস্থ Kiosk থেকে ভাল ফুল কিনে এনে উপহার দিতেন। তাঁরই কাছ থেকে কতকগুলি নামী ফুলের—paeony, lily of the valley, forget-me-not, hyacinth প্রভৃতির পরিচয় পেয়েছিলাম। লগুনে তো ওরকম ফুল মধ্যবিস্তৃত শ্রেণীর লোকেদের পক্ষে কেনা সাধ্যাতীত ব্যাপার ছিল। একদিন তিনি একটু আড়ালে আমাকে; সত্যেন বোস ও সুবোধ মুখুজ্যেকে বললেন (কথাটা খুব বেশী confidential করেন নি) যে একটি ইতালীয় সিনিগরিনাকে (কুমারীকে) বিয়ে করতে চান। তাঁরই জন্তে রোজ অনেক ফুল কেনেন—আমরা তারই কিছু প্রসাদ-স্বরূপ পাই। মেয়েটি গর্ভবিরে মেয়ে, তাঁর মা আছেন, মার বিয়েতে মত আছে। ছেলেটি পাগ্লাটে গোছের হলেও বাস্তবিকই খুব সচ্চরিত্র, বিদ্বান ও মিশুক প্রকৃতির। সবায়ের সঙ্গে ভাব—রাস্তা-চলতি ছেলে-মেয়েদের, বুড়ো-বুড়িদের সঙ্গে হাসিখুশি কথাবার্তা। ও যেমন ক্রোধ ভাষায় অনর্গল কথাবার্তা বলতো আমাদের মধ্যে কেউ সেরকম পারতো না। বাপের কাছ থেকে পয়সা পেত বেশ আর খরচ করতোও মুক্তহস্তে। নিরামিষ খেতো—প্যারিসের পানীয় যার লোভে কত globe trotter এখানে আড্ডা গাড়তো, সে তা ছুঁতোও না, খরচে হলেও নিজের ওপর কিছু বেশী খরচ করতো না। এক কথায় সবায়ের প্রিয় পাত্র ছিল তবে স্বরওয়র্দি মাঝে মাঝে ঠাট্টা করে বলতেন যে এ ঐশ্বর্যের মূল হ'ল কাপড় মাপবার গজ। ছেলেটির বাবা ছিলেন দিল্লীর চাঁদনী চৌকের বড় বস্ত্র-ব্যবসায়ী। এইখানেই বলে রাখি যে যুবকটির খিসিস খুব ভাল করেই approve হয়েছিল। কিন্তু এর বাবা ঐ বিদেশিনীর সঙ্গে ছেলের বিয়ের কথা একেবারেই অগ্রাহ করেছিলেন ও পুত্রটিকে পত্রপাট দেশে ফিরতে লিখেছিলেন। এই তরুণ মনস্তত্ত্ববিদটির উপর পিতার এই আজ্ঞার ফল একটু নতুন ধরনের হয়েছিল। চিরকাল যে লোকটি নিরামিষাণী সে আমাদের সামনে সব রকম আমিষ ডিশ আনিতে একসঙ্গে মেখে ওষুধ গেলার মতো গিলে ফেললো। তারপর জীবনে নিশ্চয়ই প্রথম বার vin rouge ও vin blanc (যে দুটি পানীয় প্রত্যেক টেবিলে অবশ্য অবশ্য রাখা থাকে)

একটা গ্লাসে মিশিয়ে কুইনিন মিক্সচার খাওয়ার মতো মুখ বিকৃত করে খেয়ে ফেললো। ঐ দৃশ্যটি দেখবার মতো হয়েছিল। এরপর কিন্তু নিজের পুরোনো রীতি অনুসারেই খাওয়াদাওয়া চলেছিল। তার আর ব্যতিক্রম করা হয়নি। আমার প্যারিস এসে ঘর পছন্দ করে নেওয়ার সম্বন্ধেও এই abnormal psychologyর গবেষক একটি মন্তব্য করেছিল। 17 Rue de Sommerard-এ জায়গা না পেলে আমি এমন একটি Maison Meuble খুঁজতাম যেখান থেকে হয় Sorbonne বা Notre Dame-এর ভাল view পাওয়া যেত। আমি কেন এরকম ঘর চাইতাম এই প্রশ্নের উত্তর হ'ল, এ মনস্তত্ত্ববিদের মতো আমারও বেশ খানিকটা Megalomania-র মতো মনোবিকার আছে। মনের ঐ দিকটার যেন বেশী বাড়াবাড়ি না করি—তাহ'লে ফল খারাপ হতে পারে।

আমি একটি বাঙালী ফুটবল খেলোয়াড় ছেলের (ধীরেন চাট্টোজ্যো) কথা আগেই উল্লেখ করেছি। তখন ফ্রান্সে ফুটবলের ততটা চলন হয়নি—আমাদের খেলোয়াড়টি ঐ খেলায় বেশ সুনাম কিনেছিল। একদিন গুর কলেজের দলের একটা ম্যাচে ও অপরপক্ষকে দুটি গোল দেয়। ঐ কলেজের মেয়ে ছাত্রীরা ওদের বিজয়ী প্লেয়ারকে congratulatory kiss দেয়। ফ্রান্সে আর বোধহয় ইয়োরোপের আরও অনেক দেশে kissing হ'ল আনন্দ জানাবার অগ্রতম প্রথা—পিতা-পুত্রের, প্রিয় বন্ধুবান্ধবের, গুরু-ছাত্রের মিলন বা বিদায়োপলক্ষে। আমরা এ সব স্থলে এরূপ রীতি দেখতে অভ্যস্ত নই। এই teenager খেলোয়াড়ের সৌভাগ্যের কথা শুনে আমার এক প্রবীণ বন্ধু বলেছিলেন যে তিনিও ফ্রান্সের কোনো একটা ফুটবল ক্লাবে ভর্তি হবেন।

প্যারিসে অনেকবার এসেছি। বসন্তকালে boulevardগুলির বড় বাহার। রাস্তার ধারের সারিবদ্ধ চেস্টনাট্ গাছগুলিতে গুচ্ছ গুচ্ছ ফুল। কাণ্ডার পাহাড়ে জঙলী গুঁ গাছের মতই এই চেস্টনাট্ গাছ—ফুল এর আরো ভাল হয় আর ফল রোস্ট করে খেলে বেশ মুখরোচক হয়। শীতকালে সন্ধ্যাবেলা রাস্তার ধারে বড় বড় কড়ায় চেস্টনাট্ গাছতলায় তারই নাট্ বোধহয় গরম বালিতে ভাজা হয় আর পথ-চলতি লোক কিনে খেতে খেতে চলে যায়।

শীতকালে লগুন থেকে প্যারিসে আসার আর একটি বড় সুবিধে—এখানে লগুনের মতো হলদে বা কালো ফগ্ নেই। কখনো যদি কুয়াশা (ফগ্) হয় সেটা হালকা সাদা ফগ্। লগুনের কালো ফগ্—সৌভাগ্যবশতঃ কমই হয়—সত্যিই ভয়াবহ ব্যাপার, দিনের বেলায় ঘুট্ঘুটে অন্ধকার, রাস্তায় বেরলে কোন্ দিকে

বাচ্ছি বোঝা যায় না। হলদে ফগ্ অতটা খারাপ নয়, যদিও একটু দূরের জিনিস বাপসা দেখায় আর গলা কুটকুট করে। আজকাল বোধহয় কয়লার ব্যবহার কম করাতে ফগের জন্ত অতটা কষ্ট হয় না। অতবড় শহরও নয় আর পোর্ট টাউনও নয় তাছাড়া কলকারখানাও অনেক কম, এসব কারণে প্যারিস (পারী) অনেকটা পরিষ্কার। আর এটাও বলতে হয় যে এখানকার পথঘাটের দৃশ্য (বিশেষতঃ Quartier Latinএ) বেশী প্রাণবন্ত—হাসিখুশী, খানিকটা হটগোলও আছে কিন্তু খুব বেশী হৈ হৈ ব্যাপার নয়।

শরতের গোড়ার দিকেও ফ্রান্স ভোজনবিলাসীদের পক্ষে ভাল জায়গা। তখন আঙ্গুর ফ্রেঞ্চ আপেল ও পেয়ারের (আপেল একটু টক কিন্তু সুস্বাদু নাসপাতি খুব নরম, রসালো আর মিষ্টি) মরসুম। প্যারিসেই Muscatel grapes খেয়েছি—এ আঙ্গুর কেবল সুস্বাদু নয়, খুব সুগন্ধ—এক প্লেট ঘরে রাখলে মনে হয় ঘরে কেউ ভাল এসেন্স মেখে ঢুকিয়েছে। এ সময়টা আমি সন্ধ্যা বেলা আর ডিনার খেতুম না। ফলের দোকানে গিয়ে এক কিলো মিস্কাটেল আঙ্গুর কিনে আনতাম, সন্ধ্যাবেলা ঘরের বেসিনে ভাল করে ধুয়ে এ আঙ্গুরের গুচ্ছগুলি শেষ করে ডিনারের পাট চুকিয়ে দিতাম। ঐ রকম ফলাহার করে ভালই ছিলাম। শুনেছি Quettaয় এই আঙ্গুর (মিস্কাটেল) পাওয়া যায়, কিন্তু তা বাইরে যায় না। এই ফ্রেঞ্চ আপেল আর ফ্রেঞ্চ পেয়ার কুলুতে খুব ভাল হয় আর ত্রীনগরে (কাশ্মীরে) যে রকম ফ্রেঞ্চ পেয়ার পেয়েছিলাম, সে রকম ফ্রান্সেও পাইনি। একবার প্যারিসের একটি শৌখীন দোকান থেকে একটি নাসপাতি কিনেছিলাম, সেই ফলটির গায়ে একটি সুন্দর হরিণের ছবি ছিল। ছবিটি আঁকা নয়, ফলের খোসা কেটে বা খোসার ওপর দাগ দিয়েও করা হয়নি। আমার বন্ধুরা সাবানজল দিয়ে ধুয়ে ফেলতে চেষ্টা করেও ছবির কিছু করতে পারলেন না। তারপর শোনা গেল যে ফল যখন ঠিক পাকেনি তখন হরিণের গড়নের ছোট কাগজ কেটে ফলের গায়ে আঁটা দিয়ে লাগিয়ে দেওয়া হয়, তারপর বেশ কিছুদিন পরে ঐ কাটা কাগজ তুলে ফেলা হয়। কাগজ তুলে ফেললেও ওর হরিণাকৃতি ছাপ ফলের গায়ে থেকে যায়।

প্যারিসের যে জায়গাটি আমার সব চেয়ে ভাল লাগতো সেটি হ'ল লুভার —পৃথিবীর সেরা Art Collection, নেপোলিয়ান তাঁর দিগ্বিজয়সূত্রে যেটিকে গড়ে তুলেছিলেন। অস্তুত বার কুড়ি আমি এই পুরোনো রাজবাড়ি, যা এখন আর্ট মিউজিয়াম হয়েছে, তন্ন তন্ন করে দেখেছি। নিজের দেখার তো

শখ ছিলই আবার অল্প দেখবার লোক বা লগুন থেকে কেউ পরিচিত লোক এলে Louvre দেখাবার ভার আমারই ওপর ছিল—আর এ কাজটি আমার খুবই ভাল লাগত। কোন্ ঘরে কোন্ বিখ্যাত ছবিটি দেখা যাবে (Mona Lisa বা Greuzeএর Broken Pitcher) তা আমাকে আর গাইডকে জিজ্ঞেস করতে হ’ত না। সোজা সেই ঘরে আগন্তুককে নিয়ে ঢুকতাম। সে সব ঘরের দারওয়ানরা তো আমার সঙ্গে বেশ আলাপ জমিয়ে তুলেছিল। বাস্তবিক লুভারের ঘরে ঘরে বেড়ানো—Venus de Milo, Victoire de Samothrace দেখবার জন্তে নীচের ঘরে যাওয়া, Italian Renaissanceএর ঘরে গ্রেট মাস্টারদের জগদ্বিখ্যাত পেইন্টিং দেখা, উনিশ শতকের ফ্রান্সের Ingresএর La Source, Corotএর Landscape প্রভৃতি ছবি বার কুড়ি দেখেও আশা মিটতো না। যে ছবিগুলি ভাল লেগেছিল তার পিকচার পোস্টকার্ড কিনেছিলাম আর সেগুলি সম্বন্ধে অ্যালবামে রেখেছি। এখনও কোনো কোনো দিন অ্যালবাম খুলে Louvre পরিক্রমা করি।

বর্তমান শতাব্দীর Impressionist প্রভৃতি আর্টের ছবি Musee de Luxembourgএর galleryতে আছে। এখানে নতুন যুগের নতুন ধারা Cezanne, Lenoir প্রমুখ চিত্রকরের, দিনকতক আগে অবহেলিত এখন বিশ্ববিখ্যাত, চিত্রশিল্প দেখবার সুন্দর আয়োজন আছে। জানি না আরো আধুনিক আর আরও তুমুল আন্দোলনের বিষয় Picasso ও Van Goghএর আঁকা ছবি এখানে বা প্যারিসের অল্প কোনো আর্ট গ্যালারিতে দেখেছিলাম কিনা।

প্যারিস তো চিত্রশিল্পীর মহাতীর্থস্থান—দেশবিদেশের চিত্রকরেরা এখানে আসেন, জগতের সেরা শিল্পসম্ভার দেখেন, Ecole des Beaux Arts etc. আর্ট শিক্ষা-নিকেতনে শিক্ষাপ্রাপ্ত হন ও অনেকেই খ্যাতিনামা আর্টিস্ট হয়ে ওঠেন। আমরা এখানে থাকতে থাকতে কলকাতার সার্ব আন্ততঃচৌধুরীর একটি ছেলে অর্যকুমার চৌধুরী ওখানকার কোনো আর্ট ইন্সটিটিউটে কাজ করছিলে। তাঁর আঁকা একটি ছবি প্যারিসের একটি আর্ট এগ্জিভিশনে দেখেছিলাম।

প্যারিসে আর্ট এগ্জিভিশনের খুব ধুমধাম। একটি এগ্জিভিশন খুব অদ্ভুত লেগেছিল। এটি হ’ল Salon des Indepents—স্বাধীনচেতা চিত্রকরদের চিত্রপ্রদর্শনী—এটির কোনো ছবিরই কিছু বোঝা যায় না। ছবির নীচে যে নাম লেখা আছে তাতে কিছুই বোঝবার সাহায্য হয় না। দৃষ্টান্ত-স্বরূপ—একটিতে দুটি তিনটি সর্প ও মোটা লোহার নল—নীচে লেখা Don Quixote।

আজকালকার অ্যাবস্ট্রাক্ট পেইন্টিং হ'ল অল্প রকমের। এই Independent Artistরা 'আর এক গোয়ালের'।

ইউরোপের আর্ট ছাড়া এসিয়ার আর্টের নমুনা প্যারিসের অল্প মিউজিয়ামে আছে। এফেল টাওয়ারের কাছে Musee de Trocaderoতে কনুজের প্রাচীন ও মধ্যযুগের হিন্দু ও বৌদ্ধ মন্দির ও দেবদেবীর ফোটো ও প্লাস্টার অফ্ প্যারিস দিয়ে তৈরী Small-scale reproduction অনেকদিন আগের একটি World Exhibitionএর সময় থেকে এখানে সংগ্রহ করা আছে। এ এগ্জিবিশনের সময়েই এফেল টাওয়ার তৈরী হয়েছিল। অনেকদিন পর্যন্ত এই স্টীল টাওয়ারটি পৃথিবীর সর্বোচ্চ টাওয়ার ছিল। এ ছাড়া Musee Guimetতে Cambodia, Annam (Vietnam) Siam (Thailand), Laos—তার মানে সমস্ত ইন্দোচায়নার অনেক প্রাচীন মূর্তি, কিছু শিলালিপি ও আরও অনেক প্রত্নতত্ত্ব বিষয়ের মূল্যবান সামগ্রীর রীতিমত স্ফুজিত ভাণ্ডার আছে। আমার ক্যান্সোভিয়া সম্বন্ধে কাজের জন্ত এই Musee Guimetএর সংগ্রহ ভাল রকম সাহায্য করেছিল।

এ ছাড়া Musee Cerunuschi হ'ল চীন, মঙ্গোলিয়ার প্রাচীন শিল্পের প্রদর্শনশালা—এটি প্যারিসের বেশ একটি নিরীক্ষণীয় জায়গায় Parc Moncef-এর মধ্যে ছিল—শহরের কোলাহল থেকে দূরে শান্তিময় স্থান। লগুনের হাইড্ পার্কের মতো প্যারিস শহরের মধ্যে অত বড় পার্ক নেই বটে তবে Tuileries, Luxembourg প্রভৃতি পুরোনো রাজবাড়ির বাগানগুলি যদিও অত বড় নয় কিন্তু বড় সুন্দর। আর Versaillesএ—প্যারিস থেকে মাইল দশ এগারো দূরে ইতিহাসবিশ্রুত রাজভবনের উত্থান মোগল বাগানের মতো terraced garden, মধ্যে সুন্দর একটি খাল আর তার মধ্যে কত রকমের ফোয়ারা। সপ্তাহে একদিন এই ফোয়ারাগুলি সব খোলা হ'ত আর সন্ধ্যাবেলায় আলোয় আলোয় ঝলমল করতো আর সেই পটভূমিকায় Moliere বা Racineএর কোনো একটি নাটক অভিনীত হ'ত। সত্যিই সে এক অপূরণ দৃশ্য—আমাদের মাইকেল মধুসূদন তাঁর একটি চতুর্দশপদী কবিতাতে এর বর্ণনা করেছেন। এই রাজপ্রাসাদে তিন শতাব্দী ধরে কত ঐতিহাসিক ঘটনা ঘটেছে আর এখনও ঘটেছে। ১৭৮৯, ১৮৭০, ১৯১৯এর ক'টি তারিখ তো সব আগে মনে পড়ে।

প্যারিসের অল্পদিকে আর বেশ খানিকটা দূরে আর একটি ঐতিহাসিক রাজপ্রাসাদ অবস্থিত। এটি হ'ল নেপোলিয়নের প্রিয় বাসভবন Fontainebleu।

এর কয়েকটি ঘর এখনও নেপোলিয়ানের ব্যবহৃত আসবাবপত্র দিয়ে সজ্জিত। আর এর Grand Staircaseটি ১৮১৪ সালে নেপোলিয়নের রাজ্যভার ত্যাগের tragic দৃশ্যের অবিস্মরণীয় পটভূমি।

ফ্রান্সে রাজদ্রোহ অপরাধে দণ্ডিত নিজ দেশ থেকে নির্বাসিত লোকের অভাব নেই। এঁদের মধ্যে একটি বিশিষ্ট ব্যক্তি রাজা মহেন্দ্রপ্রতাপকে আমরা আমাদের 17 Rue de Sommerardএর Association de Etudiants Hindousএ নিমন্ত্রণ করেছিলাম। ছোটখাটো মানুষটি, সাদাসিধে গলাবন্ধ কোট ও থাকি প্যাণ্ট পরা, আমাদের অল্পরোধে কয়েকটি কথা বললেন। তিনি তখন যাচ্ছেন আমেরিকাতে 'প্রেমের' বিষয়ে সে দেশের লোককে কিছু বলতে, কিন্তু আমাদের যা বললেন তাতে তো violence ছাড়া আর কিছুই ছিল না। তাঁর মতে গান্ধিজীর অহিংস নীতি দেশের সবচেয়ে ক্ষতি করেছে। পঞ্জাবের অহিংস আকালি আন্দোলনের উল্লেখ করে তিনি বললেন যে একটি তেজস্বী মার্সিয়াল সম্প্রদায়কে এরকম ক্লৈব্যে পরিণত করার চেয়ে দেশদ্রোহিতা আর কি হ'তে পারে। বাস্তবিক রাজা মহেন্দ্রপ্রতাপকে যেন জলন্ত আগুন বলে মনে হয়েছিল।

দু-একটি বাঙালী পলিটিকাল রিফিউজিও ওখানে দেখেছিলাম। তার মধ্যে ডাঃ রাম ভট্টাচার্যকে দেশে ফিরে এসে কলকাতায় ও দিল্লীতেও দেখেছি। তাঁর স্ত্রীও বিদূষী—তিনি Czech মহিলা তবে বাংলা ভাষা বেশ ভাল করে শিখেছেন আর বাঙালী পরিবারে বেশ ভালভাবে নিজেকে মিশ খাইয়েছেন। জানি না এখন তাঁরা কোথায় আছেন।

বিদেশে নতুন বন্ধু তো কতকগুলি পেয়েছিলাম—দু-একজন যাদের সঙ্গে দেশেই পরিচয় হয়েছিল যেমন দে মশাই, বিদেশে তাঁদের আবার দেখা পেলাম ও আরো ভাল করে পরিচিত হলাম। স্বেবোধ মুখুজ্যের কথা আগেই বলেছি। আর একজন হলেন কে. এম. পানিকার, পরে ইনি সদার পানিকার নামে দেশেবিদেশে খ্যাতিলাভ করেছিলেন। প্রফেসর, ফ্রি-ল্যান্স জার্নালিস্ট, দেশীয় রাজস্ববর্গের অমাত্য, ভারতের রাষ্ট্রীয় দূত, ইউনিভার্সিটির ভাইস-চ্যান্সেলার এইরূপ একটির পর একটি বিভিন্ন পদে নিযুক্ত হয়েও তাঁর অসাধারণ প্রতিভা যেন তার পূর্ণ বিকাশপ্রাপ্ত হয়নি। ১৯২৩এ অমৃতসরে তাঁর সঙ্গে আমার প্রথম সাক্ষাৎ হয়, আলিগড় বিশ্ববিদ্যালয় অসহযোগ আন্দোলন বন্ধ হ'লে তখন তিনি অমৃতসরে জালিয়ানওয়ালা কামিটির সেক্রেটারী হয়ে ওখানে আসেন। তারপর লগুনে ১৯২৪ ও ১৯২৫ সালে অনেকবার ১১২ গাউয়ার স্ট্রিটে আবার

ওঁকে দেখি—তখন উনি ফ্রি-ল্যান্স জার্নালিষ্ট। ১৯২৫-২৬এ প্যারিসে কয়েকবার আমরা একই বাসায় (Maison Meuble'তে) ছিলাম। দেশে ফিরে দিল্লীতে আবার এক জায়গায় যেমন Indian School of International Studiesএ কাজ করবার সুযোগ হয়েছে। এ দুটি বন্ধুর—সুবোধ মুখোজ্যের ও পানিকারের অকালমৃত্যুতে আমাদের দেশ দুটি Genius হারিয়েছে। সুবোধ মুখোজ্য একটি ক্ষুদ্র গণ্ডীর মধ্যেই পরিচিত ছিলেন, কিন্তু তাঁর সাহিত্যাহরণ অসামান্য ছিল—সত্যিকারের স্কলার ছিলেন। পানিকারের প্রতিভা বহুমুখী ছিল, কার্যক্ষেত্রও বহুদেশব্যাপী ছিল—শত্রুমিত্রও তাঁর অনেক ছিল।

১৯২৫ সালের শেষের দিকে আমার কস্তুজের কাজ শেষ হয়ে গিছিলো। জাভা, সুমাত্রার (যবদ্বীপ ও সুবর্ণদ্বীপের) বিষয় আমাদের School of Oriental Studiesএর Dean Dr. Otto Blagdenএর কাছে তখনও পড়ছি। আমাদের Director, Sir Dennison Ross আমাকে এই সম্বন্ধে ডাচ শিখতে বললেন। তাঁর মতে যারা ইংরিজি জানে তারা তো একটু মন দিয়ে ডাচ পড়লে বুঝতে পারবে। তিনি নিজে বহুভাষাবিদ (৩২টি ভাষা জানতেন এইরূপ খ্যাতি তাঁর ছিল)—তাঁর ও আমাদের মতো সাধারণ মানুষের যে কতটা প্রভেদ তা তিনি বুঝতেন না। আমাকে তো কষ্ট করে ডাচ শিখতে হ'ল—আর যখন কিছু কিছু পড়তে পারি তখন Dr. Blagden আমাকে Holland-এর Leyden Universityতে ঘুরে আসতে বললেন। ওখানে Dr. Krom ছিলেন যবদ্বীপে হিন্দুযুগ বিষয়ে বিশেষজ্ঞ।

১৯২৫এর ডিসেম্বর মাসের শেষের দিকে খুব বরফ পড়ছে, এমন এক সন্ধ্যায় মাইলখানেক হেঁটে স্টেশন পৌঁছলাম, জাহাজে যখন চড়লাম তখন ডেক বরফে ঢাকা, যেন মার্বেলের মতো মেঝে রঙ হয়েছে। রাত্রে খুব ঝড় ছিল—আর এবার তো কেবল Channel Crossing নয়—North Seaতে সমস্ত রাাত্রি পাড়ি দিতে হল। খুব Sea-sick হয়েছিল, ভোরবেলা হল্যাণ্ড যখন পৌঁছলাম—তখন সেখানেও দেখলাম সব সাদা হয়ে আছে। ষণ্টা দুয়েক রেল যাত্রার পর Leyden পৌঁছলাম, সেখানে রাস্তাঘাট বরফে ঢাকা।

Leydenএ সার্ব ডেনিসনের নির্দেশানুসারে আমি একটি ডাচ প্রফেসরের বিধবা স্ত্রীর (তিনি ব্রিটিশ) বাড়িতে দুই সপ্তাহ ছিলাম। খুবই ভদ্র পরিবারটি—গিন্নী ঠাকরুণ আমাকে ডাচ শিক্ষাও দিতেন। কাছেই ছিল প্রফেসর Kromএর বাড়ি—তার পরের দিনই তাঁর সঙ্গে দেখা করলাম। সৌম্য মধ্যবয়স্ক ভদ্রলোক,

দেখেই ষথার্থ পণ্ডিত প্রকৃতির বলে মনে হয়। তিনি আমার প্রশ্নের সূষ্ঠ উত্তর দিয়ে আমাকে Leydenএর পুরাতত্ত্বের মিউজিয়াম দেখে যেতে বললেন। তিনি তখন তাঁর বৃহৎ যবদ্বীপে হিন্দু সংস্কৃতির বিষয়ে বই লিখছিলেন। দেশে ফিরে কলকাতার এসিয়াটিক সোসাইটির লাইব্রেরীতে ঐ বই পড়েছি—বইটি ঐ বিষয়ের স্ট্যাণ্ডার্ড বই। আজকাল দু-একটি ডাচ লেখক দক্ষিণ-পূর্ব এশিয়ার প্রাচীন ও মধ্যযুগে ভারতীয় প্রভাবকে যতটা পারেন ততটা কম করে দেখাতে চান। প্রফেসর Kromএর সিদ্ধান্ত ঠিক এর বিপরীত।

তাঁর বাড়ি থেকে আমি সোজা সেই আর্কিয়লজিকাল মিউজিয়ামে গেলাম। Leyden ছোট জায়গা—সবই কাছাকাছি। মিউজিয়ামের ঠিক বাইরেই দেখলাম বিশাল শিবমূর্তি, রাত্রে বরফ পড়েছিল, সেই বরফে আধখানা ঢাকা। বড়ই ভাল লেগেছিল দেশের ঠাকুরটিকে বিদেশে বরফে ঢাকা দেখে। মিউজিয়ামের হলে সব আগেই দেখলাম সেই জগদ্বিখ্যাত প্রজ্ঞাপারমিতা মূর্তি, বোধহয় ভারতীয় স্টাইলে ভাস্কর্যের শ্রেষ্ঠ নিদর্শন। ঐতিহাসিকদের মতে এটি বাস্তবিক মধ্য-কালীন জাভার Queen Dedesএর প্রতিমূর্তি, ঝাঁকে ‘পদ্মিনী’ রমণী বলে সমসাময়িক রাজত্ববর্গ ঘোষিত করেছিলেন। পদ্মিনী রমণীর পাণিগ্রহণ করলে সার্বভৌম নৃপতি হওয়া যায় এই ধারণার দরুন Queen Dedesকে পাবার জন্তে যুদ্ধ ও রক্তপাত হয়েছিল। Leydenএর এই Indonesian Antiquities-এর সংগ্রহ বোধহয় জাভার অনেক আর্ট কলেকশনের চেয়ে ভাল। স্কয়ার্ণোর মতো ব্যক্তি যদি নিজ ক্ষমতা বহাল রাখতে পারতেন তাহলে নিশ্চয় এই ডাচ মিউজিয়ামের অনেক সামগ্রী আবার নিজের দেশে ফিরিয়ে আনবার চেষ্টা করতেন।

হল্যাণ্ডে এসে এমন এক দৃশ্য দেখা গেল যা অল্প কোথাও দেখা যেত না। খাল থেকে নদীতে আর নদী থেকে সমুদ্রে অনবরত জল পাম্প করে বের করা হচ্ছে। এর জন্তে অসংখ্য উইণ্ড মিল চারিদিকে তাদের পাল ঘোরাচ্ছে—এ এক অদ্ভুত দৃশ্য। এ দেশের ডেল্টা সমুদ্রতলের চেয়ে নীচু তাই দেশটাকে সমুদ্রের হাত থেকে বাঁচাতে রাতদিন এই সব কলাকৌশল করতে হয়।

Leydenএ এই ভদ্র পরিবারের বাড়িতে Xmas (কেক, craol গান সমেত) পালন করে প্যারিসে ফিরে এলাম। বরফ-ঢাকা হল্যাণ্ড খুব ভাল লেগেছিল। নদী খুব পুরু বরফ জমা, তার ওপর স্কেটিং হচ্ছে, নদীতীরে টাটকা বরফ দিয়ে স্নোবল নিয়ে খেলা, বরফে আটকানো বোট,—এ রকম দৃশ্য আর কোথাও দেখিনি।

প্যারিসে আর একটি জীবনে প্রথমবার অভিজ্ঞতা লাভ করা গেল। আমি, সুবোধ মুখুজ্যে আর একটি অল্পবয়সী কলকাতার কেমিস্ট্রীর লেকচারার (মহেন্দ্র গোস্বামী) একটি ছোট চার সীটার এরোপ্লেনে Le Bourget থেকে Brussels বেড়াতে গেলাম। এরোপ্লেনটি যেমন ছোট, তেমনি বেশী উঁচু দিয়েও বাইনি, নীচের ঘরবাড়ি, রাস্তার গাড়িঘোড়া সব দেখতে দেখতে গেলাম। Ardennes-এর অরণ্য—শেক্সপিয়ারের 'As You Like It'-এর পটভূমি দেখা গেল প্রথম বিশ্বযুদ্ধের তোপের গোলাতে চুরমার হয়ে আছে। Battle of Somme-এর যুদ্ধক্ষেত্রের ওপর দিয়ে ওড়বার সময় অসংখ্য cross দেখলাম—প্রত্যেক ক্রসের নীচে কত যোদ্ধার কবর আছে। আকাশে যে জায়গায় জায়গায় বাতাস খুব কম (এয়ার ভেকুয়াম পকেট) থাকে তা পাইলটকে বুঝিয়ে দিতে হ'ল যখন আমাদের ছোট প্লেনখানি স্থলদর উড়তে উড়তে হঠাৎ ঝপ করে বেশ খানিকটা পড়ে যাচ্ছিল। প্রথমবার তো আমরা ভয় পেয়েছিলাম যে সব শেষ হ'ল—মাটিতে ধড়াস করে পড়ে এবার ইহলীলা সাক্ষ হ'ল। তারপর ফ্রেন্স পাইলটকে জিজ্ঞেস করে, এয়ার পকেটের রহস্য জানা গেল।

ব্রাসেলস্ প্যারিসের ক্ষুদ্র সংস্করণ। তবে শহরের মধ্যে বড় 'চৌক' (Square) ফুলের হাট আর সামনে মধ্যযুগের প্রাচীন অট্টালিকাগুলি দেখবার মতো। এরি কাছে একটি নতুন ধরনের ফোয়ারা দেখা যায়। একটি তিন-চার বছরের খোকা দাঁড়িয়ে পেছাব করছে। স্থলদর স্ট্যাচুটি খোকাবাবুর আর 'হিসি'টিও খুব ভাল পানীয় জল। এর গল্প হ'ল যে শহরের এক ধনী বণিকের খোকা হারিয়ে যায়। তারপর যখন খোকাবাবুকে পাওয়া গেল, তখন তিনি এইখানে দাঁড়িয়ে 'হিসি' করছিলেন। তখন শহরের ঐ পাড়ায় ভাল পানীয় জলের অভাব ছিল, বণিকটি ছেলে ফিরে পাওয়ার আনন্দে ঐখানে ভাল জলের ঐরকম ফোয়ারা তৈরী করে দেন। ব্রাসেলস্-এর একটি চিত্রশালায় রবি ঠাকুরের দৌহিঙ্গ-দৌহিঙ্গীকে দেখলাম, দুটিই খুব ছেলেমানুষ।

ব্রাসেলস্ থেকে তার পরদিন জার্মানীর বন শহর ট্রেনে করে যাওয়া গেল। Rhine Land দেখা হ'ল, ওখানকার প্রসিদ্ধ ইউনিভার্সিটির (একসময় সংস্কৃত ভাষা ও সাহিত্যচর্চার জন্তে বিশেষ করে প্রসিদ্ধি ছিল) ঘুরে আসা গেল। ফেরার পথে Cologne-এর বিখ্যাত গির্জা দর্শন হ'ল। এই দেবস্থলটি যেন মানুষের হাতের তৈরী নয়—এ যেন কবির স্বপ্ন আর কবিরাই এর বর্ণনা করতে পারেন। Cologne-এর আর একটি জায়গা মনে থাকবে। 'ও ডি কলোন'

(Eau de Cologne) তো সবাই জানে, অনেকেই ব্যবহার করেছে—এই ‘কলোনের জল’—খাঁটি অক্সিজেন ‘ও ডি কলোন’—যারা কয়েক শতাব্দী থেকে শৌখীন জগতের সেরা প্রসাধন রূপে fashion circlesএ উপহার দিয়ে আসছেন সেই ‘মারিয়া ফরিনার’ রাজপ্রাসাদ সম show room দেখে এলাম। প্রকাণ্ড ‘হল’, দেওয়ালে সেই মধ্যযুগ থেকে আরম্ভ করে জার্মান সম্রাটদের চিত্র, তাঁদের মোহর লাগানো প্রশংসাপত্র—আর নানা আকারের, খুব বড় (জালার মত বড় কিন্তু খুব সুন্দর দেখতে) আধার (জেস) আর খুব ছোট শিশি ‘ও ডি কলোন’ ফারিনা ছাপমারা চারিদিকে সাজানো রয়েছে। সত্যিই এক বিরাট ব্যাপার। এই হ’ল ও ডি কলোনের আদি উৎপত্তিস্থল।

এবার প্যারিস ছাড়বার আগে আমার কনজের থিসিস টাইপ করিয়ে নিলাম। আমাদেরই maison meubleতে একটি ভদ্রলোক সপরিবারে ওপরের garretএ থাকতেন। দেশ (বাঙলাদেশ) অনেকদিন ছেড়েছেন, অনেকদিন চেকোস্লোভাকিয়ায় ছিলেন, বিয়েও করেছেন সেখানে, এখন অবস্থা মোটেই ভাল না (খানিকটা নিজের দোষেই)। তিনি আমার সন্দর্ভ টাইপ করার কাজ খুব সাগ্রহে নিলেন। পান দোষই তাঁর দুর্বস্বার কারণ, কিন্তু ও লোকটির সাহিত্যচর্চার ওপর টান ছিল, নিজেও দেশ-বিদেশের উপকথার ওপর বেশ ভাল গবেষণা করেছিলেন। তাঁর সাহায্যে আমার থিসিস ভাল করেই টাইপ হয়েছিল। লগুনে যে বাকি অংশটা (উপসংহার) টাইপ করতে হয়েছিল তার জন্তে অনেক বেশী দাম (প্যারিসে অল্প সব চ্যাপ্টারের জন্ত যা দিয়েছিলাম সেই একই পরিমাণ অর্থ) দিতে হয়েছিল।

লগুন ফিরে আসবার মাসখানেক পরে পণ্ডাব ইউনিভার্সিটি থেকে থবর এল যে আমার ‘A Comparative Study of the Gold Exchange Standard’ ডক্টরেটের জন্ত মনোনীত হয়েছে। একটা মন্ত বড় বোকা ঘাড় থেকে নেমে গেল। অনেকটা নিশ্চিন্ত মনে আমার ‘Indian Cultural Influence in Cambodia’ থিসিসের শেষ অধ্যায় শেষ করলাম। ঐ অধ্যায়টি আমার নিজের খুব পছন্দ হ’ল, কেন না লিখতে লিখতে অনেক নতুন ধারণা মনে এল, যার কথা আগে ভাবিনি, আর সেগুলি যেন বিনা আয়াসে লিখে ফেলতে পারলাম। যতন ও রকম করে কিছু লেখা যায় তখন বেশ ভালই লেখা হয়।

অবশেষে (বোধ হয় এপ্রিল ১৯২৬এ) এই থিসিসটি লগুন ইউনিভার্সিটির

অফিসে দিয়ে এলাম। বেশ মনে পড়ে যে রেজিস্টারের অফিস থেকে রাস্তায় নেমে এসে মনে হ'ল যেন বড়ই ক্লান্ত হয়ে পড়েছি—হেম্পস্টেডে ফেরবার আগে কোথাও বসে জিরুতে হবে। কাজেই একটি ছোট পার্কের বেঞ্চে অনেকক্ষণ চুপ করে বসলাম—তখন সেখানে কেউ ছিল না—তারপর ধীরেস্থে বাসায় ফিরে এলাম। এরপর তো রেজাল্টের অপেক্ষা করা ছাড়া আর কোনও কাজ রইল না। খুব ঘুমনো আর সকাল বিকেল খুব বেড়ানো গেল।

কেম্ব্রিজ ইউনিভার্সিটির প্রফেসর J. M. Keynes (পরে Lord Keynes বলে যিনি পরিচিত হলেন) আমার কারেন্সি থিসিসের একজন পরীক্ষক ছিলেন। আমার মনে হ'ল এখন তো রেজাল্ট বেরিয়ে গেছে, আর কোনো বাধা নেই, এখন তাঁর সঙ্গে দেখা করে আসি। চিঠি লিখে তাঁর সঙ্গে অ্যাপয়েন্টমেন্ট করে কেম্ব্রিজ পৌঁছলাম। আমার খালসা কলেজের (অমৃতসরের) একটি ছাত্র পদম্ চান্দ ভাণ্ডারী ওখানে পড়ছিল, তাকেও চিঠি লিখেছিলাম। সে স্টেশনে এসে আমাকে কেম্ব্রিজ ইউনিভার্সিটির একটি চক্কর দিয়ে Keynes-এর ঘরের কাছে ছেড়ে দিলে, কারণ তার তখন ক্লাস আরম্ভ হবে। অক্সফোর্ডের মত কেম্ব্রিজ ইউনিভার্সিটিও স্কন্ডর ছবির মত দেখতে—তফাত হ'ল অক্সফোর্ডের কলেজগুলির front হ'ল দেখাবার জিনিস, কেম্ব্রিজের হ'ল কলেজের back। তাই Oxonরা ঠাট্টা করে Cantabদের “you show your backs” বলে। ‘Backs’-এর Lawnগুলির ঘাস এমন পুরু আর এমন সবুজ মনে হয় যেন খুব দামী পার্সিয়ান কার্পেটের ওপর পা দিয়েছি। কেম্ব্রিজের একটি হোস্টেলের কয়েকটি cubicles দেখলাম সেই মধ্যকালীন যুগের Monksদের থাকবার কুঠুরি। প্রাচীন বিশ্ববিদ্যালয়গুলি মঠ থেকেই বিদ্যাচর্চার ভার নেয়। এই কুঠুরিগুলি ছোট ছোট দেওয়াল আব'ড়োখাব'ড়ো পাথর দিয়ে তৈরি, মেক্কেও সেই রকমই paved, আছাড় খেলে বিলক্ষণ লাগবার কথা। আমার ছাত্র (পদম্ চান্দ ভাণ্ডারী) বললে এ কুঠুরি পাবার জন্য খুব রেবারেবি হয়।

সময়মত Keynes সাহেবের ঘরে (বোধ হয় কিংস কলেজে) উপস্থিত হলাম। তিনি তখন কলেজের লনে একটি গ্রুপ ফটোর জন্যে বসেছিলেন। থানিকক্ষণ পরে উঠে এসে জিজ্ঞেস করলেন যে ঐ থিসিসের জন্য ডক্টরেট পেয়েছি কিনা? ওঁর সম্পাদিত ম্যাগাজিনে (কোয়ার্টারলি ইকনমিক রিভিউতে) আমি ঐ থিসিসের কিছু অংশ ছাপাতে পারি। আমি যখন তাঁকে বললাম যে এখন আমি ইকনমিকস্ ছেড়ে দিয়ে ইতিহাস নিয়ে কাজ করবো স্থির করেছি

আর আমার দক্ষিণ-পূর্ব এলিয়া'র ওপর কাজের কথা বললাম, তখন তিনি পরামর্শ দিলেন যে আরও কয়েক বছর ইকনমিকসের কাজ করে তারপর হিষ্ট্রির কাজ নেওয়া উচিত হ'ত। আরও একজন ওঁর সঙ্গে দেখা করবার জন্তে এলেন, আমি বিদায় নিয়ে চলে এলাম।

Keynes তখনই তাঁর Monetary Economics Policyর জন্তে জগৎ-বিখ্যাত হয়েছিলেন। মুদ্রার হ্রাস বৃদ্ধির দ্বারা বাণিজ্য ও শ্রমশিল্পের হ্রাস বৃদ্ধি বিচক্ষণ শাসকেরা হুকৌশলে করতে পারেন। এই হ'ল Keynesian Doctrine, বোধ হয় এখন আর তত খ্যাতি নেই। আমার ছাত্রের (পদম্ চান্দ্ ভাণ্ডারী) কাছে শুনেছিলাম যে Keynes Stock Exchangeএ বোচাকেনায় লক্ষপতি হয়েছেন, একটি রুশ রাজকন্তাকে বিয়ে করেছেন, আর যদিও অল্প বয়সের জন্তে কেশ্বিজ ইউনিভার্সিটিতে প্রফেসার হতে পারেননি তবে যশ ও কৃতিত্বে শুধু ব্রিটিশ কেন সারা পৃথিবীর ইকনমিস্টদের মধ্যে অগ্রগণ্য হয়ে উঠেছেন।

কেশ্বিজ ছাড়বার আগে Cam নদীতে বোট রেস দেখতে গেলাম। এই রেসে যে বোট জিতবে সেই বোট, অক্সফোর্ডের সঙ্গে বোট রেসে প্রতিদ্বন্দ্বিতা করবে।

এর দিনকতক পরেই আমার 'ভাইভাতোমি' পরীক্ষার (পরীক্ষকদের সম্মুখীন হওয়া আর ওঁদের প্রশ্নের উত্তর দেওয়া) ডাক এল। দুজন পরীক্ষক ছিলেন—একজন তো আমার টিউটার প্রফেসর ডব্লুওয়েল আর অন্যটি ব্রিটিশ মিউজিয়ামের Oriental Section of the Libraryতে থাকে দেখতাম তিনিই বিখ্যাত সংস্কৃতজ্ঞ স্কলার Dr. Allan। Dr Allanই আমাকে তিন-চারটি প্রশ্ন জিজ্ঞেস করলেন—তার মধ্যে একটি হ'ল ফ্রেঞ্চ স্কলাররা যা বলেছেন তা ছাড়া নতুন কিছু আমি লিখেছি কিনা। আমার উত্তর তৈরীই ছিল। আমি বললাম যে নালন্দার সঙ্গে কষুজ ও শ্রীবিজয়ের সম্বন্ধ, বাঙলার পাল বংশের মহাবান ধর্মের ইন্দোচায়না ও ইন্দোনেশিয়ায় প্রচার, বাঙলার প্রাচীন উপকথার কষুজে প্রচলন—সংক্ষেপে কেবল দক্ষিণ ভারতের নয় উত্তর ভারত বিশেষতঃ বাঙলা ও মগধের সংস্কৃতির এই অঞ্চলে বিস্তার—এসব আমার নিজের তরফের নতুন কথা। তখন Dr. Allan বলেছিলেন যে আমার শেষ অধ্যায়—Conclusion—বেশ ভাল হয়েছে। তারপর দুই পরীক্ষকই আমাকে কনগ্রাচুলেট করলেন। Dodwell সাহেব বললেন যে তোমার নিজের পছন্দ বিষয় ছিল—তাই এত যত্ন করে লিখতে পেরেছ।

যাক আমার দু বছর পরিচয় করা সার্থক হ'ল। আমার ছুটি খিসিসই মনোনীত হ'ল—বিশেষতঃ কঙ্কুজের কাজটি আমার নিজেরও খুব ভাল লেগেছিল।

এবার এতদিনের বন্ধুদের কাছ থেকে বিদায় নেবার পালা। Hampstead-এ যে বাড়িতে থাকতাম সেখানে একটি সিনিয়ার মেডিক্যাল স্টুডেন্ট যেমন বুদ্ধিমতি ছাত্রী ছিলেন তেমনি তাঁর ব্যবহারও ভদ্র ছিল। নিজের পড়াশুনা করে গৃহস্থালী কাজকর্মও গুছিয়ে করতেন। ইনি বাসার সব tenantদের খুব যত্ন করতেন।

Dodwell সাহেবকে বেশী ভাগ ভারতীয় ছাত্র মোটেই দেখতে পারতেন না—আমি তো তাঁকে সত্যিই গুরুরই মত দেখতাম। Dr. Blagdenএর কাছে তো আমি বিশেষ ভাবে ঋণী, তিনি যদি আমাকে ডাচ স্কলারদের বই-থেকে পড়ে আমাকে বুঝিয়ে-শুনিয়ে না দিতেন তাহলে আমার কাজ অসম্পূর্ণ থেকে যেত। Dr. Lionel Barnett শিলালিপি (বিশেষতঃ দক্ষিণ ভারতের) বিষয়ে যথেষ্ট সাহায্য করেছিলেন। বাস্তবিক স্কুল অফ ওরিয়েন্টাল স্টাডিজ, লণ্ডন, আমার জীবনে একটি স্মরণীয় তীর্থস্থানের মত রইল।

লণ্ডন থেকে প্যারিসে এলাম। এখান থেকে দেশাভিমুখে যাত্রা শুরু হবে। আমি সুইট্জারল্যান্ড, ইটালী হয়ে নেপলস্‌এ জাহাজ ধরবো ঠিক করলাম। সুবোধ মুখুজ্যে, প্রবোধ বাগ্‌চী নেপলস্‌এ জাহাজেই আমার প্রতীক্ষা করবেন, তাঁরা সুইট্জারল্যান্ড, ইটালী আগেই যুরে এসেছেন। প্যারিসে পানিকারের ও অন্ত্যস্ত স্নহদের কাছে বিদায় নিয়ে সন্ধ্যার গাড়িতে সুইট্জারল্যান্ড যাত্রা করলাম। ভোর বেলা ঘুম ভেঙে দেখি সামনে Lake Geneva ছোট সমুদ্রের মত—হুদে সীমার চলছে। সবচেয়ে যা ভাল লেগেছিল সেটি হ'ল Lago Maggiore—হুদের মধ্যে ছোট দ্বীপগুলি ফুলে ভরা। তার পর এল Simplon tunnel—পৃথিবীর দীর্ঘতম এই সুড়ঙ্গ পেরিয়ে এল ইটালীর বিখ্যাত শহর Milan। Swiss train বদলে ইটালীর ট্রেনে যাবার সময় Milan গির্জের পাশ দিয়ে গেলাম। এ গির্জাটিও খুঁটান জগতের একটি দর্শনীয় Cathedral, প্যারিসের Notre Dame, Cologneএর গির্জার তুলনীয়। সন্ধ্যা দশটা আন্দাজ Florence পৌঁছলাম। বড় সুন্দর হোটেল। সকালে ব্রেকফাস্টের পরে যখন জিজ্ঞাস করলাম Pitti Palace ও Uffizi gallery দেখতে চাই হোটেলের ম্যানেজার হাত বাড়িয়ে দেখিয়ে দিলেন যে সেই স্মরণীয় চৌকির মধ্যেই এই দুটি বিখ্যাত

চিত্রশালা ফার্মিং খানেক দূরে রয়েছে। তখনই হাঁটতে আরম্ভ করলাম—
 লাঞ্চার আগে এ ছুটি আর্ট গ্যালারি ঘুরে এলাম—গ্রেট ইটালীয়ান মাস্টারসদের
 বিশ্ববিশ্রুত চিত্র প্রাণ ভরে দেখে এলাম। এত অল্প জায়গার মধ্যে এত সুন্দর
 জিনিস বোধ হয় আর কোথাও নেই। এই চৌকের মধ্যেই Savonarolaকে
 জ্যান্ত পোড়ানো হয়েছিল। এখন সেইখানে তাঁর স্ট্যাচু আছে। আর এরই
 কাছে Michael Angelোর শ্রেষ্ঠ কীর্তি সেই খেতপাথরের প্রতিমূর্তিগুলি
 আছে। অনেক দিন আগে Italian Renaissanceএর বিবরণ ভাল করে
 পড়েছিলাম। এখন মনে হ'ল যেন Lorenzo de Medicis যুগে এসে
 পড়েছি। যে দিকে যাই Savonarola, Machiavelli, Michael Angelo,
 প্রভৃতি, Lorenzোর সমকালীন ঐতিহাসিক ব্যক্তিদের স্মৃতিচিহ্ন দেখতে পাই।
 Arno নদীর উপর সেতুটি Dante'র কথা মনে করিয়ে দেয়। Florence
 অনেক দিন ধরে দেখবার জায়গা—আমার দেড় দিনে দেখায় তো আরো ভাল
 করে দেখবার ইচ্ছেই বেড়ে গেল। কিন্তু আমাকে তার পরের দিনই রোম
 অভিমুখে যেতে হ'ল দেশে ফেরবার জন্য সময়মত জাহাজ যাতে Naplesএ
 ধরতে পারি।

রোম অমর শহর (ইটারনাল সিটি)—এখানে বিদেশী পথিক 'বাঁশ বাগানে
 ডোম কানা' হয়ে যায়। Forum, Capitol, Colisseum, St. Peter,
 Vatican Palace—এখানে ইতিহাস জমাট বেঁধে রয়েছে। হোটেল থেকে
 যেতে আসতে একটি বিজয়স্তম্ভ (বোধ হয় Trajanএর) ও আর একটি বিজয়-
 তোরণ বার বার দেখতাম আর এখনও রোমের কথা মনে পড়লে ঐ দুটি স্মৃতিপটে
 দেখতে পাই। ঐতিহাসিক, কবি ও দেশ-বিদেশের পর্যটকেরা রোমের নানা
 স্থানের কত বর্ণনা করেছেন—আমার এ সবে মধ্য মর্মস্পর্শী মনে হয়েছিল Quo
 Vadis Church যেখানে যীশু পলায়মান পিটারকে Quo Vadis (কোথা
 যাও) বলে বকেছিলেন; আর রোমের Catacombs, মাটির নীচে গুপ্ত শহর,
 (যেখানে অত্যাচার-পীড়িত খৃষ্টানেরা কয়েক শতাব্দী ধরে আশ্রয় নিয়েছিল)
 সেই বিজয়তোরণ ও বিজয়স্তম্ভ যার কথা আগেই উল্লেখ করেছি, আর রোমের
 কোয়ারা (অত্র কোথাও ফোয়ারায় জলের অত তোড় দেখিনি)। রোমে আর
 একটি ঘটনা (St. Peters' Cathedral দেখবার সময়) উল্লেখযোগ্য—
 এখানে টুরিস্টদের ভিড়ের মধ্যে অনেক আমেরিকার নরনারী দেখেছিলাম।
 তার মধ্যে কতক যেমন ভদ্র ও সুশিক্ষিত ছিলেন, তেমনি অনেক যাত্রী নিতান্ত

অভয় ও কুশীল দেখা গেল। তাদের সবায়ের একই কথা—রোমে মন প্রাণ খুলে মদ খাচ্ছি কেমন (U. S. A. তে তখন Prohibition চলছে)—কয়েকজনের চেহারা বাস্তবিকই বীভৎস ছিল। *

রোমের পর Naples। See Naples and then de—Naples দেখবার পর বৈঁচে থাকবার আর কোনো মানে হয় না—কথাটা একেবারে বাজে কথা নয়। সামনে নীল সমুদ্র, দূরে Capri দ্বীপের ছবির মত দৃশ্য, পেছনে Vesuviusএর আগুন ও ধোঁয়ার বলক—সব মিলিয়ে এক অপূর্ণ পরিবেশ। জাহাজ (যাতে মুখ্যে ও বাগ্‌চী আসছেন) তখনও এসে পৌঁছয়নি।

Naplesএর খুব কাছেই ভিসুভিয়াস আগ্নেয়গিরি। তার কথা ছেলেবেলা থেকেই শুনি—ভাবলুম জাহাজ আসতে তো আর একদিন দেবী—ভিসুভিয়াস দেখে আসি। যাবার খুব সুন্দর বন্দোবস্ত—Funicular railway। পাশাপাশি দুটি ট্রেন, একটি উঠছে আর একটি নামছে খাড়া পাহাড়ের গায়ে, একটি মোটা 'কেবল্'এ একটির মুখ আর একটির লেজ বাঁধা।

এর আগে কখনও ওরকম ট্রেন চড়িনি। খানিক দূর তো পীচ এপ্রিকট প্রভৃতি ফলের বাগানের মধ্যে দিয়ে যাওয়া গেল—ছোট গাছগুলি ফলের ভারে হয়ে পড়েছে। তারপর জমি কালো হয়ে গেল—যেন কয়লার গুঁড়োর পুরু স্তরে ঢাকা। তারপরে নেমে দেখা গেল পাহাড়ের ওপরটা যেন ডিনামাইট দিয়ে উড়িয়ে দিয়েছে—আর সেই প্রকাণ্ড গর্তের ঠিক মধ্যে একটি ছোট টিলার, মুখ থেকে বলকে বলকে ধোঁয়া ও আগুন বেরুচ্ছে। পর পর দুটি বলকের মধ্যে একটি গুরুগম্ভীর আওয়াজ হচ্ছে। দশ-বারো মাইল থেকে সেই গুরুগম্ভীর আওয়াজ শোনা যায়। প্রায় ২০০০ বছর আগে যখন দুটি শহর Herculaneum ও Pompeii ধ্বংস হয়ে যায় তখন ঐ বিরাট গহ্বরটি পাহাড়ের বুক চিরে ফেটে বেরোয় আর ঐ প্রকাণ্ড ক্রেটার থেকে আগুন ও লাভা ফোয়ারার মত ছড়িয়ে পড়ে দূর দূর পর্যন্ত একটি সুন্দর শতশ্রামল অঞ্চল পুড়িয়ে ছাই করে দেয়। এখনকার ক্রেটার সেই পুরোনো ক্রেটারের তুলনায় অনেক ছোট।

আগ্নেয়গিরি থেকে নেমে এসে Naplesএর বাহুঘর দেখলাম। সেখানে পম্পেইএর সেই ভীষণ রাজ্যের অনেক নিদর্শন রয়েছে। একটি তো ভোলবার নয়—একটি মেয়েমানুষ উপুড় হয়ে বোধ হয় তার থোকাকে রক্ষা করতে চেষ্টা করছে, সেই অবস্থায় 'লাভার' গায়ে তার দেহের ছাপ রয়েছে।

সেইদিন বিকেলে জাহাজ এলো—ইটালিয়া Loyd Tristino জাহাজ।

মুখ্যে, বাগঁটা 'ডেক' থেকে আমাকে অভ্যর্থনা করলেন। কবি কামিনী রায়ের ছোট ছেলে (নাম মনে নেই) Naples থেকে সেই জাহাজে উঠলো। আর প্যারিস থেকে আসছিলেন কাবুলের আমানুল্লাহর ছেলে আর ফ্রান্সে কাবুলের রাজদূতের ছেলে বারো-তেরো বছর বয়সী জাহির খাঁ। এই জাহির খাঁ এখন জাহির শাহ। এঁরা সব আমাদেরই সঙ্গে এই জাহাজে বোম্বাই যাবেন। এই ছেলেরা ফ্রান্সে স্থলে পড়ে—গরমের ছুটিতে বাড়ি যাচ্ছে। ইটালিয়ান জাহাজে খাবারদাবারের বন্দোবস্ত বেশ ভাল ছিল। যাত্রীরাও বেশীর ভাগ স্বয়মুখো, সুতরাং সবাই হাসিখুশি প্রফুল্লচিত্ত। ডেকে, সেলুনে এ মেলামেশা ভাল রকমই চলছিল। কাবুলের রাজদূত-পুত্রের (জাহির খাঁর) সঙ্গে ও তার দু-একটি সঙ্গীদের সঙ্গে ডেকে খেলাধুলাও হত। ঐ দলটির সবাই খুবই ভদ্র ও খুব মিশুক ছিলেন।

কয়েকদিনের মধ্যেই স্বয়েজখালে জাহাজ ঢুকলো। ভূমধ্যসাগরের পর মরুভূমির মধ্যে এই খালের এলাকা বেশী রকম গরমই মনে হচ্ছিল—রাত্রিরে 'ডেক'এর ওপর বিছানা পেতে শোয়া যেত। একদিন ভোরবেলা মনে হ'ল যে আমার বিছানার পাশে কেউ যেন থমথস্ শব্দ করে ঘুরছে। ভাল করে চেয়ে দেখি যে ওটি কাবুলের রাজদূতের ছেলে (বছর বারো-তেরো বয়স) জাহির খান—হাতে একটি বড় কাঁচি। আমি জেগে উঠেছি দেখে ছেলটি পালিয়ে গেল। পরে আমরা জলযোগ খেতে বসেছি তখন জাহির খান ডাইনিংরুমে ঢুকে, শাসিয়ে গেলেন যে মিস্টার সান্তেজির গৌফ ডাইনিংরুমে একেবারেই সহ করা যেতে পারে না। বিশেষতঃ সান্তেজি যখন সুপ খান তখন মনে হয় যেন ওঁর গৌফ ছাঁকনির কাজ করছে। 'তাই (জাহির) আজ ভোরবেলা ঐ গৌফ একেবারে কেটে পরিষ্কার করে দিতাম। সান্তেজি আমার খুব বন্ধু, তাই তাঁর এই উপকার করতে গিয়ে-ছিলাম।'

সেইদিনই কাবুলের রাজপুত্র—আমানুল্লাহর ছেলে আমাকে ডেকে পাঠিয়ে বললেন যে, 'জাহির যদি এ রকম জালাতন করে তাহলে আমাকে বলো,—আমি ওকে চুইঁমি করতে দেব না।'

যা হোক এর পরেও সবায়ের সঙ্গে তেমনি ভাবসাব চললো। আমার একটি ফ্রেন্ড বইয়ে জাহির খাঁ ও আর একটি আফগান ভদ্রলোক (বোম্বায়ের কাবুল কন্সাল জেনারেলের ছেলে) লিখেছিলেন যে তুমি নিশ্চয়ই কাবুলে আসবে—আর আমরা নিজে তোমাকে সব দেখাব শোনাব। জাহির খাঁ পরে জাহির শাহ—

আফগানিস্থানের রাজা হন। বইটি সযত্নে তুলে রেখেছি—কিন্তু কাবুল যাওয়া হয়নি। অনেক দিন পরে একবার কাবুলের অ্যামবাসেডরকে তাঁদের রাজার ছেলেবেলাকার এই গল্প বলেছিলাম—ভক্তলোক খুব হেসেছিলেন আর বলেছিলেন যে এবার যখন কাবুল যাবেন রাজাকে এই বৃত্তান্ত শোনাবেন।

অন্যদেশে

বোম্বাই পৌছনো গেল। ওখানকার কাবুলীরা ওদের রাজপুত্রের খুব ধুমধাম করে অভ্যর্থনা করলে—আমি ও প্রবোধ বাগচী সুবোধ মুখুজ্যের এক আত্মীয়ের বাড়ি ডাল ভাত স্তোত্রো চচ্চড়ি ইলিস মাছ ভাজা ইত্যাদি সব তৃপ্তির সঙ্গে খেলাম। তবে হলুদের গন্ধটা যেন বেশী বোধ হল—কিছুদিন ওরকম হলুদের গন্ধটা খারাপ লাগতো।

লাহোর থেকে বেরিয়েছিলাম বিদেশযাত্রায়, এবার কলকাতায় নিজেদের বাড়িতে ফিরলাম। জানি না এর আগে বলেছি কিনা যে ১৯২৫এ বাবা ল কলেজের প্রিন্সিপ্যালশিপ থেকে রিটায়ার করে কলকাতায় উড স্ট্রীটে বাড়ি কিনেছিলেন।

ছেলেমেয়েদের ধরমশালায় (কাংড়া ডিস্ট্রিক্ট) খুব ছোট দেখে গিছলাম, এখন তারা অনেকটা বড় হয়েছে। স্বজনের (আমার ভায়ের) দেড় বছরের থোকাকে (দেবরাজকে) এই প্রথমবার দেখলাম। আমার স্ত্রীকে অ্যানিমিক দেখলাম—অ্যানিমিয়া গুঁর অনেকদিনের অসুখ—এখনও মাঝে মাঝে ঐ রোগে ভোগেন।

আমার ভাই স্বজনরাজের স্বাস্থ্য কলকাতায় এসে তখন ভালই আছে। আর তার স্ত্রী তুহিনিকা তো কলকাতারই মেয়ে—ভাল থাকবারই কথা। বাবাকে দু বছর পরে দেখে কিন্তু মনে হল বার্ষিক্যের কিছু চিহ্ন এসে গেছে। অনেকদিন পরে নিজের লোকদের দেখলে কি রকম বদলেছে ভাল করেই বোঝা যায়।

উড স্ট্রীটের বাড়িটি খুবই সুন্দর—আর কলকাতায় খুব ভাল পাড়ায়—তবুও ধরমশালার ‘কোনিয়ম’ যেমন মনের মতনটি মনে হত এং উড স্ট্রীট তেমনটি কখনও মনে হয়নি।

এই হ’ল বিদেশ থেকে দেশে ফিরে এসে দু বছরের মধ্যে যত অদলবদল হয়েছে মনের উপর তার প্রতিক্রিয়া। আমার নিজের শরীরটা তখন বেশ দুর্বল হয়ে পড়েছে (পরিশ্রমটা অতিরিক্ত হয়েছিল—দুটো থিসিস্ সম্পূর্ণ ভিন্ন বিষয়ের ওপর লিখে ও তা শেষ করতে ‘স্ট্রেন’ নিশ্চয়ই হয়েছিল) সেইজন্য মনেও ততটা শ্রুতির ভাব ছিল না, হয়তো তাই এসব পরিবর্তনের ছাপ মনের ওপর

বেশী করে পড়েছিল।

মাস কতক তো বেশ রোগভোগে কেটে গেল—আর কোনও ভাল কাজেরও খোঁজ পাওয়া গেল না। কখনো স্তন্যলায় দুয়েকটি কাজের পক্ষে আমি ‘ওভার-কোয়ালিফায়েড’, কখনো অমৃতসর খালসা কলেজের গোলযোগের ব্যাপার হল বিশেষ রকম অন্তরায়। শেষোক্ত কারণটি আমার স্নুটজারল্যাণ্ডে ‘ইন্টার-গ্রাশানাল লেবর অরগ্যানাইজেশনে’ কাজ পাবার আশায় বাধা দিল। ওখানে যাবার সম্ভাবনাটা ভালই ছিল, কারণ কলকাতায় ‘Clow’ সাহেব আমার ফ্রেন্ড-ভাইভা পরীক্ষার পর নিজেই আশা দিয়েছিলেন। তিনি বলেছিলেন যে ভারতে ঐ ভাষায় যারা পরীক্ষা দিয়েছিল তার মধ্যে আমারই ‘রেজন্ট’ সব চেয়ে ভাল হয়েছিল। যা হোক সব চেয়ে যার জন্ত আমার মনে দুঃখ হয়েছিল তা হ’ল রবি-ঠাকুর আমাকে তাঁর সঙ্গে জাভা, বালী (বলী দ্বীপ) যাবার জন্তে ডেকেছিলেন—তখন আমার শরীরটাও তত ভাল ছিল না, আর কিছুদিন পরে জেনেভা যাবার তখনও সম্ভাবনা ছিল। আমি তাঁর সঙ্গে গেলাম না—আমার বন্ধু স্ননীতি চাটুজ্যে গেলেন। রবি ঠাকুর একদিন আমায় বলেছিলেন—‘বিজ্ঞান, জেনেভার মোহে পড়ে ডুবি জাভা, বালী গেলে না।’ আমার জেনেভাও হল না, বালীও হল না।

এই রকম করে দেড় বছর কেটে গেল। এর মধ্যে একটি কাজ করতে পেরে-ছিলাম। আমার ইণ্ডিয়ান কালচারাল ইনস্টিটিউট ইন ক্যান্টোনিমেন্ট প্রখ্যাত ঐতিহাসিক স্ত্রীর যদুনাথ সরকার পছন্দ করেছিলেন। তখন তিনি কলিকাতা বিশ্ববিদ্যালয়ের ভাইস-চ্যান্সেলর। তিনি ক্যালকাটা যুনিভার্সিটি প্রেস থেকে ঐ ক্যান্টোনিমেন্টের উপর থিসিস ছাপিয়ে দিলেন। জাভা, বালীর উপর যে নোট লিখেছিলাম কলকাতার সত্ত্বপ্রতিষ্ঠিত বৃহত্তর ভারত সোসাইটি সেগুলি একটি বুলেটিন আকারে প্রকাশিত করলেন। এ দুটি বইয়েরই বেশ কদর হয়েছিল। বিলাতে স্ত্রীর ডেনিসন রস ও দেশে স্ত্রীর যদুনাথ সরকার, মহামহোপাধ্যায় গঙ্গানাথ ঝা প্রমুখ কয়েকজন বিশিষ্ট ব্যক্তি এর ভাল সমালোচনা করেছিলেন। সেই সময়—যখন কোনও কাজ পাচ্ছিলাম না—তখন এই দুটি বইয়ের জন্ত যে খানিকটা খাতির পেয়েছিলাম সেটা সে দুঃসময়ে মনে অনেকটা সাহায্য দিয়েছিল।

উদ্বৃত্তে একটা প্রবাদ আছে ‘খোদা যব দেতা হয়, তব ছপ্পর ফোড়কে দেতা হয়।’ ১৯২৮-এর শেষের দিকে আমার কাজকর্মের বিষয়ে তাই হল। বিরলারা তাঁদের আদিনিবাস পিলানির ইন্টারমিডিয়েট কলেজে আমাকে পাঠাতে চাইলেন।

আমি যেন সেখানে গিয়ে এটিকে ডিগ্রী কলেজ করি। কিছুদিনের মধ্যে ঢাকা বিশ্ববিদ্যালয় থেকে 'ইকমিক্স ডিপার্টমেন্টে' রাউরশিপের 'অফার' এল (দু বৎসরের জন্য)। তার দু-এক সপ্তাহ পরে মীরট কলেজের হিষ্টি ডিপার্টমেন্টের হেডসিপ খালি হল। আমার শ্বশুরমশাই মীরটেই বাড়ি করেছিলেন, রিটারার হবার পর। আমার জী ও পুত্রকত্তারা তখন মীরটে। আমারও মীরটেই পছন্দ হল। মীরট কলেজের প্রিন্সিপ্যাল তখন কর্ণেল ও'ডনেল, আয়ারল্যান্ডের লোক। তিনি ওসব অমৃতসর পুলিশ রিপোর্ট প্রভৃতির পরোয়া করেন না। আমার মীরট কলেজের কাজটিই হল। আমি অক্টোবর ১৯২৮-এ এখানে ইতিহাস বিভাগের কাজ আরম্ভ করলাম। চোদ্দ বছর এই ইতিহাস বিভাগের 'হেড' ছিলাম—তারপর ১৯৪২ সালে কর্ণেল ও'ডনেল রিটারার করবার পর আমাকে মীরট কলেজের প্রিন্সিপ্যালের পদ দেওয়া হয়। দশ বছর এই কলেজের অধ্যক্ষতা করে ১৯৫২ সালে আমিও এই কাজ থেকে অবসর গ্রহণ করি। চব্বিশ বছর আমি মীরট কলেজে কাজ করেছি। কলেজ ছাড়বার পর আরও ১৯ বছর হয়ে গেল মীরটেই আছি। আর বোধ হয় এইখানেই জীবনের শেষ অধ্যায় শেষ হবে।

যা হোক এখন সেই বিয়াল্লিশ বছর আগেকার কথায় ফিরে যাওয়া যাক। ইতিহাস বিভাগে আমার একটা অসুবিধা হল যে আগ্রা বিশ্ববিদ্যালয়ে (মীরট কলেজ তখন আগ্রা যুনিভার্সিটির অন্তর্ভুক্ত ছিল) প্রাচীন ভারতের ইতিহাস (এনশ্রুট ইণ্ডিয়া) পড়াই হত না। মধ্যযুগের (medieval period) চর্চাই এ অঞ্চলের ঐতিহাসিকদের ও ছাত্রদের একমাত্র অবলম্বন ছিল। আমার ঝোক ছিল প্রাচীন ভারতের ওপর ও এই বিষয়েই কাজও করেছি। কিন্তু মধ্যযুগের এ বন্ধন থেকে বেরুতে আমার প্রায় সাত-আট বছর লেগেছিল। এ সময়টা আমি ইয়োরোপীয় ইতিহাসের ফরাসী রাষ্ট্রবিপ্লব (আমার খুবই প্রিয় পাঠ্য বিষয়) নিয়ে কাজ করে গেলাম। অবশ্য ইয়োরোপীয় ইতিহাসের (ইংলণ্ডের ইতিহাসের জায়গায়) আরও কোনও অংশ ও রাষ্ট্রীয় বিজ্ঞানেরও কিছু কাজ করতাম। ইংলণ্ডের ইতিহাস তুলে দিয়ে তার জায়গায় ইয়োরোপীয় ইতিহাস পড়ানো আমি প্রিন্সিপ্যাল ও'ডনেল সাহেবকে বলে আমাদের এই বিভাগে (ইতিহাস বিভাগে) বড় রকম পরিবর্তন করতে পেরেছিলাম। ও'ডনেল সাহেব এ বিষয়ে যা বলেছিলেন—আমি তার সম্পূর্ণ অঙ্গুমোদন করি। "ইংলণ্ডের ইতিহাসের ক্ষুদ্র গণ্ডী থেকে ইয়োরোপীয় ইতিহাসের বৃহত্তর ক্ষেত্রে প্রবেশ করা সব দিক দিয়েই বাঞ্ছনীয়।" ও'ডনেল ছিলেন আইরিসম্যান; কোনো ইংরাজ শিক্ষক এ কথা বলতেন না।

প্রঃ বোসমল্লিক (জ্ঞানেন্দ্রনাথ বসুমল্লিক) আমাদের কলেজের একজন প্রবীণ অধ্যাপক ছিলেন। মধ্যযুগের (মুসলিম পিরিয়ড) ইতিহাসের বিশেষজ্ঞ বলেও তাঁর খ্যাতি ছিল। তাঁরই বড় ছেলে শ্রীহরীবোধ বসুমল্লিক, আই, এ, এস, দিল্লীতে উচ্চপদস্থ কর্মচারী হয়েছেন। ইতিহাসের পাঠ্যতালিকা থেকে রাজনীতি শাখা বের করে নিয়ে প্রঃ বোসমল্লিককে তার (পলিটিক্সের) ‘হেড’ করে দিয়ে এই দুই বিভাগের কাজেই বেশ উন্নতি হল, আর মল্লিক মশাইও তাঁর যোগ্য পদ পেলেন।

দুঃখের বিষয় এই সময়েও কলেজের দুজন প্রবীণ শিক্ষক মল্লিক মশাই আর অঙ্ক বিভাগের মদনমোহন আগ্রা যুনিভার্সিটির সিনেট প্রভৃতিতেও কলেজের বিভিন্ন বিষয়ে নিজের নিজের প্রভাব অক্ষুণ্ণ রাখবার চেষ্টায় বেশ দলাদলির সৃষ্টি করেছিলেন। আরও দুঃখের বিষয় যে আজ (চল্লিশ বছর পরে) এই রকম দলাদলি বড় বেশীরকম বেড়েছে—আর কেবল শিক্ষকদের মধ্যে নয়, কলেজগুলির কর্তৃপক্ষদের মধ্যেও সাংঘাতিক রূপে দেখা দিয়েছে। আর এর ভয়াবহ পরিণাম যে এই ঝগড়াঝাঁটির আবহাওয়া ছাত্রমহলেও খুব বেশী রকম ঢুকেছে। আজ সমস্ত দেশটায় যে স্কুল-কলেজগুলি একটা বিক্ষোভের ঝড়ের মধ্যে পড়েছে—এর জন্ত দায়ী শিক্ষক ও কলেজ-স্কুলের কর্তৃপক্ষ, এঁদেরই দৃষ্টান্ত অনুসরণ করে ছাত্র সম্প্রদায় বিত্যাচর্চা ছেড়ে উচ্ছৃঙ্খল জীবন যাপন করছে। এই বিষয়বস্তুটি সমূলে উৎপাটিত না করলে আমাদের দেশের ভবিষ্যৎ অন্ধকার। আজ এই বিষ খুব ছড়িয়েছে—চল্লিশ-পঞ্চাশ বছর আগে এর লক্ষণ নিশ্চয়ই ছিল—তবে তখন ছাত্ররা পড়তো, স্কুল-কলেজে রক্তপাত হত না—পরীক্ষাগুলি নির্বিঘ্নে আরম্ভ ও শেষ হত। এর প্রতিকার কেমন করে করতে হবে, এর জন্তে রীতিমত বিপ্লব রাষ্ট্রে ও সমাজে দরকার হবে কিনা—এইটিই হল আজকের বিষম সমস্যা। এ সমস্যার ঠিকমত সমাধান না হলে আমাদের সর্বনাশ অবশ্যজ্ঞাবী।

১৯৩০ সালে শ্বশুরমহাশয় মারা গেলেন। ৩শেখরনাথ বন্দ্যোপাধ্যায় উত্তর প্রদেশের District ও Session Judge ছিলেন। অবসর গ্রহণের কয়েক বছর পরই হৃদরোগে ভুগছিলেন। তাঁর সম্পত্তির ব্যবস্থা তাঁর ‘উইল’ অনুসারে আমার ও তাঁর বড় দৌহিত্রের—শ্রীঅনিলদেব মুখোপাধ্যায়ের উপর স্থাপন হয়েছিল।

শ্বশুরমহাশয় উত্তরপাড়ায় জন্মগ্রহণ করেছিলেন—কিন্তু পরে ঐ পরিবারটি উত্তরপ্রদেশে চলে আসেন। বেরেলী, এলাহাবাদেই হয়েছিল তাঁদের কর্মস্থল।

ওঁদের মধ্যে দুজন—পিতা ও পুত্র—ও ঐ বাড়ির একজন জামাতা U. P. High Court-এর judge হয়েছিলেন (তার প্রমদাচরণ বন্দ্যোপাধ্যায়, ললিতমোহন বন্দ্যোপাধ্যায়, তার লালগোপাল মুখোপাধ্যায়)। মীরটের নামী ডাক্তার প্রবোধনাথ বন্দ্যোপাধ্যায় আমার শ্বশুরমশায়ের ভাইপো। প্রবোধনাথের ছোট ভাই সুবোধনাথ আমার পরম স্নহদ ছিলেন—মীরটে বছর কুড়িক ওঁর সাহচর্য পেয়েছিলাম। মীরটে ওঁকে জানতো না এমন লোক খুব কমই ছিল।

সুবোধদাই আমাকে সার সীতারামের সঙ্গে পরিচয় করে দেন। সার সাহেব (ওরফে পণ্ডিতজি) হলেন মীরটের Premier Citizen—শহরের সবচেয়ে গণ্যমান্য ব্যক্তি। বন্ধুবান্ধবেরা তাঁকে পণ্ডিতজি বলতো কারণ তিনি সংস্কৃতের উচ্চ পরীক্ষায় বোধ হয় শাস্ত্রী পরীক্ষা সম্মানে উত্তীর্ণ হয়েছিলেন। U. P. Legislative Assemblyর President ছিলেন পণ্ডিতজি—আর রাজনীতিতে মধ্যপন্থী ছিলেন বলে অনেক তীব্র সমালোচনাও তাঁকে ভোগ করতে হত তবে মীরট কলেজটিকে সত্যিই ভালোবাসতেন—কলেজের তিনি ‘ওল্ড বয়েজ’দের অগ্রণী ছিলেন ও অনেকদিন কলেজের Hony. Secretary ছিলেন। তখনকার দিনে Hony. Secretary অনেক সময় প্রিন্সিপালের, সাহেব প্রিন্সিপালেরও সমকক্ষ বা তারও বেশী হতেন ক্ষমতা ও প্রভাবে। পণ্ডিতজি বাঙলা জানতেন—আর আমার সঙ্গে তাঁর বেশ ভাব হয়েছিল।

বাবা আমার বড় ছেলে বিজুকে বড় ভালবাসতেন, আর চিরকালটা পশ্চিমে কাটিয়ে কলকাতায়ও একনাগাড়ে বেশীদিন থাকতে পারতেন না। প্রায়ই মীরটে আসতেন, বিজুকে পড়াতে আর এখানে অনেকের সঙ্গে বেশ ভাবসাব করেছিলেন। কলকাতায় ও তারও আগে লাহোরে তিনি বাঙলায় নাটক ও উপন্যাস লেখা আরম্ভ করেছিলেন। অনেকদিন তাঁর এরকম লেখা চলেছিল—তার অনেকগুলি ছাপিয়েও ছিলেন। তাঁর মণিমহেশ বইটি, এর বছর আট-নয় আগে ধরমশালায় লেখা, ঐ অঞ্চলেরই গদ্যীদের পুরনো কথা-কাহিনী নিয়ে একটি বড় গল্প, আমাদের খুব ভাল লাগতো। তবে সবচেয়ে ভাল লাগতো আরো অনেক দিন আগের কথা, যখন লাহোরে বাবা কোনো ভাল বই থেকে (স্কটের Quentin Durward ডুমার মন্টিক্রিস্টো, উর্দু ভাষার বাহার দরবেশ, প্রভৃতি) খানিকটা পড়ে শোনাতেন আর তারপর গল্পটা বেশ সবিস্তারে বলতেন। এইরূপে বাঙলা, ইংরাজি, সংস্কৃত, ইত্যাদি সাহিত্যের রত্নভাণ্ডার থেকে কিছু কিছু রত্নের সঙ্গে আমাদের অল্প বয়সেই পরিচয় হয়েছিল। যাকে বলে a born teacher, সত্যিই বাবা তাই ছিলেন।

শেষের দিকে (১৯৩৪-৩৬ সালে) ‘ব্লাডপ্রেসারের’ দরুন অস্থিতার জন্তে আর মীরটে আসতে পারেন নি—আমরাই কলকাতায় (৫ উড্ স্ট্রীটে) ছুটির সময় তাঁর কাছে যেতুম। আমার ছোট ভাই—Dr. S. R. Chatterji, M. D. (Durham University) ওঁর চিকিৎসা করেছিল, আর গোড়ার দিকে এ চিকিৎসায় বেশ উপকারও হয়েছিল। তবে বার্ধক্যের দুর্বলতা আর ব্লাডপ্রেসারের দরুন ১৯৩৬ সালে কার্তিকী পূর্ণিমার সন্ধ্যায় বাবা আমাদের ছেড়ে চলে গেলেন। তাঁর জন্মও একান্তর বছর আগে ঐ কার্তিকী পূর্ণিমায় হয়েছিল।

আমার কেবল লেখাপড়া নয় (অর্থাৎ সাধারণতঃ যাকে লেখাপড়া বলা হয়) বাবার কাছে তার চেয়ে অনেক ভাল বিষয়ে ভাল শিক্ষা পেয়েছিলাম। ছেলেবেলাতেই বুদ্ধের জীবনী ও তাঁর ধর্মের সঙ্গে একরকম পরিচয় হয়েছিল, মা ও বাবার কাছে ‘অমিত্রভ’ প্রভৃতি বই পড়া শুনে। তাঁদের একটি কথা বেশ মনে আছে যে বুদ্ধদেবের বাণী জগতে প্রথম মানুষকে জানিয়েছিল যে মানুষ শুধু তার নিজের চেষ্টায়—কারও সাহায্য না নিয়ে—নির্বাণ বা মোক্ষ (সকল সাধনের কাম্য লক্ষ্য) লাভ করতে পারে। অবশ্য অনেক পরে শ্রাবকযান (বা হীনযান) ও মহাযান বোঝবার মত বিত্তাবুদ্ধি হলে পরে মহাযান (ভক্তি ও করুণা) হীনযানের (জ্ঞান ও নিবৃত্তির) চেয়ে অনেক বেশী মনের মত বোধ হয়েছিল।

একটি দিকে কিন্তু এখনও আমার এ সব বিষয়ের ধারণা অন্তরূপ রয়ে গেছে। বাবার শেষ পর্যন্ত বিশ্বাস ছিল যে ঈশ্বর সর্বশক্তিমান ও সর্বমঙ্গলময়। আমার কিন্তু অনেকদিন থেকে মনে হয়েছে ঈশ্বর মঙ্গলময় কিন্তু সর্বশক্তিমান নন। সর্বশক্তিমান হ’লে জগতে এত দুঃখ কষ্ট কেন ? অনেকদিন থেকেই এই ধারণাটা প্রায় বদ্ধমূল হয়ে গেছে যে আর সব ব্যাপারেও যেমন, এদিকটাতেও সেই রকমই এক বিপুল বিবর্তন চলছে। অনেক বাধাবিঘ্ন অতিক্রম করে এক বিরাট শক্তির প্রবাহ (শক্তিটি শুভ বা শিব) একটি স্থির লক্ষ্যের দিকে এগিয়ে চলেছে। এই লক্ষ্যে পৌঁছলে শক্তিটি পূর্ণতা লাভ করবে—তখন ঈশ্বর সর্বমঙ্গলময় ও সর্বশক্তিমান হবেন—সম্পূর্ণ হবেন। তিনি আমাদের সবার সঙ্গেই এদিকে এগুচ্ছেন। আমরা যখন জেনে শুনে পাপ করি তখন কেবল আমাদের নয় ঈশ্বরেরও অগ্রগতিতে বাধা পড়ে। এ বিরাট বিশ্বশ্রোত সবাইকে নিয়ে পূর্ণতা ও চরম উৎকর্ষের দিকে প্রবাহিত হচ্ছে ও কোনো-না-কোনো যুগে এই দিব্য পরিণতিতে পৌঁছবে। এখন চলছে একটা Transitional Stage—পরীক্ষার মাঝামাঝি স্তর, দুঃখ কষ্ট বাধা বিঘ্ন সঙ্ঘ করে এগিয়ে যাবার। ঈশ্বর ও আমরা এখনও

অপূর্ণ—আমরা ঠুঁই সঙ্গে সঙ্গে পূর্ণতা লাভ করবো ঐ বিরাট শক্তির (ঠুঁই এগিয়ে যাবার শক্তির) জোরে। আমি ফিলসফার নই, ধর্ম ও দার্শনিক তত্ত্বের সঙ্গে কমই পরিচয়—তবে কি রকম করে জানি না এই বিশ্বাস ছাড়তে পারছি না আর বোধ হয় পারবোও না। বছর দুয়েক আগে ৮৩জন্মদিনে শীলের—সত্যিকার এক মহাপণ্ডিতের—জীবনীতে তাঁর এই রকম একটি সিদ্ধান্তের আভাস পেয়ে বড় আনন্দ বোধ করেছিলাম।

বাবা বলতেন মাহুশ মায়েই তার নিজের একটা ধারণা করে নেয় এই সব যাকে বলে আধ্যাত্মিক ব্যাপারের। এইটিকেই কি তার ‘স্বধর্ম’ বলা যেতে পারে? তাহলে আমার স্বধর্ম হ’ল ‘God is in the making and along with him we too are attaining the good—the perfect stage of all that is imperfect now.’

যা হোক এসব আধ্যাত্মিক ব্যাপারে আমার মত অজ্ঞ লোকের মতামত মোটেই গ্রাহ্য নয়—এইখানেই এ আলোচনা শেষ করা যাক।

কলেজের কথা—আমার ওখানকার সহকর্মী ও বন্ধুদের কথা কিছু না বললে এই স্মৃতিকাহিনী অসম্পূর্ণ রয়ে যাবে। কর্নেল ও’ডনেলের উল্লেখ আগেই করেছি—তিনি ইংরাজি পড়াতেন আর তাঁর সবচেয়ে শেখের কাজ ছিল University Training Corps—এখন যাকে N. C. C. বলা হয়। আগ্রা বিশ্ববিদ্যালয়ের তিনি ছিলেন U. T. C.র প্রধান—আর তাঁর তত্ত্বাবধানে মীরট কলেজের U. T. C.র বেশ নাম ছিল। খেতাবদের মর্যাদা তখনও খুবই ছিল (এখনও থানিকটা আছে) স্বতরাং ইউরোপিয়ান প্রিন্সিপালকে কলেজ চালানোর কাজে বেশী অস্থবিধা পেতে হত না। বিশেষতঃ কমিশনার (কলেজ কমিটির প্রেসিডেন্ট) কলেক্টর (কমিটির ভাইস-প্রেসিডেন্ট) এঁরা সব ইংরেজই হতেন। কমিটির দেশীয় মেম্বারেরাও সাদা চামড়ার খাতির করতেন (অবশ্য দু-একজন ছাড়া)। তবে কর্নেল ও’ডনেল নিজে এই ‘বর্ণ’সমস্যা়ার অত্যাশ্রয় প্রয়োগ করতেন না।

আমার সহকর্মী অধ্যাপকদের মধ্যে দু-একজনের একটু বিশেষত্ব ছিল। নন্দলাল ইকনমিক্সের ‘হেড’ ছিলেন। নিজেকে পুরো নাস্তিক বলে জাহির করতেন, খুব ভাল পড়াতে পারতেন—যদিও ছাত্রাবস্থায় কিছু কৃতিত্ব দেখাতে পারেননি, শিক্ষকমণ্ডলীর নিজেদের মধ্যে দলাদলিতে (তখনও এটা এত উগ্র-ভাষা নেয়নি) সতেজে ঝাঁপিয়ে পড়তেন। আর নিজে যেমন ভোজনবিলাসী

ছিলেন তেমনি বন্ধুবান্ধবদেরও ভাল খাওয়াতেন। আমার চোদ্দ বছরের অভিজ্ঞতায় একমাত্র নন্দলালকেই খোলাখুলি ভাবে ও'ডনেল সাহেবকে রুচি সজ্জাষণ করতে শুনেছি। কেন তা জানি না, আমার সঙ্গে নন্দলালের কখনো ঝগড়া হয়নি—বরং বেশ সভাবই ছিল। অনেকদিন পরে (যখন আমি সতেরো-আঠারো বছর কলেজ ছেড়েছি) একজন ঐ কলেজেরই অবসরপ্রাপ্ত অধ্যক্ষ আমাকে বলেছিলেন যে প্রফেসর নন্দলালকে অমন ঠাণ্ডা করে রাখা আর তো কেউ পারেনি।

অধ্যাপক চাঁদ বাহাদুর লাহোরে আমার সঙ্গে এম. এ. (ইতিহাস) ক্লাসে ছিলেন, তার ষোল বছর পরে মীরট কলেজে আবার আমাদের এক জায়গায় কাজ আরম্ভ হয়। তারপর চল্লিশ বছর আমাদের বন্ধুত্ব অটুট ছিল।

তান্মাজি ফিজিক্সের প্রফেসর—গোড়া অজ্ঞানদেহীয় ব্রাহ্মণ ছিলেন। উনি আমাদের ভাইস-প্রিন্সিপাল ছিলেন,—আর অত গোঁড়ামি সত্ত্বেও সব সম্প্রদায়ের লোক তাঁকে শ্রদ্ধা করতো। তিনি তাঁর ফিজিক্স ল্যাবরেটরীর জন্ত অনেক রকম অ্যাপারেটস্ তৈরী করতেন আর এই দক্ষতার জন্ত এ প্রদেশে তাঁর খ্যাতি ছিল। তান্মাজির অকালমৃত্যু না হলে আমাকে আর প্রিন্সিপাল পদের দুর্ভোগ ভোগ করতে হত না।

বাঙালী বন্ধু ও সহকর্মীদের মধ্যে মল্লিক মশায়ের কথা আগেই বলেছি।

যতুবাবু (প্রঃ যত্ননাথ সিংহ। প্রেমচাঁদ রায়চাঁদ স্কলার, পি. এইচ. ডি.) ফিলজফির হেড ছিলেন। পণ্ডিত ছিলেন, লেখক ছিলেন। এখনও তাঁর বছরে দু-একখানি বই কলকাতায় তাঁর নিজের প্রেস থেকে ছাপা হচ্ছে। আর নির্ভীকও ছিলেন। ডাঃ রাধাকৃষ্ণনের সঙ্গে তাঁর মসৌযুদ্ধ বেশ কিছুদিন চলেছিল—পরে বিচারালয়ে এর আপোসে মিটমাট হয়ে যায়। রাধাকৃষ্ণমজি তখন কলিকাতা বিশ্ববিদ্যালয়ে পঞ্চম জর্জ প্রফেসর আর যতুবাবু তাঁর কাছে কিছুদিন আগেই প্রেমচাঁদ রায়চাঁদ বৃত্তির পরীক্ষার্থী ছিলেন। এই পরীক্ষার খিসিস নিয়েই দুজনে খুব ঝগড়া হয়।

প্রিয়কুমার গোস্বামীর (ইংরাজি বিভাগের) অল্পবয়সে মৃত্যু হয়। তাঁর স্ত্রী, ছেলে শ্রীমল (১৯৬২র লদাখের লড়ায়ে মহাবীর চক্র পেয়েছে), মেয়ে অশোকা (মীরট এন. সি. সি.তে মেজর) প্রভৃতি আমাদের কেবল বিশেষ পরিচিত নন—আমাদের দুই পরিবারের মধ্যে আরও নিকট-সম্বন্ধ আছে। আমার ছোট জামাই ক্যাপ্টেন কৈলাসনাথ লাহিড়ী অশোকার মা অমলাদেবীর মামা।

ঐ ইংরাজি বিভাগেরই আরও দুজন—হরিমোহন মুখোপাধ্যায় ও বোগেশ-চন্দ্র বিশ্বাস (দুজনেই এখন পরলোকে)—আমাদের বাড়ির অনেক ছেলে-মেয়েদের ইংরাজি সাহিত্য বিষয়ে অনেক সাহায্য করেছিলেন। দুজনেই ঐ বিষয়ে নামকরা শিক্ষক। একজন, মুখুজ্যে, একটু বেশী সেক্টিমেন্টাল আর অত্যাতি, বিশ্বাসমশাই, খুব প্র্যাকটিক্যাল লোক। দুঃখের বিষয় এ দুজনের মধ্যে সন্তাব ছিল না আর এই কারণে বিশ্বাস ইংরাজি বিভাগের যখন ‘হেড’ হলেন মুখুজ্যে রাগ করে মীরট ছেড়ে দিলেন। অনেক ঘুরলেন, বছর দশেক আগে একবার মীরটে এসেছিলেন তখন তিনি উড়িষ্যা পৌঁছেছেন চাকরির সন্ধানে। বেচারীর পারিবারিক জীবন বড় দুঃখের। একে একে তাঁর পরিবারের সবাই (একটি ছেলের কথা জানি না, সেটি ছাড়া) টাইফয়েড রোগে মারা যায়। ভদ্রলোকটি তো আট-ন বছর হল মারা গেছেন।

বিশ্বাস মশাই অবসর গ্রহণের পরও পরীক্ষক (অনেক রকম পরীক্ষায়) হয়ে ও কোচিং করে বেশ রোজগার করছিলেন—হয়তো অতিরিক্ত পরিশ্রমের জন্মই বছর দেড়েক হল মারা গেছেন (১৯৭০ সালে)।

আর একজনের কথা বলে এ প্রসঙ্গ শেষ করি। মীরট কলেজের সংস্কৃত বিভাগের ‘হেড’ ডাঃ ধর্মেন্দ্রনাথ শাস্ত্রী একসময়ে আর্থসমাজী হয়েও প্রচ্ছন্ন বৌদ্ধ নয়, “বাই বিট অভ ড্রাম” (by beat of drum) বৌদ্ধ। সত্যিকার বিশ্বাস হয়েও বেশীরকম ব্যবসায়-বুদ্ধিসম্পন্ন। আর একটু বেশী মাত্রায় কলহপ্রিয়। লোকটির গুণও আছে আর দোষও আছে। সংস্কৃত বিভাগে আজীবন কাজ করেও একটি প্রকাণ্ড অট্টালিকার মালিক হয়েছেন। কত রকম কাজে তিনি হাত দিয়েছেন (ভাল ও মন্দ) বলতে পারি না—তবে সব কাজেই তাঁর উত্তম ও অধ্যবসায় অক্ষরস্ত। তাঁর বন্ধুও অনেক, শত্রুও অনেক।

এ রকম বিচিত্র স্বভাবের সহকর্মীদের সঙ্গে চব্বিশ বছর কাজ করেছি। আর আমার বিশেষ সৌভাগ্য যে বেশ মিলেমিশে, বেশ ভাল ভাবে এত বছর কাটিয়েছি। কারুর কারুর সঙ্গে বেশী বন্ধুত্ব নিশ্চয় ছিল—কিন্তু কারুর সঙ্গে শত্রুতা নিশ্চয়ই ছিল না।

এবার কলেজের কর্তৃপক্ষের দু-একজনের (এঁরা কলেজের Hony Secretary ছিলেন) বিষয় না বললে আমি অকৃতজ্ঞ বলে নিজের বিবেকের কাছেই অভিযুক্ত হব। প্রথমে বলতে হবে সার্ব সীতারামের কথা—আগেই তাঁর উল্লেখ করেছি। তাঁরই আমন্ত্রণে মীরট কলেজে ইতিহাস বিভাগে প্রধান হয়ে

চুকেছিলাম—তঁারই চেঁচায় ঐ কলেজের প্রিন্সিপাল হয়েছিলাম। বতদিন তিনি কলেজের অনারারি সেক্রেটারি ছিলেন—ততদিন কলেজ-কর্তৃপক্ষের দিক থেকে আমার কোনো আপদবালাই ছিল না। তঁার কথা ইংরেজ কমিশনার বা কলেক্টার (যাঁরা কলেজের প্রেসিডেন্ট বা ভাইস প্রেসিডেন্ট ছিলেন) প্রায় নির্বিবাদেই মানতেন। তবে উনি রাজনীতিতে নরমপন্থী বলে ও তঁার সার্ব উপাধি থাকায় জনসাধারণের কাছে তঁার যোগ্য বশ ও মান পাননি। সার্ব সাহেব বা পণ্ডিতজি, এ দুই নামেই তিনি পরিচিত ছিলেন—সংস্কৃত সাহিত্যে এম. এ. ছিলেন, বাঙলা ও অন্যান্য দেশীয় ভাষার সঙ্গে তঁার পরিচয় ছিল। শেষ বয়সে অনেক শোক পেয়েছেন—এখন অন্ধ হয়ে গেছেন। ভগবানই জানেন কেন এ রকম লোকের এত দুর্ভোগ হয়।

১৯৭২ সালে মে মাসে পণ্ডিতজি মারা গেছেন।

ঠিক এর উল্টো ছিলেন আর একজন অনারারি সেক্রেটারী—ডাক্তার ভূপাল সিং। ইনি ছিলেন মহাত্মা গান্ধীর ভক্ত, খন্দরধারী, রাজনীতিতে চরমপন্থী। একবার কমিশনার (কলেজের প্রেসিডেন্ট) কলেজের কোনো একটা নিয়ম বদলাতে চাচ্ছিলেন—অনারারি সেক্রেটারি এটা মোটেই চাইতেন না। কমিশনার সাহেব মৌরট ডিভিসনের গুটি তিনেক কলেক্টারকে ডাকলেন মিটিংয়ে—আর ভূপাল সিং ডাকলেন বেসরকারী যত মেম্বারদের। আমাকে অনারারি সেক্রেটারি একদিন চুপি চুপি বলে গেলেন যে Erskine-এর Parliamentary Procedure দেখে তঁার মতের অমূল্য সব পয়েন্টস্ যেন তঁার জন্তে তৈরি রাখি। যা হোক, মিটিংয়ে খুব ধুমধাম হলো—আর বেশ কয়েকটা ভোটে ভূপাল সিংজিরই জিৎ হলো। সেদিন আমাদের আনন্দ দেখে কে—(অবশ্য এই আনন্দ প্রকাশ্য ভাবে প্রকাশ পায়নি) ভূপাল সিংজি বেশ রাগী লোক ছিলেন—তবে আমার সঙ্গে তঁার এমন কিছু মনোমালিন্য হয়নি। কয়েক বছর পরে খুব ভাবই হয়েছিল।

আর একজন অনারারী সেক্রেটারী শেঠ রামেশ্বর প্রসাদ আমার বন্ধুই ছিলেন—তঁার সঙ্গে অনারারী সেক্রেটারী ও কলেজের কর্মচারীর সম্বন্ধ ছিল না। তিনি যখন সেক্রেটারীর পদে নিযুক্ত হন, আমি তখন প্রিন্সিপ্যাল হয়েছি। দুজনে বেশ মিলেমিশে কাজ করতে পেরেছিলাম বলে কলেজেরও বেশ উপকার হয়েছিল। গভর্নমেন্ট ও যুনিভার্সিটির কাছ থেকে কলেজের জন্য টাকা নেবার চেঁচায় শেঠজি আর আমি অনেক ঘুরেছি (দিল্লী, লন্ডো, এলাহাবাদ প্রভৃতি বড় বড় জায়গায় অনেক বড়লোকের বাড়িতে প্রায় ধন্য দিয়েছি—আর অনেক সময়ে

কাজও হয়েছে)। শেঠজির অকাল মৃত্যুতে সত্যিই একজন বন্ধু হারিয়েছি।

ইতিহাস বিভাগের কাজের ভার (এ ভার ভালই লাগতো) নিয়ে চোদ্দ বছর তো (১৯২৮-১৯৪২) কাটালাম। বোধ হয় ১৯৩৯ সালে (দ্বিতীয় বিশ্বযুদ্ধ তখনও আরম্ভ হয়নি) হিন্দি কংগ্রেস উপলক্ষ্যে লাহোর গিছলাম। লাহোর থেকে কয়েকটি ঐতিহাসিক বন্ধুদের সঙ্গে হারাম্ভা গেলাম। রাবীর পুরানো খাদে এই প্রাগৈতিহাসিক 'সাইট' বড়ই চিত্তাকর্ষক হয়েছিল। বিশেষতঃ ছোট ছোট মূর্তিগুলি—সেই 'ডান্সিং গার্ল', একটি দেবীমূর্তি আর পটরি (লাল, কালো—২০০০ বছরের ঘড়ার টুকরো) এই প্রথমবার দেখলাম।

১৯৪২ সালের এক গ্রীষ্মাবকাশে সূজনের অস্থখের কথা শুনে ধরমশালা গেছি, —ওখানে দিন দশ বারো থাকবার পরে টেলিগ্রাম এল যে কলেজের কাজে মীরটে ফিরে আসতে হবে। ফেরবার পথে কাণ্ডারপ্রসিদ্ধ মন্দির (১৯০৫ সালে ভূমিকম্প ধ্বংস হবার পর লাহোর ও অমৃতসরের ধনী হিন্দুদের দ্বারা এ মন্দির পুনর্নির্মিত হয়েছিল) এই প্রথমবার দেখলাম আর কাণ্ডা থেকে আর একটু এগিয়ে এ অঞ্চলের সবচেয়ে পুরানো মন্দির বৈজনাথ (বৈগনাথ) দর্শন করলাম। বৈজনাথ মনে রাখবার মতন জায়গা। এর পেছনে ধওলাধার এক মহান বিরাট ব্যাপার। ফেরবার পথে জালামুখী রোড স্টেশনে নেমেছিলাম 'জালামুখী' মন্দির দেখবার উদ্দেশ্যে। কিন্তু দুপুরবেলা স্টেশন এত গরম বোধ হয় যে দু-তিন মিনিট পরেই আবার গাড়িতে চড়ে বসলাম আর সোজা অমৃতসরে নামলাম। একটি দিন খালসা কলেজে ঘুরে (পণ্ডিত অজুর্নদেবের অতিথি হয়ে) আঠার বছর আগের নিজের কর্মভূমি ও বাসস্থান দেখে এলাম। বোধ হয় আর কখনও দেখা হবে না।

মীরটে ফিরে এসে শুনলাম যে কর্ণেল ও'ডনেল রিটারার করেছেন। ষাট বছরের উপর তাঁর বয়স হয়েছে, আগ্রা যুনিভার্সিটি নাকি আর এক্সটেনশন দিচ্ছেন না। আর সার্ব সীতারাম প্রভৃতি কর্তৃপক্ষীয় কর্তারা আমারই নাম ঐ পদের জন্য প্রস্তাব করেছেন। যদিও সার্ভিস হিসাবে আমার চেয়ে কয়েকজন সিনিয়র আছেন, তবে মাহিনা ও 'অ্যাকাডেমিক কোয়ালিফিকেশনস'-এর জন্য তাঁরা আমাকেই মনোনীত করেছেন। কিছুদিনের মধ্যেই কলেজ কমিটির অধিবেশনে আমাকে মীরট কলেজের প্রিন্সিপালের পদে নিযুক্ত করা হল (আগস্ট ১৯৪২)।

মীরট কলেজে অধ্যক্ষতা

এবার জীবনের আর এক পর্ব আরম্ভ হল। মীরট কলেজে এর আগে কখনো দেশী অধ্যক্ষ হয়নি। আমাকে নিয়েই নতুন 'এক্সপেরিমেন্ট' করা হল। দশ বছর (১৯৪২-৫২) কলেজের প্রিন্সিপ্যালশিপ পিরিয়ডের কথা আরম্ভ করবার আগে কিছু বাড়ির খবর বলা দরকার। এ সময়ে আমার বড় ছেলে শ্রী বিজয়রাজ এম. এ. পাস করেছে, কিছুদিন ধরে ইউ. পি. র (U.P. র) ('যুক্তপ্রদেশ'—ইউনাইটেড প্রভিন্সেস) আদি পর্বের উপর—কি করে উত্তর পশ্চিম প্রদেশ যুক্তপ্রদেশ হল—রিসার্চ করেছিল। মেজ ছেলে শ্রী রাজরাজ স্থানীয় নানককন্দ স্কুলে পড়ছিল। সবায়ের ছোট শ্রী নটরাজ তখন ছয় বছরের। বড় মেয়েটির—অমিতার—এর আগের বছর (১৯৪১) বিয়ে হয়ে গেছে। উত্তরপাড়ার খ্যাতনামা মুখ্য বংশের ছেলে শ্রী বিজলীভূষণ হলেন আমার জামাতা। ছোট মেয়ে মানসীর বিয়ে এর তিন বছর পরে হয়েছিল—দ্বিতীয় বিশ্বযুদ্ধ শেষ হবার সময়।

১৯৪৩ সাল পর্যন্ত আমরা বেগমপুরের 'রমা মন্দিরে' (শান্তি ঠাকুরাণীর বাড়িতে) থাকতাম। ঐ বছর কলেজের প্রিন্সিপালের বাঙলোতে চলে এলাম আর ১৯৫২ পর্যন্ত এখানেই ছিলাম। অনেকদিনের শখ মনের মতন বাগান করা—ওখানে যেটানো হল। জমি ছিল, জল ছিল আর ভাল মালি ছিল। কয়েক বছরের মধ্যে কলেজ বাঙলো ফুলের জগৎ সাহেব কলেজের ও কমিশনরদের বাঙলোর সঙ্গে টেকা দিতে পেরেছিল।

কলকাতায় আমার ছোট ভাই ডাক্তার সুনন্দরাজের শরীর কয়েক বছর থেকে খারাপ যাচ্ছিল—রাঁচির শ্রীনাটোরিয়ামে কয়েক মাস থেকে মধ্যে বেশ উপকার হয়েছিল—আবার নিজের প্র্যাকটিস ৫ উড স্ট্রীটে শুরু করতে পেরেছিল। আমার ভাইপো শ্রী দেবরাজ তখন কলকাতায় সেন্ট জেভিয়ার স্কুলে পড়ে। আমার জ্যেষ্ঠ ভাই সনৎকুমার (রায়বাহাদুর সনৎকুমার চট্টোপাধ্যায়) কলিকাতা বিশ্ববিদ্যালয়ে 'ল' প্রফেসর ও কো-অপারেটিভ মুভমেন্ট (সমবায় উদ্যোগ)-এর ছিলেন একজন নেতৃস্থানীয় ব্যক্তি। সনতের ছেলে বাদল (শক্তি কুমার) তখন

খুব যোগা, ধব্ধবে ফর্সা ছোটটি ছিল। আমার মেজদার (পিস্তৃতো ভাই ময়খ মুখুজ্যের) ছেলেরা তখন (মেজদাদা মারা যাবার পরে) লাহোর ছেড়ে আমাদের কাছে মীরটে আছে। বড় ছেলেটি—শ্রী অমরনাথ—দিনকতক অল্প অল্প জায়গায় কাজ করে পরে অর্ডিন্যান্স ডিপার্টমেন্টে চোকে—এখন ঐখানে বেশ ভাল পোস্টে আছে। ছোট ছেলে শ্রী সমরনাথ বেনারস বিজ্ঞানায়ের ইঞ্জিনিয়ারিং ডিগ্রি নিয়ে দু-এক জায়গায় ভাল ইলেকট্রিক্যাল ইঞ্জিনিয়ার হয়েছিল। আমার কাকাবাবুর (৮ অসিতচন্দ্রের) ছেলেরা বারাসতে 'কৈলাসপুরী'তে (আমার ঠাকুরদাদা ৮ কৈলাসচন্দ্রের বাড়ি) আছে। ছোটকাকা ৮ গোবিন্দচন্দ্রের দুই মেয়ে—ছোট মেয়ে শ্রীমতী উমা দেবী বারাসতের মেয়েদের ইন্টার কলেজের প্রিন্সিপাল। ছোটকাকার বড় মেয়ে শ্রীমতী বাণী দেবীর মেয়ে রেবাও ভাল করে এম. এ. পাস করে কোনো এক কলেজে লেকচারার হয়েছিল। এখন বিয়ে করে গৃহস্থালী কাজে ব্যস্ত আছে।

এবার আমার 'অধ্যক্ষগিরি'র প্রথম ধাক্কার কথা বলি। এদিকে একটি কথা বেশ প্রচলিত আছে—'সির মুনাতেহি ওলে পড়ে' [মাথাটি মুড়ুলাম আর শিলাবুড়ি (মাথার ওপর) আরম্ভ হল]। আমারও ঠিক সেই রকম অবস্থাটি হ'ল। আমি 'অধ্যক্ষ' হলাম জুলাইয়ের শেষ (১৯৪২ সাল) আর কুইট ইণ্ডিয়া মুভমেন্ট (ভারত থেকে বেরাও) শুরু হ'ল অগাস্টের গোড়াতেই। সেকী তুমুল আন্দোলন ! বেহারে তো রেলগাড়ির যাতায়াত কিছুদিনের জন্য বন্ধ হ'ল। আর স্কুল-কলেজের ছাত্রদের মধ্যে তো বিষম বিক্ষোভ। সোজাশুজি স্ট্রাইক নয়—একেবারে স্কুল-কলেজ বন্ধ করবার জন্তে প্রাচণ্ড চেষ্টা। আমি কলেজের ছাত্রছাত্রীদের একটি বড় দল কলেজ অফিসের দিকে এগিয়ে আসছে দেখে তাড়াতাড়ি এগিয়ে গিয়ে তাদের সঙ্গে দেখা করলুম। তারা বললে যে আমার দেশের এ দুর্দিনে (তখন গান্ধীজি প্রমুখ নেতারা সব কারাগারে) দেশের জন্য কিছু করতে চাই। আমিও তাদের বললাম যে আমি তো তোমাদেরই মতন এই দেশেরই লোক—আমারও এই সঙ্কটে দেশের কথা ভুলে থাকবার কথা নয়। আমি ও তোমাদের অল্প শিক্ষকেরা এ সময়ে যে রকম করে দেশসেবা করা যেতে পারে তোমাদের সেই সেবার কাজের বিষয়ে সহযোগী হ'তে চাই। স্তবরাং যখন আমাদের ও তোমাদের মধ্যে মতভেদ নেই—তখন যেন আমরা পরস্পরকে ভুল না বুঝি। আমার ও আমাদের অধ্যাপকমণ্ডলীর মধ্যে অনেকেরই সেই কুইট ইণ্ডিয়ার দেশব্যাপী আন্দোলনের সময় আন্তরিক ইচ্ছা ছিল যে আমরা এই যুবজাগরণের ঢেউটিকে বিশৃঙ্খলার হাত থেকে বাঁচিয়ে

ঠিক ঠিক ভাবে সামলে নিয়ে যাই। কিন্তু তা সম্ভব হ'ল না। এ বিপ্লবের উগ্রপন্থী নেতারা এ স্বকম মধ্যপন্থার ঘোরতর বিরোধী ছিলেন। তাঁরা তখন ভারত-জোড়া ধ্বংসলীলা দেখতে চান। কলেজ একেবারে বন্ধ না করে তাঁরা ছাড়বেন না—আর ছাত্রদের মধ্যে তাঁদের জোর প্রভাব ছিল। আমি ও আমাদের কয়েকজন সহকর্মী ছাত্রদের বোঝাতে চেষ্টা করলাম যে তোমরা কলেজে না আসতে চাও এসো না—তবে যারা আসতে চায়, তাদের বাধা দিও না। মুসলমান ছাত্রেরা আর সরকারি কর্মচারীদের ছেলেমেয়েরা তো কলেজ ছাড়তে মোটেই চায় না। তারা সংখ্যাতে খুব কম নয়। আবার কলেজ-কমিটির প্রেসিডেন্ট হলেন কমিশনার সাহেব—মিঃ উড—একেবারে উগ্রপন্থী কট্টর ইংরাজ সিভিলিয়ান। যদি পারতেন তবে তিনি এই বিক্ষোভের নেতাদের কঠোরতম শাস্তি দিতেন। তিনি আমাকে বাক্সালী বলে খুবই সন্দেহ করতেন। একদিন আমাকে ও প্রফেসর মদনমোহনকে তাঁর অফিসে ডেকে পাঠান—সেখানে জেলার কলেজের বনাজি (ডব্লিউ. সি. বনাজির পৌত্র) উপস্থিত ছিলেন। কলেজের অনারারী সেক্রেটারী সারু সীতারামও সে মিটিংয়ে ছিলেন। উড সাহেব এমন করে আমার সঙ্গে বাক্যালাপ শুরু করলেন যে আমি আর থাকতে পারলাম না। কমিশনার সাহেবকে বললাম, ‘আমি আপনার চাপ্রানী নই, আমি চললুম।’ এই বলে বেরিয়ে এসে আমি বাড়ি গিয়ে (তখনও আমরা রমা মন্দির, বেগমপুলে থাকি) আমার প্রিন্সিপ্যালের পোস্ট থেকে ছাড়া পাবার জন্য পদত্যাগপত্র লিখলাম। কিন্তু বাড়ির সবাই (তার মধ্যে গুরুজনরাও ছিলেন) ধরে বসলেন যে ওরকম করে কাজ ছাড়লে সর্বনাশ হবে—জেল তো হবেই হবে। সারু সীতারামও খবর পাঠালেন যে আমি ‘রিজাইন’ না করি। আমার আর পদত্যাগ করা হল না। তারপর অনেকবার ভেবেছি যে তখন প্রিন্সিপ্যালের পদ ছেড়ে যদি কের ইতিহাস বিভাগে ফিরে যেতাম তা হলে ভালই হত, মনে কোনও খেদ আপসোস থাকত না। দু-এক দিন একটু শান্ত আবহাওয়ার পর আবার দারুণ ঝড় উঠলো। একদিন সকাল বেলা আমি ডিরেক্টর অফ এডুকেশন (ইউ.পি.)-এর সঙ্গে দেখা করে তাঁর অফিস থেকে যাই ফিরেছি তখনই কলেজের অধিকাংশ ছেলে হঠাৎ কলেজ-অফিস আক্রমণ করলো। আমি প্রায় একলা ধাক্কা সামলাতে চেষ্টা করেছিলাম। সে যেন রীতিমত ফুটবলের ম্যাচ—খুব জোর ধাক্কার পর ধাক্কা দাঁড়িয়ে দাঁড়িয়ে সামলালাম। সেই সময় কোনও একজন প্রফেসর আমাকে বললেন যে কতক্ষণ এরকম চলবে—পুলিসের সাহায্য নিতে হবে। দু-তিন দিন ধরে পুলিশ কলেজের গেটের বাইরে জমায়েত ছিল—

ওরা যেন জানতো এ রকম একটা ব্যাপার হবে। কোন কর্তেই দুকাড় করে শ'খানেক পুলিশ কলেজের হাভার মধ্যে হকার করন্তে করতে ঢুকে পড়লো। ঢুকে জন কুড়িক ছেলেকে ধরে পুলিশভ্যানে পুরে খানায় নিয়ে গেল। কলেজ খালি হয়ে গেল—কেবল পুলিশের দল রয়ে গেল। এটা আমার জীবনের মর্যাস্তিক দুর্ঘটনা। পুলিশ ঢুকলো—আর বেরল না—মাস খানেক কলেজের মধ্যে তাঁবু গেড়ে অধিষ্ঠান করলো। তারপর মাস দুয়েক কমিশনার উড্‌ই কলেজ চালালেন—প্রিন্সিপাল, স্টাফ, ম্যানেজিং কমিটি সাহেবের হুকুম অহুসারে কাজ চালানো। অনেকবার এ প্রশ্ন মনে উঠেছে—যে যখন পুলিশ ডাকা হয়েছিল তখন আমাদের বলে দিতে হ'ত তাদের যে সে দিনের ছাত্রদের হান্কামা শেষ হলেই তারা (পুলিশ) যেন কলেজ ছেড়ে চলে যায়। যা হোক, সব গোলমাল থামলো বটে তবে ক্রীতদাস জীবন যে কেমন তা মাস দেড়েক হাড়ে হাড়ে বুঝেছিলাম। তখন অনেকবার মনে হয়েছে যে এ ঘটনার কিছু দিন আগে যখন পদত্যাগ করবার ওরকম একটি সুযোগ পেয়েছিলাম, তখন প্রিন্সিপালশিপ ছেড়ে না দিয়ে কি ভুলই করেছি।

অমানিশারও শেষ আছে—উড সাহেব মীরট থেকে চলে গেলেন (যদিও যাবার সময় কলেজ-কর্তৃপক্ষদের আমার উপর বড়া নজর রাখতে বলে গেলেন) আর ভাইসরয়ের এক্সিকিউটিভ কাউন্সিলে দু'জন ভারতীয় অনারারি মেম্বর—সাবু শঙ্করন নায়াব ও সাবু হোমি মোদি—কাউন্সিল থেকে পদত্যাগ করলেন। কুইট ইণ্ডিয়া মুভমেন্টের উগ্রতম স্টেজ অহিংস অসহযোগে পরিণত হ'ল। আমরা দাসত্ব-শৃঙ্খল থেকে মুক্তি পেলাম। তবে আমার Webley-scott রিভলভারটি এই বিভ্রাটের মধ্যে বাজেয়াপ্ত হয়ে গেল।

মনে একটা সাস্থনা রইল যে আমাদের দিয়ে কোন ছাত্র বা শিক্ষককে শাস্তি দেয়ানো হয়নি। Collector Bonnerjiও বোধহয় এরূপ কিছু করতে অনিচ্ছুক ছিলেন—আমি জানি ভেতরে ভেতরে তাঁর এ ব্যাপারে কিছু সহানুভূতি ছিল—তবে উড সাহেবকে মেনে ওঁকে চলতে হ'ত। আর আমরাও কাউকে অবখা শাস্তি দেবার বিরুদ্ধে প্রাণপণ চেষ্টা করতাম।

এই ফাঁড়াটা কাটিয়ে—আমার শিক্ষক জীবনের বোধহয় সবচেয়ে দারুণ ফাঁড়া—আমার দশ বছরের প্রিন্সিপালশিপ পরিষদুটি প্রায় নির্বিঘ্নে কেটে গেল। এর পর যে কমিশনার ও কলেক্টার—কলেজের প্রেসিডেন্ট আর ভাইস প্রেসিডেন্ট—এলেন তাঁরা ছিলেন সত্যিকারের উদারপন্থী—কলেজের কিসে ভাল

হয় সেটা তাঁরা বাস্তবকিই ভাবতেন। দু-একজন প্রিন্সিপালেরই কথা বেশী শুনতেন—কলেজ-কমিটির মন্তব্যের চেয়ে কলেজের অধ্যক্ষেরই মতটা মেনে নিতেন। আবার একদিন এল যখন কমিশনার (কলেজ-কমিটির প্রেসিডেন্ট) আমার অনেক দিনের বন্ধু S. S. Kherr—(বিলেতে, গাওয়ার স্ট্রীটে অনেকদিন একসঙ্গে ছিলুম), মীরটে Dist. Sessions Judgeও আমার অনেক বছরের খুব জানাশোনা লোক—তখন আর সাহেবদের পর ‘দিশী’ লোক আর কি ‘প্রিন্সিপালগিরি’ করবে এরকম কথা আর শোনা যায়নি। আর এ সময় ভাল কর্মঠ ‘অনারারী সেক্রেটারি’র সাহায্যে কলেজের কিছু উপকারও করতে পারা গিছিলো।

ছাত্রসংখ্যা বেশী বেড়ে না যায় সেরূপ চেষ্টা সঙ্গেও কলেজে দু-তিন বছরের মধ্যে ঐ সংখ্যা হাজার তিনেক হ’ল—আরও দু-এক বছরে চার হাজারে দাঁড়ালো। আমারই চেষ্টায় মীরট শহরে দুটি ইন্টার কলেজে বি. এ. পড়ানো আরম্ভ হ’ল। আমার ইচ্ছা ছিল যে বি. এ. ক্লাস তিনটি কলেজেই হোক—এম. এ. কেবল মীরট কলেজেই থাকুক। আজ কুড়ি বছর পরে এই কলেজগুলি মীরট কলেজের সঙ্গে প্রতিদ্বন্দ্বিতা করতে সব সময়েই প্রস্তুত—আর অনেক সময়ে অগ্নায় প্রতিদ্বন্দ্বিতা। তবে দিন কতক আগেও এই নতুন ডিগ্রী কলেজগুলি তাদের এই উন্নতির জন্তে আমার কাছে কৃতজ্ঞতা স্বীকার করেছেন। এখন এঁরা এম. এ. ক্লাস খুলতেও কুষ্ঠিত নন যদিও এঁদের লাইব্রেরি প্রভৃতি বিশেষ সুবিধার নয়।

আর এ কয়েক বছরের মধ্যে ‘বটানি’ ‘ফিসিক্স’ প্রভৃতি এম.এসসি. ক্লাস খোলা হ’ল। কিছু দিনের মধ্যেই বটানির এম.এসসি. ক্লাস ডাঃ পুরীর তত্ত্বাবধানে দেশজোড়া নাম কিনতে পেরেছিল। ১৯৫২ সালে যখন আমি কলেজের কাজ থেকে অরসর গ্রহণ করলাম তখন আগ্রা ইউনিভার্সিটির প্রায় প্রত্যেক পাঠ্য বিষয়ে আমাদের কলেজে বি. এ., বি. এসসি., বি.কম, এম.এ, এম.এসসি, এম. কম ক্লাস খোলা হয়েছে। আর বা কর্নেল ও’ডনেল (তাঁর সঙ্গে মন্বরিতে দেখা হয়েছিল) নিজে আমাকে বলেছিলেন ছাত্রসংখ্যা বাড়া সঙ্গেও প্রায় সব পরীক্ষায় ছাত্রছাত্রীরা ভাল করে (কেবল তৃতীয় ডিভিসনে নয়) পাস করেছে। এখানে অবশ্য বলে রাখা উচিত যে এই রকম উন্নতি আমার সহকর্মী অধ্যাপক মণ্ডলীরই কৃতিত্ব—এ কথা বলাই বাহুল্য।

কর্নেল ও’ডনেল যে U. T. C (University Training Corps) গড়ে তুলেছিলেন তা এখন N. C. C. তে (National Cadet Corps)

পরিণত হয়েছিল। রীতিমত আর্মি অফিসাররা (গোড়ায় ইংরেজ অফিসার) কলেজে এসে ট্রেনিং দিতেন। আমার মেজ ছেলে রাজরাজ মীরট কলেজে N.C.C. থেকেই ডেরাডুন মিলিটারি একাডেমিতে যায়। এখন ও Lieutenant Colnel—নীলই full Colnel হবে।

আর একটি নতুন ব্যবস্থা করতে পেরেছিলাম আগ্রা বিশ্ববিদ্যালয়কে দিয়ে। এশিয়ার আধুনিক ইতিহাস—বিশেষতঃ শেষ একশো বছরের—বি. এ. ইতিহাসের একটি Paper হিসাবে (Last Hundred Years in China and Japan, Last Hundred Years in the Middle East—The Arab World, Israels etc) পাঠ্য তালিকায় ঢোকাতে পেরেছিলাম। এখন এটি compulsory paper হয়েছে।

এ কয় বছর কলেজে কয়েকটি সত্যিকারের বড়লোক আসেন—আর তাঁদের আমার বাসায় (প্রিন্সিপালের বাড়ীলোতে) দু-একদিন রাখবার স্বেচ্ছাগত হয়েছিল। সার্. সি. ভি. রমণ মীরট কলেজে বক্তৃতা দিয়েছিলেন ও বাড়ির সকলের সঙ্গে অনেককালের পরিচিতের স্তায় মজার গল্প করেছিলেন। অত বড় বৈজ্ঞানিক যে ওরকম আমদে হতে পারেন—তা আমাদের ধারণা ছিল না। নোবেল প্রাইজ নেবার সময় ইওরোপে তাঁর ভাত খাবার গল্পটি ভুলবো না। যেখানে যান বড় বড় বিদ্বান মহিলারা তাঁর জন্তে ভাত রাখেন—ভাত গলিয়ে ঘেঁটে ঘেঁটে একেবারে লেট্টি তৈরি করেন। আর ওঁকে বলতে হয় চমৎকার হয়েছে। শেষে ওঁকে আগে থেকে ‘হোস্ট’, ‘হোস্টেস’দের বলতে হ’ল যে ডাক্তার ওঁকে কিছুদিনের জন্তে ভাত বন্ধ করিয়েছেন।

স্বামী রঙ্গনাথানন্দ তখন তাঁর পৃথিবীর সর্বত্র দিগ্‌বিজয় যাত্রা আরম্ভ করেন—নি—তবে দিল্লীতে তখন তাঁর খুব খ্যাতি। ওরকম উচ্চাঙ্গের, অথচ সাধারণের বোধগম্য, বক্তৃতা আমি তো আর কোথাও শুনি নি। উনি কয়েকবার কলেজ এসেছেন, আর আমার কলেজ থেকে অবসর গ্রহণের পরও মীরটে এসেছেন ও আমাদের বাড়িতেও উঠেছেন। উনিও কথাবার্তায় সন্ন্যাসীজনোচিত গাভীর্ষ ছেড়ে দিয়ে সবায়ের সঙ্গে বেশ হাসিঠাট্টা করতে পারেন। ওঁর বাস্তবিক একটি ম্যাগনেটিক শক্তি আছে—তাতে লোকের মনের ওপর তাঁর এক আশ্চর্য প্রভাব হয়। এখন তো ওঁর জগৎজোড়া নাম।

আর এক দম্পতি—সার বেসিল ব্র্যাকেট ও লেডি ব্র্যাকেট—আমাদের কলেজের বাড়িতে অনেকক্ষণ ছিলেন। বিলেত থেকে এসেছিলেন দিল্লীতে

সেন্টাল গভর্ণমেন্টের নিয়ন্ত্রণে। মীরট আমি হেড কোয়ার্টারে সার্বেলি ব্র্যাকেটের কিছু কাজ ছিল। লেডি ব্র্যাকেটকে কয়েক ঘণ্টা আমাদের বাড়িতে (প্রিন্সিপালের বাড়ীতে) থাকতে হয়। তিনি এই প্রথম এদেশে এসেছেন, আমার স্ত্রী ইংরাজিতে কথাবার্তা করতে পারেন না, আমার বড় বোমা মীরাও ও বিষয়ে এমন কিছু অভ্যস্ত নয়, আমাকেও কলেজে নিজের কাজে যেতে হয়েছিল—এ সব বাধাবিঘ্ন সত্ত্বেও মেমসাহেব বেশ হাসিখুশি গল্পগল্প করে দুপুরবেলাটা কাটিয়ে ছিলেন। বিকালবেলা সার্বেলি ব্র্যাকেট কলেজে বক্তৃতা দিলেন। উনি ছিলেন নিউক্লিয়ার (nucleare) ফিসিয়েল বিশেষজ্ঞ। উনি আমাদের ফিসিক্স ল্যাবরেটোরির তৈরি ফিসিক্স পড়াবার apperatusও দেখে গেলেন।

এর কিছুদিন আগে, শ্যামাপ্রসাদ মুখোপাধ্যায় মহাশয়—তখন কেন্দ্রীয় মন্ত্রী ছিলেন, এসেছিলেন, তাঁর কাছ থেকে লক্ষাধিক টাকার লোহার সরঞ্জাম (কলেজের জন্ত) কেনবার অমুমতি পেয়েছিলাম। উনি আমাদের কলেজের কন্ভোকেশনেও এসেছিলেন। ওঁর সেদিনকার Convocation Address শুনেছিল আমাদের বড় গৃহস্থওয়ালা হুভতি লোক। বাস্তবিক উত্তরাঞ্চলে অল্পদিনের জন্তই এসেছিলেন—কিন্তু তারই মধ্যে উনি ধেরূপ এদিকের জনসাধারণের ভক্তি শ্রদ্ধা অর্জন করেছিলেন তেমনটি আর কোনো বাঙালী পাননি।

১৯৫২ সালে মে মাসের গোড়ার দিকে কলেজ ছাড়লাম। বিদায়-দিনে কলেজের ছাত্রছাত্রীরা ও শহরের গণ্যমান্য লোকেরা আমাকে তাঁদের ভক্তির ও স্নেহের আশাতীত নির্দেশ দিয়েছিলেন। তাঁদের সেদিনকার আন্তরিক স্নেহের সম্ভাষণ আমি ভুলিনি।

কলেজে থাকতে থাকতেই আমার ছোট মেয়ে মানসীর ও বড় ছেলে বিজয়ের বিয়ে দেওয়া হয়েছিল। ১৯৪৫ সালে যেদিন জাপান বিশ্বযুদ্ধে হার স্বীকার করলো—সেই দিনেই শ্রী কৈলাসনাথ লাহিড়ীর সঙ্গে মানসীর বিয়ে হল। কৈলাস তখন Navyর (British Indian Navy) officer—বিশ্বযুদ্ধে আরাকান coastএ নৌযুদ্ধে উপস্থিত ছিল। এ বিয়েটি এমন তাড়াতাড়ি হয়ে গেল যে বলা যায় যে কৈলী (কৈলাসনাথ) জুলিয়াস সিজারের ‘veni, vidi vici’ (এলাম, দেখলাম, যুদ্ধ জয় করলাম)-কেও হার মানিয়ে দিয়েছিল। এর বছর খানেক পরে কৈলাসনাথ Navy ছেড়ে দিয়েছিল। ১৯৪৯এ ও মাত্রাজ বন্দরে পাইলট নিযুক্ত হয়েছিল। ওর সমুদ্রের ধারে সুন্দর কোয়ার্টার আমরা দেখে এলাম এবং সেই উপলক্ষ্যে মহাবলীপুরম্, তিরুপতি, তিরুমলাই সপরিবারে দর্শন লাভ করলাম।

দাক্ষিণাত্যে এই হ'ল আমাদের প্রথম 'অভিযান'। মহাবলীপুরমের নীল সমুদ্র-পল্লবযুগের স্থাপত্য বিষয়কর দৃশ্য—না দেখলে বোঝানো যায় না। কলেজের বাড়িতেই বিজয়েরও (আমার বড় ছেলের) বিয়ে হ'ল। আমার অনেকদিন থেকেই ইচ্ছা ছিল যে পুত্রবধূর শিক্ষকদের বাড়ির মেয়ে হন। আমার শাশুড়ী ঠাকুরাণী আর আমি এলাহাবাদের K. P. Collegeএর ইংরাজি সাহিত্যের প্রফেসর শ্রী নিমাইচন্দ্র মুখোপাধ্যায় মহাশয়ের কন্যা মীরাকে দেখে এসে—সেই পাত্রীটির সঙ্গেই বিজুর বিয়ে দিলাম (১৯৫০)।

কলেজের বাড়ি ছাড়তে যা কষ্ট হয়েছিল তা ওর বাগানের জন্ত হয়েছিল। বিজুও তখন বাগানের কাজে খুব মন দিত, মালীও ভাল ছিল—বাগান সব সময় ফুলে ভরে থাকতো। আমাদের Ranunculus (Butter-Cup), Cactus, Porana প্রভৃতি লোক এসে দেখে যেতো। আর ওরকম বাগান হবে না। কলেজের বাড়ির বাগানও এর পর নষ্ট হয়ে গেল—আর কেউ যত্ন করে ওটি রাখতে চেষ্টা করল না।

এর বছর খানেক পরে আমার ছোট ভাই সূজনরাজ মারা গেল। বাবার তো বাহান্তর বৎসর বয়সের গোড়ার দিকে মৃত্যু হয়েছিল—সূজন তো সাতার-আটার বছর বয়সেই মারা গেল—আর অনেক দিন ভুগেই গেল। খানিকটা সাস্থনার বিষয় যে তার একমাত্র পুত্র দেবরাজের বিয়ে দেখে যেতে পেরেছিল।

আমার জ্যেষ্ঠভ্রাতা ভাই সনৎকুমারও (রায়বাহাদুর সনৎকুমার চট্টোপাধ্যায়) ঐ বছর মারা গেল। ও আমাকে নিজের ভায়েরই মতন দেখতো। ওরও একটি ছেলেই ছিল—বাদল, ভাল নাম শক্তিকুমার।

আমরা আবার রমা মন্দিরে (বেগমপুল) ফিরে গেলাম। খানিকটা ইচ্ছে ছিল যে কলকাতায় ফিরে যাই—উড স্ট্রীটের অমন বাড়ি থাকতে আর কোথায় যুরে বেড়াব। ঐ দিকেই মনের মতন কোনো কাজও পাওয়া যাবে। কিন্তু কিছু দিনের মধ্যেই বুঝতে পারলাম যে ও রকম 'জোলো' হাওয়ায় আমাদের মত শুকনো জায়গার (পঞ্জাবের) লোক টিকতে পারবে না। দেশে থাকবার আশা ছেড়ে দিতে হ'ল।

এই সময়ে অনেক দিনের শখ চীনের বিষয় Up-to-date হবার ইচ্ছা খুব হ'ল। পানিকার (Sardar Pannikar) চীন থেকে ফিরেছিলেন (উনি তখন Chiang Kai-shekএর K. M. T. Govt.এ Nankingএ ভারতের দূত ছিলেন) তাঁর সঙ্গে দিল্লীতে দেখা করলাম। কলকাতায় থাকতে শুনলাম

প্রবোধ বাগচী মশাই পিকিং থেকে শান্তিনিকেতন ফিরেছেন। আমি শান্তিনিকেতন গেলাম। বাগচীর চীনের বিষয় বড়ত। শুনলাম—দিন কতক বিশ্বভারতী (শ্রীনিকেতন পর্যন্ত) ঘুরেফিরে দেখলাম। ভাল লাগলো—কিন্তু গুপ্তান থেকে যাবার তেমন ইচ্ছে হ'ল না। মীরটের ভারত-চীন মৈত্রী সজ্জের সদস্য হয়ে কিছু চীনের সমসাময়িক ইতিহাসের মালমসলা পেলুম।

১৯৫৪ সালের গোড়ার দিকে দিল্লীতে একটি ভারত-চীন মৈত্রী সজ্জের অধিবেশন হয়। বাঙলা, মহারাষ্ট্র, কেরল, পঞ্জাব প্রভৃতি প্রত্যেক প্রদেশ থেকে নির্বাচিত প্রতিনিধিরা এসেছিলেন। এই সম্মিলনীর একটি শাখার আমি সভাপতি ছিলাম। এর আগের বছর চীন থেকে চীন-ভারত মৈত্রী সজ্জের একটি goodwill mission এসেছিল আমাদের দেশে। এবার দিল্লীর এই অধিবেশনে স্থির হলো যে আমাদের একটি goodwill mission চীনে যাবে।

আজকাল যা দেশের মনোভাব তাই বুঝিয়ে বলা দরকার যে ১৯৫৩-৫৪-৫৫ এই বছরগুলিতে পণ্ডিত জোয়াহরলাল নেহরু থেকে আমাদের মত শিক্ষকশ্রেণীর সাধারণ ব্যক্তির পর্যন্ত একটা আন্তরিক বিশ্বাস ছিল যে এশিয়ার দুই মহাদেশ ভারত ও চীন একতাবদ্ধ হয়ে রাজনীতিকক্ষেত্রে কাজ করতে পারলে এশিয়াকে আর ইউরোপের হুকুম মেনে চলতে হবে না। ৩০০ বছরের ইউরোপের সার্বভৌম প্রভুত্ব এশিয়াকে আর মাথা পেতে স্বীকার করতে হবে না। এই আশা দুর্ভাগ্য দাঁড়াবে (আমার এখনও মনে হয় যে ছ'পক্ষের ভুলেতেই এরকমটি হল) তখন কেউ ভাবেনি। দিল্লীর এই সভাটি বেশ ভাল করে মনে আছে কারণ সেই সময়েই দিল্লীতে থাকতে থাকতে আমার বেয়ান ঠাকরণ শ্রীমতী ছায়া দেবীকে অনেক দিন পরে দেখলাম—আর তাঁর সঙ্গে কথাবার্তায় আমার মেজ ছেলে রাজরাজের বিয়ে তাঁর বড় মেয়ে সুনন্দার (মহুর) সঙ্গে হওয়া প্রায় স্থির হ'ল। ছায়া দেবীকে প্রায় ৩৫ বছর আগে প্রথম দেখি মীরটে যখন তিনি আমার বেয়াই শ্রী শৈলেশ রায়ের সঙ্গে, তাঁদের বিয়ের পরেই, রমা মন্দিরে এসেছিলেন। এ বিয়ের ষটকালির কাজ খানিকটা আমিই করি। উনি (শ্রীমতী ছায়া দেবী) হলেন রমাপ্রসাদবাবু (কলিকাতা হাইকোর্টের অবসরপ্রাপ্ত বিচারপতি শ্রী রমাপ্রসাদ মুখোপাধ্যায়ের) শালী। রমাপ্রসাদবাবু কলকাতা থেকে আমাকে লেখেন যে মীরটে শ্রী শৈলেশ রায় এসেছেন নতুন কাজ নিয়ে (কৃষি-বিভাগে), তাঁর সঙ্গে ছায়া দেবীর বিয়ের কথা হচ্ছিল—আমাকে তাই পাত্রে খোঁজ নিতে লিখেছেন। যাক, এ হ'ল প্রায় ৩৫ বছর আগের কথা।

দিল্লীর এই ভারত-চীন মৈত্রীর অধিবেশনের পর আমরা ধরমশালা গেলাম । সেই আমাদের ‘কোনিয়ামে’ শেষ বার থাকা—আবার ধরমশালা খুব ঘুরেছিলাম । বিজু, মীরা, খোকন, হুটু চলে যাবার পরেও দুজন দিন পনেরো ওখানে রয়ে গেলাম । তারপর টেলিগ্রাম পেলাম যে চীনে এবার যে ‘গুড-উইল মিশন’ যাচ্ছে ১লা অক্টোবর, পিপলস্ রিপাবলিক অফ চায়নার ষষ্ঠ বাৎসরিক সমারোহ উপলক্ষ্যে, আমাকে সেই মিশনের মেম্বার করা হয়েছে । আমি যেন তাড়াতাড়ি মীরটে ফিরে এসে পাসপোর্ট ইত্যাদির বন্দোবস্ত করে ফেলি । খবর পেয়ে আমরা দুজনেই নেমে এলাম । দিল্লী স্টেশনে রায় মশাই ও ছায়া দেবী আমাদের ট্রেন থেকে নামিয়ে ওঁদের বাড়ি নিয়ে গেলেন, সেখানে মনুকে আমরা দুজনে দেখলাম তারপর মীরট ফিরলাম । রাজুকে (ও তখন ক্যাপ্টেন) বলা হল যে ও বিজুকে সঙ্গে নিয়ে মনুকে যেন দেখে আসে—আমরা দুজনে তো দেখে ও পছন্দ করে এসেছি ।

পাসপোর্ট ও আনুষ্ঠানিক ব্যাপার বাস্তবিক বড় জটিল বিষয় । তবে এই গুডউইল মিশনের জন্য ‘সেন্টার’ এ সব কাজ খুব সহজ করে দিয়েছিলেন । যথাসময়ে সব ঠিক ঠিক হয়ে গেল । দিল্লী চীন রাষ্ট্রদূতালয়ে দিল্লী থেকে যারা চীনে যাবেন তাঁদের চীন রাষ্ট্রদূতের সঙ্গে একটি ফটো তোলা হল । তার দু-একদিন পরে কলকাতা মেলে কলকাতা যাত্রা করলাম । সঙ্গে ডাঃ জ্ঞানচন্দ—আমাদের একটি নেতৃস্থানীয় সত্যিকারের বিদ্বান লোক—ছিলেন আমার কম্পার্টমেন্টেই । আর সেই ট্রেনেই ছিলেন একজন খুব গোঁড়া কমিউনিস্ট ভাইসগুববক্‌স্‌ সিং, পঞ্জাবের । কলকাতায় সেইদিনই বিকেলে বাঙলার মুখ্যমন্ত্রী ডাঃ বিধান রায় স্থানীয় গুডউইল মিশনের মেম্বারদের একটি পার্টিতে সম্বর্ধনা করলেন । আমরা আর তাতে যোগ দিতে পারলাম না ।

সেই রাতেই ১৭ই সেপ্টেম্বর ১৯৫৪ সেন্ট্রাল এ্যাভিনিউ-এর এয়ার অফিস থেকে আমরা ওদেরই বাসে দমদম অভিমুখে বেরিয়ে পড়লাম । আমাদের দলের সবাই গলা ছেড়ে রবীতাকুরের গান “আমাদের যাত্রা হ’ল সুর” গাইতে গাইতে সে পাড়ার লোকদের ঘুম ভাঙিয়ে কলকাতা পিছনে রেখে যাত্রার প্রথম স্টেজ শেষ করলাম ।

চীন যাত্রার জন্য আমাদের একটি-চার্টার্ড প্লেনের বন্দোবস্ত হয়েছিল । আর এসব খরচের জন্য প্রত্যেক মেম্বারকে ১৪০০ টাকা দিতে হয়েছিল । এটা হল দমদম থেকে হংকং আর হংকং থেকে দমদম ফেরার ভাড়া । চীনের মধ্যে খরচ চীন-ভারত মৈত্রীসংজ্ঞার সভ্যদের । অবশ্য পিকিং সরকারই এই খরচের বেশীর ভাগ বহন

করেছিলেন—আর খরচটাও কম হয়নি। আমরা হিসাব করে দেখেছিলাম যে আমাদের প্রত্যেকের জন্য চীনকে আড়াই থেকে তিন হাজার টাকা খরচ করতে হয়েছিল। ওখানে দেড় মাস তো রাজার হালে ছিলাম।

হংকঙে পৌঁছন গেল ১৮ই সেপ্টেম্বর, দুপুরে। প্লেন থেকে নেমে বড় লাঞ্চারি বাসে করে ওখানে লাঞ্চারি (luxury) হোটেল সিরাসারে গিয়ে উঠলাম। এক-একটি সুসজ্জিত বড় ঘরে আমাদের দুজন করে রাখা হল। সন্ধ্যাবেলা জানলার পরদা তুলে মনে হল যেন আলাদিনের আশ্চর্য প্রদীপ নিয়ে আরব্য রজনীর সেই গুহার দৃশ্য দেখছি। সমুদ্রের খাঁড়ির ওপারে, পাহাড়ের গায়ে হাজার হাজার ইলেকট্রিক লাইট জ্বলছে—সমস্ত পাহাড়টি ঝলমল করছে। মধ্যে মধ্যে দু-তিনটি ‘প্যাগোডা’ আলোকস্তম্ভের মত রয়েছে, পাহাড়ের গায়ে Funicular রেলওয়ে ট্রেন আগুনের অজগর সাপের মত চলাফেরা করছে। আলোর এত বাহার ইওরোপে বা অন্য কোথাও দেখিনি।

পরের দিন হংকং থেকে ট্রেনে আমরা বেরলাম। বিকেলবেলা চীনের সীমান্ত রেল স্টেশন শামচুংএ পৌঁছবার আগেই হংকংএর গাড়ি ছাড়তে হল। একটি পুল পেরিয়ে—এইটিই হ’ল Frontier—শামচুংএ যেতে হয়। আমরা যখন পুল পার হচ্ছি শামচুংএর রেলওয়ে প্র্যাটফর্ম থেকে লাউভস্পীকারে ইংরাজি ও চীনা ভাষায় আমাদের অভ্যর্থনা করা হ’ল। আমরা এখন চীনে প্রবেশ করেছি। হংকং-এর ট্রেনে ও শামচুং স্টেশনে মিস্টার গোবর্ধনের সঙ্গে আলাপ হ’ল। ইনি হলেন পিকিংএ ভারতের রাষ্ট্রদূতের একজন প্রধান কর্মচারী। আবার তিনি হলেন আমাদের মীরট কলেজের ছাত্রী—আমার এম. এ. ইতিহাস ক্লাসে দু বছর পড়েছেন সেই কমলা সিংহের স্বামী। মীরটেই এঁদের বিয়ে হয়েছিল বছর তিন-চার আগে। মিস্টার গোবর্ধন মরিসাসের হিন্দু বাসিন্দা—ফ্রেন্চ খুব ভাল জানেন, ইংরাজি ফ্রেন্চ toneএ বলে থাকেন। বিয়ের পর বোধহয় হিন্দী ভাল করে শিখছেন।

শামচুংএ আমাদের জন্য স্পেশাল ট্রেন অপেক্ষা করছিল। সুন্দর গাড়ি, খাবার ঘর, বৈঠকখানা, হাওয়া খাবার জন্তে গাড়ির পেছন দিকে খোলা বারান্দা, শোবার কম্পার্টমেন্টগুলিতে ভাল বিছানার বন্দোবস্ত, প্রকাণ্ড নাইবার ঘর—সত্যি বলতে এরকম গাড়ি আগে দেখিনি আর পরেও দেখবার সৌভাগ্য হবে না। চীন ভ্রমণকালে এই গাড়িই আমাদের বিশেষ করে ঘরবাড়ি হয়েছিল। উত্তর, পশ্চিম, পূর্ব, দক্ষিণ চীন ঘোরবার সময় এই ট্রেনই আমাদের এই বিরাট অভিযান সফল করিয়েছিল।

স্টেশনেও কিছু নতনত্ব দেখলাম—খোকাখুকীদের জন্তু আলাদা Creche আছে, সেখানে নার্স আছে, বাজীদের জন্তু রিজিক্রম রয়েছে, যারা খাবার বিক্রি করে তাদের মুখে সাদা কাপড়ের মাস্ক, খাবারগুলি সাবধানে ঢাকা, ছোট চিম্টে দিয়ে ঢাকা থেকে বের করে খন্দেরকে দেওয়া হয়। সবই খুব পরিষ্কার পরিচ্ছন্ন।

ট্রেন পিকিং অভিযুখে প্রায় না থেমে চললো। মাঝে মাঝে খুব ছোট স্টেশনে জল, ফল, সব্জি নেবার জন্তু অল্প কিছুক্ষণের জন্তে থামতো, বড় বড় স্টেশনে এড়িয়ে যেত। এর জন্তু আমাদের খাওয়াদাওয়ার কোনো কষ্ট হয়নি। আমরা কয়েকজন নিরামিবাশী ছিলাম—আমাদের জন্তু ফলের বেশ আয়োজন ছিল। দক্ষিণ চীন থেকে যেমন উত্তর চীনের দিকে এগুচ্ছিলাম নতুন নতুন ফলও পেতে লাগলাম। দক্ষিণে মিষ্টি কামরাঙ্গা, ভাল কলা, এক রকম গোল আলুর মত সুস্বাদু ফল, লিচু নয়, লিচুর Season তখন শেষ হয়ে গেছে, তাই লিচু ছিল না, Cantonএর লিচু অতুলনীয়, ঐখান থেকেই লিচু ভারতে এসেছিল। আরও উপরেউঠে apple, আঙ্গুর, নানা রকমের নাসপাতি, ইত্যাদি; ফুলও কত বদলে গেল গরম জায়গা থেকে যেমন ঠাণ্ডা প্রদেশে ঢুকলাম। গাড়ির ড্রাইংরুম বা সেলুন, ফুল, ছবি, ছোট (dwarf) বাহারে গাছ দিয়ে খুব সাজিয়ে রাখতো। Dwarf (বামন) গাছ চীন ও জাপানের এক অভূত সৃষ্টি—বড় বড় গাছ (তিরিশ-চল্লিশ ফুটের গাছ) এই বামন অবস্থায় দশ-বারো ইঞ্চিতে পরিণত হয়। দেখতে কিন্তু বড় গাছের বাহার এই বামন গাছেও দেখা যায়—পাতাগুলি ঐ অন্তপাতে ছোট হয়—ফুলও ফোটে খুব ছোট ছোট।

রেলগাড়ির জানলা দিয়ে বাইরে তাকিয়ে দেখা গেল যে রেল লাইনের কয়েক হাত পরেই জমিতে চাষ হচ্ছে—আর যতদূর দেখা যায় চারিদিকে শস্তক্ষেত্র। চীনেরা চার হাজার বছর ধরে চাষবাস করছে—পৃথিবীর সবচেয়ে পুরোনো কৃষি-জীবী জাতি—এখন যুদ্ধ (যা বহুদিন থেকে চলছিল) থেমেছে, ওরা পারতপক্ষে এক হাতও জমি ছাড়েনি—কবরস্থানেও শস্ত উৎপাদন করছে। যেখানে জলাভূমি সেখানে পদ্ম (pink lotus) লাগানো হয়েছে—পদ্মবিচি এখানকার খুব প্রিয় খাদ্য। অনেক গাঁয়ের পাশে সূর্যমুখীর সারির পর সারি—শুনলুম সূর্যমুখী বীজের তেল এরা ব্যবহার করে রাঁধবার কাজে। দক্ষিণ চীনে বাঁশের ঝাড়ও প্রচুর—বাঁশের কোঁড় (bamboo sprouts) কুচি কুচি করে অনেক তরকারিতেই ব্যবহৃত হয়।

একুশে সেপ্টেম্বর মাঝরাতিরে আমাদের রেলগাড়টিকে ছুঁখণ্ড করে বড় tug-এর (মালবাহী খোলা ডেকের স্টীমার) ওপর চড়িয়ে য়াং সে-কিয়াং (চীনের একটি খুব বড় নদী) পার করানো হ'ল—তারপর ওপারে গিয়ে আবার জোড়া লাগানো হ'ল। আমাদের অনেকেই দিব্যি ঘুমলেন, কিছুই টের পেলেন না—পরদিন সকালে সহযাত্রীদের কাছে খবরটি পেলেন। অনেকেই খুব রেগে গেলেন যে এমন ব্যাপারটি দেখতে পেলেন না। এর পর এর প্রতিশোধ নিয়েছিলেন তাঁরা। যা দু-একটা ছোট স্টেশনে গাড়ি থেমেছিল সেখানে দেয়ালে পোস্টার দেখলাম—যে খাবার পরবার জিনিস খুব বেশী করে বাড়াবার চেষ্টা করে তাইওয়ান (Formosa) পুনরুদ্ধার করতে হবে। আমেরিকাকেই এই তাইওয়ান ব্যাপারে দোষী সাব্যস্ত করা হচ্ছিল। তেইশে ভোরবেলা একটি নদী পার হওয়া গেল, নদীতে ভীষণ ঢেউ, বগা এসেছে—ভয় করছিল আমাদের গাড়ি ভাসিয়ে না নেয়।

তেইশে সেপ্টেম্বর (১৯৫৪) আমরা পিকিং পৌঁছলাম। স্টেশনে চীন-ভারত মৈত্রী সজ্জার কয়েকজন বিশিষ্ট মেম্বার (তার মধ্যে পিকিং ইউনিভার্সিটির কতকগুলি প্রফেসর ছিলেন) আমাদের অভ্যর্থনার জন্তে প্ল্যাটফর্মে দাঁড়িয়ে ছিলেন। বাইরে গিয়ে দেখা গেল যে আমাদের জন্তে কার ও বাস্ দাঁড় করানো আছে। 'নিষিদ্ধ পুরী' (সে কালের রাজভবন), 'স্বর্গের শাস্তির তোরণ', Gate of Heavenly Peace, Tien An-men, এই সব ঐতিহাসিক জায়গার পাশ দিয়ে আমরা পিকিং হোটেলে পৌঁছলাম। এটি একটি নবনির্মিত বিরাট অট্টালিকা, 'নিষিদ্ধ পুরী'র প্রায় পাশেই।

পিকিং হোটেলের যে ঘরে আমি ও একটি গোয়ালিয়ার আর্ট স্কুলের অল্পবয়সী শিক্ষক পিকিং বাসকালে ছিলাম, তার জানলা থেকে এই অতীত চীন সাম্রাজ্যের কেন্দ্রস্থল এই 'নিষিদ্ধ পুরী'র খানিকটা খুব ভাল করে দেখা যেত। Cypress গাছের সারি—তারই মধ্যে মধ্যে সিঁদুর ও সোনালী রঙের টালি দেওয়া ছাতের বাড়ি, তার মেঝেতেও ঐ রকম সোনালী ও সিঁদুর রঙের টালি বেশ ছবির মত দেখাচ্ছিল। এগুলি ছিল সম্রাট ভবনের outhouse-এর মত—আসল Imperial Palace-গুলি বাইরে থেকে দেখা যায় না।

পিকিং নগরের এই সব পুরাতন ঐশ্বর্যের (ঐতিহ্যের) নিদর্শনগুলি এই শহরটিকে অবিস্মরণীয় করে রেখেছে। Sylvain Levi—জগৎবিখ্যাত প্রাচ্যবিজ্ঞাবিদ বলতেন যে তিনি পৃথিবীর অনেক নগরই দেখেছেন—পিকিং-এর মত এমন মনোহর শহর কোথাও দেখেননি।

২৩শেই সন্ধ্যাবেলা আমাদের নতুন চীনের নতুন কংগ্রেস দেখতে নিয়ে গেল। ২০শে সেপ্টেম্বর (১৯৪৪) People's Govt. of Chinaর নতুন constitution ঘোষণা করা হয়েছে। ১৯৪২ সালের পর পাঁচ বছর একটি সাময়িক প্রয়োজন অস্থায়ী অস্থায়ী সরকার কাজ চালিয়ে যাচ্ছিল। একটি পুরানো রাজবাড়ির প্রকাণ্ড উঠান একটি বিরাট হলে পরিবর্তিত হয়েছে। আমরা সদর দরজায় না ঢুকে (তখন কংগ্রেসের অধিবেশন আরম্ভ হয়ে গেছে) পাশের ঘর 'করিডর' ইত্যাদি ঘুরে হলের পেছন দিকে পৌঁছলাম। সেখানে যেতে যেতে কংগ্রেসের সদস্যদের (তারা তখন বক্তৃতা শুনেছেন) পাশের দিক থেকে দেখা গেল। খাস চীনের সদস্যরা মামুলি গলাবন্ধ কোট ও প্যাণ্ট (বেশীর ভাগ থাকি রঙের) পরা। কোনও রকম শৌখিনতা কাপড়চোপড় বিষয়ে (মেয়ে-পুরুষ উভয় পক্ষেই) তখন বারণ। কিন্তু হৃদয় পশ্চিমাঞ্চলের (সিন্‌কিয়াং, মঙ্গোলিয়া প্রভৃতি প্রদেশের) মহিলা সদস্যরা খুব জমকালো পোশাকে কংগ্রেসের শোভাবর্ধন করছিলেন। সভার মঞ্চের উপর কমিউনিস্ট নেতারা দেখলুম বসে আছেন। মাওসেতুং তখনও আসেননি, মাদাম সনয়ৎসেন ও চৌ এন্‌ লাইকে তো চেনা গেল (কতবার তাঁদের ছবি দেখেছি), আর তাঁদেরই সঙ্গে দুজন পীত বসনধারী সৌম্যমূর্তি অল্পবয়স্ক লামাও দেখতে পেলাম।

খানিকক্ষণ পরে ঘণ্টা বাজলো, কংগ্রেসের সদস্যরা বাইরের বাগানে বেরলেন। আমরাও বাইরে এলাম—সামনে দেখি মাদাম সিয়েন পিং সিং যিনি ১৯৫৩ সালে চীন ভারত মৈত্রী সঙ্ঘের সভ্য হয়ে মীরটেও এসেছিলেন। আমাদের তিনি তখনুনি চিনলেন, তাঁরই কাছে শুনলাম যে মঞ্চের উপর যে দুজন লামা আমরা দেখেছিলাম তাঁরা হলেন দালাই লামা ও পাঞ্ছেন লামা—তাঁরাও চীন কংগ্রেসের সদস্য। খানিকক্ষণ পরেই দালাই লামা তাঁর সঙ্গীকে নিয়ে বেরিয়ে এলেন। আমরা তাঁকে নমস্কার করলুম। দেখলুম উনি খুব গম্ভীর আর যেন চিন্তামগ্ন—পাঞ্ছেন লামা কিন্তু বেশ ফুটিতে আছেন, খুব হেসে হেসে অল্প সদস্যদের সঙ্গে কথা কইছেন।

খবর এল যে চীনের প্রধানমন্ত্রী চৌ এন লাই আসছেন আমাদের চীনে আসার জন্তে অভিবাদন করতে। আমরাও তাঁকে অভ্যর্থনা করবার জন্তে প্রস্তুত—ঠিক সেই সময়েই তিনি এসে পড়লেন। মূর্তিমান উত্তম ও উৎসাহ চৌ হাসতে হাসতে আমাদের সঙ্গে কনমর্দন করলেন। জিজ্ঞাসা করলেন পথে বিশেষ কষ্ট হয়েছিল কিনা, এই নতুন দেশ কেমন লাগছে? এদিকে আবার ঘণ্টা পড়লো—আমরা সবাই আবার হলঘরে গেলাম। ক্রুশ্চেভ, (রাশিয়ার কমিউনিস্ট পার্টির সেক্রেটারি

অর্থাৎ রাশিয়ার সবচেয়ে উচ্চপদস্থ ব্যক্তি) তখন কংগ্রেসে তাঁর বক্তৃতা আরম্ভ করেছেন। খুব দীর্ঘ ভাষণ (রুশ ভাষায়)—বলতে বলতে তাঁর একটি কথায় হল-স্বল্প লোক ঘাড় ফিরিয়ে আমাদের দিকে চাইল। পরে খবরের কাগজ পড়ে জানা গেল, ক্রুশ্চেন চীন যে প্রতীবেশী দেশ ভারত প্রভৃতির সঙ্গে বন্ধুত্ব করছে তার জন্য চীন গভর্নমেন্টকে যখন প্রশংসা করেছিলেন সেই সময় কংগ্রেসের দৃষ্টি আমাদের দিকে ফিরেছিল। ক্রুশ্চেন শেষ করবার পর মার্শাল বুলগেনিন (রাশিয়ার প্রধান মন্ত্রী) একটু ছোটখাটো বক্তৃতা করলেন। তারপর সেদিনকার মত সভাটি ভঙ্গ হ'ল। আমরা পিকিং হোটেলে ফিরলাম।

তার পরদিন আমরা পিকিংএর স্বর্গমন্দির (যার বিষয় ছেলেবেলা থেকে পড়ে আসছিলাম) দেখতে গেলাম। এটি একটি বিরাট গম্বুজওয়ালা প্রকাণ্ড মার্বেলের হল। মার্বেল আমাদের তাজমহলের 'মকরানা' মার্বেলের মত অত ভাল নয়—বড় ক্ষয়ে গেছে, আর যেন তার রঙও মলিন হয়ে গেছে। অবশ্য স্বর্গমন্দির তাজমহলের চেয়ে ঢের বেশী পুরানো। তবে এত বড় মার্বেলপাথরের হল আর কোথাও দেখেছি বলে বোধ হয় না। দেওয়ালে 'ফিনিক্স' (স্বর্গের পাখী) ও ড্রাগন (চীনের নাগ—এ হ'ল শুভ চিহ্ন, বিশেষতঃ চীন সম্রাটদের মাস্কুলিক চিহ্ন, সম্রাটদের সিংহাসনে, রাজদ্বারে, রাজভবনের সর্বত্র নিপুণ শিল্পীদের দ্বারা বিচিত্র রকমে চিত্রিত, খোদিত, রেশমের জ্বীনের উপর এম্ব্রয়ডারি করা, মার্বেল পাথরে নানা আকারে খোদাই করা)। খুব বড় একটি সূর্যও মার্বেলের উপর উৎকীর্ণ, সবায়ের দৃষ্টি আকর্ষণ করে। মন্দির থেকে বেরিয়েই সে যুগের সম্রাটদের পূজার বেদী—যেখানে সম্রাটরা নতুন বছরের প্রথম দিনে স্বর্গের দেবতাকে নিজেদের সাম্রাজ্যের স্বচ্ছ-হৃৎখের বিষয় সবিস্তারে জানাতেন। এটি হ'ল গোলাকার মার্বেল পাথরের প্রাঙ্গণ, রেলিং দিয়ে ঘেরা—খোলা আকাশের নীচে খোলা, স্বেচ্ছতঃ প্রার্থনা অঙ্গন। এই পূজাবেদী থেকে কয়েক ধাপ সিঁড়ি দিয়ে নেমে নীচের একথণ্ডে জমিতে সম্রাটরা নতুন বছরে একবার সোনার লাজল দিয়ে কিছুক্ষণ চাব করতেন। চাবীদের রাজা চাবীদের জন্তে দেবতার আশীর্বাদ এই রকম করে চাইতেন। এই স্বর্গের দেবতার মন্দির ছিল চীনের সর্বশ্রেষ্ঠ কনফুসীয় মন্দির—এখন এইটিই একমাত্র কনফুসীয়ান Shrine বা ঠিক আগেকার মতই রয়েছে। অন্য অন্য কনফুসীয়ান Shrine হয় মিউজিয়াম নয় বিড়ালয়ে পরিণত হয়েছে। ১৯৫৪ সালে—যখন আমরা চীনে বেড়িয়েছি—তখন গির্জা, বৌদ্ধবিহার ও মন্দির মসজিদ প্রভৃতি পূজা ও ভজনালয় নির্বিবাদে খোলা ছিল ও সেই সেই সম্প্রদায়ের উপাসকেরা সে সব স্থানে নির্বিবাদে

যাতায়াত করতেন। কেবল কনফুসীয় মতকে তার নিজের দেশ থেকে একেবারে পুঁছে ফেলার চেষ্টা হয়েছিল। কারণটা হ'ল যে কনফুসীয়ান মতটা ছিল চীনের অভিজ্ঞাত সম্প্রদায়ের ধর্ম আর কনফুসীয়ান সংস্কৃতি ছিল গোড়া রক্ষণশীল, সামাজিক, সাংস্কৃতিক, সব বিষয়ে; স্মৃতির বিপ্লবী যুগের সঙ্গে কনফুসীয়ান মত একেবারে খাপ খায় না।

সেই দিনই (২৪শে সেপ্টেম্বর) ভারতীয় দূতাবাসে আমাদের জলযোগের ব্যবস্থা হয়েছিল। রাষ্ট্রীয় দূত বাসন আমাদের অভ্যর্থনা করলেন। সেখানে মিসেস গোবর্ধন, আমাদের মীরট কলেজের ছাত্রী, তাঁর স্বামীর সঙ্গে এসেছিলেন। সেইখানেই পরজন্মের সঙ্গে প্রথম দেখা হয়েছিল। ইনি মাঝাঠা যুবক, আমার বন্ধু বাগ্‌চী এঁকে পিকিংএ চীনা ভাষা ও সাহিত্যচর্চার জন্য এ দেশে রেখে যান—এখন পরজন্মে ঐ বিষয়ে পারদর্শী হয়েছেন, অনেক সময়ে দো-ভাবীর কাজ করেন। পিকিংএ থাকতে পরজন্মের সঙ্গে আমার বেশ ভাব হয়েছিল, পরে দিল্লীতেও তাঁর সঙ্গে কয়েকবার কথাবার্তা হয়। ভারতীয় দূতাবাসে কয়েকটি শিখ কর্মচারীর চীনা স্ত্রী, তাঁদের কেউ কেউ পঞ্জাবী বেশে সেদিন সেখানে উপস্থিত ছিলেন—তাঁদের সেই বেশে বেশ মজার দেখাচ্ছিল। শ্রীমতী কমলা গোবর্ধন আমাকে তাঁদের বাড়িতে দু-তিন দিন থাকবার জগ্গে নিমন্ত্রণ করেন—কিন্তু তাতে আমাদের চীন ভ্রমণের যে সময় নির্ধারিত হয়েছিল তাতে বাধা পড়বে বলে এই নিমন্ত্রণ গ্রহণ করতে পারলাম না।

সে দিন বিকেলবেলা আমরা পেইহেই পার্কে গেলাম। পার্কের মধ্যে বেশ একটু উচু জায়গায় একটি তিব্বতী ভৈরবমূর্তির মন্দির আছে—সেখান থেকে পিকিং নগরের সুন্দর একটি দৃশ্য পাওয়া যায়। নীচে একটি বৃহৎ জলাশয়—পেইহেই লেক—তার ওধারে দূরে একটি খুব উচু পুরোনো রাজভবন। এরই সব-উপরতলায় চীনের মিং বংশের শেষ সম্রাট শত্রুর হাত থেকে নিষ্কৃতি পাবার জগ্গে নিজের বেশমের স্বাক্ষর গলায় দিয়ে উব্বন্ধনে আত্মহত্যা করেছিলেন। তার পরেই মাগু নৃপতি বংশ চীনে রাজত্ব করেন। মন্দিরের নীচে খুব বড় বড় গামলায় নানা আকারে নানা রঙের অদ্ভুত রকমারি মাছ (গোল্ড ফিশ) রাখা আছে। সোনালী রঙের মাছ—বেশ বড় সাইজের—তো আছেই, তা ছাড়া কুচুচে কালো, কালো মথমলের মত—মাঝারি সাইজের চেপ্টা অদ্ভুত আকারের মাছও (মাছ বলে মনেই হয় না) রয়েছে। চীনের বাইরে কোনো Aquarium এও ওরকম মাছ দেখিনি।

সেখান থেকে বেরিয়ে পেইহেই হ্রদের তীরে সেকালকার একটি সম্রাটদের

বিলাসভবনে (প্যাভেলিয়ান) আমাদের নিয়ে গেল। এখন এটি একটি হৃদয়-আর্ট মিউজিয়াম। ঢোকবার রাস্তায় অনেকগুলি Stone slabs of volcanic origin ছু ধারে সাজানো রয়েছে। প্রত্যেকটি আলাদা রকমের পাথরের, রঙ, গড়ন, সবই আলাদা। চীন ও জাপানে বড় বড় বাগানে এরকম অদ্ভুত পাথর সাজানো একটি প্রাচীন রীতি। দূর দূর থেকে এরকম পাথর আনা হ'ত। পাথর-গুলির গায়ে অসংখ্য ফুটো (কৃত্রিম নয়, স্বাভাবিক)। প্যাভেলিয়ানের মধ্যে চীন সম্রাটদের শিলালেখ, রেশমের Scroll তাতে সেকালকার হাতের লেখার নমুনা, এ সব সম্বন্ধে রাখা রয়েছে। চীনের পুরাকালে হাতের লেখা—Caligraphy—একটি রীতিমত উচ্চাঙ্গ শিল্প বলে গণ্য হত। কয়েকজন সম্রাট তাঁদের নিজের হাতের লেখা দিয়ে এই আর্টে নাম কিনেছেন। প্যাভেলিয়ান থেকে বেরিয়ে পেইহেই লেকে ঘণ্টাখানেক ছোট ছোট নৌকোর হৃদের ধারে ধানে বেশ ঘোরা হল। তখন সন্ধ্যা হয়েছে। চারিদিকে নগরের আলো জ্বলে উঠছে—সে এক হৃদয়-দৃশ্য।

পিকিং হোটেলের ফেরবার রাস্তায় আমরা বিখ্যাত Dragon Screen দেখলাম। প্রকাণ্ড চীনেমাটির দেওয়ালের ওপর ভিন্ন ভিন্ন রঙের কয়েকটি ড্রাগন যেন জলজ্বল করছে। ড্রাগনগুলি চীনে মাটির, বড় শিল্পীর হাতের কাজ, Dragon Screen এর রঙ এখনও অক্ষুণ্ণ রয়েছে। সেকালের বড় বড় বাড়ির সদর দরজার সামনে এরকম এক-একটি 'জ্বীন' (আড়াল-করা দেওয়াল) থাকতো। অন্তত প্রেত প্রভৃতির অনধিকারপ্রবেশ বন্ধ করবার জন্ত এই ছিল রীতি।

সেই সন্ধ্যায় হোটেলের সাততলার ছাদে চীন ভারতীয় মৈত্রী-সংঘ আমাদের একটি বড় রকমের ভোজ্য দিলেন। ন-দশটা করে কোস'। কয়েকটি নিরামিষ তরকারি বড় ভাল লেগেছিল। আমাদের হোস্টরা এত থাওয়ালেন যে সে রাজে আমার তো পেট ব্যথা করেছিল।

২৫শে সেপ্টেম্বর—সকাল বেলা আমরা গেলাম একটি ট্রেনিং ইনস্টিটিউট শিক্ষাকেন্দ্রে যেখানে তিব্বতী, মঙ্গোলীয়, তুর্কিস্থানী প্রভৃতি চীনা নয় এমন সব অল্পসংখ্যক জাতিদের মধ্যে থেকে নির্বাচিত কর্মচারীদের 'ট্রেনিং' দেওয়া হয়। চীন সরকারের অভিপ্রায় ছিল এই সব অ-চীনা প্রশাসনিক কর্মচারীদের স্বাধীনভাবে চীনের জাতীয় ভাবের গণ্ডির মধ্যে টেনে আনা। তুর্কিস্থানী ও মঙ্গোলীয়দের বিচিত্র পোশাক। তিব্বতীদের পূজার বেদী—ফরমোসা- (তাইওয়ান) বাসীদের সেখানে উপস্থিতি (ফরমোসার কর্মচারীরা যে চীনে

আছেন আগে জানতামনা)—এসবই আমাদের পক্ষে অপ্রত্যাশিত, অতএব বেশী করে চিন্তাকৰ্কক ব্যাপার। তুর্কীস্থানের ছাত্রাবাসে আমাদের থাওয়ানো হ'ল—খুব ভাল পোলাও—‘মটন’ পোলাও ও নিরামিষ দু'রকমই তারা দিল। শেষে আমাদের তরফ থেকে আমাকেই এঁদের সবাইকে ধন্যবাদ দিতে হল। এক-একটি সেন্টেন্স (বাক্য) আমি বলছি ইংরাজিতে আর চীনে তর্জমা তখন বলা হচ্ছে, তারপর আমি আবার আরম্ভ করছি। কিছুদিন পরে এ ব্যবস্থা বেশ লাগতো।

সেইদিনই (পঁচিশে সেপ্টেম্বর) বিকালে আমরা ‘তিয়েন আনমেন’ সিংহ-দ্বারের বৃহৎ প্রবেশপথে নিষিদ্ধ পুরীর মধ্যে ঢুকলাম। প্রথমে সারি সারি অতি প্রাচীন সাইপ্রেস গাছ—তারপর আর একটি বৃহদাকার তোরণ—তারপর প্রাঙ্গণের পর প্রাঙ্গণ—প্রত্যেকটি বিরাট আয়তনের। এক-একটি প্রাঙ্গণে একটি করে প্যাভেলিয়ন সিঁদুর রঙের (উঁচু একতলা প্রাসাদ), ভিতরে ‘জেডের’ বা হাতির দাঁতের উপর সুন্দর খোদাই করা চিত্র। রেশমের ‘স্কোল’ (সেকালের বড় বড় চিত্রকরের আঁকা ছবি তাতে), এখনও ছবিগুলির রঙ জলজল করছে। বলা বাহুল্য, এই প্রাচীন চিত্রগুলি এখন বাস্তবিকই অমূল্য।

আর ঘরের কোণে কোণে মাছরাঙা পাখীর রঙ্গীন পালকের সযত্নে রক্ষিত শুদ্ধ। এই বিশাল প্রাচীর ঘেরা পুরীর মধ্যস্থানের প্যাভেলিয়নটি সবার বড়, তার সামনের প্রাঙ্গণে ব্রোঞ্জের প্রকাণ্ড সারস—ধূপ জ্বালাবার ঘুঁচাচর কাজ করছে। সারস চীনের বড় আদরের পাখী। ব্রোঞ্জের বিরাট আকার কচ্ছপও অনেক রয়েছে—জানি না কিসের জন্ত, বোধহয় মাস্টলিক চিহ্ন। প্যাভেলিয়নের ঠিক সামনে বড় বড় জেডের স্নায়ব—তাতে ড্রাগন ও ফিনিক্স খোদাই করা—এ সব দেখে মনে হয় এই ভবনটিই ছিল চীন সম্রাটদের—‘দেওয়ানে খাস’। এক প্রাঙ্গণ থেকে আর এক প্রাঙ্গণের মধ্যে জলভরা খাল—মার্বেলের সেতু দিয়ে পার হতে হয়। এই সেতুর রেলিং ‘ফিনিক্স’ ও ড্রাগনের মূর্তি দিয়ে অলঙ্কৃত। এই প্রাঙ্গণগুলির বাগানও সুন্দর উইস্টেরিয়া, সাইপ্রেস, পাইন, ফার প্রভৃতি নানা জাতীয় বৃক্ষে সুশোভিত। এই সম্রাটপুরীর যথার্থ বর্ণনা করতে একটি আলাদা বই লিখতে হয়—ছ-চার পাতায় কিছুই হয় না—তাই এখানেই শেষ করলাম।

এই মাছরাঙা পাখীর পালকের বিষয় একটা মন্তব্য মনে পড়ল Sir Osbert Sitwell-এর “Escape with Me” বই থেকে। তিনি কষুজের অকোরবাট প্রভৃতি বিরাট মন্দির দেখে আশ্চর্য হয়েছিলেন যে কষুজ নৃপতিদের এত টাকা এল কোথা থেকে? পিকিং-এর রাজসভন দেখে (তিনি লেখেন) এ প্রশ্নের

উত্তর পেলেন। ঐ যে মাছরাঙার পালক ঘরে ঘরে রাখা আছে ওখানে—ঐ পালকের বিনিময়েই ক্যাম্বোডিয়া অত অর্থ উপার্জন করেছিল। ক্যাম্বোডিয়ায় মাছরাঙা পাখী সব জায়গায় দেখা যায়—আর চীনে ওর খুবই কদর স্ততরাং বাণিজ্যের মাধ্যমে কম্বুজ চীন থেকে খুব লাভ করে। আর ঐ লাভের টাকা থেকেই Angkor, Bayon তৈরী হয়েছিল। জানি না এই অনুমান কতদূর সত্য। তবে Sir Osbert Sitwell-এর একটি মন্তব্য প্রাণিধানযোগ্য। তিনি লিখেছেন যে সম্রাটভবনগুলির আসবাবপত্র প্রায় সবই লোপ পেয়ে গেছে,—চিয়াং কাই শেকের সময়—জাপানীরা লুট করে নিয়ে যাবে এই অছিলায়। সে-গুলি কি এখন ইয়োরোপ, আমেরিকার মিউজিয়মে ঢুকেছে ?

পঁচিশে শতাব্দীর একটি ‘ক্লাসিক অপেরা’ দেখা গেল—এর প্রজ্ঞাপতি নৃত্যটি বড় সুন্দর ছিল।

ছাব্বিশে শকালে প্রাগৈতিহাসিক যুগের পিকিং-এরই কাছাকাছি খুঁড়ে যা সব জিনিস পাওয়া গেছে তার একটি মিউজিয়মে দেখে এলাম Peking Man। (পৃথিবীর সব চেয়ে প্রাচীন মানুষের অস্তিত্ব পিকিং-এর কাছেই পাওয়া যায়) সেই মানুষের মাথার খুলি পিকিংএ ছিল—কিন্তু এখন আর পিকিংএ নেই, হয় জাপানীরা না হয় আমেরিকানরা নিয়ে গেছে। Peking Man চীনের একটি গৌরবের বিষয় ছিল,—ওর মাথার খুলি হারিয়ে যাওয়ায় চীনের দুঃখ ও রাগ দুই খুব হয়েছে।

সেই দিনেই বিকেল বেলা আমরা শহরের বাইরে বিশ্ববিখ্যাত Summer Palace দেখতে গেলাম। পুরোনো সামার প্যালেস, যা জগতের একটি ‘আশ্চর্য’ বলে গণ্য হত সেটিকে তো আজ একশ বছর হল ইংরেজ ও ফরাসী সৈন্যরা লুটে তারপর পুড়িয়ে দিয়েছিল। কত যে আর্ট সামগ্রী এই অগ্নিকাণ্ডে লোপ পেলো তা বলে ওঠা যায় না। এখনকার সামার প্যালেস সাম্রাজ্ঞী Tzu-hsi (সুশী) নিজের অভিক্রটি অনুসারে তৈরী করিয়ে ছিলেন। এই রাজভবনে থাকতেই তিনি পছন্দ করতেন—হ্রদ, বাগান, পাহাড় প্রভৃতি প্রাকৃতিক পরিবেষ্টনের মধ্যে।

দুর্কভেই সম্রাজ্ঞীর একটি থিয়েটারের মঞ্চ, উনি নিজে তার জন্ম নাটক লিখে-ছিলেন, তার পাশে তাঁর একটি বিশ্রামের suite of rooms, একটি ঘরে অসংখ্য ষড়্ভি, দেশবিদেশের রাজা, সম্রাট, সম্রাজ্ঞীরা তাঁকে এইগুলি উপহার দিয়ে-ছিলেন। ষড়্ভিগুলি এখন দম দিয়ে ঠিক রাখবার চেষ্টা করা হয়। এইখান

থেকে বেরিয়ে সম্রাজ্ঞীর প্রিয় বেড়াবার পথ—একদিকে হ্রদ আর একদিকে বাগান তারপর ছোট পাহাড় শ্রেণী। মধ্যে লতা ছাওয়া (চীনের wistaria লতা) pergola মধ্যে দিয়ে রাস্তাটি অন্ততঃ মাইল খানেক লম্বা হবে—স্বশী হেঁটে এই রাস্তায় বেড়াতে, নিজের হাতে বনের পাখীদের খাওয়ানো। এই পথটি শেষ হ'ল, হ্রদের ওপর একটি মার্বেল ঘাটে, এখানে হ্রদের জলে একটি বড় মার্বেলের জাহাজ যেন নোঙ্গর কেলে দাঁড়িয়ে আছে। বেশ বড় জাহাজ—তার মার্বেলের ডেকে মার্বেলের চেয়ার পাতা আছে। আমরা জাহাজ চড়ে ছিলাম, ডেক থেকে চারিদিকের দৃশ্য সত্যই চমৎকার, যেখানে হ্রদ সরু হয়ে গেছে সেখানে ঝোড়ার খুরের আকারের মার্বেল সেতু, কাছের পাড়ের ওপর একটি স্থলর প্যাগোডা আর ঐ পাহাড় শ্রেণীর ওপর জায়গায় জায়গায় ছোট ছোট প্যাভেলিয়ান, চারদিকে পাইন, ফার, উইসটেরিয়ার কুঞ্জ—সত্যি স্বপ্নে দেখা অলৌকিক দৃশ্য! এই স্বপ্নপুরী নির্মাণের জন্য সম্রাজ্ঞী স্বশী জগতের ধন্যবাদ অঙ্গন করেছেন। তবে একটি বিষয়ে তাঁর কাজ নিন্দনীয় বলা উচিত। প্রথম চীন জাপান যুদ্ধে যখন চীনের রণতরীর সংখ্যা দেখতে দেখতে কমতে লাগলো (জাপানীরা চীন নৌবাহিনী প্রায় ধ্বংস করে ফেলেছিল), তখন স্বশীর রাজভক্ত প্রজারা তাদের সম্রাজ্ঞীর হাতে কোটি দুয়েক টাকা চাঁদা করে তুলে দিয়েছিল ভাল একটি আধুনিক battleship কেনবার জন্যে। স্বশী কিন্তু সেই টাকা দিয়ে এই মার্বেলের জাহাজ তাঁর সামার প্যালেসের শোভাবর্ধন করবার জন্য তৈরী করালেন। এর কৈফিয়ৎ স্বরূপ বললেন যে battleship তো জাপানীরা ডুবিয়ে দেবে ও তা চীন সমুদ্রে ডুবে গিয়ে অদৃশ্য হয়ে যাবে। তিনি যে তাঁর সামার প্যালেসের জন্যে মার্বেলের জাহাজ তৈরী করলেন, সেটি শত শত বৎসর দর্শকদের আনন্দ দেবে। স্বশী ঠিক করে ছিলেন না ভুল করেছিলেন ভেবে দেখা উচিত।

সাতাশে—পিকিং 'Medical Association'-এর অধ্যক্ষ আমাদের চীনের Patriotic Health Movement সম্বন্ধে অনেক কথা বললেন, পিকিং যে আজ পরিষ্কার পরিচ্ছন্ন, মাছি যে এখানে আর দেখা যায় না, সংক্রামক রোগ যে দূর করা হয়েছে—এসব এই movement-এর কৃতিত্ব...প্রত্যেক রাস্তা, প্রত্যেক গলির বাসিন্দাদের সাহায্যেই এসব করা সম্ভব হয়েছে।

যখন এ বক্তৃতা শুনছিলাম তখন মনে হচ্ছিল যে আমাদের দেশে এ রকম কবে করতে পারা যাবে। চীনে কতটা ভয় দেখিয়ে, জোর করে এ কাজ করাতে হয়েছে জানা যায় না, তবে যা হয়েছে তা আমাদের পক্ষে আশ্চর্য ব্যাপার।

শহরের গলিতে ঘুরেছি, হাটবাজার দেখেছি—মাছি পাইনি, ভাস্করিন ভরা দুর্গন্ধ ময়লার স্তূপ দেখিনি।

সেই দিনই সন্ধ্যায় আমরা আবার আমাদের স্পেশাল ট্রেনে চড়লাম। স্টেশনে গুনলাম মাও সেতুং নতুন চীনের রাষ্ট্রপতি মনোনীত হয়েছেন। রাস্তায় স্টেশনে মাওয়ের সেই দিনের একটি উক্তি পোস্টারে ছাপানো দেখলাম—“বাধাবিহ্ন আছে অনেক, আমাদের আশাও আছে অনেক, আর কৃতকার্য হবার উপায় তো আমাদের আছে যথেষ্ট।” এ রকম কথা জাতীয় জীবনে প্রেরণা আনে।

সকাল বেলা শানসী প্রদেশের (পিকিংএর পশ্চিমে) টাটুং শহরে পৌঁছলাম। সেখান থেকে Yuan King (Rene Grousset's Histoire de l' Extreme Orient, Vol. I, এর Yun Kang P. 321et seq.), এখানে ১০০ বছর ধরে (৪১৪—৫২০ এ. ডি.) Wei সম্রাটদের রাজত্বে পাহাড় কেটে বিরাট আয়তনের বৌদ্ধমূর্তি উৎকীর্ণ করা হয়েছিল। গান্ধার ভাস্কর্যের প্রভাব ও Grousset-এর মতে মথুরা স্কুলেরও প্রভাব এখানে চীনের শিল্পীদের প্রেরণা দিয়েছিল। কয়েকজন বোধিসত্ত্ব চেয়ারে ইয়োয়োপীয় ফ্যাসানে বসে আছেন। আর এক গুহার প্রবেশমুখে একটি ত্রিশূলধারী মূর্তি দেখা গেল, আর এর কাছে একটি বাঁড়ও দেখলাম আর ঐ ঢোকার পথের অগ্র দিকটায় দেখা গেল একটি বড়ানন মূর্তি ময়ূরে চড়ে আছেন। স্বদূর চীনে শিবঠাকুর ও তাঁর পুত্র কাতিক ঠাকুর আমাদের অপ্রত্যাশিত আনন্দ দিয়েছিলেন। এক জায়গায় অভয় মুদ্রায় আসীন একটি বুদ্ধ মূর্তিতে M. Grousset গুপ্ত যুগের স্টাইল লক্ষ্য করেছেন। চীনে যে সময়ে এই গুহাগুলির মূর্তি খোদাই করা হয়েছিল সেইটিই ছিল ভারতে গুপ্তকাল। দু-তিনটি মাটির মূর্তি এখানে এখনও দেখা যায়—বেশীর ভাগই কিন্তু ভেঙে প্রায় নিশ্চিহ্ন হয়ে গেছে।

এই মূর্তি খোদা পাহাড়ের নীচে একটি ‘পরম্পর সাহায্য’ করা গ্রামে ঐ গ্রামের মোড়ল আমাদের নিয়ে গেল। এই লোকটি একটি নামকরা গেরলা বোন্ধা, দেখতে কিন্তু সরল প্রকৃতির মানুষটি। এই গাঁয়ে একটি ছোট ঘোঁষা ভাঙার আছে, তাতে ফসলের বীজ রাখা হয়। সামনে বড় উঠোন—গাঁয়ের কুটিরগুলি ছোট কিন্তু বেশ পরিষ্কার—আসবাবপত্রের কোনো বালাই নেই। এইসব কুটিরের উনোন। চীনে নাম কাঙ, ঘর গরম রাখে এক নতুন উপায়ে। উনোনের একদিকে একটু উঁচু বেদীর মত, ভিতরে ফাঁপা, এর ভেতরে উনোনের আঁচ ও ঘোঁয়া ঢুকে বেদীটাকে গরম রাখে—আর ঐ বেদীর উপরই রাখে সবাই শোয়। উত্তর চীনে

গায়ের লোকেদের 'কাঙ'ই বাস্ত ভিটের আসল কেন্দ্রবিন্দু। সেই রাজ্যেই আমরা পিকিং ফিরে এলাম। শুনলাম যে Congressএর অধিবেশন শেষ হয়েছে।

উনত্রিশে সেপ্টেম্বর—রাজধানীর লাসা মন্দির—২৭ হো কুং—চিয়াং কাই শেককে তাড়াবার পর এই মন্দিরটিকে সারিয়ে-হুরিয়ে আবার খোলা হয়েছে। এখানে পঞ্চাশ ফুট দীর্ঘ চন্দন কাঠের (একটি আস্ত চন্দন গাছ ব্যবহার করা হয়েছে এর জন্ত) বুদ্ধ মূর্তির পূজা হয়। এখানে ধর্মচক্রের জায়গায় একটি Yin-yang চক্র (জী-পুং তত্ত্ব,—এ দুয়ের মধ্যে বিশ্বজগৎ ঘড়ির পেণ্ডুলামের মত জ্বলছে—এ একটি প্রাচীন চীন কল্পনা) প্রথম দেখলাম। এ মন্দিরে লামারা মঙ্গোলীয় (তিব্বতী নয়)।

উনত্রিশে সেপ্টেম্বর সন্ধ্যায় নতুন চীনের রাষ্ট্রপতি 'ও' তাঁর মন্ত্রীমণ্ডলী আমাদের ও অন্যান্য বিদেশীদের, যারা সে সময় পিকিং এসেছেন, তাঁদের সবাইকে নতুন রাষ্ট্রের পক্ষ থেকে অভ্যর্থনা করলেন। পিকিং হোটেলেরই সংলগ্ন প্রকাণ্ড একটি হলে মহাসমারোহে সেদিনকার অনুষ্ঠান সম্পন্ন হ'ল। ঐ হলে হাজার তিনেক লোক সেদিন সমবেত হয়েছিল—পৃথিবীর কোনো দেশই (হয়ত আমেরিকা ছাড়া) বাদ যায়নি। রাশিয়ান ও বুলগারিয়ান সবচেয়ে বেশী সংখ্যায় সেখানে উপস্থিত ছিলেন আর আফ্রিকা থেকে (Egypt, etc) Visitors, ভারতের কর্মী সঙ্ঘের (ট্রেড ইউনিয়ন) ও ছাত্র সঙ্ঘের (স্টুডেন্ট ইউনিয়ন) কয়েকটি প্রতিনিধি, ইংলণ্ড ও ফ্রান্সের কিছু Leftist M.P.রা, আর চীনের নতুন কংগ্রেসের সদস্যরা—সবাই মিলে একটি রীতিমত World Parliament সৃষ্টি করেছিলেন। ভীড়ের মধ্যে এগিয়ে daisএর দিকে চেয়ে দেখলাম সেখানে মাও, চৌ এন লাই, মাদাম সন যাং সেন, দালাই লামা প্রভৃতি নতুন রাষ্ট্রের সকল নেতারা রয়েছেন। মাও দাঁড়িয়ে কিছু বললেন, হল থেকে তুমুল হর্ষধ্বনি উঠলো, তারপর চৌ এন লাই মঞ্চ থেকে নেমে এসে অতিথিদের মধ্যে ঘুরে বেড়াতে লাগলেন। তারপর নাচের বাজনা বাজলো, আগন্তুকদের চক্রাকারে দাঁড় করানো হল। ছেলে বুড়ো কাউকে রেহাই দেওয়া হল না। সবাইকে হেলেদুলে সেই নাচে যোগ দিতে হ'ল। জলযোগের ব্যবস্থা প্রচুর ছিল। চীনের লাল মদিরা ও খারা tee to taller তাঁদের জন্ত লেমনেড ইত্যাদি পানীয় সহকারে 'টোস্ট' ও তার জবাবে আবার টোস্ট অনেকক্ষণ চলল। তারপর মাও প্রভৃতি বিশিষ্ট নেতারা এই রূপে অতিথি সংকার করে 'হল' থেকে বেরিয়ে গেলেন। খানিকক্ষণ পরে আমরাও চলে এলাম।

তিরিশে সকালবেলা আমরা রাজধানীর কলাক্ষেত্রে গেলাম। এখানে অনেকগুলি ‘ক্লাস রুম’ দেখা গেল আধুনিক রীতিতে ছবি আঁকা হচ্ছে। কোথাও ‘মডেল’ (দু-একটি গরীব বুড়ো) সামনে রেখে ছবি বা প্লাস্টার অফ প্যারিস-এ প্রতিমূর্তি গড়া হচ্ছে। শোনা গেল যে নতুন চীনে শিল্পীদের খুব কদর, চাহিদা খুব বেশী, যোগান তত নয়। আর্টস্কুলে গরীব ছাত্রদের জন্য বিশেষ ব্যবস্থা। সব দেখে মনে হল যে আধুনিক ললিতকলা (চিত্র, ভাস্কর্য ইত্যাদি) আজ চীনে ইয়োরোপের কাছে একটি robust objective style—একটি সবল বস্তুতাত্ত্বিক শৈলী—শিখেছে বটে কিন্তু চীনের নিজের পুরানো exquisitely delicate touches—মনোরম, কমনীয়, হালকা তুলির স্পর্শ—হারিয়ে ফেলেছে। এ জগতের নয় আরও কোথাকার এর চেয়ে সুন্দর জগতের স্পর্শ আভাস আর চীনা আর্টে পাওয়া যাবে না।

সেদিন (তিরিশে) সন্ধ্যায় কংগ্রেসে বিদায়ের পালা হল। রুশ ও বুলগেরিয়ান অতিথিরা তাঁদের বিদায় ভাষণ দিলেন। ক্রুশ্চেভ আবার একটি দীর্ঘ বক্তৃতায় চীনে দেশবিদেশের রাষ্ট্রের সঙ্গে সম্ভাব রাখার প্রয়াস উল্লেখ করে খুব প্রশংসা করলেন। চীনের তাইওয়ান (ফরমোসা) পুনর্বাস অধিকার করবার প্রস্ততিরও উনি বিশেষ সূখ্যাতি করলেন। তিনি বাই তাঁর ভাষণ শেষ করলেন, অমনি দুজন চীনা কর্মচারী আমাদের নেত্রী শ্রীমতী উমা নেহরুর কাছে এসে তাঁকে কিছু বললেন। তারপর উমাজী তাঁদের সঙ্গে কংগ্রেস হলের পাশে একটি ঘরে চলে গেলেন। আমরাও হোটলে ফিরে এলাম। কিছুক্ষণ পরে জানা গেল উমাজী ফিরেছেন। উনি আমাদেরই মত চার তলার ঘরে থাকতেন। আমরা তাঁর ঘরে গিয়ে তাঁর কাছে শুনলাম ওঁকে মাওয়ের অফিস ঘরে নিয়ে গিছলো। মাও তাঁকে নিজের পাশে বসিয়ে জিজ্ঞাসা করলেন, ‘এখন শরীরে ও মনে স্বস্তি বোধ করছেন কিনা?’ উমাজীও বেশ ‘ডিপ্লম্যাটিক’ উত্তর দিলেন। ‘হ্যাঁ, আজ চীনের নেতা মাওয়ের সাক্ষাৎ পেয়ে বাস্তবিক স্বস্তি অসুভব করছি।’

মাও হাসলেন আর দু-একটি কথা আমাদের মৈত্রী সজ্জের বিষয়ে জিজ্ঞাসা করে সেকথাও করলেন। এরপর উমাজীকে বিদায় দিলেন।

চৌ এন্ লাইয়ের সঙ্গে আমরা অনেকে দু-একটি কথা করেছি। অল্পসল্প হাসিখুশীর কথাও হয়েছে—কিন্তু মাও সেতুংএর সাক্ষাৎ পাওয়া কেবল আমাদের নেত্রী উমাজীরই হয়েছিল।

তিরিশে রাত্রি পিকিং যেন জেগেই কাটালো। ১লা অক্টোবর চীন জাতীয় দিবসের জন্ত রাত জেগে প্রস্তুত হচ্ছিল।

পরলা অক্টোবর, ১৯৫৪। বিশেষতঃ এই দিনটির জন্তই আমরা চীনে নিমন্ত্রিত হয়েছি। তাড়াতাড়ি প্রাতরাশ শেষ করে আমরা তিয়েন আনমেনএর (স্বর্গের শাস্তির তোরণ) দিকে এগুলাম। সোজা রাস্তায় (আধ মাইলও হবে না) ভিড়ের জন্ত যাবার উপায় ছিল না। অনেক গলিঘুঁজি দিয়ে পেছন দিক দিয়ে পৌঁছন গেল। সিংহদ্বারের বাঁ দিকে খোলা বারান্দায় গ্যালারিতে আমাদের দাঁড়িয়ে দেখবার জন্ত জায়গা করা হয়েছিল। কেবল উমাজীর জন্ত একটি ছোট গদিওয়ালা চেয়ার এনে দিলে। দেশবিদেশের রাষ্ট্রদূতেরা দাঁড়িয়েই ছিলেন। আমাদের ঠিক ডান দিকে সিংহদ্বারের ঠিক ওপরে সিঁড়র রঙের সামিয়ানার নীচে মাও, চু-টো, লি সাও চি, চো এন্ লাই প্রভৃতি চীনের নেতারা দশটার সময় এলেন। অনেকগুলি ব্যাণ্ডে জাতীয় সঙ্গীত বাজলো। তারপর দলে দলে পদাতিক, অশ্বারোহী, ট্যাক আর্মাড কার, নৌবাহিনী ও এয়ার ফোর্সের সৈন্য মার্চ করে, নেতাদের স্যালিউট করে সামনে দিয়ে চলে গেল। তারপর এল এক শ্রমজীবীদের দল মাওয়ের বড় বড় ছবি নিয়ে। এরপর 'বয়' ও গার্ল স্কাউট (বাছা বাছা—ভাল পড়াশুনার জন্ত যারা মেডেল পেয়েছে—বুকে মেডেল বুলিয়ে) তিয়েন আনমেনের সামনে এসে শত শত পায়রা উড়িয়ে দিলে। কৃষকরা এবার দেখা দিল, শস্তের আঁটি, ফল সব্জি কাঁধে করে। দেড় লক্ষ ছাত্রছাত্রী এই 'প্যারেডে' যোগ দিয়েছিল। সবশেষে এল মায়ের দল—খোকাথুকী কোলে করে।

তিন ঘণ্টা লাগল শোভাযাত্রা শেষ হতে। অন্ততঃ ছয় লক্ষ লোক এই উৎসবে—এই 'প্রোসেশনে' যোগ দিয়েছিল।

১টার সময় যখন সব শেষ হল, মাও আমাদের গ্যালারির দিকে তাকিয়ে হাত ঘুরিয়ে আমাদের বিদায় দিলেন। যারা বলেন যে চীনের কমিউনিস্ট রেন্ডলিউসন একটি পার্টির কাজ, জনসাধারণের নয়, তাঁদের চীনে ১লা অক্টোবরের দৃশ্য একবার দেখে যাওয়া উচিত। এ যে জাতীয় উচ্ছ্বাস, কোন পার্টির বা ভিক্টোরের হুকুমে এ রকম ছেলে বুড়ো শিক্ষিত অশিক্ষিত, স্ত্রী পুরুষ সবায়ের Mass demonstration সম্ভব নয়।

সেদিন সন্ধ্যায় ধুমধামে আতশ বাজি দেখানো হবে কথা ছিল—কিন্তু খবর এল যে তাইওয়ান (ফরমোসা) থেকে বখার মেঘের আড়ালে ঘুরছে—তাই শহরে

বেশী আলো না হয় সেইরূপ ব্যবস্থা করা হল। তবে প্রায় সারা রাত রাস্তায় রাস্তায় Yanko নাচ চলেছিল। সকালে উঠে শুনলাম যে আমাদের দলের কয়েকজন নাকি বেশ নেচেছিলেন। তার পরদিন (দ্বাদশরা অক্টোবর) পিকিং বিশ্ববিদ্যালয়ের ভাইস-চ্যান্সেলার ও প্রাক্ত ভাষা বিভাগের অধ্যক্ষ আমাদের হোটেলের ঘরে এলেন। আমার ও আমাদের গুডউইল মিশনের ডাঃ সভ্যকেতু বিদ্যালয়কারের সঙ্গে ইতিহাস ও সাহিত্য বিষয়ে ঘণ্টাখানেক আলোচনা করলেন। ভাইস-চ্যান্সেলার সাহেব ফিলসফির প্রফেসর ছিলেন, কিন্তু তাঁর কাজ হ'ল বিশ্ববিদ্যালয়ের পরিচালনভার সামলানো। এঁদের কাছে প্রথম শুনেছিলাম (পরে দু-এক আয়গায় পড়েছি) যে মিং সম্রাট যুংলোর সময় চীনের অ্যাডমিরাল চেংহো ভারতবর্ষের বাঙলা, কেরল প্রভৃতি সমুদ্রতীরবর্তী স্থান ঘুরে গেছেন—এর বিবরণ চীন ইতিহাসে পাওয়া যায়। ওঁদেরই কাছে শুনলাম যে টুংছ্যাঙে—‘সহস্রবুদ্ধের গুহার’ কাছে—একটি বৌদ্ধ যুগের প্রত্নতত্ত্ব চর্চার বিভাগ খোলা হয়েছে। আমরা তাঁদের জিজ্ঞাসা করলাম যে চীনের মধ্যযুগের কোন Classic আমরা কি তর্জমার মাধ্যমে পড়তে পারি? তাঁরা দুজনেই একবাক্যে তৎক্ষণাৎ বললেন যে আপনারা Dream of the Red Chamber—সেই লালঘরের স্বপ্ন—পড়ুন, ওর ইংরাজি অনুবাদ আছে। আমরা আরও জিজ্ঞেস করলাম ‘All Men are Brothers’ (মানুষ সব ভাই ভাই), মাওয়ের প্রিয় পুস্তক, সেটি কেমন হবে? ওঁদের যুতে প্রথম বইটি আমাদের বেশী ভাল লাগবে।

এই কথোপকথন আমাদের খুব ভাল লাগছিল—কিন্তু তাঁদের ইউনিভার্সিটির ক্লাস ছিল—তাঁরা চলে গেলেন। তাঁদের আমাদের ঘরে এসে এরকম কথাবার্তা কওয়ায় আমরা তো নিজেদের বিশেষ রূপে সম্মানিত মনে করলুম।

সেদিন দুপুরে নিউজিল্যান্ডের Rewi Alleyর সঙ্গে চীনের সমবায় (কো-অপারেটিভ মুভমেন্ট) বিষয় আলোচনা হ'ল। Alley চীনের পুরনো Classical Poetry—শ্রেষ্ঠ কবিদের কিছু কবিতাও অনুবাদ করেছেন। Edgar Snowর উনি প্রিয় বন্ধু—Snow ওঁর ‘On the other side of the river’এ R. Alleyর প্রশংসা করেছেন।

সেদিন (দ্বাদশরা অক্টোবর) সন্ধ্যাবেলা মহাত্মা গান্ধীর জন্মবাৎসরিক দিবসে আমরা ভারতীয় রাষ্ট্রদূতের গৃহে একটি সম্মিলনীতে ওখানকার অনেক বিশিষ্ট ব্যক্তির সাক্ষাৎ লাভ করলাম। পাকিস্তান প্রত্নতত্ত্ব রাষ্ট্রের দূতও কয়েকজন উপস্থিত ছিলেন। আমাদের হোস্ট শ্রী রাঘবন ঞানিককর্ণ পরে তাঁর লিগেসন অফিসে

চলে গেলেন—চৌ এন্ লাই সেখানে তাঁর কাছে গান্ধীজির জীবনী নিতে আসবেন, সেদিন সকাল বেলা বলে পাঠিয়েছেন। পরজন্মে সেদিন আমাদের একটি মনে রাখবার মত কথা বলেছিলেন, “বোলোশো, সতেরোশো বছর আগে চীনে বৌদ্ধধর্মের প্রবেশ যেমন চীনা ইতিহাসে জাতীয় জীবনে বিপ্লব এনেছিল তেমনি আজকের কমিউনিজমের আগমন এদেশে সেইরূপই গুরুতর পরিবর্তন এনেছে।” চীন দেশ বিদেশী প্রভাব মোটেই পছন্দ করে না—কিন্তু এর ব্যতিক্রম দুবার এই দেশের ইতিহাসে ঘটেছে—বৌদ্ধধর্ম ও কমিউনিজমের এখানে প্রভাব ব্যাপারে।

ঐ দিনেই বিকেল বেলা পিকিংএ রাশিয়ান এগ্জিভিশন্ দেখতে গেলাম। বিরাট প্রদর্শনী—বিশাল রুশ সাম্রাজ্যের ভিন্ন ভিন্ন জায়গার শিল্পের, কৃষি সামগ্রীর, কলকল্লার অতুলনীয় সম্ভার। এখানে একটি আদর্শ ‘রেন্তার’ দেখানো হচ্ছিল। আমরা এক দরজা দিয়ে সেখানে ঢুকছি—আর এক দরজা দিয়ে ঢুকলেন মার্শাল বুলগানিন। আমাদের দেখে তিনি হেসে Salute করলেন। তারপর অগ্রদিকে চলে গেলেন। এর কিছুদিন পরে বুলগানিন রাশিয়ার প্রাইম মিনিস্টার (প্রধানমন্ত্রী) হয়েছিলেন। কয়েক মাস পরে মীরটে বলতে পেরেছিলাম যে ব্রাহ্মণ আচার্যকে নমস্কার করেছিলেন বলেই সেই ব্রাহ্মণের আশীর্বাদে বুলগানিন প্রধানমন্ত্রী হ’তে পেরেছিলেন। বক্তৃতায় শ্রোতাদের একটু হাসানো দরকার।

তেসরা অক্টোবর—সরকারী গোশালা—চীনে গরুর নিত্যন্ত অভাব। চীন যাবাবর পশুপাল যুগে (pastoral stage) বোধহয় কোন কালে ছিল না—গোড়া থেকেই মনে হয় কৃষিকর্ম (agriculture stage) যুগে ছিল। এইখানে শহরের কাছেই ডাচ্, রাশিয়ান, মঙ্গোলিয়ান ও চীনের গরু, বাছুর সম্বন্ধে রাখা হয়েছে। ভেতরে ঢোকবার সময় আমাদের নাক Mask দিয়ে ঢেকে দেওয়া হয়েছিল—আমাদের নিশ্বাসে যাতে গরুর কোন অসুখ না করে। বেশী হাওয়া থেকে বাঁচাবার জন্ত গোশালাটির একদিকে খুব ঘন করে পপলার গাছ লাগানো হয়েছে। এই হল উইণ্ড স্ক্রীন। আরও একটু বড় হলে এটি দুর্ভেদ্য জঙ্গল হয়ে বাবে। এরি মধ্যে এই সরকারী farm থেকে কিছু লাভ হচ্ছে শুনলাম।

সেইদিনই (তেসরা অক্টোবর) কৃষি বিভাগের মন্ত্রী আমাদের বোঝালেন চাষাবাস সমস্তা নতুন চীন কি করে সামলাচ্ছে আর এদিক দিয়ে সমাজতন্ত্র কেমন করে সম্ভব করা যায়। ১৯৫৩ সালে ভূমিস্বত্বাধিকার বিষয়ে আমূল পরিবর্তন

হয়েছিল। তিরিশ কোটি কৃষকের মধ্যে পাঁচ কোটি হেক্টয়ার (এক হেক্টয়ার = আড়াই একর) জমি বিতরণ করা হয়েছিল। [গ্রামাঞ্চলে নিশ্চয়ই রক্তপাত হয়েছিল—আমেরিকান ঐতিহাসিকদের মতে লক্ষাধিক ভূস্বামী এই সময়ে প্রাণ হারায়। (মন্ত্রী মশাই এ বিষয়ে কিছু বলেননি) গাঁয়ের লোকেরাই এদের বিচার করে দণ্ড দেয়।]

খুব ছোট ছোট ক্ষেতে চাষবাস লাভজনক হয় না। সে জগ্ন সমবায় পদ্ধতিতে চাষ করা প্রচলিত করতে খুব চেষ্টা হচ্ছে—আর ফলও পাওয়া গিয়েছে। তবে ভাল করে কৃষিকার্যে যন্ত্রপাতির ব্যবহার চালু করার জগ্ন কলেকটিভ ফার্মিং (সমবেত চাষ) দরকার। যেমন পাশাপাশি দু-তিনটি গাঁয়ের চাষের জমি একটি বড় ক্ষেতে পরিণত করে চাষ করা মন্ত্রী মশায়ের মতে ১৯৭০ পর্যন্ত এদিকে অনেকটা এগুতে পারা যাবে। তৃতীয় পঞ্চবার্ষিক যোজনা তখন শেষ হবে।

আমরা সেই রাত্রে পিকিং ছাড়লাম। রাজধানীটিকে বস্ত্রা থেকে রক্ষা করার জগ্ন কাছেরই একটি নদীতে বড় বাঁধ দেওয়া হয়েছে ও সেই সঙ্গে একটি বড় রকমের হ্রদেরও উৎপত্তি হয়েছে। সকাল বেলা (চৌঠা অক্টোবর) বাঁধ দেখলাম—এর আগে এরকম বাঁধ দেখিনি। এরপর মাইথনের বাঁধ (দুর্গাপুরের কাছে) দেখেছি—সেটি এর চেয়ে বড়ই হবে।

পিকিং-এ ফেরবার পথে চীনের ইতিহাসবিশ্রুত প্রাচীর দেখলাম—প্রায় তিন হাজার মাইল—সমুদ্রতীর থেকে। পশ্চিমের মরুভূমি পর্যন্ত বিস্তৃত—চীনের অধিষ্ঠাত্রী বিরাট ডেগন যেন পাহাড় পর্বত উপত্যকার উপর চেটে খেলিয়ে দেশ রক্ষা করছে। অশোকের সমকালীন চীন-সম্রাট শি-হুয়াংটি মঙ্গোল ষাষাবরদের আটকাবার জগ্ন এই বৃহৎ প্রাচীর (জগতের সপ্তম আশ্চর্য) তৈরী করেছিলেন। অনেক জায়গায় এই বিরাট কীর্তি এখনও অটুট আছে। দেওয়াল খুব চওড়া—অন্ততঃ দশজন মৈনিক পাশাপাশি লাইন বেঁধে মার্চ করতে পারে—জায়গায় জায়গায় আরও চওড়া—ওখানে অনেক যোদ্ধা সমবেত হতে পারে। ‘চীনের প্রাচীর’ এখনও দেশ রক্ষার প্রতীক স্বরূপ রয়েছে—চীনের জাতীয় সঙ্গীত দেশ-বাসীকে রক্তমাংসের নতুন দেওয়াল তৈরী করতে ডাক দিচ্ছে। দেওয়ালের কোণে কোণে খুব ছোট হলদে ফুল ফুটে রয়েছে। কিছু ফুল পেড়েছিলাম দেশে নিয়ে যাবার জগ্ন। কিছু ফুলগুলি রইল না—ঝরে গেল।

পাঁচই অক্টোবর Opera Actors Training School-এ আমাদের নিয়ে গেল সকাল বেলা। নতুন চীনে অপেরার খুব কদর—আর লোকশিক্ষার

(প্রোগাণ্ডাও বলা যায়) এ বেশ ভাল উপায়। এ সব অল্পটানে সরকারী সাহায্য মুক্তহস্তে দেওয়া হয়। শিক্ষার্থীদের সংখ্যাও কম নয়—যদিও এর কোর্স ন বছরের। বার বছর বয়সের ছাত্রছাত্রীদের প্রবেশাধিকার আছে। একুশ বছর বয়সে পুরোপুরি Opera Actor-Actress হয়ে বেরবে। তিন-চারশত বছর পুরনো ও আজকালকার নতুন নাটক—তুই বকমেরই অভিনয় দেখানো হয়—আর সঙ্গে সঙ্গে রীতিমত জিমজাক্টিকের মত শারীরিক ব্যায়াম সব শিক্ষার্থীদের করতে হয়।

সন্ধ্যাবেলা থিয়েটারে কমিউনিস্ট বিপ্লবের একটি নামকরা নাটক ‘লিউ হলান’ দেখলাম। নায়িকা লিউ হলান একটি বিপ্লবী বীরাজনা। শেষ অঙ্কে নিজের প্রাণটি দিলো, তবে নিজের কাজ পুরো করতে পারলো। থিয়েটারে খুব ভিড় ছিল। ‘লিউ হলান’ এখন কমিউনিস্ট বিপ্লবের জ্যান্ ডার্ক (মধ্যযুগের ফ্রান্সের বীরাজনা)।

ছয়ই অক্টোবর—পিকিং মিউনিসিপ্যাল তিন থেকে সাত বছরের বাচ্চাদের স্কুল দেখতে গেলাম। সরকারী আমলাদের ছেলেমেয়েদের জন্ম এই স্কুল। এখানে বই খাতাপত্রের বালাই নেই। খেলা, নাচগান, নিজেদের কাজ নিজেরাই করা—(বড় ছেলেমেয়েরা ছোটদের দেখবে শুনবে এর ব্যবস্থা, এই স্কুলের বিশেষত্ব) স্কুলটি খুব পরিষ্কার পরিচ্ছন্ন—বাচ্চাদেরই এই পরিষ্কার রাখা কাজ। অল্প-সল্প বাগানের কাজও করে। নিজেদের হাতের স্কুল, সজী করা—এও তো একটা খেলা। ১, ২, ৩, সংখ্যা গণনা শেখানো হয়। তাছাড়া আমরা যাকে লেখাপড়া বলি সেরকম এখানে কিছুই নেই। খুব হাসিখুশি নাচগান বাচ্চাদের—আমাদেরও নাচিয়ে ছেড়েছিল। চীনে থোকারা ওজনে বেশ ভারি—একটি বছর তিনেকের বাচ্চাকে কোলে করে বেশ বুঝতে পেরেছিলাম। স্কুলটি বড় ভাল লেগেছিল। বাচ্চাদের খেলাধুলায় আমোদ-আহ্লাদে ভরপুর এই জায়গাটি সুখশান্তির একটি ছবির মত মনে রয়েছে।

সেই দিন বিকেলে Prof. Yin Ta আমাদের হোটেলের ঘরে এলেন ও আমার ও বিদ্যালঙ্কারের সঙ্গে দেশের সমসাময়িক বিষয় নিয়ে অনেকক্ষণ ধরে আলোচনা করলেন। যদিও উনি প্রাগৈতিহাসিক যুগের একজন বিশেষজ্ঞ তবুও আধুনিক যুগের কথা ভাল করেই বুঝিয়ে ছিলেন।

আমার প্রশ্ন ছিল, চীনের নতুন সরকারকে এখন দেশটিকে সব বিষয়ে নতুন করে গড়তে আর সেই সঙ্গে বিরাট সামরিক আয়োজনও করতে হচ্ছে—কি রূপে একাজ সম্ভব হচ্ছে?’

এর উত্তরে প্রঃ য়িন টা বললেন, এ প্রশ্নের ‘মাওএর উত্তর হল ‘নিজের পরিশ্রমের ফল দিয়ে’ (By your own work)।’

জাপানের সঙ্গে যখন যুদ্ধ চলছিল—তখনও অবস্থা এর চেয়েও খারাপ ছিল। আর এখন তো ঐ চারটে পরিবার—চিয়াং, চেন, ফুং, ফুং—নেই—যারা দেশটাকে লুটছিল। আর এখন কার্টমস্ ডিউটিস (আমদানি-রপ্তানি দ্রব্যের উপর শুল্ক) নিজেদের হাতে—মাফু রাজস্বেও আয়টি বিদেশীর হাতে ছিল। তাছাড়া বিলাসের জিনিস আর তো বিদেশ থেকে আসছে না। দেশেও খুব কমই তৈরি হচ্ছে। দেশের পুনর্গঠনের কাজেই এখন বেশী ব্যয় হচ্ছে সৈন্যসামন্তের উপর তত নয়।

আর আসল কথা হল দেশবাসীর উৎসাহ ও উত্তম। তাদের মনে পুরো বিশ্বাস আছে যে এত অশান্তি ও যুদ্ধের পরেও তারা দেশে আবার ফুঁহ সবল অবস্থা আনতে পারবে।

আমাদের আর একটি প্রশ্ন ছিল যে দক্ষিণ চীন কি উত্তর চীনের মত নতুন কমিউনিস্ট সরকারের উপর আস্থা রাখে (কমিউনিস্ট বাহিনী উত্তর দিক থেকে তাদের জয়যাত্রা আরম্ভ করেছিল) ?

প্রঃ য়িন টার উত্তর, দক্ষিণ-চীনই চিরকাল বেশী বিপ্লবপরী, তাইপিং ক্রান্তি তো মনে আছে ? তাছাড়া চিয়াং কাই শেক দক্ষিণেরই বেশী কাছে আছে, তার উপদ্রবের আশঙ্কা এই দিকে বেশী। উত্তর ও দক্ষিণবাসীদের মনোভাবে তফাৎ নেই। মাওয়ের উপর আস্থা দুয়েরই আছে।

আমরা এবার জিজ্ঞাসা করলাম এখানকার ঐতিহাসিকরা এই সমসাময়িক ঘটনাগুলির উপর লেখা শুরু করেছেন কিনা ? আমরা তো ইতিহাস নিয়েই কাজ করি তাই আমরা নিজেরাও বিশেষ উৎসুক এই সব world shaking events ভাল করে জানতে। য়িন টা বললেন যে Chinese Modern History References দশ খণ্ডে বেরুচ্ছে। পাঁচ খণ্ড ছাপাও হয়ে গেছে। আরও বললেন যে ইংরাজি People's China পাক্ষিক পত্রে এ থেকে কিছু বাছা বাছা অংশ শীঘ্রই আপনারা দেখতে পাবেন।

যদিও য়িন টা সম্পূর্ণ অল্প বিষয় নিয়ে গবেষণা করছেন, তা সত্ত্বেও সমসাময়িক ঘটনাবলীর বিষয়ে তাঁর মন্তব্য আমার খুব ভাল লেগেছিল। বিভ্রান্তকার কিন্তু বিরক্ত হয়েছিলেন যে প্রাগৈতিহাসিক যুগের অধ্যাপক পাঠাবার কি দরকার ছিল—আধুনিক ইতিহাসের লোক কি ছিল না ?

সাতই অক্টোবর—বিজয়া দশমী—আমরা পরস্পর বিজয়ার শুভাশংসাদান-

প্রদান করলাম। তারপর শিকিং হোটেলের সাততলার ওপর ছাত্তের বারান্দার বলে মিঃ শি-মু চাওএর কাছে চীনের আর্থনৌতিক পরিকল্পনার কথা শুনলাম। উনি চীন সরকারের আর্থনৌতিক গঠনমূলক সমিতির সদস্য আর নিজেও একজন অর্থ-বিজ্ঞাবিদ। এর ভাষণটি বাস্তবিক বহু ভূগাপূর্ণ হয়েছিল তাই এর বিশেষ উল্লেখ করা উচিত—চীন সরকারের ব্যয়ের শতকরা পঁয়তাল্লিশ ভাগ গঠনমূলক খরচ করা হচ্ছে। এর মধ্যে বেশীর ভাগ হচ্ছে কলকারখানা—একটি কৃষিপ্রধান দেশকে উন্নততর স্তরে তোলবার জন্য এরকম করা দরকার ছিল।

এই কাজ ঠিক করবার জন্য চাই দেশে শান্তি। ১৯৫২ সাল পর্যন্ত তো দেশে একটি নতুন আর্থনৌতিক ব্যবস্থা চালু করবার চেষ্টা চললো। ১৯৫৩ সাল থেকে গঠনমূলক কার্য আরম্ভ হল। ১৯৫৩ সালের গ্রীষ্মকালের আগেই পুরনো জমিদারী প্রথা উচ্ছেদ করতে তারা গিয়েছিলো। এর ফলে সাড়ে বার কোটি একর জমি তিরিশ কোটি ভূমিহীন চাষীদের মধ্যে বিতরণ করা হল।

গরীব চাষীদের জমি তো দেওয়া হ'ল—কিন্তু ছোট ছোট ক্ষেত থেকে যে ফসল পাওয়া যায় তার পরিমাণ তো বেশী আশা করা যায় না। আর এতে কৃষিকার্যের উন্নতি হয় না। এর জন্যে সমবায় প্রথা অবলম্বন করা হচ্ছে। বছর খানেকের মধ্যে এক কোটি কৃষক এই রকম পাঁচ লক্ষ সমবায় সমিতিতে যোগ দিয়ে কৃষিকার্যে এক নতুন যুগ আনবে।

কুয়োমিনটাং শাসকদের সময়ে চারটি পরিবার (কিয়াং, কেন্, ফুং, শুং) কয়েকটি লাভজনক শিল্পজাত জব্যের নির্মাণ নিজের হাতে রেখে এর রকম অসং উপায়ে অনেক ধন উপার্জন করেছিল। এখন আর সে রকম হতে পারে না। বড় বড় কলকারখানার কাজে এখন শ্রমিকদের বিশেষ সাহায্য দেওয়া হয়। শ্রমিকদের উৎসাহ দিয়ে স্থনির্দিষ্ট পরিকল্পনা অনুসারে শিল্পের ক্ষেত্রে অগ্রসর করা হচ্ছে।

শি-মু চাও বেশ জোর দিয়েই বললেন যে রাষ্ট্রায়কৃত শিল্প ব্যবসায়গুলিই বেশী লাভদায়ক হয়েছে। কিন্তু এখনও তো কেবল সরকারী ব্যবসায়ের উপর নির্ভর করে চলা যায় না—তাই ব্যক্তিগত ব্যবসায় কিছুদিন টিকে থাকবে। তবে এগুলি স্বার্থপর, দেশবিরোধী ব্যক্তির হাতে থাকতে দেওয়া হচ্ছে না।

আর এমন কোনো কাজও ব্যক্তিগত (প্রাইভেট) হাতে থাকতে দেওয়া হবে না যা দেশের পক্ষে খুব তাড়াতাড়ি করে নেবার দরকার।

রাষ্ট্রায়কৃত ব্যবসায়ের মধ্যে লোহা, ইস্পাতের বড় বড় কারখানা থেকে সরকারের সবচেয়ে বেশী আয় হয়েছে। এই সব কারখানার তৈরী জব্যের পরিমাণ

আগেকার সবচেয়ে বেশী উৎপন্ন সামগ্রীর বিপণন হয়েছে। অল্প তবিলিতে রাষ্ট্রীয়কৃত শিল্পক্ষেত্রই হবে দেশের সবচেয়ে উৎকৃষ্ট আয়ের উৎস। মিঃ শি-মু চাও বললেন যে এখন ‘হেভি ইণ্ডাস্ট্রি’ (বড় বড় ‘মেশিন’ নির্মাণ করা) হ’ল সবচেয়ে দরকার। এর (হেভি ইণ্ডাস্ট্রি) উন্নতি না হলে আধুনিক প্রণালীর কৃষিজাত, শিল্প, অস্ত্রশস্ত্র নির্মাণ, পরিবহন ব্যবস্থা ইত্যাদিতে কিছুই উন্নতি হবে না। এর খরচ মেটাবার জন্য সব রকম চেষ্টা করা হচ্ছে। বহির্বাণিজ্যের আমদানি-রপ্তানির অনেকটাই সরকারের হাতে। ব্যাঙ্কিংও রাষ্ট্রের হাতে আছে (সেইদিনই বাণিজ্য বিভাগের উচ্চপদস্থ কর্মচারী সন্ধ্যাবেলায় এই কথা আমাদের বলেছিলেন) ও রাষ্ট্রপরিচালিত পিপলস ব্যাঙ্ক অফ চায়না দেশের বাণিজ্য, শিল্প ও কৃষিকার্যের উপর যথেষ্ট প্রভাব রাখে।

গ্রাইভেট্‌ ব্যাঙ্কগুলি—এখনও যেগুলি টিকে আছে—ঐ স্টেট ব্যাঙ্কের আদেশানুসারে কাজ করছে।

একটা বড় রকমের অসুবিধা এখনও রয়েছে মিঃ শি-মু চাওয়ের মতে—তা হল হুদুক শিল্পীর (ট্রেন্ড ওয়ার্কিং পারসোনেলের) অভাব। ১৯৫৪ সালে রুশ দেশীয় বিশেষজ্ঞরা যথেষ্ট করছিলেন—রুশ মিস্ত্রী, এঞ্জিনীয়ার প্রভৃতি—আমরাও মাঝুরিয়া ভ্রমণকালে অনেক দেখেছি। আর এও দেখেছি চীনা মিস্ত্রীরা (জী-গুরুব) কেমন ভাল কাজ শিখেছে।

চীনের আজকাল যে মুদ্রার চলন (কারেন্সী) তা সত্যিই আশ্চর্য হবার ব্যাপার। চিয়াং কাইশেকের শাসনকালের শেষ দিকে ‘মু’আনের’ মূল্য প্রায় কিছুই ছিল না। বন্ধুদের কাছে শুনেছি যে হোটেল ‘ডিনার’ খাবার আগে খাবারের ষা দাম ছিল—‘ডিনার’ শেষ হবার সময় দাম ডবল হয়ে যেত। লাখ খানিক ‘মু’আন’ (তখন K. M. T. নোট—দশ লাখ ৫০ লাখ এই রকমই হত) লাগতো গৃহস্থের সাধারণ ব্যবহারের সামগ্রী কিনতে। এই ধাকা সামলাতে হল নতুন কমিউনিস্ট সরকারকে—আমরা যখন চীনে ছিলাম তখন পাঁচ হাজার ‘মু’আনের’ নোট K. M. T. যুগের বোধ হয় পাঁচ লাখের জায়গায় বাজারে চলছিল। আমাদের এক টাকার সমান ছিল পাঁচ হাজার ‘মু’আন’ নোট। সত্যি এই স্বকৃত্তিদের দৃষ্টান্ত। এর পরের বছরেই—১৯৫৫ সালে নতুন ‘মু’আন’ নোট ছাপা হল। এক মু’আন—হু টাকা (ভারতের) সমান মূল্যের। এই ‘এক্সচেঞ্জ রেট’ বিনিময় হার এখনও চলতি রয়েছে (১ মু’আন = ২ টাকা)। কুয়োমিণ্টাং যুগের ‘রান্ অ্যায়ে ইনফ্রেশন’ এই রকম করে ধাপে ধাপে সামলানো হয়েছে। প্রথম

বিশ্বযুদ্ধের পর জার্মান মার্কের মূল্যের পতন তখন অবিস্মৃত বোধ হয়েছিল বটে, কিন্তু তাও এতটা হয়নি। এসব অর্থনীতির কথা পাঠকের (যদি এ লেখার পাঠক কখনও হয়) ভাল লাগবে না—বিষয়টি বদলানো যাক।

তার পরদিন—৮ই অক্টোবর—আমরা পিকিং বিশ্ববিদ্যালয় দেখতে গেলাম। চীনের রাণী স্থলীর গ্রীষ্মবাসের খুব কাছে প্রায় রাস্তার এধার ওধার বিশ্ববিদ্যালয়ের বহু একর বিস্তৃত হাতা (grounds)। ঢুকে বোধ হল যেন একটি সুন্দর পার্কে প্রবেশ করলাম। কেমেস্ট্রি ল্যাবরেটরী জলের ট্যাঙ্কটিও প্যাগোডার আকারে তৈরি হয়েছে আর বিজ্ঞান বিভাগ ছাড়া অন্তর বিভাগগুলি খানিকটা সেই প্রাচীন চীনের স্থাপত্যরীতি অনুসারে নির্মিত। সায়েন্স ব্লকগুলি অবশ্য আধুনিক প্রণালীতে তৈরী। দেবদারু, ফার, সাইপ্রেস, উইলো (একটি হ্রদের চারিপাশে) জায়গাটিকে প্রায় নিকটবর্তী ‘সামার’ প্যালেসের মত সুন্দর করে রেখেছে। আর ঐ প্যাভেলিয়নের মতই একটি হল পিকিং যুনিভার্সিটির ভাইস-চ্যান্সেলর আমাদের বসালেন ও ওখানকার শিক্ষাপদ্ধতির কথা কিছু বললেন। তাঁর ভাষণটি শুনে অনেক নতুন খবর পেলাম।

১৮৯৮ সালে যখন চীনের যুবক সম্রাট আর তাঁর মাসীমা—‘স্থলীর’ মধ্যে খুব মনকষাকষি চলছে—দেশটাকে কতটা আধুনিক করা যায় এই নিয়ে—সেই সময় বিশ্ববিদ্যালয়টির পত্তন হয়। এই বিশ্ববিদ্যালয়েই ৪ঠা মে ১৯১৯-এর ঐতিহাসিক ছাত্র বিক্ষোভ চীনের সে সময়ের শাসনকর্তাদের পরাভব স্বীকার করায়। কার্ল-মাক্স-এর গ্রন্থাবলীর চর্চা এখানেই শুরু হয় ও মাও সেতুং প্রভৃতি নেতারা এই শিক্ষাকেন্দ্রের সঙ্গে বিশেষভাবে সংশ্লিষ্ট। এই বিদ্যালয়েই যে বীজ বপন করা হয়েছিল—আজ তারই ফল জগৎসুস্থ দেখছে।

এই বিশ্ববিদ্যালয়ের এখন প্রধান কাজ হচ্ছে নতুন চীনের নতুন কর্মচারীদের অর্থনীতি, শিক্ষাপদ্ধতি, অকশাস্ত্র ও ‘মার্কসবাদে’ সুশিক্ষিত করা। এখনকার ছাত্রছাত্রীর সংখ্যা পাঁচ হাজার দুশো; পোস্ট-গ্রাজুয়েট ক্লাসগুলিতে দুশো নব্বই। উপরকার ক্লাসগুলিতে সংখ্যা কম—কারণ নতুন ব্যবস্থার শিক্ষিত কর্মীদের যোগানের চেয়ে চাহিদা বেশী—গ্রাজুয়েট হবার সঙ্গে সঙ্গেই সরকার নির্ধারিত কাজে নিযুক্ত হতে হয়। এখানে কাজ নেই, রোজগার নেই, বাড়ি বসে থাকা—লোকের ভিড় এখনো তো হয়নি।

কৃষক ও কলকারখানার শ্রমিকদের মধ্যে অল্প সময়ের মধ্যে তাদের উপযুক্ত শিক্ষাদানের ব্যবস্থাও এখানে আছে। প্রায় আটশত কৃষক ও শ্রমিক এই বকম

শিক্ষা পাচ্ছে। এ ছাড়া আলাদা ‘পিপলস্‌ ইউনিভার্সিটি’ (জনসাধারণের শিক্ষাকেন্দ্র) আছে—যেখানে যাদের হাতের কাজ বেশ ভাল, তারা সে সব কাজের ‘থিওরি’ ও ‘সায়েন্স’ বিষয়টাও শেখবার সুযোগ পায়। তারা এর জন্য সরকারী অর্থসাহায্যও পেয়ে থাকে।

গত পাঁচ বছরে (১৯৪২-১৯৫৪) পাঁচ কোটি টাকা (আমাদের ভারতের টাকা) এই বিশ্ববিদ্যালয়ের অন্ত্রে খরচ হয়েছে। এখন বড় বড় ‘সায়েন্স ব্লকস্‌’ তৈরি হচ্ছে। যে ঘরে ভাইস-চ্যান্সেলর সাহেব আমাদের এসব বললেন তার চারিধারে সুন্দর সুন্দর ‘বামন’ গাছ (ডোয়ার্ফ ট্রিস, দেবদারু, চীর প্রভৃতি) সুন্দর চীনেমাটির টবে সাজানো হয়েছে।

এর পর ঐ ইউনিভার্সিটির ‘ভীন’দের কাছে চীনের শিক্ষা-ব্যবস্থার আরও কিছু তথ্য আমরা পেয়েছিলাম।

গ্র্যাডুয়েসন্‌এর জন্য (আমাদের বি. এ. তুলনীয়) চার বছর পড়তে হয়। শীর্ষে পাঁচ বছরের কোর্স করে দেওয়া হবে। ইতিহাস ও গণিতের সব ছাত্রদের মার্কসবাদ ও চীনের রেভলিউশনারি হিষ্ট্রি (চীন বিপ্লবের ইতিহাস) পড়তে হয়। অনেকেই রাশিয়ান শেখে। তবে চীন পুরাতন ঐতিহ্য তুলতে চায় না। পুরাতন সাহিত্যের বাছা বাছা বিষয়ের ওপর গবেষণার কাজ চলছে। কাছাকাছি প্রাগৈতিহাসিক স্থানগুলিতে ছাত্ররাই খোদাই কাজ করছে।

এখানে বছরে দুইবার পরীক্ষা নেওয়া হয়। পরীক্ষার মৌখিক প্রশ্নোত্তর রীতির প্রচলন সবায়েরই ভাল বোধ হচ্ছে। যাতে কেউ ‘ফেল’ না হয় এ বিষয়ে পরীক্ষকদের বিশেষ দৃষ্টি আছে—কারও পরীক্ষার্থী ‘ফেল’ হলে শিক্ষক ও সহপাঠী-দেবই সমানভাবে দোষী মনে করা হয়। মাও নিজে ছাত্র-ছাত্রীদের উপদেশ দিয়েছেন—“থাকো ভাল করে (স্বাস্থ্যের দিকে নজর রেখে), পড়ো ভাল করে, কাজ করো ভাল করে (দেশের জন্য)।” দিন রাতের চব্বিশ ঘণ্টার মধ্যে আট ঘণ্টা ঘুমানো। অন্ততঃ এক ঘণ্টা খেলাধুলা আর সপ্তাহে চুয়ান ঘণ্টা পড়াশুনা (class work and attendance সমেত)—এই হ’ল শিক্ষার্থীদের জন্য চীনের সব ইউনিভার্সিটির (সংখ্যায় একুশটি) ভরফ থেকে বিশেষ নির্দেশ।

সেইদিনই (৮ই অক্টোবর) শিক্ষা বিভাগের দপ্তরে আমরা ডেপুটি এডুকেশন মিনিস্টারের কাছে ওখানকার জাতীয় শিক্ষাপদ্ধতি বিষয়ে আরও তথ্য শুনলাম। স্কুল শিক্ষার প্রথম ধাপ হল ‘কিণ্ডারগার্ডেন’—তিন থেকে সাত বছরের ছেলেমেয়েদের জন্য। এ স্তরে লেখাপড়া নেই, খেলাধুলা, ছবি ইত্যাদির

মাধ্যমে বিস্তারিত হয়। দ্বিতীয় ধাপ হল 'প্রাইমারি স্কুল'—হয় বছর ব্যাপী, তারপর 'মিড্‌ল স্কুল' শুরু। কৃষক ও শ্রমিকদের জন্য এই দুই স্তরে (প্রাইমারি ও মিড্‌ল স্কুল পর্যায়ে) তাদের অবসর সময়ে শিক্ষাদানের ব্যবস্থা আছে। এখন প্রাইমারি স্কুল স্তরে শতকরা আশীজন শিক্ষার্থী কৃষক ও শ্রমিক শ্রেণীর। সুনির্ভার্সিটি স্টেজেও শতকরা ২৩ জন এই শ্রেণীর।

পাঠ্যপুস্তক অনেক বদলাতে হয়েছে। বিশেষজ্ঞদের হাতে এ কাজের ভার দেওয়া হয়েছে।

প্রাইমারি স্কুলের ছাত্রছাত্রীর সংখ্যা ১৯৫৯ সালের সংখ্যার দ্বিগুণ।

মাওএর মতে অর্থনৈতিক উন্নতির সঙ্গে সঙ্গে শিক্ষাবিস্তারের উন্নতিরও বিশেষ প্রয়োজন। নিরক্ষরতা সমস্যা দূর করবার জন্য দশ লক্ষ স্বেচ্ছাসেবী শিক্ষক দেশ জুড়ে প্রাথমিক শিক্ষাদানের অভিযান চালাচ্ছেন। সবচেয়ে দরকার বড় বড় কলকারখানায় শ্রমিকদের ভাল করে লেখাপড়া শেখানো। মন্ত্রী মহাশয় তাঁর ভাষণের শেষে স্কুলে 'পঞ্চপ্রেম' শিক্ষা দেবার উল্লেখ করেছিলেন। পাঁচটি ভাল-বাসবার বিষয় হল—দেশ, দেশের লোক, পরিশ্রম, জনসাধারণের সম্পত্তি (রাষ্ট্রাঘাট প্রভৃতি)।

সেদিন (৮ই অক্টোবর) সন্ধ্যায় আমরা চীন-ভারত মৈত্রী সংঘের কাছে বিদায় নিলাম। ডাঃ চেন্‌ হুং মংকে (ইনি তার পরের বছর আমাদের দেশে এসেছিলেন) ধন্যবাদ দিয়ে পিকিং-এর কাজ শেষ হল। শুভে গিয়ে দেখি যে আমাদের ঘরে ঘরে সংঘের উপহার বিছানার পাশে রাখা আছে।

৯ই অক্টোবর দুপুর বেলা পিকিং হোটেল ছেড়ে স্টেশনে পৌঁছলাম। হোটেলের চাকরবাকরেরা বক্‌শিশ্‌ নিলো না। চীনা বন্ধুদের পরামর্শ অনুসারে তাদের সঙ্গে শেকহাণ্ড করে তাদের ধন্যবাদ দেওয়া গেল। স্টেশন প্ল্যাটফর্মে চীন-ভারত-মৈত্রী সংঘের বন্ধুরা আমাদের গাড়িতে চড়িয়ে বিদায় দিলেন। গাড়ি এবার উত্তর দিকে চললো—মাঞ্চুরিয়ায়।

তার পরদিন—১০ই অক্টোবর আমরা বেলা দশটায় মুকুডেন্‌ (এখন এর নাম সেনইয়াং) পৌঁছলাম।

মাঞ্চুরিয়া এই শতাব্দীর রণাঙ্গন। কয়েকবার চীনের হাতে এর হস্তান্তর হয়েছে। রুশের হাতে দুবার গিয়েছিল—জাপানের হাতেও বেশ কয়েক বছর ছিল। এখন আবার চীনেরই অংশভূত হয়েছে। এই মাঞ্চুরিয়া থেকেই চীনের শেষ রাজবংশ (মাঞ্চু বা চিং বংশ) এসে চীনে আধিপত্য বিস্তার করেন। চীনের

শেষ সন্ধ্যাট 'পুয়ি' শৈশবে তো চীন সাম্রাজ্য হারান, তবে জাপানীরা তাঁর যৌবনে তাঁকে মাঞ্চুরিয়ার সিংহাসনে বসিয়েছিল—'মাঞ্চুরিয়া সন্ধ্যাট' এই নতুন উপাধি দিয়ে। সে সিংহাসনটিও হারিয়ে এখন তিনি পিকিংএ সাম্যবাদী সরকারের আফিসে কাজ করেন আর ঐ শহরের বাগানগুলির দেখাশোনা করেন। জীবনে অনেক ওলটপালট তিনি দেখেছেন।

মুক্‌ডেন্ শহরে জাপানী 'অফিসারস মেসে' আমরা উঠলুম। পিকিংএর রাজ-স্বয়ং সমারোহের পরে এ ব্যবস্থা আমাদের কয়েকজনের মনঃপূত হল না। সকালে পেট ভরে এখানকার আপেল খেলাম, এরকম স্বাদু আপেল খুব কমই খেয়েছি, ব্রেকফাস্ট কটি মাখন চায়ের সঙ্গে খেয়ে মুক্‌ডেন্ শহরের মধ্য দিয়ে প্রাচীন বৌদ্ধস্তম্ভের পাশ দিয়ে একটি শহরতলীতে ব্রিটিশ হাজার শ্রমিকদের জগ্ন তৈরি একশো সত্তরটি বিরাট ত্রিভুজ বাসভবন দেখতে গেলাম। আরও এ রকম 'ব্লক' তৈরী হচ্ছে। শীঘ্রই আড়াই লক্ষ শ্রমিক এই শ্রমিক নগরে বাস করবে। আমরা দু-একটি ব্লকে ঢুকেছিলাম। দু-তিনজন শ্রমিক গৃহিণী আমাদের তাদের নিজের ঘর দেখায়। বেশ পরিষ্কার পরিচ্ছন্ন, খুব সাদাসিধে ব্যবস্থা। ব্লকের ছোট ছেলে-মেয়েদের নাচগানেরও ব্যবস্থা আছে।

মাঞ্চুরিয়াতে লোহা ও কয়লা দুয়েরই কোনো অভাব নেই। রুশ ও জাপান দুই রাষ্ট্রেরই এখানে খুব বড় রকমের কলকারখানার আয়োজন করবার চেষ্টা ছিল। জাপানীরা 'ইম্পাতের উৎপাদনের জগ্ন বিরাট বিরাট' ফ্যাক্টরী মুক্‌ডেন্ শহরের আলোপাশে নির্মাণ করেছিল। চীন সরকার সেগুলিকে আরও বাড়িয়েছে, আর পুরো উত্তরে এখানে কাজ চলছে।

এ কাজে রুশ বিশেষজ্ঞরা সাহায্য করছেন। আর চীনে ছাত্রছাত্রীরা এদের কাছে প্রয়োগকৌশল শিখে খুব ভাল করেই কাজ চালাচ্ছে।

এখানকার বড় যন্ত্রপাতি তৈয়ারের কারখানার (Tool-making heavy industries) দেখলাম যে অল্পবয়সী মেয়েরা (যারা অল্পদিনই হ'ল কলেজ ছেড়েছে) কেমন অনায়াসে এখানে ওখানে 'সুইচ' টিপে সস্তর-আশি মণ ওজনের লোহার কল এদিক ওদিকে নিয়ে যাচ্ছে। আর এও দেখলাম যে অতি সূক্ষ্ম কাজও, যেখানে একটু নড়েচড়ে গেলে আঙুল উড়ে যাবে, তাও কেমন সুনিপুণ ভাবে করছে। আর যে কেবল হাতের কাজই করছে তা নয়, এইসব কারখানার নানা বিভাগ আছে, এই রকম কয়েকটি বিভাগে ডিরেক্টর (অধিকর্তা) হলেন রীতিমত ঐ কাজের উপযুক্ত মহিলা। তাঁদের মধ্যে একজন নাকি চীনের

বহু বৎসর ব্যাপী গৃহযুদ্ধেও যোগদান করেছিলেন। এর স্বামী সৈনিক পুরুষ—মিলিটারি অফিসার—চীনের কোনও সীমান্ত প্রদেশে থাকেন, ইনি পুত্র কন্যা নিয়ে এখানে এই কাজের ভার নিয়েছেন। আমাদের আশ্চর্য বোধ হল যে মহিলাটি মোটেই ‘জাঁদরেল’ গোছের নন, তিনি বেশ গিন্নীবাব্বী ধরনের হাসিখুশীতে ভরা একটি প্রৌঢ়া রমণী।

মুকডেনের কাছেই ‘আনশান’ যেন একটা দৈত্যপুত্রী। প্রকাণ্ড ‘চিমনি’, অলস্ত ‘ফার্নেস’, গ্যাস রাখবার বিরাটকায় ‘কনটেনার’, চারি দিকে কলকারখানা। টাটানগর দেখিনি, এরপর দুর্গাপুর, বার্গপুর দেখেছি, ‘আনশান’ এ দুই জায়গার চেয়ে অনেক বড়। হাজার হাজার স্ত্রী পুরুষ শ্রমিক এখানে কাজ করছে। লোহা, ইস্পাতের ‘আনশান’ই হল প্রধান উৎপাদন কেন্দ্র। ১৯৪৩-১৯৫৪ এই পাঁচ বছরে মাঞ্চুরিয়া আশাতীতরূপে লোহা ও ইস্পাতের উৎপাদন করেছে। এই বৃদ্ধির হার বাস্তবিকই বিশ্বয়জনক।

আমরা রোজ সকালে এইসব জায়গা দেখতে যাই মুকডেনের আমাদের জাপানী আমলের অফিসারস মেল থেকে। দুপুর বেলার আহ্বার হয় এর কোনো একটি ‘ফ্যাক্টরী’র ভোজনালয়ে। এত বড় সব কলকারখানা কিন্তু কোথাও অপরিষ্কার কিছু চোখে পড়েনি। যা খেতাম বিশেষ করে যে ফল মাঞ্চুরিয়ায় খেয়েছি, বাস্তবিকই চমৎকার ছিল। আনশানে খুব ছোট নাসপাতি দেখলুম গোছা গোছা চেরীর মত। খেতে কান্দীরের বিখ্যাত ‘বকুগোশা’রই মত।

সন্ধ্যাবেলা মুকডেনে একদিন আমাদের ‘কমলনৃত্য’ দেখানো হ’ল। যে মেয়েরা এই ‘ব্যালের’ দেখিয়েছিল, বোধ হয় তারা এই কলকারখানাতেই কাজ করে, তবে নাচগান এরা সত্যিই খুব ভাল শিখেছে। নাচের পোশাকের ‘স্মার্ট’-গুলি পদ্মের আকারের, আর পদ্মফুল তার ওপর আঁকা—এই ‘কমলনৃত্যে’ বোধ হয় সরোবরে যেন পদ্মফুল হাওয়ায় ছলছে।

আমাদের দোভাবী হয়ে একটি ‘সাংঘাই’ কলেজের মেয়ে পিকিং থেকে এসেছিল—কুমারী লী ; সেদিন এ মেয়েটি পুরাকালের রাজকন্যার বেশে স্টেজে নেমে ব্যালের প্রত্যেক ‘অ্যাক্ট’ ইংরাজিতে বুঝিয়ে দিচ্ছিল।

একদিন মুকডেন থেকে বেরিয়ে আমাদের বাসের রাস্তার পাশে একটি উঁচু জায়গার ওপর সুন্দর একটি পার্কের মত দেখলাম—মনে হ’ল যেন বিখ্যাত জং বংশের সময়ের আঁকা একটি দৃশ্যের ছবি ; শুনেছিলুম এটি হল মাঞ্চুসম্রাটদের সমাধিস্থল।

এরই মধ্যে এক ছুপুরে ফুশানে আমরা এক কয়লার খনিতে নামলাম। আমাদের মাথায় টুপি পরানো হ'ল; ইলেকট্রিক আলো দেওয়া লিফ্টে হাজার ফাঁট নামলাম—তারপর লিফ্ট থেকে বেরিয়ে প্রেতপুরীর গলির মত খনির গলির মধ্যে খানিকক্ষণ ঘুরলাম। চারিদিকে জল পড়ার শব্দ আর কিছু খোঁড়া হচ্ছে তার শব্দ স্তনভে পাওয়া যাচ্ছে। গলিতে 'রেল' পাতা আছে। রেলের ওপর দিয়ে ট্রলি কয়লা ভরে নিয়ে এদিকে ওদিকে চলছে। এর আগে কখনো কোনো খনি দেখিনি। আমার পক্ষে এ তো পাতালপুরী দর্শন হল।

মাঞ্চুরিয়ায় ১৪ই অক্টোবর পর্যন্ত আমরা ছিলাম। এখানে শীত প্রচণ্ড। আমাদের রাশিয়ান গুভারকোটের ব্যবস্থা করা হয়েছিল। আমাদের এখান থেকে চলে যাবার দুদিন পরেই স্তনলাম এখানে 'স্নোকল' (তুষারপাত) হল।

মুকডেন থেকে বিদায় নেবার দিন আমাকেই বিদায়ভাষণ দিতে বলা হয়েছিল। আমার সেদিন বেন প্রেরণা এসেছিল—আমি বললাম : এই মাঞ্চুরিয়া থেকে বার বার শত্রু চীন জয় করবার জন্য অভিযান আরম্ভ করেছে—এখন মাঞ্চুরিয়া চীনের দ্রুতগত অস্ত্রাগার হয়েছে—কার সাধ্য আর চীনকে বিব্রত করে ! এই কথাগুলি শুনে শ্রোতাররা জোরে হাততালি দিয়েছিল।

চীন রাজ্যের উত্তর দিক শেষ হল—এবার পশ্চিম চীন অভিযুখে যেতে হবে। ফিরে পিকিংএর দিকে খানিকটা পেছতে হ'ল। ছুপুর বেলা টিয়েন সিন্ স্টেশনে পৌঁছলাম। গাড়ি থেকে চীন সমুদ্র দেখা যাচ্ছিল, চীনে নৌকা-(Junk)গুলি পাল তুলে যাচ্ছে, সবটাই সুন্দর ছবির মত দেখাচ্ছিল। একশো বছর আগে এখানে চীন একদিকে ব্রিটেন ও ফ্রান্স আর একদিকে তুঙ্গল যুদ্ধ হয়েছিল, কারণ চীন সমুদ্র থেকে জলপথে পিকিং যাবার এই হল একমাত্র রাস্তা। এইখানেই টাকু দুর্গ নদী ও সমুদ্রের সঙ্গমস্থলে পিকিংএর প্রবেশদ্বার রক্ষা করছে। এই দুর্গ জয় করতে ইয়োয়োরোপীয় নৌবাহিনীকে অনেক যুদ্ধতে হয়েছিল। একবার এদের হার মানতেও হয়েছিল।

আমাদের রেলগাড়ি স্টেশনে দাঁড়িয়ে আছে। আমাদের দলের অনেকেই দ্বিবি আয়ামে দিবানিত্রায় মগ্ন। এমন সময়ে মস্ত একটি 'রেলওয়ায়ে ট্রেন' এসে পাশেই থামলো। গাড়িটি কিছু বিশেষ রকমের, আমরা যে কজন য়ুমুইনি কাছে গিয়ে জানলাম যে ঐ ট্রেনটি হ'ল ট্রান্সকক্টিনেন্টাল-লেনিনগ্রাড-পিকিং ট্রেন। লম্বা ইয়োয়োরোপ ও এশিয়ার সবচেয়ে চওড়া দিকটা পার হয়ে এসেছে। আমাদের চীনা গাইডকে ধরে ঐ কক্টার 'ট্রান্সকক্টিনেন্টালের' গার্ডকে অভ্যর্থনা করা গেল

যে আমাদের ঐ ট্রেনে ভিতরটা বেন দেখতে দেয়। এই অসুস্থতা শুৎক্ষণে নিয়ে আমরা গাড়িতে ঢুকে 'এক্সিন' থেকে শুরু করে গার্ডের কেবিন পর্যন্ত বেড়িয়ে এলাম। ফার্স্ট ক্লাস কামরাগুলি বড় সুন্দর, টাটকা ফুলের তোড়াও রয়েছে ছোট ছোট টেবিলের ওপর। থার্ড ক্লাসের কোন বাহার নেই। তবে বেশ পরিষ্কার, পরিচ্ছন্ন। আমরা গাড়ি থেকে নেমে আসবার খানিকক্ষণ পরেই গাড়ি ছেড়ে দিল—আধ ঘণ্টার মধ্যেই পিকিং পৌঁছে কত হাজার মাইলের 'সফর' শেষ করলে। আমরা এবার গিয়ে আমাদের 'কুন্তকর্ণ' সহযাত্রীদের ঘুম ভাঙালাম আর ট্রানস্কন্টিনেন্টাল ট্রেনের খবর সবিস্তারে বললাম। তারা তো রেগেই আশুন, কেন তাদের জাগানো হয় নি। এর উত্তর ছিল যে ইয়াংসে পার হবার সময় যখন আমাদের গাড়ি দু টুকরো করা হল আবার জুড়ে দেওয়া হল তখন আমাদের তো তোমরা জাগাও নি।

এবার আমাদের পশ্চিমমুখে লম্বা পাড়ি, 'হোয়াংহো' পার হয়ে 'গ্র্যাভেলে'র মত আল্গা-চুরো পাথরের পাহাড়ের পাশ দিয়ে (যে রকম জায়গায় মাও য়েনানের গুহায় নিজের শিবির স্থাপন করেছিলেন আঠারো বছর আগে—১৯৩৬-এ)। আমাদের হাতে অফুরন্ত সময় তখন, আমরা আমাদের মধ্যে কোনো কোনো বিষয়ে 'স্পেন্সালিস্ট' ধারা তাঁদের ভাষণ শুনলাম, আমাদের ট্রেনের ড্রয়িংরুমে বসে। ডাঃ স্তানচন্দ্র (আমাদের দলের উপাধ্যক্ষ) চীনের সমবায় নীতির কথা বললেন। এদেশের গ্রামীণ সমবায় সমিতিগুলিতে সাড়ে নয় কোটি 'মেশ্বর'—এরা গ্রামবাসী। সমিতিগুলির কাজ শহরের জিনিস বা চাষীদের দরকার, শহর থেকে এনে গ্রামে উচিতমূল্যে বেচা, আর গ্রামে উৎপন্ন জিনিস শহরে বেচা বা বেচবার সুবিধা করে দেওয়া।

আমাদের সহযাত্রী 'জার্গালিস্ট' ডিপি. জেন, চীনের খবরের কাগজ বিষয়ে তাঁর গবেষণার কথা শোনালেন। 'পিপল্‌স ডেলি' হল এদেশে প্রধান সংবাদ-পত্র, গ্রাহক আট লক্ষ—সম্পাদকীয় সমিতি ছাড়া সত্তর জনের—দেশে রাজ-নৈতিক, অর্থনৈতিক, সামাজিক সংবাদ দেশ মধ্যে প্রচার করে। এটি অবশ্য চাইনিজ্ কমিউনিষ্ট পার্টির কাগজ। এতে একটি 'কলম' থাকে যাতে পার্টির উচ্চপদস্থ মেম্বরের প্রশংসা বা কঠোর সমালোচনা থাকে। কৃষকদের জন্য এই কাগজ বিশেষ আয়োজন করে। যে কৃষকদের চাষবাসে খুব উন্নতির পরিচয় পাওয়া যায়, তাদের নামধাম, কার্যপ্রণালী সবিস্তারে দেওয়া হয়।

১৭ই অক্টোবর আমরা সিয়ান পৌঁছলাম। এর পুরাতন নাম হল 'চাঙ্গান'

—বহু শতাব্দী এ নগর চীনের রাজধানী ছিল। শিল্পে, সাহিত্যে, সব বিষয়ে সমৃদ্ধিতে সে যুগে জগতের সভ্যতা ও কৃষ্টির কেন্দ্র ছিল। আর চীনে বৌদ্ধ ধর্মের প্রবেশ ও বিস্তার এই চাঙ্গান বা সিয়ানেই হয়েছিল।

এই অতি পুরাতন শহরের বাইরে একটি নতুন বড় হোটেলে আমরা উঠলুম। তারপর জলযোগ করে এখান থেকে আট-নয় মাইল দূরে একটি উষ্ণপ্রস্রবণ দেখতে গেলাম। এখানে হাজার বছর আগে চীনের এক সম্রাজ্ঞী স্নান করতে বড় ভালবাসতেন। রাস্তার দু'ধারে 'পপ্‌লার' গাছের সারি। কান্টোয়ের প্রসিদ্ধ 'বারামুলা' শ্রীনগরের রাজপথ মনে করিয়ে দেয়। আর ছিল 'পার্সিমম' গাছ ফলে তরা। পার্সিমম (এ হ'ল এর জাপানী নাম, আর এই নামেই এ ফল এখন সর্বত্র পরিচিত) ঠিক পাকা লাল টোম্যাটোর মত দেখতে আর খেতে গুড়ের মত মিষ্টি। সিয়ানে থাকতে সাধ মিটিয়ে আমরা পার্সিমম খেয়েছিলাম।

উষ্ণপ্রস্রবণটি চার-পাঁচটি শাখায় বিভক্ত হয়ে কয়েকটি চীনে মাটির টালি বাঁধানো সুন্দর চৌবাচ্চায় পড়ছে। খুব আরামে এখানে নাওয়া গেল, তারপর কাছেই একটু উঁচু জায়গায় উঠে সেইখানে পৌঁছলাম যেখানে ১৯৩৬ সালে চিয়াংকাই-শেক প্রথমে মার্কুরিয়ায় 'ওয়ারলড' চ্যাং সো-লিনের পুত্রের হাতে বন্দী হয়েছিলেন, তারপর তাঁর বিষম শত্রু 'কমিউনিস্ট'দের কবলে হস্তান্তরিত হয়ে-ছিলেন। সে যাত্রা চো-এন লাই চিয়াংএর প্রাণরক্ষা করেন।

সেদিন সেখানে নতুন চীনের জনসাধারণের মুক্তিবাহিনীর একটি ক্যাম্প দেখলাম। একটি সৈনিক পুরুষ আমাদের কিছু দূরে এক প্রকাণ্ড পাহাড়ের মত স্তূপ দেখালেন। ওটি হল চীনে প্রথম ইতিহাস যুগের সম্রাট চীনবংশীয় শি-হুয়াংটির (যাঁর বংশের নামে দেশটির নাম চীন হয়েছে) সমাধিস্থান। এই স্তূপ ইজিপ্টের পিরামিডের মত বিশালকায়। আজকাল যে ভূখণ্ডটিকে আমরা উত্তর চীন বলে থাকি—হোয়াং হো নদের চারিপাশে ও ইয়াং উ সির উত্তরে ভূভাগ—সবটাই শি-হুয়াংটির সাম্রাজ্যভুক্ত ছিল। প্রাগৈতিহাসিক যুগের চৌ নৃপতি বংশের (১১০০ B C) রাজত্বকালের অনেক নিদর্শন কাছাকাছি মাটি খুঁড়ে পাওয়া গেছে। হোয়াংহোর বাকের এই অঞ্চলটি হল চীনের ইতিহাসের ও সংস্কৃতির উৎপত্তি স্থান।

ভারত ও চীনের সম্পর্কেরও গোড়াপত্তন Changan (Sian) থেকেই আরম্ভ হয়েছিল। খৃষ্টাব্দ চতুর্থ শতাব্দীর শেষের দিকে ফাহিয়ান এইখান থেকে তাঁর ভারত-তীর্থযাত্রায় বেরিয়েছিলেন। চাঙ্গান নগরেই কুমারজীবী ঐ:পঞ্চম

শতাব্দীর গোড়াতেই বৌদ্ধ ধর্মের শতাধিক পুস্তক চীনা ভাষায় অহ্ব্যবাহ করেন। ভারতবর্ষ থেকে যত পণ্ডিত চীনে গিয়েছিলেন কুমারজীব তাঁদের মধ্যে জ্ঞান ও মনীষায় সর্বশ্রেষ্ঠ। Sianএ তখন এক তাতার নৃপতি রাজত্ব করছিলেন, তিনি কুমারজীবের পাণ্ডিত্য ও ব্যবহারে এমন মুগ্ধ হয়েছিলেন যে কুমারজীবকে একটি রাজকন্ডার সঙ্গে জোর করে বিয়ে দিয়ে দেন। কুমারজীব বৌদ্ধ ভিক্ষু, অনেক আপত্তি করেছিলেন, রাজার কাছে তাঁর আপত্তি টিকলো না। এইজন্য কুমারজীব বড় দুঃখে শিগ্গাদের বলেছিলেন যে আমি যা বলি তাই করো, আমি যা করি তা করো না।

আর সবার চেয়ে বড় কথা হল চাঙ্গান বা সিয়ান থেকে তীর্থযাত্রী-চুড়ামণি হিউয়েন সাং তাঁর ঐতিহাসিক ভারতযাত্রা আরম্ভ করেছিলেন (খৃঃ সপ্তম শতাব্দী)। বোলা বছর (৬৩০-৬৪৫ খৃঃ) ভারতের সর্বত্র ঘুরে হিউয়েন সাং সিয়ানে ফিরে এই নগরীতেই আমাদের দেশ থেকে যে অসংখ্য পুঁথি এনেছিলেন, সে সবার অহ্ব্যবাহ শুরু করেন। Tang সম্রাট এই গুরুত্বপূর্ণ কার্যের জন্য তাঁর প্রিয় বন্ধু হিউয়েন সাংকে চাঙ্গানের প্রসিদ্ধ Pagoda Ta yen-ta (ককণার মন্দির) গুঁর বাসের জন্য নির্ধারিত করে দিয়েছিলেন। এই প্যাগোডার প্রবেশদ্বারে সম্রাট তাই সুংএর আদেশ লিখিত দুটি শিলালিপি রয়েছে। লিপিকার চীনের একজন বিখ্যাত ক্যালিগ্রাফিস্ট। প্যাগোডাটি খুব উঁচু আর এর উপর তলা থেকে Wei নদীর আঁকাবাঁকা গতিপথ বড় সুন্দর দেখায়। আমাদের গাইড বললেন যে পুরাকালে এই জায়গাটিতে চাঙ্গানের কবিসমাগম হত—কবিরা তাঁদের সুধাপাত্র Weiএর জলে ভাসিয়ে দিতেন আর সঙ্গে সঙ্গে চলতে থাকতেন, যখন ওগুলি বেশ ঠাণ্ডা হ'ত তখন জল থেকে তুলে পান করতেন।

T'ang যুগ চীনের শ্রেষ্ঠ কবিদের (Li-po, Tu-fu, Po-chui প্রভৃতিদের) যুগ। হিউয়েন সাং মারা গেলেন আর তাঁর সমাধি এখানেই হবার কথা ছিল। কিন্তু T'ang সম্রাট বললেন যে সকালে উঠেই প্রিয় বন্ধুর সমাধি ঠিক সামনেই দেখতে চান না। তাই ঐ মহাভিক্ষুর চিতাভস্মরাশি রাজভবন থেকে আট-ন মাইল দূরে একটি বাগানের মধ্যে একটি মন্দিরে রাখা হয়েছে। আমরা সেখানেও গিচ্ছলাম। সমাধি-মন্দিরের সামনে ফুলবাগানে বেশ ফুল ফুটে আছে, একটি অতি বৃদ্ধ ভিক্ষু সেখানে জপ করছে, আর মন্দিরের ঠিক পিছনে একটি বড় প্রস্তরফলকে খোদিত হিউয়েন সাংএর আর তাঁর দুজন

সহযাত্রীর প্রতিকৃতি দেখা গেল, কাঁধে পুঁথির ভার আর পুঁথিগুলি যোদ বুটি থেকে বাঁচাবার জন্য তার ওপর ছাতা পিঠের সঙ্গে বাঁধা রয়েছে। নীচে লেখা ছিল বহু ঘুরে, মরুভূমি, পাহাড় পর্বত নদনদীর ওপারে, বহু রাজ্যে বহু তীর্থ স্থানে ইনি পর্যটন করেছিলেন। সেদিন হিউয়েন সাংএর কর্মস্থল আর লম্বাধি দেখে এসে বড় তৃপ্তি পেয়েছিলাম। তার পরদিন এখানকার পুরাতত্ত্ব বিভাগের মিউজিয়াম দেখলাম, এখানে সেই ‘শিলালিপি অরণ্য’ রয়েছে যার কথা অনেকের কাছে শুনেছিলাম। বহুকালের অসংখ্য শিলালিপি এখানে সংগ্রহ করা হয়েছে—তার মধ্যে একটি মনে হ’ল যেন আমাদের দেবনাগরী অক্ষরে লেখা। আর এইখানেই T’ang যুগের বিখ্যাত মার্বেলের ঘোড়ার ছয়টি প্রতিমূর্তি আছে আট হিসাবে যা খ্রৈষ্ট গ্রীক ভাস্করের সঙ্গে তুলনীয়। একটি ঘোড়া নাকি চুরি গেছে আর শোনা যায় সেটি আমেরিকার বোর্টন মিউজিয়ামে সংরক্ষিত রয়েছে। এই T’ang সম্রাটকে মধ্য-এশিয়ার কোনো করদ রাজ্য এই ঘোড়াগুলি উপহার দিয়েছিলেন। সম্রাট এই ঘোড়াগুলি এত ভাল-বাসতেন যে তিনি এদের খেত-মর্মরের প্রতিমূর্তি গড়ান।

সেদিন সন্ধ্যাবেলা আমরা একটি আড়াইশো বছরের পুরনো লামা মন্দির দেখতে গেলাম। ঋষ্ঠাধ্যক্ষ তিব্বতী লামা, সবল সুস্থ দেহ, চীন কংগ্রেসের সদস্য। ভারতের লিপিতে লেখা এখানে পুরাতন কাগজপত্র ইনি আমাদের দেখালেন আর কতকগুলি নকল আমাদের দিলেন। মঠের দেওয়ালে সুন্দর লতা উঠেছে, ফুলগুলি মুকুর মত—এই কি সংস্কৃত কাব্যের অতিথ্যাত মুক্তালতা? মন্দিরটির শাস্তিময় পরিস্থিতি বড় ভাল লেগেছিল।

রাত্রে আমাদের হোটেলে চীনের বিখ্যাত লোককথা ‘The Monkey’র পুতুল নাচ হ’ল। এই ‘Monkey’ যে-সে বানর নয়, ইনি হলেন আমাদের রামায়ণের হনুমান, হিউয়েন সাংকে তাঁর তীর্থপর্যটনে সাহায্য করছেন। আর ইনি হলেন বিদ্রোহের প্রতীক, দেবতাদেরও অত্যাচার সহ করতে পারেন না। ‘The Monkey’ মাওসেতুংএর বড় প্রিয় গল্প। সেই সন্ধ্যা বেলাই আমরা সিয়ান থেকে বেরিয়ে পড়লাম। রেলওয়ে স্টেশনে সিয়ান অধিবাসী ধারা আমাদের বিদায় দিতে এসেছিলেন, আমাদের তাঁদের ধন্যবাদ দিতে বলা হ’ল। আমি বললাম যেখানে কুমারজীব, ফাহিয়েন ও হিউয়েন সাংএর পদধূলি পড়েছে, সেখানকার প্রত্যেক ধূলিকণা আমাদের ভারতবাসীদের কাছে পবিত্র, মোটেই তুচ্ছ করবার জিনিস নয়। এ কথাটা সবায়ের ভাল লেগেছিল।

তার পরদিন ভোরে গাড়ি লোয়াং স্টেশনে থামলো। গাড়ির জানলা থেকে একটি সাদা রঙের বাড়ি দেখা গেল, আমাদের গাইড বললেন এটিই হ'ল যেত-অশ্বমঠ যেখানে সম্রাট মিংটি কান্তপ মাতঙ্গ ও তাঁর সঙ্গীকে তাঁর নিজ সাম্রাজ্যে অভ্যর্থনা করেছিলেন। তিনি তার কয়েক মাস আগে স্বপ্ন দেখেছিলেন যে সোনাল রঙের একটি দেবমূর্তি পশ্চিম দিক থেকে তাঁর রাজ্যে প্রবেশ করছেন। পরদিন সভাপতিগণেরা এই স্বপ্নের মানে বুঝিয়ে দিলেন যে ভারত-ভূমি থেকে বৌদ্ধ ধর্ম তাঁর সাম্রাজ্যের দিকে অগ্রসর হচ্ছে। তিনি তখন স্বদূর পশ্চিমে লোকলঙ্কার পাঠালেন যে যারা এই মহাব্রতে ব্রতী হয়ে পাহাড় পর্বত-মলভূমি পার হয়ে আসছেন, তাঁদের সাহায্য করবার জন্তে। এই সৈন্যদল পশ্চিম দিকে অনেকটা এগিয়ে দেখতে পেলো যে গোবি মহামন্ডর মধ্যে ছুটি বৌদ্ধ ভিক্ষু, একটি সাদা ঘোড়ার ওপর ধর্মগুরুক চাপিয়ে পূর্ব দিকে চলেছেন। চীনা সৈন্য তখন তাঁদের দুজনকে নিয়ে রাজধানীর দিকে রওনা হল। সম্রাটের কাছে থবর গেল। তিনি লোয়াংএ (কিছুদিনের জন্ত তখন এ নগরই দেশের রাজধানী ছিল) এঁদের জন্ত অপেক্ষা করলেন ও এঁরা এসে পৌঁছুলে এঁদের সাদা ঘোড়ার স্বতিরক্ষার জন্তে “হোয়াইট হর্স মোনাস্টারি” স্থানীয় বৌদ্ধ মঠ স্থাপন করলেন (একটি খুঁটাবো)। আমাদের গাড়ি এখানে বৈশিষ্ট্য থামলো না। আমাদের নেমে গিয়ে মঠ দেখা হল না।

তার পরদিন সকালে (২১শে অক্টোবর) আমরা ইয়াং সিকিয়াং পার হলাম। আমাদের রেলগাড়িটি মধ্যস্থান থেকে খুলে দু-ভাগ করা হল। তারপর দুটি বড় ‘টাগে’ এ দুটি ভাগ চড়িয়ে আমাদের নদী পার করা হল। আমরা গাড়ির জানলা দিয়ে এ দৃশ্যটি বেশ উপভোগ করলাম।

এবার আমরা শ্বানকিং (দক্ষিণ রাজধানী) পৌঁছলাম। এখানে একটি স্থানীয় হোটেলে ওঠা গেল। (এখানকার বিছানাও ‘আর্টিস্টিক’—এমন স্থানীয় কারুকার্যের নমুনা যে না ঘুমিয়ে দেখবার মতন।) তারপর পার্বত্য ছিলে সান-ইয়াট সেন মেমরিয়াল আমাদের দেখাতে নিয়ে গেল। উমাজী এখানে সান-ইয়াট সেনের সমাধির উপর পুষ্পমালা দিলেন। এখানকার ছুধারের গাছগুলি—সাইপ্রেস্ ‘উইপিং উইলোর’ মতন ভাল খোলা আর চেনারের সারিবদ্ধ লাইন (প্রত্যেক গাছে ঠিক পাঁচটি করে ডাল) বাস্তবিকই নতুন রকমের। এইখানে তখন একটি ক্রিসান্থিমাম্ শো হচ্ছিল। লতানে ক্রিসান্থিমাম্ এখানে প্রথম দেখলাম। চীনাদের মতে এই ফুল তারাই শত শত বৎসর

বস্তু করে এর বস্তু উন্নতি করেছে, জাপানীরা চীনের কাছ থেকে নিয়ে এর জন্তু জগতে নাম কিনেছে।

এখানে এই পার্শ্বপল্ হিলেরই আর একদিকে চীনের শেষ থাটি চীনা রাজ-বংশের মিং সম্রাটদের সমাধি আছে। পাহাড়ের গা দিয়ে আমাদের গাড়ি চললো অনেকগুলি পুরাতন ধ্বংসস্তুপের পাশ দিয়ে। এক জায়গায় আমাদের সন্মুখে ছিলেন একটি বিদুষী চীনা মহিলা। তিনি আমাদের একটি স্মারকস্তুপ দেখালেন। তাতে খোদাই আছে—‘সম্রাট কাংসি মিং সম্রাটদের গৌরবময় যুগের প্রশংসা করছেন।’ মহিলাটি বললেন যে লিপিটি ইতিহাসে একটি প্রায় অভাবনীয় ব্যাপার। সম্রাট কাংসি (১৬৬২-১৭২৩) হলেন মাঞ্চু বংশের মহাপরাক্রমশালী নৃপতি। এর সময় তিব্বত ও মঙ্গোলিয়া জয় করে মাঞ্চু-বংশ চীন সাম্রাজ্যকে এশিয়ার সবচেয়ে বড় ও সবচেয়ে পরাক্রান্ত দেশ করে তুলেছিলেন। আর মিং বংশ ধ্বংস করে মাঞ্চু চীন হস্তগত করেন। তাই মাঞ্চু সম্রাট যে এরকম করে মিং বংশের গুণকীর্তন করছেন সত্যিই এ এক অভাবনীয় ব্যাপার। এই অতি পুরাতন রাস্তায় অতি পুরাতন বিশালকায় উট, ঘোড়া প্রভৃতির মূর্তি আছে। সান-ইয়াট সেন্ মাঞ্চু সাম্রাজ্য পতনের পর এই সব ধ্বংসস্তুপের মধ্যে এসে উচ্চৈঃস্বরে ঘোষণা করেছিলেন যে চীন আজ বিদেশী মাঞ্চুদের হাত থেকে দেশকে উদ্ধার করেছে।

তার পরদিন সকালবেলা, আমরা রেনিং ফ্লাওয়ার হিলে (পুষ্পবৃষ্টি পাহাড়ে) চড়লাম। এখানে বহুশতাব্দী পূর্বে এক বৌদ্ধ ভিক্ষুর উপর স্বর্গ থেকে পুষ্পবৃষ্টি হয়েছিল, তারপর চিয়াং কাইশেকের সময় এইখানে হাজার হাজার কমিউনিস্টদের বধ করা হয়। এখানে নানা রঙের ছোট ছোট পাথরের ছড়ি পাওয়া যায়। আমরাও এক এক বাস্তু ছড়ি এখান থেকে এনেছিলাম। ঐ পাহাড়টির এখন শহীদ পাহাড় নতুন নাম হয়েছে।

ঐ বিদুষী মহিলার কাছেই শুনলাম যে মাঞ্চু সাম্রাজ্যের সময় থেকেই চীনা ভাষার মাধ্যমেই আন্তর্জাতীয় সব কাজ চলতো। তাই এখন বেশী কিছু ভাষা-সমস্যা নেই—তবে কয়েক বছর হয়তো ছুটি ভাষার (একটি দেশের আর একটি বিদেশীয়) ব্যবহার করতে হবে। (আগে ইংরাজির চলন ছিল, দিন কতক উর্দুশ'শ উনপঞ্চাশের পর রুশ ভাষা ইংরাজির জায়গা প্রায় নিয়েছিল।) গ্লান্‌কিংএ আমাদের একটি ভোজ দেওয়া হয়। এই ব্যাকোয়েটে দু-তিনটি প্রফেসরের সঙ্গে দেখা হল। তাঁরা ভাল ইংরাজি জানেন। তাঁরা আমাদের টাইপিং বিক্ষোভের

কথা বললেন। সে এক ভীষণ কাণ্ড হয়েছিল, এক কোটি লোকের প্রাণনাশ হয়েছিল। বিখ্যাত চীনেমাটির 'প্যাগোডা' (জগতে অতুলনীয়) এই সময়েই ধ্বংস হয়ে যায়। এই টাইপিং বিক্ষোভের সঙ্গে একশ বছর পরের মাও-এর কমিউনিস্ট অভ্যুত্থান অনেক বিষয়ের সাদৃশ্য রাখে। এই সময়েই ভারতে সিপাহী স্বাধীনতা সংগ্রাম আরম্ভ হয়। চীনা প্রফেসররা আমাদের বলেন যে এই সিপাহী যুদ্ধ চীনকে 'আফিং সমরে' কিছুদিন ইয়োরোপীয় মহাশক্তিদের (বুটেন, ফ্রান্স) হাত থেকে বাঁচিয়ে রেখেছিল। বৃটিশ সৈন্য ভারতবর্ষ ছেড়ে কোথাও যেতে পারেনি। বছর কয়েক আগে (১৯৬৮ সালে) শুনেছিলাম যে মাও ভারতে পিকিং দূতাবাসে সিপাহী সংগ্রামের শেষ দিকটার heroine কাঁসীর রাণীর সিনেমা দেখে খুব খুশী হয়েছিলেন। অনেক রাত পর্যন্ত দূতাবাসে ছিলেন ঐ ছবি দেখবার জন্য।

২৩শে অক্টোবর আমাদের রেলগাড়ি শাংঘাই স্টেশনে পৌঁছল। সেখান থেকে বাসে ও মোটার করে আমরা একটি চোদ্দতলা স্কাইস্কেপার কিংকং হোটেলে গিয়ে উঠলাম। শাংঘাই চীনের সবচেয়ে বড় শহর, বাষট্টি লক্ষ লোকের বাস, তার মধ্যে আট লক্ষ শুনলাম ছাত্রছাত্রী। মাঞ্চু শাসন কালের শেষ দিকে শাংঘাই চীন থেকে বিচ্ছিন্ন হয়ে বুটেন ও ফ্রান্সের কুক্ষি-গত হয়ে পড়ে। এখানে একদিকে যেমন চরম বিলাসিতা দেখা যেত অন্যদিকে তেমনি ভীষণ দারিদ্র্যও তারই সঙ্গে সঙ্গে বর্তমান ছিল। এখানকার bar নাকি পৃথিবীর সবচেয়ে বড় ও জমকালো ছিল ও এই শহরেই শীতকালে শতাধিক ভিথারীর মৃতদেহ রোজ সকালে ফুটপাতে দেখা যেত। শাংঘাইয়ের গুণ্ডা তো গুণ্ডা-জগতে অধিতীয় ছিল—আর শাংঘাইয়ের অভ্রভেদী অট্টালিকাও এশিয়ার প্রথম Skyscraper। ১৯৪২এ ইয়োরোপীয় ধনকুবেররা যখন এখান থেকে চলে গেলেন, আর বিলাসসামগ্রীর চাহিদা যখন আর রইল না, তখন বহির্জগৎ ভেবেছিল যে শাংঘাইয়েরও পতন অনিবার্য। কিন্তু তা হয়নি—শাংঘাই এখন বিলাসপণ্যের জায়গায় চীনের কোটি কোটি গ্রামবাসীর উপযোগী দৈনন্দিন ব্যবহারের জিনিস তৈরী করে আগেকার সমৃদ্ধি অক্ষুণ্ণ রেখেছে। সত্যিই এ এক আশ্চর্য পরিবর্তন। ভিথারী ও বেস্তা—দুই-ই এখানে কয়েক লক্ষ ছিল—এখন আর এ শহরে দেখা যায় না।

এই শাংঘাইয়ে ১৯২৫ সালে সেই ঐতিহাসিক ধর্মঘট হয়েছিল যা হ'ল চীনে সাম্যবাদের (Communism) প্রথম আবির্ভাব। এই শহরেই

১৯২৭ সালে চিয়াং কাই-শেক্ রক্তগন্ধা বইয়ে এই কমিউনিজম তখনকার মত গুঁড়িয়ে দেন। চো এন্-লাই কোনো রকমে গ্রাণ বাঁচিয়ে শাংঘাই থেকে পালান। তারপর জাপানীদের হাতে পড়ে ইয়োরোপীয় ও চীনেদের সমান দুর্দশা হয়েছিল—ও বিষয়ে জাপানীরা ‘সাম্যবাদ’ ঠিক বজায় রেখেছিল।

আমরা সেদিন মাদাম সানইয়েং সেনের নামে স্থাপিত বাচ্চাদের নার্সারি স্কুল দেখলাম। বেশ ছোট থেকে সাত-আট বছরের বালক-বালিকারা খুব খেলাধুলা, নাচগান করলো। বাচ্চাদের স্বাস্থ্য দেখবার মত। তারপর আমরা Doctor Sun yat Senএর (নিজের) বাড়ি দেখতে চললাম। বাড়িটি শহরের গোলমাল থেকে দূরে—সত্যিই যেন একটি শান্তিনিকেতন। এর একটি ঘরে মাদাম সান ইয়েং সেনের একটি বিয়ের সময়ের ছবি আছে। ছবিটি বড়ই সুন্দর, উপকথার রাজকন্ডার মত।

এরপর শাংঘাইয়ের জগৎবিখ্যাত ‘বাঁধ’ দেখলাম। একদিকে স্বাইক্রোপার (ব্যাক, ব্যবসার কেন্দ্রের অভ্রভেদী অট্টালিকা) আর একদিকে জাহাজ, junk (জঙ্ক—চীনা বড় নৌকা) ছোট নৌকা ভরা Whampoa নদী। আগেকার মত ব্যস্তসমস্ত ভাব হয়ত আর নেই, তবুও ‘Bund’ আমাদের খুব ভাল লাগলো। এই Whampoa নদীরই তীরে আর এক জায়গায় সেই ঐতিহাসিক Military Academy ছিল যেখানে Chiang Kai-shek, Borodin, Chou En-lai আর Ho Chi Minh দিন কতক একসঙ্গে কাজ করে-ছিলেন।

‘বাঁধ’ থেকে গেলাম ‘সুব ভবনে’। মার্বেলের মেঝেওয়ালা এই বিরাট ভবনটি ছিল একটি বৃটিশ ধনকুবেরের। এখন এটি হয়েছে স্কুলের ছাত্রছাত্রীদের বড় একটি ‘ক্লাব’, নানা রকমের খেলার (ঘরের ও বাইরের) এখানে বন্দোবস্ত আছে। সুন্দর পড়বার ঘর আর লাইব্রেরী দেখলাম। অনেক ছেলেমেয়েরা চীনা বই, খবরের কাগজ, পত্রিকা প্রভৃতি পড়ছে। একটি বড় Galleryতে অনেক যন্ত্রপাতির ছোট ছোট নমুনা সাজানো আছে। আর প্রকাণ্ড ‘হল’টিতে জোরে বাজনা বাজছে ও নাচ হচ্ছে। আমাদের দলের কেউ কেউ ছেলেমেয়েদের সঙ্গে বেশ নাচলেন আর তার পুরস্কার হিসাবে তাঁদের Young Pioneersএর Badge ও tie দেওয়া হল। আমাদের সত্যকেতু বিভালঙ্কার মসুরী লোক, উনি বললেন যে মসুরীতে অনেক বড় বড় ‘বাজলো’ এখন খালি পড়ে থাকে—ওদের দু একটিকে এরকম ‘সুবভবন’ করে দেওয়া উচিত।

শাংঘায়ের ভারতীয় Consul General শ্রীমুরগেশ ও তাঁর সহধর্মিণী আমাদের সে সন্ধ্যায় খোঁসা, ইভলি দিয়ে জলযোগ করালেন, বড় ভাল লাগলো। ওঁদের ছোট মেয়েটি ভরতনাট্যম নাচ নাচলে—চীনে ও নাচ দেখবো ভাবিনি।

২৫শে অক্টোবর—শাংঘায়ের কাস্টমস্ হাউসের অধ্যক্ষ আমাদের কিংকং হোটেলে শাংঘায়ের অর্থনৈতিক পরিবর্তনের কথা শোনালেন। আগে এ মহানগর বহির্বর্ণিজ্যের ওপর নির্ভর করতো। ইয়োরোপের বিলাসপণ্য আসতো চীনে ইয়োরোপীয়ান প্রবাসীদের ও কিছু অল্পসংখ্যক ধনী ও শৌখীন চীনা পরিবারের জন্ত, আর চীন থেকে রপ্তানি হ'ত কাঁচা মাল, বিদেশীরা বেশ সস্তা দামে (গ্রাযা মূল্যের চেয়ে বেশী সস্তা দামে) কিনতে পারতো। এখন এই বহির্বর্ণিজ্য বন্ধ হয়ে গেছে। এখানে এখন বড় বড় কলকজা তৈরী হচ্ছে—সমস্ত দেশটার জন্ত, আর এই কাজের জন্ত কাঁচা মাল সমস্ত দেশটা থেকে আসছে। শতকরা আশি ভাগ পাইকারী ব্যবসা সরকারের হাতে, খুচরা ব্যবসা অর্ধেক সরকারী অর্ধেক বেসরকারী। চাল, কাপড়, রাঁধবার তেল এসব একসঙ্গে ration করা।

সে সন্ধ্যায় ছিল দেওয়ালী, আমরা ভারতীয় Consulate Staffএর শ্রীয়ায়চৌধুরীর বাড়ি দেওয়ালীর ভোজ খেলাম। চৌধুরী-গৃহিণী বললেন যে দুধ, কফি, মাখন বড় দামী, চাকরের মাস্তিনা মাসিক ষাট টাকা (খাবার খরচ তার নিজের), মাছের দর কলকাতারই মত, ভেড়ার মাংস ছাগ-মাংসের চেয়ে সস্তা।

সে সন্ধ্যায় আমাদের হোটেলে শাংঘাই Fuh-tan University-র ইতিহাসের অধ্যাপক Shang Sze Tsai চীনের আধুনিক ইতিহাসের অনেক কথা আমাকে বললেন। হোটেলের Loungeএ ভিড় ছিল বলে আমার ঘরেই তাঁর সঙ্গে কথাবার্তা হল। বিষয়টি ছিল তা: সান্ ইয়েং সেন ও চীনের মুক্তিসংগ্রাম। ওঁর মতে সান্ ইয়েং সেন বিপ্লবী ছিলেন না, তিনি reformer ছিলেন, সংশোধন চেয়েছিলেন, আমূল পরিবর্তন চান নি। অনেকদিন তিনি আমেরিকার কাছে অনেক আশা করেছিলেন। পরে বাধ্য হয়ে রাশিয়ার দিকে ঝোঁকেন। তাঁর ঐতিহাসিক Three peoples principles San Min Chu-i (of the people, by the people, for the people) হ'ল জাতীয়তা, গণতন্ত্র ও বোধ হয় সমাজবাদ (Socialism)। এই Socialism আস্তে আস্তে সাম্যবাদের (Communism) দিকে এগুচ্ছিল। তবে তিনি

Classwar (সমাজের মধ্যে শ্রেণীসংগ্রাম—মধ্যবিত্তদের বিরুদ্ধে শ্রমজীবীদের সংঘর্ষ) মানতে চান নি। তিনি বুদ্ধিজীবীদের ওপর নির্ভর করতেন—মাওসে-তুংএর ভরসা ছিল কৃষকদের উপর। তাঁর মিং সম্রাট বংশের উপর খুব ভক্তি ছিল, পুরাতনকে বাদ দিতে তিনি চাইতেন না। সত্যকথা বলতে সান্ ইয়েং সেন ভাবুক, গভীর চিন্তাশীল ব্যক্তি ছিলেন—কর্মী ছিলেন না। সান্‌এর গণতন্ত্রের আদর্শ ছিল আমেরিকার পৃথক পৃথক ক্ষমতাকেন্দ্র—শাসন বিভাগ, ব্যবস্থাপক বিভাগ ও বিচার বিভাগ। মাওএর নিউ ডেমক্রেসিতে এ পৃথক ব্যবস্থা মোটেই নেই। মাওএর হ'ল 'সেন্ট্রালাইজড ডেমক্রেসি'—কেন্দ্রীভূত গণতন্ত্র। যদি সান্ আরও কিছুদিন বাঁচতেন হয়তো কমিউনিজমের দিকে আরও খানিকটা এগুতেন।

লালচাঁন ভিতর বাহির সব বদলাচ্ছে—কি করে এত খরচ করতে পারে এর সেই জবাব পেলাম যা পিকিংএ শুনেছিলাম—সব কলকারখানার কাজ সরকারের হাতে তুলে দেওয়া এই হল এই সমস্তার সমাধান আর সেই সঙ্গে দেশের লোকের 'ডিটারমিনড' উইল—একতা আর উন্নতির আন্তরিক সংকল্প।

২৭শে অক্টোবর আমরা শুনলাম নেহরুজী আজ শাংঘাইয়ে আসছেন। টাইওয়ান (ফরোসা) কিছুদিন থেকে খুব ঘন ঘন প্লেন চীনের ওপর চালাচ্ছিল—সেই জন্তে তাঁর চীনে ভ্রমণ সম্বন্ধে খবরের কাগজে কিছু থাকতো না। আমরা শাংঘাই বিমানবন্দরে গেলাম। সেখানে ছাত্র ও শ্রমজীবীদের বেশ ভিড় জমেছিল। নেহরুজী প্লেন থেকে নেমে ঘুরে ঘুরে ছাত্রমণ্ডলী ও শ্রমিকদলগুলির সঙ্গে দেখা করলেন। শাংঘাইবাসী-ভারতীয়েরা (বেশীর ভাগ শিখ) তাঁর অভ্যর্থনা করলেন। সেই সন্ধ্যায় আমাদের কিংকং হোটেলের ঠিক সামনে একটি বড় প্যাভেলিয়নে নেহরুজীকে শাংঘাইবাসীরা খুব ধুমধামে সংবর্ধনা দিলেন। সেইদিনই সকালবেলা প্যাভেলিয়নটির সামনে বড় বড় পপুলার গাছ মাটি খুঁড়ে লাগানো হয়েছিল—ওরকম বড় গাছ যে ওরকম করে যেখানে ইচ্ছা লাগানো যেতে পারে জানতাম না। নেহরুজী বক্তৃতা দিলেন ও আমাদের পূর্বপরিচিত পরঞ্জে সঙ্গে সঙ্গে চীনে ভাষায় তার অহুবাদ সমাগত শ্রোতৃমণ্ডলীকে শোনালেন। শাংঘাইয়ের গণ্যমান্ত কয়েকজন নাগরিক নেহরুজীর ভাষণের উত্তর দিলেন। টাইওয়ানের (ফরোসার) প্লেন কাছে কাছেই উড়ছিল—তাই বেশী কিছু করা হয়নি। মাঝরাত্রে আমরা শাংঘাই ছাড়লাম। চীনের সবচেয়ে বড় শহর ছেড়ে এবার আমরা চীনের একটি সবচেয়ে সুন্দর শহর হ্যাংকো-এ তার পরদিন সকালে

পৌছিলাম। “ওপরে স্বর্গ নীচে হ্যাঞ্চে আর স্বচো”—একটি পুরানো চীনা প্রবাদ। সকালবেলা বিছানা থেকে উঠে গুনলাম যে ব্রেকফাস্টের জন্ত দু ফার্লিং দূরে রান্নাবাড়ি ও খাবার ঘরে যেতে হবে। খাবার ঘরের সামনে সবিস্ময়ে দেখলাম যে সামনে রয়েছে একটি সুন্দর খুব বড় হ্রদ, তার চারিদিকে যতদূর দেখা যায় ‘পার্ক’র মত মাঠ, গাছপালা আর হ্রদের ওদিকটায় পাহাড়—মাঝে মাঝে পাহাড়ের গায়ে উঁচু বৌদ্ধ ‘প্যাগোডা’। কাশ্মীরের শিকারার মত ছোট ছোট বোটেরে আমরা হ্রদে অনেকগুণ ঘুরলাম। নৌকাতেই হ্যাঞ্চার প্রসিদ্ধ সবুজ চা খাওয়া হল। হ্রদটির ঠিক মাঝখানে উঁচু বাঁধ দেওয়া আছে—তার ওপর দিয়ে মোটর ইত্যাদি বেশ যাতায়াত করে। মধ্যযুগের বিখ্যাত কবি পো চুইএর নামে এই বাঁধের নামকরণ হয়েছে। আমরা ঐ পো চুই রোড দিয়ে হ্রদের অপরপাশে পৌঁছলাম। ওখানকার পাহাড়গুলি সবুজ গাছে ঢাকা, মধ্যে মধ্যে ছোট জল-প্রপাত ঝকঝক করছে আর অনেক গুহা রয়েছে পাহাড়ের গায়ে, তার মধ্যের বৌদ্ধ মূর্তিগুলি নীচে থেকেও কিছু কিছু দেখা যায়। প্রবাদ এই সমস্ত পাহাড়টি উড়তে উড়তে ভারত থেকে এখানে এসেছিল।

এই বিশালকায় পাহাড়ের তীরে একটি খুব পুরানো, বড় বৌদ্ধমন্দির দেখা গেল; এখন গুটি ভাল করে মেরামত করা হচ্ছে। এইখানে সেবারকার চীন যাত্রায় নেহরুজী একদিন ছিলেন। সন্ধ্যাবেলা আমরা এখানকার আর একটি পুরানো বৌদ্ধ মন্দিরে ঢুকলাম। প্রবাদ এখানে একটি ভিক্ষু এসেছিলেন, তাঁর ব্যবহার ছিল অদ্ভুত, যদিও তিনি পাগল নন। একদিন তিনি খুব নাক ডাকিয়ে ঘুমুচ্ছিলেন এই মন্দিরের উঠানে, সেই রাত্রে আগুন লেগে মন্দিরটি পুড়ে গেল। মন্দিরের লোকজনের সন্দেহ হয় যে এই ভিক্ষুরই অসাবধানতায় আগুন লাগে। ভিক্ষুকে বলা হয় যে মন্দিরের পুনর্নির্মাণ কাজে সাহায্য কর, নয়তো এদেশ থেকে তোমাকে তাড়িয়ে দেওয়া হবে। এই হুকুম শুনে ভিক্ষুটি আবার নাক ডাকিয়ে ঘুমতে লাগলেন আর মন্দিরের উঠানের কুয়ো থেকে ইট কাঠ হুড়হুড় করে বেরুতে লাগলো। ভোর হবার আগেই দেখা গেল যে মন্দিরটি আগের চেয়ে অনেক ভাল হয়েছে। সূর্য উঠলে ভিক্ষুও উঠলেন আর বললেন যে কে বললে মন্দির পুড়ে গেছে। আমরা এই কুয়ো দেখেছি—এর ভেতরে জলেতে স্নেহ একটা আলো ঘুরছে। এই ভিক্ষুটি (যিনি পাগল নন কিন্তু খার ব্যবহার ছিল অদ্ভুত) অনেক গল্প হ্যাঞ্চে-এ আজও শোনা যায়।

এই হ্রদের আর একদিকে আমরা ‘একেবারে একাকী’ পাহাড়ে তার পরদিন

গেলাম। এখানে কবি Lung-fa আলুচারফুল ও সারসদের বিষয় সুন্দর কবিতা লিখেছিলেন। সারসরা কবির খুব সেবা করতো, আলুচারফুল ছিল কবিপত্নী। সুউৎসবের এক সম্রাটও এই 'একেবারে একাকী' পাহাড়ে এসে রাজকাৰ্য থেকে বিশ্রাম করতেন। পাহাড়ের গায় ধাপে ধাপে ফুলবাগান নেমে গেছে। এখানে peony ফুলের চারা দেখলাম, তখন ফুলের সময় নয়। এই peony হ'ল চীনের 'জাতীয় ফুল'—খুব বড় স্থলপদ্মের মত। পাহাড় থেকে নেমে একটি লতাপাতা ঢাকা ছোট মন্দিরের উঠানে একটি বেদীর ওপর Han যুগের (১৭০০ বছর আগের) একটি লোহার জলভরা গামলা রয়েছে। গামলার দুটি handle ঘষলে ঐ গামলার জলে যেন ঘূর্ণি ওঠে, ছোট ছোট ঢেউয়ের মাথায় ফেনা দেখা যায়। আমরা handle ঘষলে কিছুই হ'ল না। আমাদের গাইড হাত দিলেই জলে ঢেউ ফেনা ঠিক ঠিক হ'ল।

কাছেই একটি Chrysanthemum ফুল ভরা বাগানে সুউৎসবের সাজাজ্যের একজন বিখ্যাত সেনাপতির মূর্তি আছে। বিশ্বাসঘাতক কয়েকজন সভাসদ ঐকে হত্যা করেছিল। এই বিশ্বাসঘাতকদের মূর্তি এখানে আছে। সেইসব মূর্তির ওপর থুথু ফেলতে হয়। এখানে একটি Chrysanthemum ফুলগাছে দুশোর বেশী কুঁড়ি দেখলাম। তবে ফ্রেমের উপর স্তরে স্তরে কুঁড়িগুলি সাজানো রয়েছে। এসব বাগানের মধ্যে জল যাচ্ছে বেশ খরশ্রোতে, আর সেই শ্রোতে অসংখ্য লাল মাছ দেখা গেল। শ্রোতের জলে ওরকম মাছ আর কোথাও দেখিনি।

Hanchow পুতুল (নরম রঙ্গীন পাথরের), জালের ঢাকনা দেওয়া বেতের বুড়ি (অনেক জিনিস নেওয়া যায়), রেশমের বোনা ছবি, আরও অনেক কারু-কার্ণের জগ্রে আর তার হৃদ ও বাগানের জগ্রে চীনের কাশ্মীর নাম অর্জন করেছে।

তিরিশে ও একত্রিশে অক্টোবর—আমরা গাড়িতেই কাটলাম। এখন ফেব্রুয়ারি পালা। দক্ষিণের Cantonএ যাচ্ছি। গাড়ির জানলা দিয়ে দেখা গেল উঁচু পাহাড়ের নীচে দিয়ে সুন্দর একটি নদী যেন আমাদের সঙ্গে সঙ্গে চলেছে। এইটিই হ'ল Pearl নদী—নীচে গিয়ে Cantonএর মধ্যে দিয়ে সমুদ্রের দিকে এগুবে। গাড়ির বসবার ঘরে চীনে যা যা আমাদের মনোযোগ আকর্ষণ করেছে সেই সেই বিষয়ে আলোচনা করা গেল। ●

৩১শে সন্ধ্যায় Cantonএ পৌঁছলাম। আমাদের বাসস্থান ছিল Victory হোটেল, Pearl নদীর একটি খালের উপর। হোটেলের হলে একটি দু-তিন

ফুটের বামন গাছ ছিল অনেকটা আমাদের বাঙ্গলা 'ঞ'র আকারের। চীনের ঐ অক্ষরটি হ'ল—কেবল অক্ষর নয় পুরো একটি কথা, আর সেই কথার মানে হল শান্তি।

১লা নভেম্বরে আমরা সব আগে গেলাম Yellow Flower Hill Memorialএ। এইখানে ১৯১১ সালে চীন বিপ্লবের প্রথম দিকে বাহাদুরজন শহীদ প্রাণ দিয়েছিল। আমেরিকাবাসী চীনেদের অর্থসাহায্যে এই স্মারক ভবনটি তৈরী হয়। এখানে একটি আমেরিকান স্টাইলে স্বাধীনতার স্ট্যাচু আছে।

তারপর আমরা গেলাম Mao Tse Tung's Peasant Training Centre-এ। এখানে মাও কৃষকদের শিক্ষা দিতেন—লেখাপড়া, সাম্যবাদ ও গেরিলা যুদ্ধ কৌশল। মাওয়ের ক্লাসরুম আমাদের দেখানো হ'ল। তাঁর চেয়ার টেবিল এখনও সযত্নে রাখা আছে।

বাসে চড়ে পাহাড়ের উপর Sun Yat-sen Memorial Tower দেখতে গেলাম। নীচেই বৃহৎ স্টেডিয়াম, পঞ্চাশ হাজার দর্শক বসে খেলা দেখতে পারে। পাশেই মিং যুগের পাঁচতলা একটি অট্টালিকা—সে পুরানো যুগের পাঁচতলা এ রকম বাড়ি খুব কমই দেখা যায়। ফেরবার সময় দেখলাম সান্ ইয়েং-সেন হল, পুরাতন ও নতুন স্টাইলের সংযোগে নিমিত। এখন থিয়েটার হয়েছে। চারিদিকে কাঞ্চন ফুলের (কচ্নারের) গাছ ফুলে ভরে ছিল—হেমন্ত কালে এই কচ্নার ফুলের খুব সুগন্ধ।

Canton হ'ল জগতের সর্বোৎকৃষ্ট লিচুর জায়গা। এইখান থেকেই লিচু আমাদের দেশে গিচ্ছিল। এখানের একটি জলাশয়ের নাম Lichee Bay। এরই চারিদিকে এখানকার জগৎজোড়া নামের লিচু। আমরা তো লিচুর সময়ে যাইনি—আমরা Cantonএ লিচুর মোরব্বা (চিনিতে পাক করা লিচু) খেয়েছি।

সান্ ইয়েং-সেন্ ইউনিভার্সিটিতেও আমাদের গাইডরা আমাদের নিয়ে গিচ্ছিলেন। এখানে লাইব্রেরিতে অনেক ইংরেজি বই (চীনে এই প্রথমবার) দেখলাম। একটি বর্ষাঙ্গী ইংরাজ মহিলা এই ইউনিভার্সিটির Staff-এ ছিলেন।

এই Canton ভারত-চীনের আর একটি সংযোগ স্থল। যারা সমুদ্র পথে ভারত চীনের মধ্যে যাতায়াত করতেন—তাঁরা Cantonএ আসতেন বা এখান থেকে যেতেন (Gunavarman, I-tsing প্রভৃতি)। স্থলপথের যাতায়াতের রাস্তা ছিল—চাঙ্গান (সিয়ান)।

national Studiesএ কাজ হ'ল South East Asiaর ওপর কয়েকটি ছাত্র নিয়ে ও সব দেশের বর্তমান রাজনৈতিক পরিস্থিতির ওপর রিসার্চ করা। দেশ তো অনেকগুলি দক্ষিণ পূর্ব এশিয়ার—আমি তার মধ্যে Indochina ও Indonesia নিয়ে কাজ আরম্ভ করলাম। ক্যাম্বোডিয়া (কম্বুজ), জাভা, সুমাত্রা নিয়ে তিরিশ বছর আগে ফ্রান্স ও ইংলণ্ডে আমার 'থিসিস' লিখেছি—এ সব জায়গার আধুনিক অবস্থার বিষয় আমার খুবই ভাল লাগবার কথা—আমিও খুব আগ্রহে এ সব কাজ শুরু করলুম। আমার ছাত্ররাও সৌভাগ্যবশতঃ পরিশ্রমী ও উৎসাহী বেরলো। তার মধ্যে ডাঃ বিশাল সিং আমার ইন্টারন্যাশনাল স্টাডিজ থেকে অবসর নেওয়ার পর আমারই পদে নিযুক্ত হয়েছে। দুঃখের বিষয় শ্রী বমব্‌ওয়াল, যাকে ভিয়েটনামের বিষয় গবেষণা করতে পাঠানো হয়েছিল, সে সেখানে গিয়ে ইন্টারন্যাশনাল কমিশনে (যার অধ্যক্ষ ভারতেরই এক উচ্চপদস্থ কর্মচারী ছিলেন) এত গুরুত্বপূর্ণ কর্মে ব্যস্ত হ'ল যে থিসিসের কিছুই করে উঠতে পারল না। Bombwalএর যেমন ইংরাজি লেখা ভাল ছিল তেমনি ছিল তার 'ফ্রেঞ্চ' ভাষার উপর দখল। আমি বড়ই আশা করেছিলাম যে ওর ভিয়েটনামের থিসিস্ গবেষণা কাজের একটি উৎকৃষ্ট নিদর্শন হবে। Dr. Bombwal এখন হরিয়ানার একটি গভর্ণমেন্ট কলেজের প্রিন্সিপ্যাল। ক্যাম্বোডিয়ায় আধুনিক ইতিহাসের থিসিস্ লিখে ভি. এম. রেড্ডি বেশ নাম করেছে। কয়েকমাস হ'ল ক্যাম্বোডিয়া ও প্রিন্স সিহাহু ক শীর্ষক যে বই লিখেছে সেটি আমাকে উৎসর্গ করেছে। ইন্টারন্যাশনাল স্টাডিজের স্থিতি আজ দশ বছর পরেও আমার মনে খুব উজ্জ্বল রয়েছে। আমার সহকর্মী অধ্যাপকদের মধ্যে কয়েকজন তো বিখ্যাত ব্যক্তি ছিলেন—যেমন সর্দার পাণিকার (কে এম পাণিকার)। তিনি ফ্রান্সে ভারতের দূত হয়ে যাবার পর তাঁর জায়গায় এলেন ডাঃ তারাচন্দ। জাপানী প্রফেসর ইনোকি, ডাঃ আলীম (এখন আলিগড় বিশ্ববিদ্যালয়ের ভাইস চ্যান্সেলর), প্রঃ হুবিমল মুখার্জি (এখন ইন্টারন্যাশনাল মনিটরি ফাওন্ডে ইনি আছেন), প্রঃ রামাণি (এখন স্কুল অফ ইন্টারন্যাশনাল স্টাডিজের ডীন) প্রভৃতি। প্রঃ পন্নাই (সেক্রেটারি জেনারেল আই. বি. ডব্লিউ. এ.), ডাঃ আশ্লা ভোরাই (ডিরেক্টর আই. এম. আই. এস.) এঁরা স্কুল কর্তৃপক্ষের লোক হলেন। তবে এঁদের সঙ্গেও আমার সৌহার্দ্যের সম্বন্ধই ছিল। ১৯৫৫-১৯৬১—এই ছয় বছর ইন্টারন্যাশনাল স্টাডিজের ছাত্র ও সহকর্মীদের কাছ থেকে যে আশাতীত ভাল ব্যবহার পেয়েছিলাম, তার জন্যে জীবনের এই অংশটি বাস্তবিক বড়ই ভাল

ভাবে কেটেছিল। খুব অল্প সংখ্যক ছাত্র আর ভারতের সব প্রদেশের এরা হল বাছা বাছা ছাত্র আর তাদের সঙ্গে তাদের ও আমারও মনোনীত বিষয় নিয়ে কাজ। এই কাজের জন্ত ইণ্ডোনেশিয়া ও ইণ্ডোচায়নার কয়েকটি রাষ্ট্রের দূত ও কন্সাল প্রভৃতির সঙ্গে আলাপ পরিচয়, নতুন ভাষা শেখবার চেষ্টা—এ সব নিয়ে ব্যস্ত থাকায় এ সময়টা মনের আনন্দেই কেটেছিল। শিক্ষক জীবনের গোড়া থেকেই এ রকম কাজ পেলে মনে হয় আমি অনেক দিকে খুব এগুতে পারতাম। আমার সাধনার বিষয় ‘এশিয়ার নব যুগ’ সত্যই যথোচিত রূপে সিদ্ধ হত।

দিল্লীতে থাকবারও প্রথম দিকটায় খুব স্ববিধা হয়েছিল। ইন্টারগ্যাশানাল স্টাডিজ তখন ছিল সাফ্র হাউসে। তার কাছেই কন্সটিটিউশন্ হাউসে লোক-সভার (পার্লিয়ামেন্টের) সদস্যরা থাকতেন। সেখানে কিছু ঘর খালি থাকলে কিছু অল্প ব্যক্তিও থাকতে পারতেন। প্রায় আড়াই বছর আমি ও আমার স্ত্রী কন্সটিটিউশন্ হাউসে ঘর নিয়ে ছিলাম। এখানেই খাবারদাবারের বন্দোবস্ত ছিল। আমরা চীন রাজ্যের নেত্রী উমা দেবীর (পণ্ডিত নেহরুর বৌদিদির) ডাইনিং হলের টেবিলে সীট পেয়েছিলাম। সেই টেবিলে সিতার্মো-এর মহারাজ কুমার রঘুবীর সিং বসতেন। তিনি ভারতের মধ্যযুগের ইতিহাস বিষয়ে সত্যই বিশেষজ্ঞ ছিলেন। দিল্লীতে বাইরে থেকে অনেক গণ্যমান্য ব্যক্তি আসতেন, তাঁদের মধ্যে অনেকেই এই টেবিলেই খাওয়াদাওয়া করতেন। অনেকের সঙ্গে এই ডাইনিং হলে পরিচয় হয়েছিল। উমাদেবী ও আমাদের দুজনকে বাড়ির লোকের মত দেখতেন। মীরট থেকে কেউ এলে এখানে তাঁদের জন্ত ঘরেরও বন্দোবস্ত হয়ে যেত—হুতরাং কোনো অস্ববিধাই হত না। বিজু মীরা হুটু প্রায়ই আসতো, নাতি-নাতনীরা দিল্লী বেড়িয়ে যেত। বেয়াইবাড়িও (শৈলেশ রায় মশায়ের বাড়ি) কাছেই ছিল, প্রায়ই যাতায়াত হত। সে কন্সটিটিউশন হাউস আর নেই—সব ভেঙেচুরে চার-পাঁচতলা অট্টালিকা তৈরী হয়েছে। আমরা কিন্তু পুরানো বাড়িতে বেশ স্বখে ছিলাম।

১৯৫৭ মে মাসে ইন্টারগ্যাশানাল স্টাডিজের খবর এল যে পিনাঙ্গে সাউথ ইন্সট এশিয়ান হিস্ট্রী কন্ফারেন্সের অধিবেশন হবে। ওরা আমাদেরও ঐ সভায় যোগদান করতে নিমন্ত্রণ করেছিল। ইন্টারগ্যাশানাল স্টাডিজ, দিল্লী, আমাকে ওখানে পাঠানো স্থির করলেন—তবে খানিকটা খরচ আমাকেই দিতে হবে এই শর্তে। আমি তাতে কোনো আপত্তি করলাম না। ইণ্ডিয়ান এয়ার লাইন্স পেনে কলকাতায় পৌঁছুলাম, সেখান থেকে বি. ও. এ. সি. পেনে আমাকে ব্যাঙ্কু

(থাই রাজধানী) নিয়ে যাবে। কলকাতায় বি. ও. এ. সি. প্লেনের জন্তে মাঝরাত্তি পর্যন্ত অপেক্ষা করতে হল। ব্যাককে যখন এ প্লেন পৌঁছুল তখন সেখান থেকে যে প্লেনে পিনাং যাবার কথা ছিল সেটি বেরিয়ে গেছে। আমাদের বি. ও. এ. সি. বাসগাড়ি একটি ভাল হোটেলে নামিয়ে দিল। দোতলার বেশ ভাল ঘর, পরিষ্কার পরিচ্ছন্ন। এর আগের বার (উনিশশ'তেইশ সালে) তো আমি একটি মুন্দির দোকানে ছিলাম। সুনলাম যে দুদিন আমাকে ঐখানেই থাকতে হবে। আমি ভাবলাম বি. ও. এ. সি. এই হোটেলের খরচ দেবে, আমি চূড়ালঙ্করন বিশ্ববিদ্যালয় প্রভৃতি আর একবার দেখে নিই। পরে কিন্তু বি. ও. এ. সি. এই হোটেল খরচ কিছুই দেয়নি।

যাহোক আমি একটি শ্রামদেশীয় ভদ্রলোকের সাহায্যে চূড়ালঙ্করন যুনিভার্সিটি তো পৌঁছলাম। ইতিহাস বিভাগে গিয়ে সুনলাম যে ঐ বিভাগে হেড প্রফেসর স্বস্তিকুল তার আগের দিন পিনাং গেছেন। ষণ্টাখানেক হিষ্ট্রি স্টাফ রুমে গল্প করা গেল। শ্রামদেশ, থাইল্যান্ড ছোট রাজ্য হলেও নিজেদের কারও চেয়ে কম ভাবে না। পিনাঙে প্রঃ স্বস্তিকুল আমাকে বলেছিলেন যে থাইদেশই সমস্ত ইণ্ডোচায়না অঞ্চলটা ইসলাম ধর্মের কবল থেকে বাঁচিয়েছিল। ইন্দোনেশিয়া ও দক্ষিণ মালব তো মুসলমান হয়ে গিয়েছিলো। স্বস্তিকুল আরও বলেছিলেন যে এই শতাব্দীতে থাইদেশই দক্ষিণ পূর্ব এশিয়ার এই অঞ্চলটিকে কমিউনিস্ট প্রভাব থেকে বাঁচাবে। ওখানে হিষ্ট্রি লেকচারারদের কাছে সুনলাম যে আমি যেন সায়াম সোসাইটিতেও যুরে আসি। ওখানে এই অঞ্চলের ইতিহাস সম্বন্ধে খুব ভাল কাজ হচ্ছে। হোটেলে ফেরবার পথে সায়াম সোসাইটি দেখে এলাম। ওখান থেকে একটি ইংরাজি পত্রিকা 'Journal of the Siam Society' আমাদের International Studies এর জন্ত দরকারী বোধ হল। আমি এই জার্নালের জন্ত অর্ডার দিয়ে গেলাম। আর সুনলাম যে থাইল্যান্ডে এক মহাপণ্ডিত প্রিন্স ধিনিবিত ইংরাজিতে শ্রামের আধুনিক ইতিহাস প্রায় সম্পূর্ণ করেছেন। কিন্তু রাজনৈতিক কারণ বিশেষের জন্ত ওটি এখনও ছাপা হয়নি। যতদূর জানি ও বই ছাপা হয়নি এখনও—আর যতদিন শ্রামদেশে সামগ্রিক শক্তি রাজশক্তিকে কাবু করে রেখেছে ততদিন কোনো প্রিন্স এর ওরকম বই বেরুতে পারে না।

এরই মধ্যে একবেলা থাইল্যান্ডে ভারতীয় রাষ্ট্রদূত শ্রীআনন্দসহায়ের সঙ্গে দেখা করতে পেরেছিলাম। ইনি স্ত্রীভাষ বহুর I N A তে বিশেষভাবে সংশ্লিষ্ট ছিলেন। ইনি আমাদের ছাত্রদের এ বিষয়ে কাজ করতে বললেন—আর এ

কাজে তাদের সাহায্য করতে রাজী ছিলেন।

ইচ্ছে ছিল নদীর ধারে কতগুলি Wat (বাঈ-মন্দির) দেখে আসি, কিন্তু বৃষ্টির জন্ত সে আর হ'ল না। তারপর দিন ভোরবেলা Planeএর বাস আমাদের হোটেল থেকে নিয়ে গেল—রাস্তায় আর একটি বড় হোটেল থেকে একটি পাকিস্তানী ভদ্রলোককেও তুলে নিল, তারপর এয়ারপোর্টে আমাদের নামিয়ে দিল। পাকিস্তানী ভদ্রলোকটি আমি কোথায় যাচ্ছি, কেন যাচ্ছি জানবার জন্ত খুব উৎসুক ছিলেন। এয়ারপোর্টে যেখানে পাসপোর্ট দেখাতে হয় সেখানে আমরা দুজনেই পাসপোর্ট অফিসের টেবিলে রেখে দিলাম। প্লেন ছাড়বার কয়েক মিনিট আগে পাসপোর্ট ফিরিয়ে নেবার জন্তে যখন আবার অফিসে গেলাম টেবিলে আমার পাসপোর্ট দেখতে পেলুম না। পাকিস্তানী ভদ্রলোককে জিজ্ঞেস করলাম তিনি নিজেরটি ফেরত পেয়েছেন কিনা। তিনি ফিরে পেয়েছেন কিন্তু আমারটির বিষয় কিছু বলতে পারলেন না। আমি তো মহা মুশ্কিলে পড়লাম, বিদেশে পাসপোর্ট হারানো, বিশেষতঃ পিনাঙের পথে, যেখানে Communist Emergency প্ররোদমে চলছিল। কি আর করবো পিনাং-যাত্রী প্লেনে গিয়ে বসলাম, ভাবলাম কোনোক্রমে পিনাং ‘হিস্ট্রি কনফারেন্স’ বোধ হয় যোগ দিতে পারবো, তারপর দিল্লী ফিরে যেতে হবে। এ যাত্রায় আর ইন্দোনেশিয়া ও ক্যাম্বোডিয়া হলো না। পিনাং বিমান বন্দরে পৌঁছেই পাসপোর্ট দেখতে চাইলে। যখন বললাম যে ব্যাকক বিমান বন্দরে হারিয়ে গেছে, তখন ওথানকার পোর্ট অফিসারের সন্দেহ হল। আমার স্টুকেস্ থুলে দেখলে, Communism in South-East Asia বই সামনেই ছিল, তা দেখে আমার উপর সন্দেহ আরও বেড়ে গেল। ভাগ্যিস সেই সময় “হিস্ট্রি কনফারেন্স” থেকে একটি ইয়োরোপীয়ান ভদ্রলোক আমাকে ওখানে নিয়ে যেতে বিমান বন্দরে এসেছিলেন, তা না হলে আমাকে সেখানে অনেকক্ষণ আটকে রাখতো। আমি অবশ্য কনফারেন্সের নিমন্ত্রণ পত্র দেখিয়ে পোর্ট অফিসারকে খানিকটা আশ্বস্ত করতে পেরেছিলাম। আট-নয় মাইল গিয়ে একটি English Teacher's Colonyতে ভদ্রলোক আমাকে ছেড়ে দিলেন। দু-তিনটি ইংরাজ দম্পতি আমাকে সাদরে অভ্যর্থনা করে তাঁদের খাবার ঘরে নিয়ে গিয়ে চা খাওয়ালেন। খানিকক্ষণ পরে তাঁদের একজন আমাকে একটি বই দেখালেন আর জিজ্ঞেস করলেন আমি তো ঐ বই লিখেছি। বইটি দেখলাম সার এ. সি. চ্যাটার্জীর লেখা। উনি বিলেতে ভারতের হাই কমিশনার ছিলেন। আমি সবিনয়ে আমার hostদের বললাম যে সার এ. সি. চ্যাটার্জী,

চ্যাটার্জী বটে কিন্তু আমার (বি. আর. চ্যাটার্জী) সঙ্গে কোনো সম্পর্ক নেই। আমি একটি সাধারণ শিক্ষক, সার এ. সি. চ্যাটার্জী হলেন Knight ও অতি উচ্চ-পদস্থ অফিসিয়াল। চা পর্ব শেষ করে ওঁদের একজন তাঁর ছোট মোটরটি করে আমাকে কনফারেন্সের জায়গায় নিয়ে গেলেন। রাস্তার দুধারে সাদা গোলনচাঁপার বড় বড় গাছ। গোলনচাঁপা হল মালায়ায় জাতীয় পুষ্প। সন্ধ্যার সময় গম্ভীরা স্থানে পৌঁছলাম, কনফারেন্স তখন পুরোদমে চলছে। হাঁপিয়ে পড়েছিলাম। কাপড় ছেড়ে আবার বেশভূষা পরে ভিড়ের জায়গায় যাবার মত উত্তম ছিল না। কনফারেন্স হলের ওপরে দোতলায় একটি ঘর আমার জন্তে ঠিক করা ছিল। বিছানা পাতাই ছিল, শুয়ে পড়লাম, নীচে কনফারেন্সের বক্তৃতা অস্পষ্ট শোনা যাচ্ছিল, খানিকক্ষণের মধ্যেই ঘুমিয়ে পড়লাম।

পাশের ঘরেই ছিলেন Dr. Singhal ও তাঁর বিদ্বাী স্ত্রী শ্রীমতী দেবাহতি। সকালবেলা উঠে তাঁদের সঙ্গে পরিচয় হল। পিনাঙে অবস্থান কালে তাঁরা আমার খুবই আদর যত্ন করেছিলেন। তারপর ধূতি চাদর পরে বাঙ্গালী বাবু বেশে কনফারেন্স হলে উপস্থিত হলাম। ভারত থেকে আমিই একলা এসেছিলাম, Singapore University থেকে Prof. Parkinson (পরে Parkinson Law প্রকাশ করে বিখ্যাত হয়েছেন) ও Drs. Singhal (স্বামী, স্ত্রী), হংকংএর Prof. Brian Harrison, Australiaর Canberra University থেকে Dr. Bastin, Malayaর সম্ভ্রান্তবংশীয় রাজা Sir Uda, পিনাঙের চীনা Mayor Mr. Ho, English Teacher's Colony থেকে কয়েকটি ইংরাজ শিক্ষক আর স্থানীয় কয়েকজন মালয়, চীনা ও ভারতীয় ভদ্রলোক ও মহিলা কনফারেন্স হলে সমবেত ছিলেন। পিনাঙের মেয়র মিঃ হো ছিলেন আমাদের host—তিনিই Chinese Club আমাদের কনফারেন্সের জন্ত দিয়েছেন।

এক সপ্তাহ (৮ই জুন থেকে ১৪ই জুন ১৯৫৭) আমরা সকালে কনফারেন্সে বসতাম, বিকেল বেলা পিনাং দ্বীপে বা মালায়ায় ঘোরাফেরা হত। একদিন সকালবেলা দ্বীপ ছেড়ে বেরিয়ে পড়ে সমস্ত দিন মালায়ায় রবারজঙ্গলে, পাহাড়ে, নদীতীরে কাটানো হল। তখন কমিউনিস্টদের সঙ্গে সংঘর্ষ চলছে, অনেক জায়গায় রবার জঙ্গলে তারের বেড়া দেওয়া, তার ওধারে কমিউনিস্টদের হাতে পড়বার ভয় আছে। দু-একটি রেস্ট হাউসে ব্রিটিশ অফিসাররা রয়েছেন। সমুদ্রতীরে ব্রিটিশ নৌ-সেনা হস্তা করছে শোনা গেল। সে সময় সিঙ্গাপুর যুনিভার্সিটির প্রত্নতত্ত্ববিৎ ডাঃ সলিভান যুনিভার্সিটির ছাত্রছাত্রী নিয়ে কয়েকটি পুরানো সাইটসএ খনন

করছিলেন। একটি বাঙালী ছাত্রী দেখলাম মাটি পাথর ঝুড়ি করে নিয়ে যাচ্ছে। আমি বাঙালী শুনে আমার সঙ্গে কিছুক্ষণ কথা কইলে। একটি পাহাড়ের চূড়ার ওপর থেকে দেখা গেল সমুদ্রতীরে সেই জায়গাটি যেখানে পনেরশ' বছর পূর্বে রক্তমুক্তিকার মহানাবিক বুদ্ধগুপ্ত দান করেছিলেন বোধ হয় এ ভূমিখণ্ডটি, আর সেইখানেই পাওয়া গেছে একটি শিলালিপি। তাতে বৌদ্ধধর্মের মূলমন্ত্রটি খোদিত আছে “যে ধর্মী হেতু প্রভবা তেষাম হেতুং তথাগতোঃ অবদৎ। তেষাম চ যো নিরোধঃ এবংবাদী মহাশ্রমণঃ।” এটি হল মালায়ার নর্থ ওয়েলেস্লি প্রভিন্সের পূর্ব উপকূলে। আরো দু-একটি প্রাগৈতিহাসিক স্থান দেখলাম—দু-এক জায়গায় খুব সাবধানে, কারণ যে কোনো মুহূর্তে কমিউনিস্ট গেরিলা বাহিনী আক্রমণ করতে পারে। দু-একটি খননের জায়গায় শুনলাম যে মিঃ কার্ভরিচ ওয়েলস্ (স্বতন্ত্র প্রত্নতাত্ত্বিক) আগেই খনন করে গেছেন এবং সত্যিকার প্রত্নতত্ত্ববিদদের মতে মোটেই ঠিক রকমে করেননি। ভাল করতে গিয়ে অনেক ক্ষতি করেছেন। সেইদিনই সন্ধ্যায় পিনাঙের মেয়রের বাগানে গার্ডেন পাটিতে আমাকে একটি ইয়োয়োপীয়ান ভদ্রলোক খুব উৎসুক ভাবে জিজ্ঞাসা করেছিলেন যে কার্ভরিচ ওয়েলস্‌এর খনন কাজ সম্বন্ধে কি মতামত শুনেছি। আমি বললাম যে তাঁকে প্রত্নতত্ত্ব বিভাগ গালাগালিই দিয়েছে। তিনি এ শুনে খুব হাসলেন বটে কিন্তু আমার মনে হয় তিনিই ছিলেন মিঃ কার্ভরিচ ওয়েলস্‌।

আর একদিন আমাদের কনফারেন্সের অধিবেশন হল পিনাঙের পাহাড়ের চূড়ায়। ফিনিফিউলার রেলওয়ে দিয়ে—তার মানে দুটি ট্রেন, পরস্পর লোহার কাছি দিয়ে বাঁধা, পাহাড়ের গায়ে খাড়া চড়েছে। একটি নামছে অগ্নি উঠছে। ট্রেনের মধ্যে সিটগুলি গ্যালারির মত সাজানো। পাহাড়ের চূড়া প্রায় সমতল, সেখানে একটি সুন্দর পার্ক করা হয়েছে। পাহাড়ের নীচে ট্রপিকাল জঙ্গল। ওপরে বিলাতি মরশুমী ফুল চমৎকার ফুটে রয়েছে। বাগানের মধ্যে ব্রিটিশ গভর্নরের গ্রীষ্মাবাস রয়েছে। সুন্দর বড় বাঙলা, চারিদিকে কতরকম টবে লাগানো চমৎকার ছোট গাছ। ওপরে চারিদিকে খুব ঘোরা হ'ল—এখানে সেদিন কোনো মিশনারি স্কুলের বাচ্চারাও বেড়াতে এসেছিল, জায়গাটি ছিল হৈ চৈ হাসিখুশীতে ভরা—আর নীচেকার দৃশ্য বাস্তবিকই অপূর্ব। তিন ধারে সমুদ্র, বন্দরে ছোট ছোট রণতরী (ক্রিগেট, গানবোট প্রভৃতি) ওপর থেকে খেলনার মত দেখাচ্ছিল। পাহাড়ের গায়ে ও নীচে গোলনচাঁপা, বুগেনভেলিয়া ইত্যাদি ফুলে ভরা—rambastan (লিচুর মত এর ফল) গাছ লাল ফল ভরা—সব মিলিয়ে যেন একটি

রঙ্গীন ছবি।

নীচে টাঁদনৌ রাতে সিংগল সাহেবের মোটরে স্ট্র্যাণ্ড রোডে বেড়িয়েছি। সমুদ্রের ধারের রাস্তায় আলো, বড় বড় বাড়িগুলিতে আলো, বন্দরের জাহাজগুলিতে আলো। এসব আলোতে পিনাং পরী রাজ্যের মত দেখায়। পিনাং মালয় নাম—মানে স্থপারিদ্বীপ—বড় সুন্দর ছায়গা—যদিও এই হল গত শতাব্দীর গোড়ার দিকে ‘পুলিপলম’। তখন যাদের ‘লাইফ সেন্টেন্স’ দণ্ড দেওয়া যেত—যে কারাবাস মরণেই শেষ হয়—তাদের ‘পুলিপলম’ (পুলো মানে দ্বীপ মালয়ের ভাষায়) বা পিনাং পাঠানো হত। অনেক পরে আন্দামানদ্বীপে এই বেচারাদের পাঠানোর ব্যবস্থা হয়।

আমাদের কনফারেন্সে ঠিক হল যে একটি বায়াম্পিক পত্রিকা সাউথ ইস্ট এশিয়ার ঐতিহাসিক গবেষণার বিষয়ে কনফারেন্স প্রকাশ করবে। এর জন্ত U N E S C O র সাহায্য নেওয়া যেতে পারে। এ বিষয়ে যে ঐতিহাসিকেরা কাজ করছেন তাঁরা যেন নিজেদের মধ্যে সহযোগ করবার ব্যবস্থা রাখেন আর এক দেশের কর্মীরা যেন অন্য দেশে গিয়ে এই কাজ করতে পারেন। এ সব দেশের ভাষা [মানে, বাহাসা, ইন্দোনেশিয়া, থমের (ক্যাছোডিয়ান), ভিয়েতনামীজ, বর্মী ইত্যাদি] পঠনপাঠনের ব্যবস্থা করতে হবে। দক্ষিণ পূর্ব এশিয়ার কোনও একটি কেন্দ্রে একটি ভাল লাইব্রেরী ও আর্চাইভ গড়ে তুলতে হবে। আর দু বছর পরে হয় সিঙ্গাপুরে বা ব্যাঙ্কে আরও বড় করে সাউথ ইস্ট এশিয়া ইনস্টিটিউট কনফারেন্স করার চেষ্টা করতে হবে।

সিংগল দম্পতির কৃপায় এখানে আমার খাওয়াদাওয়ার কোনো কষ্ট হয়নি। কৰ্তা চাইনীজ্ রেস্টুরাঁতে মাছ মাংস খেতেন, গিন্নী ছিলেন নিরামিষাহারী। আমরা প্রায়ই ফলের বাজারে গিয়ে মালয়ের নতুন নতুন ফল কিনতাম—ম্যাক্‌ফ্রিস্টিন্, র্যামবানস্টান (ঝালর দেওয়া লিচু, গন্ধটা একটু চড়া), ডুরিয়ান্ (কাঁঠালের মত খুব মিষ্টি, একটু উগ্রগন্ধ), অ্যাভোকেডো (দেখতে সুন্দর নামপাতির মত তবে মিষ্টতা কম)। আর একটি ঠিক পাহাড়ি আলুর মত ফল (ভেতরে চার-পাঁচটি কালো বিচি) ইত্যাদি। হুঁতগ্যবশত: ‘র্যামবানস্টান্’ (মালয় লিচু, গোল নয় ডিম্বাকৃতি, রেশমী স্বয়োয় ঢাকা) এত মিষ্টি যে ঘরে ফল রাখবার জো ছিল না, লাল পিপড়েতে ভরে যেত। একটি হিন্দুস্থানীর দোকানে কুটি, নিরামিষ তরকারি ও ‘মালাই’ পাওয়া যেত, সেখানেও কুটি ও মালাইএর লোভে মাঝে-মাঝে যাওয়া হ’ত। সেই দোকানী স্বভাব বহু পিনাং আসার

গল্প করতো আমাদের সঙ্গে।

কন্ফারেন্স শেষ হল—সে সময়টা স্থানীয় নাগরিকদের মনের অবস্থা বিশেষ ভাবে বিচলিত হয়ে উঠেছিল। কারণ মালায়ায় ‘স্বাধীনতা দিবস’ নীত্বই ঘোষিত হবে। বিলাত থেকে তার মঞ্জুরি এসেছে। বেশ বোঝা গেল যে চীনা আর ভারত-বাসী যারা মালায়ায় অনেকদিন (অনেকে দু-তিন পুরুষ) আছে, তারা যেন ভয় পেয়েছে। এতদিন মালায়ার মালেরা চাষবাস করত, পুলিশে কাজ করত, দপ্তরে চাপরাসী হত—আর ব্যবসা বাণিজ্য চীনা বা ইয়োরোপীয়ানদের হাতে ছিল। ওকালতি, ডাক্তারি, লোকশিক্ষা দেবার কাজ ভারতীয়েরা প্রায় একচেটে করে নিয়েছিল। সুতরাং ভয় হওয়া স্বাভাবিক যে মালেরা এবার এর শোধ তুলবে। দেশে ফিরে আসার পর মালায়ার স্বাধীনতা দিবসে আমি মালায়ার মধ্যযুগের ইতিহাস সম্বন্ধে অল্ ইণ্ডিয়া রেডিওতে কয়েক মিনিটের ‘টক’ দিয়েছিলাম।

১৪ই জুন—পিনাঙের চীনে মেয়র একটা অদ্ভুত ব্যাপার শোনালেন ও তার প্রমাণ দেখালেন। গত শতাব্দীতে পিনাঙে চীনাদের ‘লজ’ (আমরা যাকে মেসনিক লজ বলি সেই রকম) ছিল, আবার লজে লজে ঘোর শত্রুতাও চলতো। এই রকম দুটি লজের মারামারিতে যখন কয়েক শ লজ মেঘর হত হ’ল তখন সন্ধি হল, যে কুয়োতে অসংখ্য মৃতদেহ ফেলা হয়েছিল সেখানে একটি শাস্তির মন্দির স্থাপন করা হ’ল। আমরা সেই মন্দির দেখতে গেলাম, অদ্ভুত তার কারুকার্য। আমাদের যারা এখানে এনাঁছিলেন তাঁদের মধ্যে অনেকেই ঐ লজ মেঘরদের বংশধর। দক্ষিণ চীনের লজগুলির নিয়মাবলী খানিকটা ওয়েস্টার্ন মেসনিক লজের অনুরূপ—হয়তো ইয়োরোপ চীনের কাছ থেকে এ ‘সাইনস’গুলি নিয়েছে—দক্ষিণ চীনের লজগুলি ছিল anti-Manchu dynasty centres। পিনাঙের একটি চীনা মঠও আমাদের খুব অভ্যর্থনা হয়েছিল—আর সেখানে যেমন ‘ফ্রায়েড রাইস’ (নিরামিষ) খেয়েছিলাম, অমনটি আর কোথাও খাইনি। ওখানের একটি বৌদ্ধ (চীনা) মন্দিরও খুব বৃহৎ ব্যাপার ও খুব সুন্দর, পরিষ্কার পরিচ্ছন্ন। জানি না মালায়ার স্বাধীনতার পরে এখন পিনাঙের চীনাদের অবস্থা কিরূপ।

১৫ই জুন ১৯৫৭—প্রঃ সিংগল আমাকে বিমান বন্দরে পৌঁছে দিলেন। পিনাঙে যে এক সপ্তাহ এত সুখে ছিলাম তার জন্য সিংগল দম্পতির কাছে আমি চিরকৃতজ্ঞ থাকবো।

যখন আমাদের বিমান স্মাত্রার পাশ দিয়ে যাচ্ছে, তখন বিমানের ক্যাপ্টেন (ডাচ কে. এল. এম. বিমান) মাইকে আমাদের জানালেন যে আমরা ভূবিসু-

রেখা পার হচ্ছি—আর ধারা এই রেখা প্রথম পার হচ্ছেন তাঁদের তিনি অভিনন্দিত করছেন। আর আমাদের উপহার দেওয়া হল একটি নেপচুনের (বরুণদেবের) রাজসভার ছবি আর একটি চীনা মাটির খুব ছোট ‘ভাচ কুটীর’, তার মধ্যে *creme de menthe* ভরা আর লীল্ করা। ছবিটি রঙ্গীন ও খুব ছোট (অ্যাম্‌স্টারডামে লিখলে বড় ছবি পাওয়া যায়), বরুণদেব ত্রিশূল হস্তে সিংহাসনে আসীন, চারিদিকে জল—মার্মেডরা (পরীরা) সীতার কাটছে আর নানারকমের সামুদ্রিক জীব ঘিরে রয়েছে।

জাকার্তা (যবদ্বীপের ও সমগ্র ইন্দোনেশিয়ার রাজধানী) পৌঁছতে দেরী হল না। তখন বিমানবন্দরে সবাই একটি সুন্দরী ‘জাতানীজ্’ মহিলার অভ্যর্থনায় ব্যস্ত। খুব সম্ভবতঃ উনি রাষ্ট্রপতি ডাঃ সুকর্ণের স্ত্রী হবেন। একটি পোর্টারের সাহায্যে একটা ‘বেচা’ ধরে ভারতীয় দূতাবাসের দিকে চললাম। পাঁচ-ছ মিনিট পরেই ‘বেচাওয়ালা’ আমাদের একটি নির্জন ছোট ‘কম্পাউণ্ডে’ নামিয়ে দিয়ে চলে গেল। অনেক ডাকাডাকির পর (তখন ভোরবেলা) একটি পশ্চিম পাকিস্তানের (ওয়েস্ট পাক্সাব) মুসলমান ভদ্রলোক বেরিয়ে এলেন। আমি তাঁকে বললাম যে আমি ভারতের দূতাবাস বা কন্‌সুলেট্‌এ যেতে চাই, বেচাওয়ালা আমাদের এখানে নামিয়ে দিয়ে গেছে। পাক্সাবী মুসলমান ভদ্রলোকটি বললেন যে আপনি এখানে বিশ্রাম করুন, চা খান, তারপর আমি আপনার ওখানে যাবার বন্দোবস্ত করে দেব। পাকিস্তান, হিন্দুস্তান তো প্রতিবেশী মিত্র দেশ। যাক, তাঁকে অনুরোধ করায় তাঁর চাকর বেচা নিয়ে এল আর তিনি বেচাওয়ালাকে কোথায় যেতে হবে বুঝিয়ে দিলেন। এবার রিক্সাওয়ালা আমাদের ভারতীয় দূতের অফিসের প্রথম সেক্রেটারি শ্রীরামমূর্তির ক্ল্যাটের নীচের তলায় নিয়ে হাজির করলো। ডাকাডাকি করে রামমূর্তীজীকে পাওয়া গেল। আমি তাঁকে বললাম যে আমি দক্ষিণ পূর্ব এশিয়ার ওপর গবেষণা কাজে এসেছি, কিছুদিনের জন্য জাকার্তায় থাকবার বন্দোবস্ত যেন তিনি করে দেন। মিসেস মূর্তি তখনই আমাদের ওপরে ডেকে নিয়ে গেলেন, আমার জ্ঞান ও প্রাতরাশের ব্যবস্থা করে দিলেন; ইতিমধ্যে মিঃ মূর্তি আমাদের কাছেই একটি হোটেলে থাকবার বন্দোবস্ত ফোনে করে দিলেন। খানিকক্ষণ পরে উনি নিজে গিয়ে আমাদের সেই হোটেলে রেখে এলেন।

তখন ইন্দোনেশিয়াতে পার্লামেন্টের জন্য নির্বাচন দেশ জুড়ে আরম্ভ হয়ে গেছে। অগণিত দ্বীপগুচ্ছ থেকে নির্বাচনপ্রার্থী ইন্দোনেশিয়ান গণ্যমান্য ব্যক্তিরা রাজধানী

জাকার্তায় পৌঁছে গেছেন। সব হোটেল ভরা, আমি তো একটি মাঝারি গোছের হোটেলে একটি আউট-হাউসের মত রুকে একটি ইন্দোনেশিয়ান শিক্ষকের সঙ্গে একটি ছোট ঘর শেয়ার করলাম। মিসেস মূর্তি এসব শুনে আমাকে তাঁদের বাড়িতেই নিয়ে যাবেন বলেছিলেন। আমি বিকেল বেলাটা তাঁদের ড্রয়িং রুমে কাটালাম। এর বেশী তাঁদের আর কষ্ট দিলাম না। হোটেলেই রইলাম। এখানে একটা অভূত ব্যাপার দেখলাম। জাকার্তা বেশ গরম জায়গা, রাত্রে মশারীরও দরকার হয়, কিন্তু কোনো রকম পাখার বন্দোবস্ত নেই। হোটেলের মালিককে বললাম যে একটি ছোট ‘টেবল ফ্যান’ পেতে পারি কিনা তার ভাড়া আমিই দেব। তিনি তো আশ্চর্য হয়ে গেলেন—যেন এরকম কথা কখনও শোনেননি। তাঁর কাছে শুনলাম যে ইন্দোনেশিয়াতে পাখার হাওয়া বিশেষতঃ রাত্রিবেলা, বড়ই অস্বাস্থ্যকর। কোনো বাড়িতে পাখা চালানোর ব্যবস্থা নেই। এই বলে তিনি আমাকে একটি ছোট কাগজের হাতপাখা প্রজেক্ট করলেন। আমার তখন মনে পড়লো ডাচ বইয়ে পড়েছিলাম যে ডাচেরা ব্যাটে-ভিয়ায় (জাকার্তার ডাচ যুগের নাম) রাত্রে গরম কাপড় পরে শুতো, যাতে ঘাম হয়। তা না হ’লে শরীর খারাপ হ’ত। একটু বেশী রাত্রি হলে আমারও তেমন কষ্ট হত না।

আমাদের দূতাবাসে প্রথমে শুনেছিলাম যে আমাদের ইন্টারগ্যাশানাল স্টাডিজের ছাত্র বিশাল সিং যোগ্যজাকার্তায় (দক্ষিণ জাভায়) গজমদ বিদ্যালয়ে ‘রিসার্চ’ করছে। পরদিনই দূতকার্যালয়ের ইন্ফরমেশন্স অফিসের কাছে খবর পেলাম যে কিছুদিন হল বিশাল সিং জাকার্তায় ডিপার্টমেন্ট অফ সোস্যাল সায়েন্সেসএ ভর্তি হয়েছে। ও যে বিষয় নিয়েছিল ইন্দোনেশিয়ান পলিটিক্যাল পার্টিস্—তার জন্তে ওর জাকার্তায় থাকাই ঠিক ছিল। জাকার্তা হল রাজধানী, যোগ্যজাকার্তা এখন একটি মফঃস্বল শান্তিময় পুরানো শহর।

ফোনে বিশাল সিংকে পাওয়া গেল। আমার ঘাম দিয়ে জ্বর ছাড়লো। ওকে না পেলে হোটেলের যে খাওয়াদাওয়া ও ঘরের কষ্ট ছিল তার জন্তে আমাকে তিন চার দিনের মধ্যেই জাভা ছাড়তে হত। ওর সঙ্গে গোড়ায় ওর প্রফেসরদের সঙ্গে দেখা করা গেল। প্রঃ সুদিমান (‘ল’ প্রফেসর) খুশী হলেন যে বিশাল সিং জাকার্তায় এসেছে। তিনি ‘আদল বিধান’ (আদত ‘ল’ কার্টমারিন) সম্বন্ধে দু-একটি কথা বললেন, আর বললেন ইন্দোনেশিয়ার বর্তমান পরিস্থিতিতে আদত খুবই গুরুত্বপূর্ণ বিধান। রাষ্ট্রপতি সুকার্নোরও সেই মত। সুদিমান তার পরদিনই বিশেষ যাজা

করলেন। জাকার্তা বিশ্ববিদ্যালয়ে সোশ্যাল সায়েন্সেস্ বিভাগের হেড প্রঃ Don Arn তখন আপানে ছিলেন। তাঁর জায়গায় কাজ করছিলেন মাদাম্ বুদ্ধিয়ার্মে। ইনি উচ্চশিক্ষিতা স্ববদ্বীপের বিদ্বতী মহিলা—জাকার্তা বিশ্ববিদ্যালয়ের অনেক কথা বললেন। ইংরাজি বেশ ভাল বলতে পারেন। তাঁরই কাছে শুনলাম যে প্রাচীন স্ববদ্বীপের ইতিহাসের বিশেষজ্ঞ প্রঃ পূর্বকরকত কিছুদিন থেকে জাকার্তায় নেই, ইন্দোনেশিয়ার দ্বীপপুঞ্জ ঘুরছেন তাঁর কাজের জন্ত তথ্য সংগ্রহ করতে। পরে তাঁর একটি চিঠি পেয়েছিলাম, আমার সঙ্গে দেখা না হওয়াতে দুঃখ প্রকাশ করে ছিলেন ঐ চিঠিতে। জাকার্তায় বিশাল সিংএর পড়াশুনার ব্যবস্থা দেখে নেওয়ার পর আমাদের স্থল অফ্ ইন্টারন্যাশানাল স্টাডিজের জন্তে এখানে আর কি করা যেতে পারে সে বিষয়ে ভাববার সময় পেলাম। জাকার্তায় বিখ্যাত বইয়ের দোকান ‘পেমহান্ডুয়ান্ট’এ বিশাল সিং নিয়ে গেল। দোকানের মালিক মিঃ সুজান্নাকো সোশ্যালিস্ট নেতা তখন জাকার্তায় ছিলেন। তবে তাঁর দোকান থেকে ইন্টারন্যাশনাল স্টাডীজ দিল্লীতে বেশী ভাগ বাহাসা ইন্দোনেশিয়ার লেখা বই (অর্থাৎ এই রাষ্ট্রের রাষ্ট্রীয় ভাষায় লেখা) পাঠানোর বন্দোবস্ত করা হল। ইন্দো-নেশিয়া দশ বছর আগের সরকার প্রকাশিত ভাচ ভাষা একেবারে পরিত্যাগ করেছে। এখন সরকারী কাজ বর্তমান শিক্ষা, সাহিত্য ও ব্যবসা বাহাসা ইন্দো-নেশিয়ার মাধ্যমে চালানো হচ্ছে—আর স্বীকার করতেই হবে যে মোটের ওপর ভালভাবেই চলছে। ইন্দোনেশিয়ার অনেক নতুন চেষ্টা ব্যর্থ হয়েছে—কিন্তু এই ভাষা-বদল কৃতকার্ণ হয়েছে। দিল্লী ফিরে গিয়ে আমি আমার ইন্দোনেশিয়া ভ্রমণ সম্বন্ধে এক বক্তৃতায় বলেছিলাম যে বাহাসা ইন্দোনেশিয়া বাস্তবিকই দেশের রাষ্ট্রভাষা হিসাবে সফল হয়েছে। তার পরদিন স্টেট্‌স্‌ম্যান্ আমার এই বক্তৃতার রিপোর্টে লিখলেন যে আমি বলেছি বাহাসা ইন্দোনেশিয়া রাষ্ট্রভাষা হিসাবে অসফল হয়েছে। আমাদের বিশেষ শুভাশুখ্যায়ী জাতানীজ দূতালয়ের কালচারাল সেক্রেটারি ডাঃ সুজানো খবরের কাগজে এই রিপোর্ট পড়ে বললেন, সত্যিই কি আমি বাহাসার ব্যর্থতা লক্ষ্য করেছি! আমি বললাম মোটেই নয়, স্টেট্‌স্‌ম্যান্ উল্টো বুঝেছে। আর আমি এ খবর কাগজে লিখে পাঠিয়েছি। তুলটা সংশোধন করার জন্ত। তার পরদিন স্টেট্‌স্‌ম্যান্ তুল স্বীকার করল। সুজানো সন্তুষ্ট হলেন। সুজানো (বা সন্নো) আমাদের অনেক সাহায্য করেছেন। আমাদের বাহাসা শেখবার ব্যাপারে খুবই সহায়তা করেছেন, আর বিশাল সিংকে তো নিজেদেরই আশ্রয়ের মতই দেখতেন। আমার জাতা ভ্রমণেও তিনি চিঠিপত্র দিয়ে জাকার্তা

ও যোগসাকার্তার অনেকের সঙ্গে পরিচয় করে দিয়েছিলেন। আর তাঁরই খাতিরে আমরা জাকার্তায়, তথ্য মন্ত্রণালয় থেকে এগারো খণ্ড ‘রিপাবলিক্ অফ ইন্দোনেশিয়া’ (সমগ্রদ্বীপপুঞ্জের আধুনিক সমীক্ষা) আর তিন খণ্ডে ‘এনসাইক্লোপিডিয়া ইন্দোনেশিয়া’ আমাদের সাফ্র হাউসে লাইব্রেরীর জন্তে পেলাম। এই দুটি বৃহৎ পুস্তক বাহাসায় লেখা। এ থেকে বুঝতে পারা যায় ঐ ভাষা কতটা এগিয়েছে।

জাকার্তায় থাকতে একদিন আমরা ভূতপূর্ব প্রধানমন্ত্রী সূতন শাহরীরের সঙ্গে তাঁর বাড়িতে দেখা করলাম। শাহরীর ও সূকার্ণো এঁরাই তো ছিলেন ইন্দোনেশিয়ায় মুক্তিসংগ্রামে অগ্রণী। দুর্ভাগ্যবশতঃ এখন এ দুজনের মধ্যে সুহৃদভাব একেবারে বিলুপ্ত। তাই আমি আমাদের কথাবার্তার গোড়াতেই বলে ফেললাম (ও রকম বলা ভুল হয়েছিল) যে আমরা দূর দেশে থাকি। আমরা তো এ বিরাট দ্বীপপুঞ্জে আপনাদের তিনজনকে, সূকার্ণো, আপনি (শাহরীর) ও হাট্টাকে দেশের তিন মহানেতা বলেই জানি। এখন আপনাদের মধ্যে আর সম্ভাব নেই, সহযোগিতা নেই, এসব শুনে আমরা মনে বড় কষ্ট পাই। এতে দেশেরও সাংঘাতিক ক্ষতি হয়েছে। আমার এ কথা শোনা মাত্র শাহরীর যেন থানিকটা বিচলিত ভাবে জিজ্ঞাসা করলেন যে সূকার্ণো কি আপনাদের আমার কাছে পাঠিয়েছেন ও রকম অস্বরোধ করতে? উনি যদি আমাদের সহযোগিতা না চান তাহলে আমি আর কি করতে পারি?

আমরা নিজেদের ভুলটা বুঝতে পেরে বিষয়টা বদলে নিলাম। তাঁকে জিজ্ঞাসা করলাম যে সূকার্ণোর গ্রাশানাল কাউন্সিল বিষয়ে আপনার কি মত? সূকার্ণো পার্লামেন্টের ওপর বিরক্ত হয়ে কিছুদিন হল প্রস্তাব করেছিলেন যে উনি নিজের দেশের কয়েকটি গণ্যমান্ত ব্যক্তি বেছে নেবেন (যুনিভার্সিটি, সৈনিকবিভাগ, ট্রেড ইউনিয়ন প্রভৃতি থেকে) ও তাদের পরামর্শ সব দরকারী বিষয়ে চাইবেন। অনেকের মতে পার্লামেন্টের মত অগ্রাহ্য করে। এর উত্তর তৎক্ষণাৎ শাহরীর দিলেন, ‘চার চাকার গাড়ির যেমন আর একটি পঞ্চম চাকার দরকার নেই তেমনি ইন্দোনেশিয়ার গ্রাশানাল কাউন্সিলেরও কোনো প্রয়োজন নেই।’ এখানে শাসন কাজের চারটি চাকা হল (১) সৈনিক বিভাগ (২) পার্লামেন্ট (৩) মন্ত্রীসভা (৪) রাষ্ট্রপতি। গুরুত্ব অস্বাসরে এই নম্বর দেওয়া হয়েছে। শাহরীর গণতন্ত্রে পুরো বিশ্বাস রাখতেন। আর তিনি সোশ্যালিস্ট পার্টিরও নেতা। তাঁর বিশ্বাস—‘কিছু সময় না পেতে পারে, কিন্তু গণতন্ত্রই হল শাসনের একমাত্র উপায়।’

আর এদিকে সূকার্ণো যেন ক্রমশঃই গণতন্ত্রে বিশ্বাস হারাচ্ছিলেন। তাঁর

জায়গায় তিনি এখন ‘গাইডেড্ ডেমক্রেসি’ চালাতে চান। ‘গাইডেড্’ মানে হল সুচালিত—গণতন্ত্র অঁচল হলে কাজ হবে না। এখনও দেশের লোক ‘অনগাই-ডেড্’ ক্রী ডেমক্রেসি বোঝে না, দেশের লোককে কিছুদিন এ বিষয়টি ভাল করে বোঝাতে হবে। বিশেষজ্ঞরা তাদের পথপ্রদর্শকরূপে দেশের লোকদের দেখাবেন কি করে গণতন্ত্র এই বাস্তব জগতে চলতে পারে। সুদূর ভবিষ্যতের জন্য নির্ভেজাল democracy আপাততঃ তোলা থাক, শিক্ষিত, বহুদর্শী যথার্থ কর্মীরা বর্তমান অবস্থায় হাল ধরুন। নয়ত নৌকাডুবি হবেই হবে।

জাকার্তা বড় শহর। এইটি হল এর পুরানো নাম জয়ক্রাতনের (ক্রাতন মানে রাজভবন) অপভ্রংশ। ডাচ আমলে এর নাম হয়েছিল ব্যাটেভিয়া, ডাচদের চলে যাবার পরে জাকার্তা হয়েছে। শহরের মধ্যে দিয়ে রাস্তার পাশাপাশি অনেক জায়গায় খাল আছে। এগুলি হল্যাণ্ডের অ্যাম্‌স্টারড্যাম প্রভৃতি শহরের অনুলকরণ। জালান হুসান্তারা (জালান=রাস্তা, হুসান্তারা=দ্বীপপুঞ্জ) জাকার্তায় প্রসিদ্ধ রাস্তা, মধ্যে বড়খাল অনেকটা পাকা বাঁধের মধ্যে দিয়ে গেছে, একধারে বড় বড় দোকান। দু-একটি বড় ডাচ দোকান তখনও ছিল। ভ্যান্ডার্প ও কল্‌ফ্—এককালের বিখ্যাত বইয়ের দোকানে তখনও (১৯৫৭ সালে) কিছু ভাল বই পাওয়া যেত। আর পাওয়া যেত সুন্দর বলী দ্বীপের গাছের গুঁড়ি থেকে খোদাই করা চমৎকার খেলনা (দাম ও চমৎকার)।

এবার আমরা (আমি ও বিশাল) যোগ্যাকর্তা গেলুম। আমি গেলুম জগদ্বিখ্যাত বোরবুদ্র ও প্রস্থানম্ দেখবার জন্তে, বিশাল তার গজমদ যুনিভার্সিটির প্রফেসর হার্জনের (অজু'নোর) সঙ্গে দেখা করে নিজের কাজের বিষয়ে তাঁর নির্দেশ নেবার জন্ত।

যোগ্য আমার খুব ভাল লেগে ছিল। গুগুগোল নেই, ভারতের ছাপ যেন এখানে কিছু আছে। ডাঃ সূজনোর ভাই এখানে কাজ করেন, তিনি আমাদের খুব সাহায্য করেছিলেন। গজমদ বিশ্ববিদ্যালয়ে ডাঃ হার্জনের সঙ্গে সর্বপ্রথম দেখা করলাম। তাঁর নিজের লাইব্রেরীতে রামকৃষ্ণ ও বিবেকানন্দর বিষয়ে অনেক বই দেখলাম। তিনি আমাকে অহরোধ করলেন যে ভারতে ফিরে গিয়ে যেন আমি রামকৃষ্ণ মিশনের কোনো স্বামীজিকে যোগ্য পাঠাই। এখানে একটি রামকৃষ্ণ মিশন সোসাইটি স্থাপন করতে তিনি (অজু'নো) কিছুদিন থেকে চাইছেন।

তার পরদিন বোরবুদ্র দেখতে গেলাম। ধানের ক্ষেতের মধ্যে একদিকে

একটি আশ্বেয়গিরি থেকে ধোঁয়া বেরুচ্ছে। আর একদিকে বরভূধর (সত্যিই বর-ভূধর) বৌদ্ধধর্মের গরিমা যেন আজও প্রচার করছে। একটি পাহাড়কে স্তূপে পরিণত করা হয়েছে। আর নীচে থেকে ওপরে উঠতে পাহাড়ের গায়ে বুদ্ধদেবের জীবনকাহিনী শক্ত পাথরে খোদিত রয়েছে। কতগুলি প্যানেল বাস্তবিক অপরাধ। যত ওপরে ওঠা যায় খোদায়ের কারুকার্য কমতে থাকে। সব ওপর ধাপে কয়েকটি খালি ছোট স্তূপ। খালি মানে শূন্য। বোরবুহর ভোলবার জিনিস নয়। আর এর বিষয়ে ডাচেরা সুন্দর বই লিখেছেন। সিলভে লেভির (স্মমহান ফরাসী প্রাচ্যবিজ্ঞানবিদ) মতে প্রসিদ্ধ বুদ্ধের জীবনী 'ললিত বিস্তরে'র সচিত্র সংস্করণ হল বরভূধর।

সেইদিনই প্রধানমন্ত্রীর দেখলাম চড়চড়ে রোদ্দুরে। কিন্তু মন্দিরগুলি (তিনটি মন্দির, মধ্যেরটি ভাল অবস্থায়) দেখতে দেখতে চড়া রোদ্দুরের কথা ভুলে গেলাম। মধ্যের মন্দিরের গায়ে রামায়ণের bas relief পৃথিবীর যে কোনো আর্ট গ্যালারির গৌরব হতে পারে। আর এখানে একটি পার্বতীর মূর্তি (পুরো statue) আছে, ওরকম সুন্দর মূর্তি আমি আর কোথাও দেখিনি। প্রধানমন্ত্রীর চারিদিকে অসংখ্য ধ্বংসাবশেষ, হিন্দু ও বৌদ্ধ মন্দির ও মঠের ভগ্নাংশ। এরই খুব কাছে চণ্ডী (মন্দির) মেনদুতে (Tchandi Mendoot) সেই অপূর্ব বোধিসত্ত্বের মূর্তি দেখলাম যার প্রশংসা কত জায়গায় পড়েছি। এই মূর্তিটি যেন চেয়ারে বসে আছেন।

সবশেষে গজমদ বিশ্ববিদ্যালয়ে গেলাম। গজমদ হলেন প্রায় ছশ বছর আগের মজপাহিতের (বিজ্ঞতিক সাম্রাজ্যের) প্রধানমন্ত্রী। কোনো রাজসভাসদ একে ঠাট্টা করলে ইনি বলেছিলেন যে ইন্দোনেশিয়া দ্বীপপুঞ্জের সব দ্বীপগুলি জয় করতে না পারলে উনি মাথার চুল চূড়া বেঁধে রাখবেন না। মজপাহিতের নৌবাহিনীর নায়ক নলের সাহায্যে তিনি তাঁর প্রতিজ্ঞাপূরণ করেছিলেন। জাভা, বলী, সুমাত্রা, বোর্নিও, সেলিবিজ, স্পাইস আইল্যান্ডস, নিউ গিনি প্রভৃতি দ্বীপে মজপাহিতের সম্রাট Hayam Wurak ওরফে রাজসনগর একচ্ছত্র নৃপতি ছিলেন। এখন সুকার্নোর উচ্চাভিলাষ ছিল যে তিনি আজকের ইন্দোনেশিয়াকে মজপাহিতের সমতুল্য করে তুলবেন।

গজমদ বিশ্ববিদ্যালয়টি যোগ্যকর্তার স্থলতানের ক্রাতনে (রাজত্ববনে) অবস্থিত। স্থলতান ক্রাতনের যে অংশে এখন থাকেন তার প্রবেশদ্বারের উপর লক্ষ্মীর মূর্তি রয়েছে। শুনেছি লক্ষ্মীদেবীর আরতি এখনও করা হয়। স্থলতানের

নামে এখনও তুবন উপাধি যুক্ত আছে।

আমি জাকার্তায় ফিরে এলাম। বিশাল ডাঃ হার্জানোর কাছে পড়বার জন্তে যোগ্যায় রয়ে গেল। দু'তিনদিন দিনের বেলাটা ভারতীয় দূতাবাসেই কাটালাম। তখন জেনারেল ইলেকশন্ খুব জোরে চলছে। P. K. I (সাম্যবাদী দল) বেশ জিতছে, মাসুমি (গোঁড়া মুসলমান) খুব হারছে, অনেকেরই মন বিচলিত। এই পরিস্থিতিতে আমি রুসলান আবদুল গনির (স্বকার্ণের প্রিয় পরামর্শদাতা) সঙ্গে দেখা করলাম। উনি তো প্রেসিডেন্টের খুব ভক্ত। উনি বললেন যে গণতন্ত্রের জন্ত দরকার ক্ষমতামূলী মধ্যবিত্ত সমাজ। ইন্দোনেশিয়াতে তো তা নেই। তাই এখানে প্রথমে চাই গণতন্ত্রে শিক্ষানবিশি স্টেজ—‘গাইডেড ডেমক্রেসি’। তারপর কোনো সুদূর দিনে গণতন্ত্রও কৃতকার্য হতে পারে। আর সাম্যবাদও এখন চলতে পারে না। যে কৃষক ও শ্রমিক শ্রেণী এখন কোনো রকমে কষ্টেহুটে জীবনযাপন করছে তাদের অবস্থার কিছু উন্নতি করাই হল এখনকার কর্তব্য। এই হ’ল ‘মারহেনিজম’ (যে সব লোকের একদিনের খোরাক বন্ধ হলে, তার পরদিন অনাহারে থাকতে হয় তারা হল ‘মারহেন’)। স্বকার্ণো এখন মারহেনিজম নীতি অবলম্বন করে দেশের উন্নতি করতে চান।

ভারতের দূতাবাসে আর শ্রীরামমূর্তির বাড়িতে ভালই দিনগুলি কাটছিল, হঠাৎ ‘ফু’তে শুইয়ে দিলে। মাস কয়েক থেকে মালায়ায় ‘ফু’র প্রকোপ চলছিল, ওর ভয়েই অনেক নিমজ্জিত ব্যক্তি পিনাং কন্ফারেন্স-এ আসেন নি। আমারও ভয় হ’ল যে ঐ হোটেল আমি জর গায়ে পড়ে থাকবো। আমার পাসপোর্টও বেশী দিনের ছিল না। আর সবচেয়ে বিপদ হল তখন ইন্দোনেশিয়ার ‘রুপিয়া’ শোচনীয়ভাবে পড়তে লাগলো। জর ছাড়তেই আমি সোজা দিল্লীর জন্তে প্যাসেজ্ বুক করলাম। বড় সাধের ‘ক্যানোডিয়া’ (কনুজ) যাত্রা রদ করতে হল। অনেক কষ্টে জাকার্তা-সিঙ্গাপুর-রেঙ্গুন-ঢাকা-দমদম-পালম্ রুটে দু-তিনটি এয়ারলাইনএ নামা-উঠা করে জাভা থেকে বেরবার ব্যবস্থা হল।

যাবার আগে আমাদের ভারতের দূত পার্থসারথি মহাশয়ের সঙ্গে দেখা করতে পেরেছিলাম। ওঁর কাছে ইন্দোনেশিয়ার অনেক কথা শুনতে পেলাম।

জাকার্তা বিমান বন্দরে আমাদের ইন্টারন্যাশনাল স্টাডীজের আমেরিকান হিষ্ট্রির প্রফেসর অগর্ভ সাহেবের সঙ্গে দেখা হ’ল। উনি ইউ. এস.-এ ফিরছেন। বৃহৎ ভবনলোকটি যেমন বিখান তেমনি হাসিখুশি। কয়েক মাস পরে শুনলাম তিনি

মারা গেছেন। উনি ছিলেন সোসিওলজির একজন খ্যাতনামা বিশেষজ্ঞ। তাঁর মত অমায়িক আর স্বার্থ পণ্ডিতের সঙ্গে পরিচয় হওয়া আমি আমার জীবনের মহাসৌভাগ্য বলে মনে করি।

আমার বিদেশ ভ্রমণ এবার শেষ হল। এরপর নিজের দেশের দক্ষিণ দিকটি কিছু কিছু দেখেছি (পুনা, গোয়া)। কিন্তু এ তো নিজেকে ঘরের কথা। এখন আশী পেরিয়েছি, শরীর ও মন দুই-ই জবাব দিতে বসেছে। এখন বাইরের দিক থেকে মন সরিয়ে ভেতরের দিকে মন বসাবার চেষ্টায় আছি—(৮ই নভেম্বর উনিশশ একাত্তর) জীবনটা এখন বহির্মুখী (objective) ছেড়ে অন্তর্মুখী (subjective) ধারায় চলুক।

॥ পরিশিষ্ট ॥

ফিরে এসে কন্সটিটিউশন্ হাউসে আর জায়গা পেলুম না। দু-এক মাস বেয়াইবাড়ি (শ্রীশৈলেশ রায়ের তোগলক ক্রিসেন্টএর সুন্দর বাঙলোতে) আরামে থেকে তাঁদের বুকিয়েস্বকিয়ে লাজপৎ নগরে (দিল্লীর নতুন কলোনিতে) বাসা নিলাম। খোলা জায়গা, একটি ঘরের জায়গায় দুটি ঘর ও রান্নাঘর ইত্যাদি পাওয়া গেল। তবে সাফ্র হাউস থেকে অনেক দূরে পড়লো। ট্যাক্সি করে যাওয়া রোজ রোজ ত সম্ভব হল না। যা হোক স্কুটার রিক্শ কখনও বা বাসে (পারতপক্ষে বাসে নয়) আর অল্প উপায় না থাকলে অগত্যা ট্যাক্সিতে ইন্টার-ন্যাশানাল স্টাডিজ্‌এ পৌঁছনো যেত। বাসায় ফেরবার সময় আবার অল্পরূপ সমস্যা দাঁড়াতো। সবচেয়ে দুঃখের বিষয় হল যে সাফ্র হাউসের অনেক 'ফাংশান'ই বাদ দিতে হত। তবে লাজপৎ নগরে ভাল দুধ, নিজেদের মনের মত খাবার, একটু 'প্রাইভেসি'—এসব সুবিধাগুলি তো আমরা পেয়েছিলাম। আর দিনকতক ছুটু (নটরাজ—আমাদের সবচেয়ে ছোট—তৃতীয় ছেলে) দিল্লী ক্লাইং ক্লাবে ট্রেনিংএর জগ্গে এইখানেই ছিল। সেটা সবায়ের পক্ষে সুবিধা হয়েছিল। আর মজার ব্যাপার হয়েছিল যে আমাদের দুজনকে (স্বামী-স্ত্রীকে) সেকলে বড়ো মনে করে প্রতিবেশীরা যেন থানিকটা কুপার চক্ষে, থানিকটা সমীহ করে দেখতো। মোটের ওপর এই শহরতলীতে ভালই ছিলাম।

কিন্তু সংসারে দুঃখ কষ্ট বাদ দেওয়া যায় না। আমার স্ত্রীর বোনপো অনিলের (প্রসিদ্ধ বাঘ শিকারী অনিলদেব মুখোপাধ্যায়—এ. ডি. মুখার্জি নামেই খ্যাত) বড় ছেলে অরুণ—আমাদের নাতির দলে বয়সে, বিত্তাবুদ্ধিতে সবচেয়ে বড়, দু-একদিন আমাদের লাজপৎ নগরের বাসায় এসে রইল। দিল্লীতে এসে কত ভাল ভাল বই কিনেছে দেখালো। তারপর বিকেলের দিকে দিল্লীর ঠিক উল্টো দিকে থাইবারে বন্ধুর সঙ্গে দেখা কুরবে বলে চলে গেল। বলে গেল ঐখান থেকেই লক্কো চলে যাবে ওর বাবা-মার কাছে। তার পরদিন আমি সাফ্র হাউসে ফোন পেলাম যে অরুণ মারা গেছে, আমরা যেন মীরাট যাই। অনিলরা সবাই তার পরদিন মীরাট পৌঁছুছে। তার আগেই যেন আমরা রমামন্দিরে (আমার শান্তিড়ী ঠাকরনের বাড়ি) এসে যাই। মীরাটে সেদিনটা বড় ভয়ানক দিন। এরা

সবাই লক্ষ্য থেকে এল। হুটু তখন লক্ষ্যে ক্লাইং ক্লাবে ছিল। ও তো ওদের সঙ্গে এল, যেন পাখরের মত হয়ে গেছে, বাকশক্তি হারিয়েছে। কিছুক্ষণের মধ্যেই জানা গেল অরুণ আত্মহত্যা করেছে, আর এরা কয়েক ঘণ্টা লক্ষ্যে হাস্পিটালে মৃণ্মু ছেলেটিকে বাঁচাবার চেষ্টা করেছিল, মনে হয়েছিল বুঝি বেঁচে যাবে, তারপর যেমন ডাক্তার বলেছিলেন ‘The patient had not the will to live’ বাঁচাতে পারা গেল না। এই সব দেখে হুটুর গুরুত্ব অবস্থা হয়েছিল।

এর পরিণাম শোচনীয় হয়েছিল। অনিলের মা (অরুণের ঠাকুরমা) আর অনিলের দিদিমা (আমার শাওড়ীঠাকুরাণী) কিছুদিন আগে পরে এঁরা দুজনেই যেন অরুণকে দেখবার জন্তে চলে গেলেন। রম্যামন্দিরে আর বাড়ির কেউ রইল না। এখন ঐখানেই হয়েছে মীরাতের ‘সুপার মার্কেট’—‘আপকা বাজার’।

এইসব দুর্ঘটনার কয়েক মাস পরে আমি ইন্টারন্যাশনাল স্টাডীজ ছাড়লাম। আমার তখন সত্তর বছর বয়স ; ডাঃ আঞ্জাডোরাই (ইন্টারন্যাশনাল স্টাডিজের ডিরেক্টর) নিজেই বললেন যে এখন আমার ছুটি হওয়া উচিত, তবে যেন মাঝে মাঝে আমি সাফ্রা হাউসে আসি, ছাত্ররা উৎসাহ পাবে ও সহকর্মীরা খুশী হবে। ১৯৫৫-১৯৬১—ছ বছর সাফ্রা হাউসে ইন্টারন্যাশনাল স্টাডিজের মনের আনন্দে কাজ করেছি, আর ছাত্র, কলিগদের সৌহাদ্য পেয়েছি। জীবনের আর একটি অধ্যায় সমাপ্ত হল। ভেবেছিলাম যে অবসরপ্রাপ্ত লোক সব ঝগড়া থেকে মুক্ত হবে। একেবারে ছুটি পাবার জন্তে উৎসুক ছিলাম, কিন্তু ভবী ভোলবার নয়। চাকরি থেকে অব্যাহতি পাবার আগেই টেলিগ্রাম এল যে হুটু (নটরাজ—ছোট ছেলে) বোম্বাই জুহু ‘বীচে’ প্লেন অ্যাক্সিডেন্টে বেশী রকম আঘাত পেয়েছে। আমার মেজ ছেলে রাজরাজ (তখন ক্যাপ্টেন) তখন খড়্গবাসলা মিলিটারি এ্যাকাডেমিতে সিগনালস বিভাগে ট্রেনীদের শিক্ষা দিত। সে বোম্বাইয়ে ওর হাসপাতালে থাকবার ব্যবস্থা করলো আর কিছুদিনের মধ্যেই ওকে খড়্গবাসলায় নিজের কাছে নিয়ে গেল (ফেব্রুয়ারী, ১৯৫৯)। আমার ইন্টারন্যাশনাল স্টাডিজের কাজ থাকায় তখনুি যেতে পারলাম না, হুটুর মা-ই প্রথমে ওর কাছে যেতে পারলেন। হুটুর পিঠে ও নীচের চোয়ালে জখমটা গুরুতরই হয়েছিল, ওর দাদা—আমার বড় ছেলে বিজয়রাজ ওকে ঐ ক্লাইংএর কাজ ছেড়ে যে কোনো অস্ত্র লাইনে যেতে অস্বীকার করেছিল। কিন্তু নটরাজ মোটেই রাজী হল না। রাজরাজেরও সেই মত ছিল যে ওকে গুরুত্ব করে নিরুৎসাহ করা উচিত নয়।

কিছুদিন খড়্গবাসলায় আমরা সবাই একত্রে ছিলাম। তারপর ছুটি আবার নিজের ক্লাইং কোর্স শেষ করবার জন্তে চলে গেল, আমরা মীরাতে ফিরে এলাম। আমাদের দিল্লীতে থাকতে থাকতেই ছুটি ক্লাইং লাইসেন্স পেল। কিছুদিন চা বাগান অঞ্চলে আসামের এক প্রাইভেট এয়ার ট্রানসপোর্ট কোম্পানিতে কাজ করলো। তারপর উনিশ-শ বাষট্টি সালে 'নেফায়' চীন আক্রমণের সময় এয়ার ফোর্সে ছিল। এখন ও ইণ্ডিয়ান এয়ার লাইনস্-এর পাইলট। কখনও আসামে কখনও বা নেপালের দিকে ফকার ফ্রেণ্ডসিপ প্লেন নিয়ে যায়। ওর অনেক দিনের সাধনা সফল হল। তবে ও ওড়ে (হাওয়ায়, অস্ত্র অর্থে নয়), সে জন্তে আমাদের দেশের বাপ মা ওকে কতাদান করতে নারাজ দেখা গেল। আমরা ভয় পেয়েছিলাম ওর বিয়ে আমরা দেখে যাব কিনা।

উনিশ-শ একষট্টি সালের শেষের দিকে আমার চণ্ডীগড়ে পাঞ্জাব বিশ্ববিদ্যালয়ে বৃহত্তর ভারত সম্বন্ধে তিনটি বক্তৃতা দেবার আমন্ত্রণ এল। ওখানে আমার দশ-বারো বছর আগের ক্লান্তি ছাত্র বুদ্ধপ্রকাশ ইতিহাস বিভাগেই বেশ উচ্চ পদে ছিল। আমি সেইখানেই কয়েকদিন থাকবো স্থির করেছিলাম। বেশ আরামে সহযাত্রীদের সঙ্গে গল্প করতে করতে যাচ্ছিলাম, সাহারানপুর স্টেশনে গাড়ি থেমে গেল, শোনা গেল সেদিন আর কোনো গাড়ি আগে বা পিছু কোনো দিকে যাবে না। তবে টুপ ট্রেন (সৈন্ত বোঝাই ট্রেন) আপ্ অ্যাণ্ড ডাউন লাইনে খুব চলছে। আমাদের একজন সহযাত্রী খবর নিয়ে এলেন যে গোয়ায় যুদ্ধ আরম্ভ হয়েছে। আর পশ্চিম পাকিস্তানের দিকে গোলযোগের আশঙ্কা আছে। ওদিকেও সৈন্ত পাঠানো হচ্ছে।

তার পরদিন অতিকটে তো চণ্ডীগড় পৌঁছানো গেল। চণ্ডীগড় যেমন হৃন্দর জায়গা বিশ্ববিদ্যালয়টিও তেমনি হৃন্দর। আমার দ্বিতীয় দিনের বক্তৃতার সময় উপস্থিত ছিলেন স্বনামধন্য পণ্ডিত হাজারিপ্রসাদ দ্বিবেদী। আমি আমার 'টকে' কল্পে ও যবদীপে বৌদ্ধ ভ্রমণ ও শৈব ব্রাহ্মণদের উল্লেখ করেছিলাম। তাঁদের অক্ষয়কীর্তির কথা বলেছিলাম। আমার বক্তব্য শেষ হলে দ্বিবেদীজি বেশ মজার কথা বললেন ব্রাহ্মণদের বিষয়ে। একবার শাস্তিনিকেতনে মঙ্গোলিয়া থেকে কয়েকটি বৌদ্ধ ভিক্ষু এসেছিলেন। তাঁদের শাস্তিনিকেতন খুব ভাল লেগেছিল। একদিন দ্বিবেদীজির সঙ্গে কথাবার্তায় তাঁরা শুনলেন যে উনি ব্রাহ্মণ। ওঁরা তো বিশ্বাস করতেই চান না যে উনি, অমন একটি অমায়িক ভ্রমলোক, ব্রাহ্মণ হতে পারেন। দু-তিন বার তাঁরা ওঁকে বললেন যে উনি ঠাট্টা করছেন, উনি কখনই

ব্রাহ্মণ হতে পারেন না। দ্বিবেদীজ্ঞি আশ্চর্য হয়ে তাঁদের জিজ্ঞাস করলেন যে-
 তাঁরা ব্রাহ্মণ শব্দের কি মানে করেন। তাঁরা যেন ভয়ে ভয়ে বললেন যে
 ব্রাহ্মণরা তো রাক্ষস, মানুষ খায়। ওদের কবলে পড়লে তো আর বাঁচবার
 আশা থাকে না। তখন বোঝা গেল যে মজোলিয়াতে ব্রাহ্মণ ও ব্রহ্মরাক্ষস
 একই বস্তু। অতি ভয়ানক ব্যাপার।

মীরাতে ফিরে এসে জনলুম যে রাজ্যরাজ গোয়া অভিযানে গেছে। মহু (রাজুর
 স্ত্রী) আর্থরাইটিসে ভুগছে আগ্রায়। আমাদের আগ্রা যেতে হবে বিনা বিলম্বে। দেবী
 কিন্তু হল কেন না মীরাতে তখন আমরা দুজনেই ছিলাম। বিজুরা (আমার বড়
 ছেলে বিজয়রাজ) ও তার স্ত্রীপুত্র কয়েকদিন পরে বাড়ি ফিরে আসতেই আমরা
 আগ্রা পৌঁছলাম। ট্রেনে গাড়ির জানলার শাশি বা হাতের দুটি আঙ্গুলের ওপর
 পড়ে ও দুটি আঙ্গুল খেঁতো হয়ে যায়। কিছুদিন তো ভয় ছিল ও আঙ্গুল দুটি
 বুঝি হারাতে হয়। যাক, তা হয়নি কিন্তু আঙ্গুল সারতে দেবী হওয়ায় ভাতারেরা
 ধরে ফেললেন যে আমার ডায়াবিটিস্ হয়েছে। গরম দুধে বেশ করে গুড় (মীরাতের
 গুড় চমৎকার) বা চিনি দিয়ে খাওয়া বন্ধ হল। এখনও সে সব বিধিনিষেধ মেনে
 চলতে হয়।

এদিকে মহু আর্থরাইটিসে খুব ভুগলো। আর সবচেয়ে ভাবনার বিষয় হল
 রাজুর (মেজর রাজরাজের) গোয়ায় জীপ্ অ্যাক্সিডেন্ট। ওরা তিনজন
 অফিসার রাত্রিবেলা জীপে যাচ্ছিল মাইল দশেক দূরে এক জায়গায়। রাস্তার
 অবস্থা ছিল খারাপ, জীপের অবস্থা তখৈবচ, জীপ পড়লো বিশ ফুট নীচে খাদে।
 খুবই সৌভাগ্যের বিষয় যে এদের প্রাণরক্ষা হয়েছিল তবে আঘাত খুবই গুরুতর
 হয়েছিল। রাজু তো দু মাস হাসপাতালে ছিল। প্রথম দু সপ্তাহ সংকটময়
 অবস্থায়। এখনও মাঝে মাঝে ওর পিঠে ব্যথা হয়।

উনিশ-শ বাষটি (১৯৬২) সাল বেশী ভাগ দুর্ভাবনায় কাটলো। ছিলাম আমরা
 আগ্রার সবচেয়ে ভাল জায়গায়—মল রোডের সিসিল ম্যানসানস (তখন
 মিলিটারির হাতে)। তাজমহল হেঁটেই বেড়িয়ে এসেছি—পূর্ণিমার আলোতে।
 অমাবস্তার অন্ধকারেও দেখেছি। আমার ভাই স্বজনরাজের বেয়াই শ্রীহরপ্রসাদ
 বাগচী মহাশয়ের বাঙলা লাইব্রেরীর ভাল বাছাই করা বই পড়বার সুযোগ
 পেয়েছি। তবে রাজু ও মহুর অস্থির জন্তু দুজনেরই মনে দুর্ভাবনা বরাবরই
 ছিল।

দুর্ভাবনার তো এ সংসারে অন্ত নেই। আগ্রায় থাকতে থাকতে খবর পেলাম

যে বাদল (শক্তিকুমার—আমার জাঁঠতুতো ভাই সনৎকুমারের ছেলে) হার্টফেলিওর হয়ে হঠাৎ মারা গেছে। বছর দুয়েক আগে তার বিয়ে আমরাই দিয়েছিলাম। ওর অকালমৃত্যুতে মনটা বড় দমে গেল।

দুঃখকষ্টের মধ্যেও নিজের কাজ নিয়ে থাকায় কিছু সান্ত্বনা পাওয়া যায়। আগ্রা থেকেই দুবার দিল্লী গেলাম। একবার একটি রাজনৈতিক নিরপেক্ষতা বিষয়ের সেমিনারে আর একবার সাউথ ইষ্ট এশিয়ান টুরিজম সংক্রান্ত একটি থাইল্যান্ড, ইন্দোনেশিয়া প্রভৃতি ঐ অঞ্চলের এক ছাত্রছাত্রী গোষ্ঠীকে দিল্লী, আগ্রা ও আর আমাদের দেশের দর্শনীয় স্থান সম্বন্ধে একটা শর্ট টক্ দিতে। নন অ্যালাইনমেন্ট সেমিনারে ভাগ নিয়েছিলেন সিংহলের, ফিলিপাইনের ও পাকিস্তানের রাষ্ট্রীয় দূতেরা। তবে পাকিস্তানী দূত কিছু বলেননি, কেবল শুনেই গেলেন। পাকিস্তানী দূত বান্দালী (পূর্ববঙ্গের) বেরুলেন, আমার সঙ্গে বান্দলায় কথাবার্তা বললেন। আমি তাঁকে বললাম আমি লাহোরেই পড়াশুনা করেছি আর লাহোর আর একবার দেখে আসতে চাই। তিনি বলেছিলেন যে আমি যদি চাই স্বচ্ছন্দে লাহোর যেতে পারি।

মীরট ফিরে গিচ্ছলাম, কিন্তু উনিশ-শ বাষটি সালের অক্টোবর বড়ই দুঃসংবাদ নিয়ে এল। কতদিন থেকে ভারত চীন মৈত্রীর স্বপ্ন দেখছি, উনিশ-শ চুয়ান্ন সালে চীন ঘুরে স্বপ্নটা যেন বাস্তব রূপ নিচ্ছিল। এবার সেই স্বপ্ন ভেঙ্গে গেল। রাজ-রাজকে (মেজর রাজরাজ চ্যাটার্জি) হিমালয়ের কোনো দূর দুর্গম স্থানে যেতে হবে, মনু, টুকি, বাবলুর কাছে থাকবার জগ্রে আবার আগ্রা এলাম। এক সন্ধ্যার কথা খুবই মনে আছে। নেফায় আমাদের মারাত্মক হার হয়েছে। চীনা সৈন্যবাহিনী আমাদের দেশের অভ্যন্তরে ঢুকে পড়েছে। আগ্রা থেকে বড় একটি সৈন্যদল বিমান পথে নেফা যাবে কয়েক ঘণ্টার মধ্যে, তারি অপেক্ষায় আমরা সিসিল ম্যানসানস্‌এ বসে আছি। অতগুলি প্লেন যোগাড় করতে কিছু দেবী হচ্ছে শোনা গেল। রাতটা কেটে গেল। অপেক্ষায় থাকতে হল। রেডিওতে শোনা গেল যে চীনা বাহিনী ফিরে যাচ্ছে। আসামের মধ্যে এগিয়ে আসবার সংকল্প ছেড়ে দিয়েছে। রাজু ও অগ্রাণ্ড অফিসাররা, যাদের কাছে আমি তখন এসব শুনিছিলাম, তারা একবাক্যে এ খবর শুনে বললে, এ যেন কেউ গালে চড় মেরে বললো আই অ্যাম সরি। এর চেয়ে যুদ্ধ হয়ে যাওয়া ভাল ছিল। যাই হোক এখন তো যুদ্ধবিশারদদের মতে এটা চীনের কৃপার নিদর্শন নয়। হিমালয় পার করে ভারতের মধ্যে ঢুকে যুদ্ধ চালানো চীনের পক্ষে অসম্ভব হত। শীতকালে

তো সমস্ত চীনা বাহিনী ধ্বংস হয়ে যেত। হিমালয়ের পরপার থেকে কোনো রকম সাহায্য আর আসতে পারতো না।

এরপর কয়েক বছর এমন কিছু উল্লেখযোগ্য ঘটনা লেখবার মত নেই। কিছু নিজের ইচ্ছামত পড়াশুনা করেছি। ইন্টারন্যাশনাল স্টাডিজের কাজ (বাড়ি বসে যা করা যায়) মাঝে মাঝে করেছি। আমার আগেকার লেখা বইয়ের (ক্যাথোডিয়া, ইন্দোনেশিয়া, মডার্ন জাপান, মডার্ন চায়না বিষয়ক পুস্তক) পরিবর্ধিত নতুন সংস্করণ আমাদের মীরাট কলেজের প্রাক্তন ছাত্র চন্দ্রপ্রকাশের সাহায্যে প্রকাশ করতে পেরেছি। নতুন বই একটি 'সাউথ ইস্ট এশিয়া ইন্ট্রান্জিশন' লিখেছি, আমার চারটি রিসার্চ স্কলারের সহযোগিতা পেয়েছি এ কাজে। ইন্দোনেশিয়া ও ইন্দোচায়নার সমসাময়িক বৃত্তান্ত ওতে দেবার চেষ্টা করা হয়েছে। বইটির প্রথম সংস্করণ বেশ তাড়াতাড়ি শেষ হয়ে গিয়েছিল। দ্বিতীয় সংস্করণের ব্যবস্থা এখনও হয়ে উঠলো না।

পরিবারের গভীর মধ্যেও পরিবর্তন হয়েছে। নাতিনাতনীরা বড় হয়েছে, স্বাস্থ্য সবল হয়েছে, লেখাপড়া বেশ করছে, দুইটি দৌহিত্রের বিয়ে হয়েছে। তার একটি 'বেবি শো'র প্রাইজ পাবার মত চৎমকার মেয়েও হয়েছে। আমরা প্রমাতামহ প্রমাতামহীর দলে উঠেছি। ঈশ্বরের কৃপায় সংসারযাত্রা মোটের ওপর ভালই হয়েছে। ছেলেরা, জামাইরা ভাল কাজ ভালভাবে করছে। মেয়ে দুটি নিজেদের সংসার বেশ গুছিয়ে চালাচ্ছে। এমনি করে উনিশ-শ সত্তর সালের মার্চ মাসে পৌঁছনো গেল।

আমরা স্বামী-স্ত্রী তখন গোয়ায় আমাদের ছোট জামাইয়ের সমুদ্রের উপর স্বন্দর কোয়াটার্সে আছি। একদিন ভোরবেলা ঘুম ভেঙে গেল। পাশের ঘরে টেলিফোনে কথা হচ্ছে শুনলাম। পরিচিত গলায় কে বলছে, বাবা মাকে বলে তাঁদের বুঝিয়ে তাঁদের অসুস্থতি নাও। উঠে পড়লাম। ছোট জামাই আমাদের ঘরে এসে বললে যে হুটু (আমাদের ছোট ছেলে নটরাজ, ইণ্ডিয়ান এয়ার লাইনস্‌এর পাইলট্) বিয়ে করতে চায়। আপনাদের সম্মতি চাইছে।

আগেই বলেছি যে হুটু 'হাওয়াই জাহাজে' হাওয়ায় ওড়ে, তাই ওর বিয়ে হওয়া এক সমস্যা হয়ে দাঁড়িয়েছিল। জামাই কৈলাসনাথের মুখে একথা শুনে আমাদের তো বড়ই আশ্চর্য বোধ হল। কৈলাস ধীরেস্থে বলতে লাগলো যে হুটু একটি ভাল পরিবারের স্ত্রীলা, স্ত্রী, অল্প বয়সের কুমারীকে বিয়ে করতে চায়। মেয়েটি ভিন্ন সম্প্রদায়ের ভিন্ন প্রদেশের। হুটু কিন্তু ওকেই বিয়ে করবে স্থির করেছে আর খুবই

আশা করছে যে আমরা এ বিয়েতে মত দেব। তার পরদিন ফোনেতে আমার সঙ্গেও হুটুর (নটরাজের) কথা হল। আমি মেয়েটির কথা আরও কিছু জিজ্ঞেস করলাম। তারপর আমাদের সম্মতি জানালাম। হুটুর মা প্রথমে তো বিলক্ষণ বিচলিত হয়েছিলেন। তারপর বেশ কিছুক্ষণ সময় চূপ করে ছেলের সঙ্গে (উনি আবার 'কোলের ছেলে', যদিও ছ ফুট তিন ইঞ্চি লম্বা) পাছে ছাড়াছাড়ি হয়ে যায় এসব ভেবেচিন্তে রাজী হলেন। আমি তখন আমার বড় ছেলে বিজয়রাজকে (মীরট কলেজের ইতিহাস বিভাগের প্রধান) আর মেজ ছেলেকে (লে: কর্ণেল রাজরাজ চ্যাটার্জী, মিলিটারি কলেজ অফ টেলিকমিউনিকেশন্স এন্ড ইনিসিয়ারিং, মাউ) খবর দিলাম আর বোঝায়েতে হুটুর বিয়েতে আসতে লিখলাম। বিজুর হুটার অ্যাক্সিডেন্টে গুরুতর রূপে আঘাত লেগেছিল। ওর আসা সম্ভব ছিল না। রাজু ছুটি পেল না সুতরাং আমাকেই বিয়ে দিয়ে বরকনের সঙ্গে যেতে হল। ব্যাপারটা সত্যিই নাটকীয় রূপে ঘটেছিল। তবে আমি ও হুটুর মা এ বিয়েতে সম্মতি দিয়ে তুল করিনি। কিছুদিনের মধ্যেই বিজুর সেই হুটার অ্যাক্সিডেন্টের ফলে ত্রেনে রডস্ট্রাক্ট হল। শরীরের ডান দিকটা পক্ষাঘাতের মত প্রায় অচল হয়ে পড়লো। দিল্লীর অল ইণ্ডিয়া ইনস্টিটিউট অফ মেডিক্যাল সায়েন্সস্‌এ অপারেশন্স করে সেই স্ট্রাক্টটা বার করে দিলে তৎক্ষণাত্ হাত পা আবার সহজ ভাবে সচল। কয়েক দিনের মধ্যেই বিজু বাড়ি ফিরে এল। এই দুঃসময়ে এবং এরপর আমাদের দুই বুড়োবুড়ীকে সেবাযত্নে আমাদের নতুন বোমার যে রকম নিজের স্বভাবের পরিচয় পাওয়া গিছিল তাতে তিনি পরিবারের সকলেরই প্রিয়পাত্রী হয়েছেন। ঈশ্বর করুন নিজে সুখী থাকুন ও সবাইকে সুখী রাখুন।

আরও কয়েক বছর কেটে গেল। এবার আমার স্মৃতিকাহিনী শেষ করা যাক। মন ও শরীর রীতিমত জরাগ্রস্ত হয়ে পড়েছে। গৃহিণীরও বানপ্রস্থ অবলম্বনের বয়স হয়েছে। সবচেয়ে ছোট নাতিটি—হুটু-আইন্ডির সদানন্দ শিশুটি—আর তার চেয়ে তিন বছর বড় ভাইটি এখন তাঁর নয়নের মণি। আমাদের জীবনবৃত্তান্ত এইখানেই সমাপ্ত করার ঠিক সময়।

তবে অনেক বছর ধরে যে প্রশ্ন মনে বার বার জেগেছে, যে বিষয়ে অনেকের মত নিতে চেষ্টা করেছি, অনেকের সঙ্গে আলোচনা করেছি, সেই সমস্যাটির (যার কথা আগেও বলেছি) উল্লেখ করে এই লেখা শেষ করব। প্রশ্নটি নতুন কিছু নয়, মানুষ বোধ হয় চিরকালই এর উত্তর খুঁজছে। তবে এর উত্তর পেয়েছে কি ?

খুব সংক্ষেপে বলতে চেষ্টা করছি :—“ঈশ্বর মঙ্গলময় ও সর্বশক্তিমান তবে তাঁর জগতে দুঃখ কষ্ট এত কেন ?” অনেক ভেবেছি, এ বিষয়ে মহা মহা পণ্ডিতদের ধারণা বুঝতে চেষ্টা করেছি। সকলেই বোধ হয় এ রকম করে আর নিজের একটি সিদ্ধান্তে উপনীত হয়। আমার নিজের ধারণা হল যে সৃষ্টিকর্তা এক বিরাট শক্তি, বিরাট প্রবাহের মত ভালমন্দ এই পরিস্থিতি থেকে আরও ভাল, আরও মঙ্গলময় জগতের দিকে অগ্রসর হচ্ছেন। আমরা প্রত্যেকে তাঁর এই এগুবার পথে সহযোগিতা করছি। আমাদের কৃত মন্দ কাজ তাঁর এগুবার পথে বাধা দেয়। প্রত্যেক ভাল কাজ তাঁর সর্বমঙ্গলময় লক্ষ্যে পৌঁছতে সাহায্য করে। জীবনের শেষ দিকটা এই ধারণার অনুসারে চালাতে পারব কি ?

॥ শেষ ॥

শুদ্ধিপত্র

পৃষ্ঠা	অশুদ্ধ	শুদ্ধ
৬	Prof,	Prof.
৭	শিথদেব	শিথদেব
২৪	জয়কিষণ	হরকিষণ
২৫	যন্তেসা	যন্তেমা
৩০	বলেছো	বলেছে
৫৫	প্রেসিডেন্ট	রেসিডেন্ট
৬৪	কৌডিস্	কুদেস (Coedes)
৬৪	বের্গা	বেরগাইনই (Bergaigne)
৬৮	ওয়াদেন	ওয়াথেন (Wathen)
৭০	মেজদা	মেজদা
"	মজো	মানোরা
৭১	purpoise	porpoise
"	জলে পড়ায়	জলে ঐ পড়ায়
৭৩	wngon Lit	Wagonlit
"	hyons	Lyons
"	Ferench	French
"	ক্যানেল	চ্যানেল (Channel)
৭৪	Gara	Java
৮৬	পরীক্ষায়	পরীক্ষার্থীর
৮৭	ছেলে ভাল	ছেলে—ভাল
৮৮	আমাকে,	আমাকে
৯০	কিন্তু স্ব স্বাহ্	কিন্তু স্ব স্বাহ্,
৯১	Corotএর	Corotর (করোর)
"	Indepents	Independents
৯৩	আন্দোলন	আন্দোলনে
৯৪	Blagden,	Blagden
৯৭	Eaude cologne	Eau de Cologne
"	জানে	জানেন

পৃষ্ঠা	অক্ষর	শব্দ
৯৭	করেছে	করেছেন
"	জেস্	ভাস্ (vase)
৯৮	কিংস্	কিংস্
১০২	de	die
"	Funiculer	Funicular
১০৩	আমাণ্‌লার	আমাণ্‌লার
১০৭	১২ বছর	২২ বছর
"	বিয়াল্লিস	ছেচল্লিস
১০৮	প্রভৃতিতে	প্রভৃতিতে ও
১১২	যদুনাথ সিংহ ।	যদুনাথ সিংহ,
১১২	Webbley-scott	Webbley-Scott
১২১	এখনও Lt. Colonel	এখন ও Full Colonel
"	Israels	Israel
১২২	বেসিন	বেসিল (Basil)
১২৫	ভাইস্‌গুরু	ভাই গুরু
১২৬	মিয়ামারে	মিরামার
১৩৭	লাসা	লামা
১৩৯	চুটে।	চুটে
১৪২	তীর থেকে ।	তীর থেকে
১৪৩	জান ডার্ক	Jeanne d' Arc
১৫১	দৃশ্যের ছুটি	landscape
১৫৭	ডাল ঝোলা	ডাল ঝোলা গাছ
১৬২	জ্যালকো	হার্কে
১৬৩	সুচো	সুচো
১৭০	মলেব	মালায়া
১৭৪	বাহামা, ইন্দোনেশিয়া	বাহামা-ইন্দোনেশিয়া
"	আর্চাইড	আর্কাইড
১৭৭	কার্টমারিন	কার্টমারি 'ল'
১৭৮	Don Arn	Von Arx

ପୃଷ୍ଠା	ଅନୁକ୍ର	ବୁକ
୧୭୮	ପୁଈକରକଡ଼	ପୂର୍ବଚକ୍ର
”	ପେରହାନଂସ୍ତାଟୁ	Pembanguan
”	ପ୍ରକାଶିତ	ପ୍ରଚଳିତ
”	ମୟଲୋ	ହୁୟନୋ
୧୭୯	ନାପେତେ ପାରେ	ନାଗତେ ପାରେ
୧୮୨	ମାରହେନିଜ୍‌ମ	ମାରହାୟେନିଜ୍‌ମ
”	ମାରହେନ	ମାରହାୟେନ

